

सोम देव भट्ट कृत

कथा सरित सागर

भाग-२



दोगरी अनुवाद: केदार नाथ शास्त्री



सोमदेव भट्ट दे मूल संस्कृत ग्रन्थ दा डोगरी अनुवाद

कथा सरित सागर

भाग-२

लम्बक - (७-६)

डोगरी अनुवाद :

केदारनाथ शास्त्री



जे० एण्ड के० अकैडमी ऑफ आर्ट, कल्चर एण्ड सेन्वेजिज, जम्मू ।

प्रकाशक :

सक्रैटरी—

जे० एण्ड के० अकंडमो ऑफ आर्ट, कल्चर एण्ड लैंग्वेजिज, जम्मू ।

KATHA SARIT SAGARA
Translated from the original Sanskrit

by

Sh. Kedar Nath Shastri

सीमदेव भट्ट दे मूल संस्कृत ग्रंथ दा डोगरी भावानुवाद



प्रकाशन : मार्च 1979

पहलै बारी : 500

मुल्ल : 13 रूपै 75 पैसे

© : अकंडमो

छापखाना : एस. एन. मर्गात्रा प्रिंटिंग प्रेस, जम्मू ।

अनुक्रम

भूमिका	पृष्ठ
रत्नप्रभा (सतमां लम्बक)	
तरंग-१	
नरवाहनदत्त	
कथा—१ (ब्राह्मण दी कथा)	१
सत्यशील दी कथा	२
राजा विक्रमतुंग	३
तरंग-२	३
राजा रत्नधिपति	
तरंग-३	
निश्चयदत्त वणिया	
चन्द्रस्वामी दी कहानी	१५
भवशर्मा ब्राह्मण	२०
राजा विक्रमादित्य	२२
भिक्षू दी कहानी	२७
तरंग-४	२८
राजा वीरभुज	
राजकुमार शृंगभुज ते रूपशिखा दी कथा	३३
	३९

तपोदत्त ब्राह्मण	४६
विरूप शर्मा ब्राह्मण	४७
राजा विनयशील	४८

तरंग-५

राजा चिरायु	५१
-------------	----

तरंग-६

युवराज नरवाहनदत्त दा शकारै पर जान।	
ते कपूर्िका तापसी कन्ने मिलना	५४
राजा परित्यागसेन	५६
खडगदंष्ट्रा दी कथ	६१
इंदीवरसेन ही दिग-विजे	६३
इंदीवर सेन दी पूर्व-जन्म कथा	६४

तरंग-७

नरवाहनदत्त दा सुखना	६५
कांची नगरी दे राज्यधर नां दे बिसकम्मै	
दी कथ	६७
अर्थलोभ दी कथ	६९
राजकुमारी कपूर्िका दा पिछला जन्म	७४

सूर्यप्रभ (अठमाँ लम्बक)

तरंग-१

वज्रप्रभ विद्याधर दी कहानी	
चन्द्रप्रभ दी कथा	८१

तरंग-२

मयासुर-प्रसंग	
काल नां दे ब्राह्मण तपस्वी दी कथा	८८

तरंग-३

भुतशर्मा दा सूर्यप्रभ दी भारजा गी वरना	९१
	१०५

प्रभास दे पूर्व - जन्म दी कहानी	११४
तरंग-४	
सूर्यप्रभ दा जुद्ध आस्तै प्रस्थान	११६
तरंग-५	
जुद्ध दा दूआ दिन	१२१
तरंग-६	
मंत्री वीतभीति द्वारा उज्जयिनी दे राजा महासेन ते गुणशर्मा दी कथा सनाना	१२६
तरंग-७	
जुद्ध च देवतें दा दखल देना ते सूर्यप्रभ दी विजै	१३७
अलंकारवती (नौमा लम्बक)	
तरंग-१	
शकार खेठन गेदे नरवाहनदत्त दा दिव्व	
विद्याधारियें कन्ते मिलना	१४५
अलंकारशील विद्याधर	१४६
प्रतिष्ठान दे राजा पृथ्वीरूप दी कथा	१४८
तरंग-२	
अशोक माला दी कहानी	१५३
हठशर्मा ब्राह्मण दा पूर्व - जन्म	१५६
अनंगरति दी कहानी	१५७
तरंग-३	
राजा लक्षदत्त महादानी	
राजा विक्रमतुंग ते वीरवर दी कथा	१७२
तरंग-४	१७६
प्रलम्बबाहु	
नरवाहनदत्त ते चार दिव्व पुरख	१८२
	१८२

समुद्रशूर दी कथा	१८५
चमरवाल दी कथा	१८९
यशोवर्मा शूरवीर दा तप	१८९
तरंग-५	
नौकर द्वारा मंत्री मरुभूति दी सरकार अगें शकायत	१९५
राजा चिरदाता	१९६
राजा कनकवर्ष	१९७
तरंग-६	
चन्द्रस्वामी ब्राह्मण	२०६
नारायणी देवी द्वारा विद्याधरी दी कथा व्यान करना	२१०
चक्र बनिये दी कथा	२१४
तपोधन मुनि दी कथा	२१६
त्रिभुवन राजा दी कहानी	२१९
नल - दमयंती दी कथा	२२९



कथा-सरित-सागर दा शिल्प-विधान

कथा सरित सागर दी इक्क चेची खूवी जेह्ड़ी शुरु च गै ध्यान खिच्ची लैन्दी ऐ, ओह् ऐ उसदा शिल्प-विधान । इस विधान दी चर्चा थमां पैह्लें शिल्प विधान दी वकास - परंपरा गी समझने गितै कहानी दे वकास गी समझना पौग ।

कहानी सुनने दी चाह् ते कहानी आखने दी कला इन्दा दोनं दा वकास समें कन्ने अपने-आप होन्दा आया ऐ । कहानी दी यात्तरा मानु दे भाव-ग्राही जीव बने कन्ने गै होई ही—यानी जिसलै मानु दे संवेदन नै अपने चक्खीं दी सृष्टि वारै खतोले दी नजर इख्तियार कीती ही । हर नमां अनुभव इक्क कहानी हा । ते बाद इच जीन्दै रौह्ने दी तांजग ते संघर्ष ते भाशा द्वारा उन्दी पुनरावृत्ति (परतिपै सनाना) गै कहानी खुआई । कहानी जिसलै इक्क पीढ़ी द्वारा अपने अनुभवें गी दूई पीढ़ी तगर पुजाने दा माध्यम बनी उसलै उसदा स्वतंत्र वजूद बनेआ । वजूद दे कन्ने उसी मता मनोरंजक बनाने ते न्हाड़े तौले अर्थ-संपादन दी जरूरत बी बनी आई । इन्ने दौं पक्खें पर गौर देने कन्ने कथें गी इक्क सुधरे दा भेस प्राप्त होन लगा, जिसी अस शिल्प दा नां दिन्ने आं । पैह्लें कहानी दे शिल्प दी सफलता इस गल्लै कन्ने मन्नी जन्दी ही जे ओह् सुनने आले दे (जां पाठकदे) मनै च एह् खतोला जगा जे अगगें केह् होआ । एह् बल्लें - बल्लें घटना-क्रम दी परिणति अल अगड़ी वधदी ही । पैह्लें दी कहानी स्हेई अर्थे च इक्क भावना-जात्तरा ही, जेह्दे च मनुक्खी वकास इच मदद देने आले वचारें ते अनुभवें दा पुट बी हुन्दा हा । भावनात्मक आधार होने करी ओह् मते-करी आदमी दी चित्तवृत्तियें गी तोष देने आस्तै सिरजी जन्दी ही । अज्जै दी कहानी एह्दे वर - अक्स मनुक्खी अनुभवें दी विचारात्मक - जात्तरा ऐ जेह्दा उद्देश तोष दे थाऽर मानवता दियें मूलभूत समस्याएं कन्ने साक्षात्कार कराना ऐ ।

एह् दे च भावना दा थाऽर वड़ा घट्ट ऐ ।

डोगरी लोक-कथें च किछ कथें दा विधान न्हेआ ऐ जे कोई राजकमारी, राजा, सेठ - शऊकार जां कोई होर मानु नित्त नमीं कथ सुनने दा शकीन होन्दा ऐ ते ओह् कथ सनाने आले गो इक्क सुन्ने दा टगा जां होर किछ (इ)नाम दिन्दा ऐ । एह् विधान किज मता सैह् ज, मता सरल ऐ ते इसदे थाऽर कथा-सरित-सागर दे ग्रंथ-कार ने केई कथें गी इक्क थाऽर परोने दा वड़ा संश्लिष्ट विधान चुने दा ऐ । ओह् दे च वाकायदा इक्क सम्राट ऐ, ओह् दा राज - दरबार ऐ । अकलमन्द मंत्री-ऐह् लकार न । राज - काज गी सुचारु ढंगे कन्ने टोरने - चलाने आस्तै राजा कथां सुनदा ऐ—जां फिरी ओह् दे मंत्री दृष्टांत तौर जां मनोरंजन आस्तै कथां सनांदे न । इस करी कथें दा सनाना उपयोग गी समाने रक्खियै नभाया गेदा ऐ ।

जिस चाल्ली 'हितोपदेश' ते पंजतंत्र' दी रचना नीति (राज नीति, कूटनीति आदि) दी शिक्षा देने गित्ती होई दी ऐ—उस्तै चाल्ली कथा - सरित - सागर दी रचना मनोरंजन दे (इ)लावा जीवन दी व्यावहारिक-शिक्षा देने गित्ती होई दी ऐ ।

पंजतंत्र आंगर गै कथा - सरित - सागर दा रचना - विधान काफी सुलभे दा ऐ । सैह् ज होन्दे होई बी एह् अज्जे दियें मानु द्वारा सिरजी दियें कलात्मक शैलियें दे मते नेड़ै ऐ । कथां वड़ी बुद्धि-मत्तापूर्ण तरीके कन्ने आपू - चें जक्कियां गेदियां न ।

कथा-सरित-सागर कथें दी इक्क अनोखी परंपरा ऐ—जिसी अस नावल-विधा दी लीह् - परंपरा ग्लाई सकने आं । एह् ग्रंथ अपनी समग्री करी गै नेई अपनी शैलीगत वशेशताएं करी बी इक्क महान ग्रंथ ऐ । असेंगो मेद ऐ डोगरी भाशा इस अनमोल ग्रंथ गी प्राप्त करियै होर बी सगोसार खुआई सकग ।

इस भाग च त्रौ लम्बकें दा अनुवाद पेश कीता गेआ ऐ । पैह्ले भाग च छे लम्बक हे । हून बकाया नौ लम्बकें गी भाग नं० त्रै-चार च छापेआ जाग, इस चाल्ली चौ भागें च कथें दे इस समुन्दर दा अनुवाद मकम्मल होई जाग ।

—ओम गोस्वामी

रत्नप्रभा (सतमां लम्बक)

अपनी परम प्यारी मदनमंचुका गी व्याहिए वत्सराज उदयन दा पुत्र नरवाहनदत्त गोमुख जनेह् अपने मंत्रिए ते मित्रे दे संग कौशाम्बी च नंद - मंगलाचार करन लगा । रितुराज वसंत आई गेआ । उदा स्वागत करने लेई कोयले मस्त होइए पंचम सुरा च कू-कू दा अलाप शुरु करी दित्ता । मलय पवन दी प्रेरणा पाइए वने - उपवने दे बेल - बूटे च प्राणें दा संचार होई गेआ ते ओ वी अपने मनोहर नृत्त ते लास्य दा प्रदर्शन करन लगे । इस वसन्तोत्सव च उन्मत्त मधुकरें दी गुंजारा कन्ने चारै दिसां गूंजी उठियां । नेया रमणीक समां दिक्खिए नरवाहनदत्त अपने साथिए समेत उपवनै च विहार करन गेआ । प्रकृति दे संडार दी शोभा के स्वादै च डुब्बे दे राजकुमार कोल उदा साथी ततंतक हसदा-हसदा आइए आखन लग्गा—युवराज जी ! में इत्थें नेइ गै इक दिव्य - कन्या गी गासै परा उतरदे दिक्खेआ ऐ । अपनी स्हेलड़िए समेत ओ अशोक दे बूटे थल्लै बैठी दी तुंदे कन्ने मिलना चाहूं दी ऐ । ए सुनिए नरवाहनदत्त अपने साथियें समेत तत्काल उत्थें गेआ जित्थें ओ कुमारी रुक्खै हेठ बेठी दी ही । ओ कुमारी परमरूपवती ही । उसनै उट्टिए राजकुमार दा स्वागत कीता । जिसेल्लै सारे अपने - अपने थां बंई गे तां गोमुख ने दिब्ब कुमारी कोला उदा

परिचय ते औने दा कारण पुच्छेआ । उसनै अपना परिचय इस चाली दिता :-

शिवें दे नवास थां हिमालै च कांचनशृंग नां दा इक्क सुन्ने दा नग्गर ऐ । इत्थें हेमप्रभ नां दा विद्याधर पति शासन करदा ऐ जेड़ा शिवें दा परमभक्त ऐ । ओ वड़ा देआलु ते दानी ऐ । उदी पटरानी दा नां अलंकारप्रभा ऐ । सारा राजकीय मुख सम्पदा होने पर वी उसी संतानहीन होने दा संताप सदा सतांदा रौह्दा हा जिदे कारण राजा दिनरात चिंतत रौह्दा हा । पति गी सदा चिंतातुर दिक्खिए इक्क दिन रानी अलंकारप्रभा राजा गी पुच्छन लग्गी—म्हाराज ! अऊं तुसेंगी सदा दुआस दिक्खनियां इदा के कारण ऐ । राजा बोलेआ—रानी जी ! मिगी परमेश्वर ने सब रिद्ध - सिद्ध दिती ऐ पर इक्क पुत्र नेईं दिता । वस ईऐ गल्ल मिगी दिन रात सता करदी ऐ । में पुत्रहीन सत्यशील दी कथा सुनी ऐ । मेरे मनै गी ए चिंता हर वक्त जलांदी रौह्दी ऐ—कथा इस चाली ऐ :-

कथा — ?

चित्रकूट नगरै च ब्राह्मण वर नां दा इक राजा राज करदा हा । ओ ब्राह्मणें दा वड़ा भगत सा । रात दिन ओ दान-मान कन्ने उंदा सत्कार करदा हा । सत्यशील नां दा उदा इक शूरवीर सेनापति हा जिसी हर म्हीनै इक सौ अशरफियां तनखा मिलदी ही । राजा आंगर उदा सेनापति वी वड़ा दानी हा । इस लेई तनखा कन्ने उदा निर्वाह नेईं हुंदा हा । उदै घर वी कोई पुत्र नेईं सा पर ओ दीन-दुखिएं गी दान देइऐ अपने मनै दे संताप गी किश नां किश शान्त करी लैदा हा । पर दान दी चठका गी पूरा करने लेई उदे कोल काफी धन नेईं सा, इसलेईं उसी सदा चिन्ता वनी रौह्दी सी । दिलै च सोचदा हा के मिगी दान देने दी वड़ी चाह् ऐ पर काफी धन नेईं ऐ । इदे कोला ते ईऐ चंगा सा जे अऊं कुतै जंगलै च मुक्के दा रुक्ख जां पत्थर गै हुंदा तां जे चिन्ता कोला ते मुक्ति होई जंदी । इस चिंता च दुब्बे दे सत्यशील गी इक दिन सैर करदे कुसै वागै च इक खजाना लव्वी गेआ । ओ इस खजाने गी

गुप्त तरीकै कन्ने घर लेई आया हून उसी दीन - दुखिएं गी देने लेई काफी धन मिली गेआ । उदे गुप्त खजाने दा पता उदे बैरी आंडिएं - गोआंडिएं गी लग्गी गेआ ते उनें ए गल्ल राजा तकर पुजाई ओड़ी । राजा नै सत्यशील गी प्रतीहार द्वारा अपने मैह्लै च बुलाया । अंदर जाने दे पैह्लें राज मैह्लै दे हात्ते च खड़ोते दे सत्यशील ने अपनी दिव्व दृष्टि कन्ने हात्ते च दब्बे दे इक होर खजाने दा पता लाई लेआ । प्रतीहार जदों उसी राजा दे सामनै लेई गेआ तां राजा उसी आखन लग्गा—जनैल जी सुनेआ तुसेंगी खजाना मिलेआ ऐ, ओ खजाना तुस साढ़े हवालै करो । सत्यशील बड़े अदब कन्ने बोलेआ—म्हाराज ! तुसें केड़ा खजाना लैना ऐ पैह्ला जां अज्जै दा ? ए सुनियै राजा बोलेआ—अज्जै दा । सत्यशील नै राजमैह्ले दे हात्ते गी खोदिए ओ खजाना राजा गी देई दित्ता । इस खजाने गी पाइऐ राजा बड़ा परसन्न होआ ते उन्न मता सारा धन देइऐ सत्यशील दा सतकार कीता । राजा दा सम्मान ते अनन्त धन पाइऐ सत्यशील दीन-दुखिएं दी होर मती मदत करन लगा । हून उसी कोई दुख हा तां ओ ए सा जे पुत्रै दा मुंह दिक्खना उदे नसीबें च नेई सा ।

सत्यशील दी कथा : विद्याधरें दे स्वामी राजा हेमप्रभ नै जदों ए कथा अपनी रानी हेमप्रभ गी सुनाई तां ओ आखन लगी—म्हाराज धीर ते दलेर मनुक्खें दी स्हायता आपू करदे न । इस लेई तुस वी अपने बल ते सच्चाई दे परभाव कन्ने अपने मनोरथ गी प्राप्त करगेओ । इस सरबंघै च अऊं तुसेंगी राजा विक्रमतुंग दी कथा सनानियां :—

राजा विक्रमतुंग : प्राचीन समै च पाटिलपुत्र नगगरै च विक्रमतुंग नां दा इक्क पराक्रमी ते दानी राजा राज करदा हा । इक दिन दी घटना ऐ जे ओ राजा जंगलै च शकार खेडन गेआ । उत्थें उसने कुसै ब्राह्मणै गी अग्निकुंडै च बिल्लें कन्ने हवन करदे दिक्खेआ । उसी दिक्खिए राजा दे मनै च इछ्या होई के ओ ब्राह्मणै कछ जाइऐ उसी परनाम करै । पर कुसै कारण थमां अपनी इच्छा गी पूरण कीते वगैर ओ शकार लेई अग्नै चली गेआ । शकार

करिए जिसेल्लै ओ परतोआ तां ओ ब्राह्मण अजें विल्लें कन्ने होम
 करै करदा हा । राजा नै कछ जाइए उसी परनाम कीती ते उदा
 परिचय ते विल्लें कन्नें होम करने दा कारण पुच्छेआ । ब्राह्मण
 जवाव दित्ता—मेरा नां नाम शर्मा ऐ ते अऊं विल्लें कन्नें होम
 इसलेई करै करनां के जे मेरे पर अग्निदेव परसन्न होई गे तां
 उं दी किरपा कन्ने मिगी अग्निकुंड चा सुन्ने दे विल्ल फल प्राप्त
 होडन । मिगी हवन करदे मता समां वीती गेआ ऐ पर भाग मंद
 होने कारण अग्निदेव अजें मेरे पर परसन्न नेईं होए । राजा
 आखन लगा—ब्राह्मण तुस इक्क विल्ल मिगी देओ, में अगनकुंडै च
 हवन करिए दिक्खनां के अगनदेव परसन्न हुं दे न के नेईं । ब्राह्मण
 आखेआ—आऊं ब्रह्मचर्य दा व्रत धारण करिए नियम पालदा इन्ने
 चिरै दा हवन करै करनां फी वी अगनदेव प्रगट नेईं होए । तुस
 विना दीक्षा ते नियम दे हवन करना चांहदे ओ, तुस कियां सफल
 होई सकदे ओ । राजा बोलेआ—ब्राह्मण देवता ! शंका मत कर । तूं
 इक्क विल्ल मिगी पगड़ा फी पल भरै च मेरा चमतकार दिक्खो ।
 ब्राह्मणै ने इक्क विल्ल राजा गी दित्ता । राजा आसन जमाइयै
 हवनकुंडै कछ बेई गेआ । एकाग्रचित्त ओ हत्थै च विल्ल पगड़ियै
 अग्निदेव गी आखन लगा—भगवन् ! जे तुसैं मेरे द्वारा हवन कीते दे
 इस विल्ल गी अंगीकार नेईं कीता तां अऊं इस हवनकुंडै च अपने
 सिरै दी आहुति देई देड । इस चाल्ली धीरज धरियै राजा नै
 ब्राह्मणै दा दित्ता दा ओ विल्ल अगनकुंडै च हवन करी दित्ता ।
 ततकाल अग्निदेव हत्थै च सुन्ने दा विल्ल लेदे कुंडै चा प्रगट होया
 ते राजा गी आखन लगा—राजन् ! में तेरे दृढ़ संकल्प ते धीरज पर
 बड़ा परसन्न होयां । तूं वर मंग । हत्थ जोड़ियै राजा नै प्रार्थना
 कीती—भगवन् जे तुस मेरे पर परसन्न ओ तां इस ब्राह्मणै दी जेड़ी
 कामना ऐ ओ पूरी करो । अगनदेव बोले - 'तथास्तु' । इस ब्राह्मण
 दियां सारियां कामनां पूरियां होडन ते ओ माल—धन प्राप्त करग ।
 ब्राह्मणै वड़े चरज कन्नें अग्निदेव गी प्रश्न कीता—म्हाराज ! तुस इस
 भोगी राजा दे हवन करने पर ते तुरत परसन्न होई गे पर मेरे जनेहू
 संजमी ते ब्रह्मचारी दे चिरकाल तक हवन करने पर वी प्रगट नेईं

होए । अग्निदेव नै उत्तर दिता—भूदेव ! ए राजा वड़े आत्मबल ते धी रज वाला ऐ । जे में प्रगट नेईं हुंदा तां ए अपना सिर कप्पियै अगनकुंडै च उदा हवन करी दिदा । तेरे च ओ आत्मबल ते साहस नेईं ऐ । इसै लेई तू इन्ने चिरै दा हवन करै करदा हा फी वी अऊं तेरै सामने प्रगट नेईं होया । तेरे अन्दर ओ आत्मबल ते साहस नेईं के तू मिगी प्रगट होने लेई मजबूर करो दिदा । इस लेई अम्मी ढिल्ल करदा रेया । ए आखियै अगनदेव छप्पी गे । वर प्राप्त करियै संदोख कन्ने ब्राह्मण अपने घर गेआ ते राजा विक्रमतुंग राजधानी गी परतोई आया ।

इक्क दिन राजा विक्रमतुंग अपने मैहलै च बैठा दा हा । एस्सै वैल्लै द्वारपाल नै आइयै खबर दिती के दत्त शर्मा नां दा इक्क ब्राह्मण कुमार सरकारा अगें किश अरज करना चाह्दा ऐ । राजा दी आज्ञा पाइयै द्वारपाल उसी अपने स्वामी दे सामनै लेई आया । सामनै औंदे गै पैहलें स्वस्तिवाचन पढ़ेआ, परंत राजा दी अनुमति कन्ने आसनै पर बेई गेआ ते आखन लगा—म्हाराज ! अऊं रसायन दे तरीके कन्ने त्रामें दा सुन्ना बनाई सकनां । उदी परखा लेई राजा नै मुगता सारा त्रामा मंगवाया । जिसेल्लै त्रामा परघली गेआ तां ब्राह्मणै नै उदे च इक्क चूरण सुट्टेआ । पर उस चूरण गो कुसै यक्ष नै गुप्तरूप कन्ने पौंदे - पौंदे गी रस्ते च गै चुराई लेआ । इदा ए फल होआ जे त्रामां सुन्ना नेईं वनेआ । उसनै त्रामें च त्रै बेरी चूरण पाया पर त्रै वारा गै यक्ष नै उसी रस्ते च गै चुराई लेया । त्रामां सुन्ना नेईं वनेआ । ब्राह्मणै गी वड़ी लज्जा होई । राजा दे विना उस यक्ष गी होर कोई नेईं दिक्खी सक्केआ । राजा उसी इसलेई दिक्खी सक्केआ जे उसी अग्निदेव दा वर सा । राजा नै ओ चूरण ब्राह्मणै दे हत्था दा लेइयै अपने हत्थै कन्ने पिरघले दे त्रामें च बरुरेआ । चूरण बरुरेदे गै त्रामां सुन्ना होई गेआ । ब्राह्मण कुमार गी वड़ा चम्भा बभोआ । राजा नै उसी दस्सेआ के यक्ष दे विघन पाने दे कारण त्रामे दा सुन्ना नेईं वनेआ सा । राजा नै उदे कोला चूरण बनाने दी जुगती सिक्खी लेई ते उसी खासा धन देइयै विदा कीता । इस रसायन

विद्या दी विधि सिक्खने करी राजा दा खजाना सुने कन्ने भरपूर
 होई गेआ । इस धन गी राजा गरीब गुरवें दे पालने - पोसने आस्ते
 खर्च करन लगा जिदे कारण उदा यश दूर - दूर फैली गेआ । इदे थू
 पता लगदा ऐ जे भगवान उने मनुक्खें दी कामनाएं गो पूरा करदा
 ऐ जिदे च आत्मवल ते धीरज हुंदा ऐ । ए कहानी सुनाइयै रानी
 अलंकारप्रभा अपने पति राजा हेमप्रभ गी आखन लगी—म्हाराज !
 तुस वी अपने च आत्मवल पैदा करो । शिवें दी राधना करो ।
 शिव परसन्न होइयै तुसंगी पुत्र दा वर देउन । नराश होने दी
 कोई गल्ल नेई । रानी दी सिक्ख सुनियै राजा गी मता संदोख
 होआ । उसी जकीन होई गेआ जे शिवें दी राधना करने करी उसी
 अवश पुत्र प्राप्त होग । दूऐ दिन राजा रानी न शनान करियै
 ब्राह्मणें ते दीन-दुखिएं गी खूब दान दित्ता । परंत ए प्रण करिये
 के अऊं जां ते शिवें गी परसन्न करिये वर प्राप्त करड नेई तां शरीर
 त्यागी देड । राजा निराहार शिवें दी राधना च बेई गेआ । त्रै दिन-
 रात निराहार जिसेल्लै राजा गी शिवें अगें तपस्या करदे होई गे
 तां त्रीयै दिन अही राती उनें राजा गी सुखने च दर्शन दित्ते कन्ने
 आखेआ—राजन् ! अस तेरे पर बड़े परसन्न आं तेरै घर तौले गै
 इक्क सुमंगला कन्या होग । ए कन्या अगें चलियै विद्याधर चक्रवर्ती
 नरवाहनदत्त दी पत्नी होग । ए आखियै शिव शंकर छप्पी गे ।
 सवेरै उठियै राजा नै रातीं दा सुखना रानी गी दस्सेआ ।
 रानी बोली—रातीं मिगी वी सुखने च पार्वती नै दरशन
 देइयै ईऐ गल्ल आखी सी । राजा नै इस सुखने दा उत्सव मनाया ।
 दान - पुत्त कीता । किश समां बीतेआ । रानी अलंकारप्रभा नै गर्भ
 धारण कीता । नौ महीने बीतने पर रानी नै पुत्तररत्न गी जन्म
 दित्ता । राजा नै पुत्र दा नां वज्रप्रभ रक्खेआ । दो वर्षे बीतने पर
 रानी नै इक्क कन्यारत्न गी जन्म दित्ता । इस कन्या दे जम्मने पर
 आकाशवाणी होई के ए कन्या वत्सराज उदयन दे पुत्र नरवाहनदत्त
 विद्याधर चक्रवर्ती दी धर्म - पत्नी बनग । राजा नै इस कन्या दा नां
 रत्नप्रभा रक्खेआ । कुमारी जियां बड़ी हुंदी गई उदे शरीर दी
 कान्ति चन्द्रमा दे कल्प आंगर वधदी गई । राजकुमार वज्रप्रभ
 जिसेल्लै जोआन होआ तां राजा नै उदा व्याह् करियै उसी अपना

युवराज बनाई लेआ। राजकाज दा सारा भार उदे सिरै पर सुट्टिये राजा आपूँ सुरखरू तै नचित होई गेआ। हून उसी छड़ी अपनी श्री रत्नप्रभा दे ब्याह् दी चिता सतान लग्गी। इक दिन राजा नकेवलै रानी गो आखन लगा—रानी जी दिव्य वाणी नै आखेआ सा जे ए राजपुत्र नरवाहनदत्त दी भारजा होग। तां अस की नेईं जतन करवे जे इदा ब्याह् उस राजकुमार कन्ने होई जा। पर इक गल्ल ऐ। अज्जै तक विद्याधरी विद्या प्राप्त करियै नरवाहनदत्त विद्याधर नेईं बनेआ। ईयै बलगै करदा हा जे विद्याधरी विद्या प्राप्त करियै दिव्य बनी जा तां ब्याह् करां। राजपुत्री रत्नप्रभा बाह् कंधा कन्ने लगियै पिता दियां गल्लां सुनै करदी हो। युवराज नरवाहनदत्त दे गुणें दी सराह्ना सुनियै उदे हिदै च उदे नेई प्रेम दा डूर निकली पेआ। रातीं सुखने च रत्नप्रभा गो गोरो नै दर्शन दित्ता ते आखेआ—पुत्री ! कल्ल शुभ दिन ऐ। तूँ आपूँ कौशाम्बी जाइयै राजकुमार नरवाहनदत्त गो दिखी आमेआं। परन्त तेरा पिता नरवाहनदत्त गो अपने नगर सदियै तेरा ब्याह् उदे कन्ने करो देग। सबेरा होआ तां रत्नप्रभा ने ए सुखना अपनी माऊ गो चुनाया। माऊ नै उती सलाह् दित्ती जे ओ गौरी दी आज्ञा दा पालन करै। माऊ दी सलाह् लेइयै रत्नप्रभा अपनी विद्याधरी शक्ति दे प्रभाव कन्ने अक्खों दे फोरे च उत्थें पुज्जी जित्थें कौशाम्बी दे राजकीय वागै च राजकुमार साथियें समेत विहार करै करदा हा।

ए कथा सुनाइयै रत्नप्रभा नरवाहनदत्त गो आखन लग्गी—राजकुमार जी ओ रत्नप्रभा अऊँ आं। रत्नप्रभा दे दिव्य रूप गो दिखियै ते उदे वचनरूपी अमृत दा अपने कन्ने दी कटोरिएं कन्ने पान करियै नरवाहनदत्त विद्याता दी निद्या करन लग्गी जे की नेईं विद्याता नै मेरे सारे शरीरै च सैकड़ें अक्खियां ते कन्ने बनाई ओड़ें तां जे में इस राजकुमारी दे रूप ते वचन-अमृत गो रज्जियै दिखदा ते पीदा। फी राजकुमार रत्नप्रभा गो आखन लग्गी—देवी ! अऊँ धन्न आं जिसी वरने लेई तूस आपूँ आई ओ। अज्जै नरवाहनदत्त ए गगन करै गै करदा हा जे गार्स च विद्याधर

सेना लब्धन लगी पेई । सेना गी दिक्खियै रत्नप्रभा बोली—ओ दिक्खो गासै पासै, मेरा पिता ते भ्रा तुंदे कन्ने मिलने लेई सेना समेत आई पुज्जे न । इन्ने चिरै च विद्याधर पति राजा हेमप्रभ ते उदा पुत्र वज्रप्रभ उसै वागै च आई पुज्जे । राजकुमार नरवाहनदत्त नै उंदा बड़ा स्वागत कीता । उसै बेल्लै वत्सराज उदयन बी मंत्रिण समेत उत्थै आई गेआ । आपू - चें कुशल समाचार पुच्छने परन्त राजा हेमप्रभ ने नरवाहनदत्त ते रत्नप्रभा दे व्याह् दा प्रस्ताव वत्सराज अगें रखेआ । वत्सराज दी अनुमति कन्ने राजा हेमप्रभ अपनी पुत्री रत्नप्रभा ते कुमार नरवाहनदत्त गी विमान द्वारा अपनी राजधानी कांचनशृंग नां दे नगरै च लेई गेआ । उत्थै जाइयै राजा नै राजपुत्री रत्नप्रभा दा व्याह् सशास्त्र विधि अनुसार नरवाहनदत्त कन्ने करी दित्ता । किश दिन सौह् रै रैइयै नरवाहनदत्त नमीं लाड़ी समेत विमान द्वारा कौशाम्बी गी परतोई आया । उसै विमानै च उदा सोह् रा राजा हेमप्रभ ते साला वज्रप्रभ बी आए । वत्सराज नै इंदा दौनें दा शैल आतिथ्य-सत्कार कीता । नमीं लाड़ी रत्नप्रभा नै दौनें ससैं, सौह् रे ते होर बड़्डे - बड़ेरे दे चरण छूते । अपने जोआई नरवाहनदत्त ते धी रत्नप्रभा गी उत्थै छोड़ियै राजा हेमप्रभ ते युवराज वज्रप्रभ गासै रस्तै अपने नगर कांचनशृंग गी परतोई गे ।

द्विआ तरंग

दूयै दिन सबेरै जहू गोमुख ते दूए युवराज नरवाहनदत्त दे मंत्री उदे कने मिलने लेई जनाने मेह्लै च जान लगे तां द्वारपाल नै किश समै लेई उनेंगी राजद्वार पर रोकी लेआ । जिसेल्लै रत्नप्रभा गी इस गल्ला दा पता लग्गा तां उसने प्रतीहारी गी सदिदयै आखेआ जे अगे थमां जनाने मेह्लै च औदे इनेंगी नेईं रोकै करो कीजे ए युवराज हुंदे परम-मित्र होने दे कारण साढ़े शरीरै दा अंग ऐन । फी रत्नप्रभा पति गी आखन लगी जे जनानिण पर इन्ना सखत पैह् रा नेईं होना लोड़चदा । जनानिण दे चाल - चलन गी उंदा स्वातम ते शील गै वचाई सकदा ऐ, सखत

पेहूरा नेईं । कवत्तिएं जनानियें दे चाल-चलन गो विधाता बी नेईं
वचाई सकदा । मुंहजोर नारियें ते नदिएं पर कुंडा रखना बड़ा
कठन ऐ । इस परसंगै च अऊं तुसेंगी इक कथा सनानिया :-

राजा रत्नाधिपति : चवक्खी समुंदरै कन्ने घिरे दा
रत्नकूट नां दा इक लम्मा चौड़ा टापू ऐ । उत्थें विष्णु भगवान दा
परम भगत इक पराक्रमी राजा राज करदा हा । इस राजा नै
सारी पृथ्वी गो जित्तने ते संसार दिएं सारिएं राजपुत्रिएं गो
अपनियां पतनियां बनाने दी गरजा कन्ने विष्णु भगवान दी राधना
कीती । राजा दी भगती थूं परसन्त होइयै विष्णु भगवान् परतक्ष
होइयै आखन लगे—पुत्रा ! उट्टु अस तेरे पर बड़े परसन्त आं । अस
जेड़ी गल्ल तुगी आखनेआं ओ तूं ध्यान लाइयै सुन :-

“कलिग देसै च मुनिशाप दे कारण इक गंधर्व नै श्वेत हाथी
दे रूप च जन्म लैता ऐ । उस हाथी दा नां श्वेतरश्मि ऐ । पूर्व
जन्म दी तपस्या दे कारण ओ हाथी बेरोकटोक गासै च उड्डो
सकदा ऐ ते कन्ने जातिस्मर बी ऐ । अर्थात् उसी पैहूले जन्म दियां
सारियां गल्लां जाद न । में उस हाथी गो सुखने च हुक्म दित्ता
ऐ जे ओ तेरै सामनै हाजर होयै । तूं इयां करेआं जे उदे पर
चढ़ियै ऐरावत - वाहन इन्द्र आला लेखा सबनै राजें गो जित्ती
लैआं । तेरै सामने कोई नेईं ठैहूरो सकग । इस चाल्ली तूं सारी
पृथ्वी गो जित्तियै अस्सी हजार राजपुत्रिएं गो अपने वशै च
करी लौगगा ।

ए आखियै ! विष्णु भगवान उत्थें गै छपी गे । राजा नै
अपने वर्तै दा पारण कीता । दूऐ दिन सबेरै ओ श्वेतरश्मि महा-
राज गासै रस्तै उड्डियै राजा दे सामनै आइयै हाजर होई गेआ ।
विष्णु दे वरै दे परभाव कन्ने राजा नै उस गड़गील हाथी पर
चढ़ियै सारी पृथ्वी जित्ती लेई ते सारें राजे दियें पुत्रियें गो हरि
लेआ । इनै राजपुत्रिएं दी गिनती अस्सी जहार ही । इस बिजै दे
वाद राजा रत्नकूट टापू च बड़े नंदे कन्ने अपना जीवन बतान
लगा । चन्द्रमा ते श्वेतरश्मि हाथी दी शांति लेई राजा रोज पंज
सौ ब्राह्मणें गो भोजन करांदा हा । इक बारी राजा श्वेतरश्मि

हाथी पर सवार मते टापुएं दी सैल करियै जिसेल्लै अपने द्वीप गो
 परतोई आवै करदा हा तां गरुड़ दी जाति दे इक महान पंछी नै
 उस हाथी दे मत्थे पर अपनी चुंजा कन्ने सख्त सट्ट लाई जिदे करी
 हाथी मूर्छित होइयै धरती पर डिग्गी पेआ । राजा उदे परा खल्ल
 उतरी आया । किश चिर होआ तां हाथी गी होश आई गेई पर
 ओ इन्नां निर्बल होई गेदा हा के उदे कोला उट्टना वी मुश्कल हा ।
 इस दशा च निराहार तड़फदे हाथी गी पंज दिन बीती गे । उसी
 दुखी दिक्खियै राजा नै वी पंज दिन अन्न - जल ग्रहण नेई कीती ।
 पंजमैं दिन राजा नै अति दुखी होइयै लोकपालें अगें प्रार्थना कोती ।
 अंतरिक्ष पासै मुंह करियै राजा आखन—लगा—संसार दे रखवालो,
 हे लोकपालो ! इस संकट कोला वचने दा मिगी कोई उपा दस्सो ।
 नेई तां में अपना सिर कप्पियै तुंदै अगें बलि चढ़ाई देड । ए
 आखियै राजा नै अपनी तलवार म्याना चा सूतरी लेई ते अपना
 सिर कट्टने गी तेआर होई गेआ । ततकाल आकाशवाणी होई जे
 राजन् ! ए साहस मत कर । जे इस रोगी हाथी गी कोई सती
 नारी अपने हत्थै कन्ने छूग तां ए हाथी ततखिन नरोग उट्टी
 खडोग । ए मुनियै राजा नै परसन्न होइयै अमृतलता नां दी अपनी
 पटरानी गी उत्थें सद्देआ । उसनै हाथी गी अपने हत्थै कन्ने छूता
 पर हाथी नेई उट्टेआ । राजा नै वारी - वारी अपनी सारिएं
 रानिएं गी उत्थें बुलाया । पर कुसै दे छूने करी वी हाथी
 नेई उट्टेआ । इदा मतवल ए निकलेआ जे राजा दी कोई वी
 रानी पतिव्रता सती नेई ही । इस गल्ला कोला राजा गी बड़ी
 शर्म आई । राजा नै अपने नगगरै दियां बड़े - बड़े मन्ने दे कुलै
 दियां जनानियां सद्दिदयै उंदे हत्थें दा रोगी हाथी गी परस कराया,
 पर हाथी फी वी नेई उट्टेआ । राजा दियां रानियां ते नगगरै दियां
 सारियां कुलीन नारियां जेडियां इस परीक्षा च फेल होई गेइयां
 अंदर शर्मा च डुब्बी मोइयां । राजा ने पर्जा दी नजरा च ओ
 सारियां जनानियां पतत लब्बन लगियां । राजा हरान परेशान
 होइयै सोचन लगा के मेरे राजै च लक्खें जनानिएं चा इक वी
 नेई नेई जिसी पतिव्रता ते सती आक्खेआ जा । इनें दिनें च गै

इक वणिया इस घटना दी खबर सुनियै हाथी गी अपनी अक्खीं
 दिक्खने लेई ताम्रलिप्ति नगरी कोला रजतकूट टापू च आया ।
 उदे कन्ने शीलवती नां दी इक नौकरानी वी आई । शीलवती
 परम सती ते पतिव्रता ही । जदों उसी इटना दा पता लग्गा तां
 ओ उस थां आई जित्थें हाथी डिग्गे दा पेदा हा । हाथी कच्छ
 जाइयै ओ आखन लगी—हे भगवान् ! जे में कदें सुखने च वी
 पर - पुरष दा ध्यान नेई कीता होयै तां ए हाथी मेरे हत्थै दे छूने
 करी नरोग उठी खड़ोए । ए आक्खियै उसनै अपने हत्थै कन्ने हाथी
 गी छूता । हत्थै दे छूने करी हाथी ततकाल निरा नरोया उट्टियै
 खड़ोई गेआ । ते उसनै केई दिनें दे फाकें दे वाद चारा खाद्दा ।
 शीलवती दे हत्थै दे चमत्कार गी दिक्खियै उत्थें जमा होए दे लोकें
 च रौला पेई गेआ । चवक्खी धन्न - धन्न दियां वाजां उट्टन
 लगी पेइयां । फी इक सुरा कन्ने सारें लोकें शीलवती दा जैकारा
 बुलाया ते आखेआ—धन्न न शीलवती जनेइयां सती नारां । सत्त ते
 धर्म दी रक्षा करने आलियां नेइयां पतिव्रता नारियां संसारै च
 मतियां घट्ट न । राजा ने शीलवती दी पूजा कीती ते उदे पति
 हर्षगुप्त गी अनन्त धन दित्ता । उनेंगी रौह् ने लेई राज मैह्लें दे
 कच्छ गै इक शैल घर वी दित्ता । राजा नै अपनी पैह्ली रानिएं
 गी त्यागी ओड़ैआ । इक रोज राजा ने शीलवती ते उदे पति गी
 अपने मैह्लें च सद्देआ । उसनै शीलवती गी पुच्छेआ जे देवी !
 तूं ए दस्स जे तेरे कुलै च कोई होर वी कुआरी कुड़ी ऐ । होयै तां
 अऊं उसी अपनी रानी बनाना चाह्नां । मिगी मेद ऐ जे ओ वी
 तेरे आंगर सती होग । शीलवती ने जवाब दित्ता—म्हाराज !
 ताम्रलिप्ति नगरी च राजदत्ता नां दी इक मेरी भैन ऐ । जे सरकारा
 दी मरजी होऐ तां उसी व्याही लैन । राजा मन्नी गेआ । हर्षगुप्त
 ते शीलवती कन्ने अपने श्वेतरश्मि हाथी पर सोआर होइयै ओ
 ताम्रलिप्ति नगरी गी गेआ । उत्थें पुज्जियै राजा ने जोतशिएं
 कोला राजदत्ता कन्ने व्याह् करने दा म्हरत पुच्छेआ । दोनैं दियां
 जन्म - कुंडलियां दिक्खियै जोतशी आखन लगे—म्हाराज ! त्रौं
 म्हीनैं दे पैह्लें व्याह् दा कोई म्हरत नेई निकलदा । जे बगैर

मूरत दे व्याह कीता गेआ तां डर ऐ जे शैद ए तुंदी रानी चंगे
 चाल - चलन दी नेईं रवै । राजा नै सोचेआ जे की नेईं अऊं
 इस कन्या गी अज्ज गै व्याही लैं । ए शीलवती दी भैन ऐ, कदें वी
 कवत्ती नेईं निकलग । अऊं इसी व्याहियै समुंदर कन्ने घिरै दे
 टापू च मैहू लें अन्दर रक्खड जित्थें कोई मनुक्ख नेईं जाई सकदा ।
 इदी सेवा लेई छड़ियां जनानियां गै होडन, मरद कोई नेईं होग ।
 जे इसी उत्थें कोई मरद गै नेईं लव्वग तां इदा चाल - चलन क्रियां
 विगड़ग । ए सोचियै राजा नै राजदत्ता गी उस्सै दिन व्याही
 लेआ ते हर्षगुप्त वणिए ते उदी पत्नी शीलवती कन्ने अपनी राज-
 धानी गी परतोई आया । जियां उसनै सोचेआ हा उंआं गै इक
 जोआड़ टापू च मैहू ल वनवाइयै राजदत्ता गी उत्थें रक्खेआ ।
 उदी सेवा लेई जनानियां गै जनानियां रक्खियां । सारी रातीं राजा
 उस मैहू लै च नमीं रानी कच्छ रौह्दा । दिनें राजकाज करने
 लेई रतनकूट टापू च चली जंदा । इक दिन रानी राजा नै नमीं रानी
 समेत रज्जियै शराव पीती । सबेरै वी राजदत्ता शराबै दे नशे च
 ही । इस हालता च उसी छोड़ियै राजा राजकाज करने लेई
 रतनकूट चली गेआ पर उदे दिलै च गल्ल खड़कदी रेई जे अऊं
 रानी राजदत्ता गी नशे दी हालता च छोड़ी आयां । राजा दे चली
 जाने बाद रानी कल्ली रेई गेई । जिसेल्लै उदियां सारियां दासियां
 इंदर - उंदर अपने - अपने कम्में च लग्गी दियां हियां तां इस कल्ल-
 मकल्ली हालता च वैंठी दी राजदत्ता ने दिक्खियै जे उदे कमरे दे
 दरवाजे पर इक्क शैल शवीला बांका गवरू खड़ोता दा ऐ । उसी
 चानचक आये दे दिक्खियै राजदत्ता मस्ती दी हालता च उसी
 पुच्छन लग्गी जे भलेआ लोका ! मनुक्ख दे अगम्म इस थां तूं क्रियां
 उठी आयां । ओ आखन लगा—देवी ! अऊं मथुरा दे निवासी इक
 सेठ दा पुत्र आं । मेरा नां पवनसेन ऐ । पिता दे मरी जाने परंत
 अऊं विदेश चली गेआ । उत्थें वपार द्वारा धन कमाइयै जिसेल्लै
 अऊं परतोआ तां रस्ते च मेरा सारा धन लुटेरें लुट्टी लेआ ।
 उदे बाद अऊं कनकक्षेत्र नां दी सुन्ने दी खाना च कम्म करन लग्गी
 पेआ । इत्थें में खासा धन कमाया । अपने साथिए समेत जिसेल्लै

अऊं ज्हाजै पर चढ़ियै घरै गी परतोआ करदा हा तां समुंदरै च
 तूफान औने करी ज्हाज डुब्वी गोआ । डुवदे - डुवदे गी मिगी इक
 तख्ता हथ्य लग्गी गोआ जिदे स्हारै तरदा - तरदा अऊं इस टापू
 दे कनारै आई लग्गा । दूरा दा इस चौं चवारें आले मैह्लें गी
 दिक्खियै अऊं मदता लेई इहर आई गोआ । उसी दिक्खियै रानी
 राजदत्ता दा मन काम - वासना कन्ने डगमग करन लग्गी पेआ ।
 शराव ते काम - वासना दी मस्ती च बेवस होइयै उसनै उस बांके
 गवरू गी अपने पलंगै पर बठाइयै छाती कन्ने लाई लेआ । जित्थें
 जनानी, शराव दी मस्ती, एकान्त, बांका गवरू, ते मुंह जोरी इनें
 पंजें अगें (पंजगति) दी ज्वाला भड़कै करदी होयै उत्थें वचारा
 चरित्र रूपी तृण क्रियां वची सकदा ऐ । जिसेल्लै राजदत्ता वगाने
 मरदै कन्ने विहार करै करदी ही तां राजा रतनकूट कोला वापस
 आई गोआ । उसनै अपनी रानी दे दुराचार गी दिक्खी लेआ ।
 राजा सोचन लग्गा में बुरे मूरतै च व्याह् कीता । उदा ए फल
 होआ जे ए रानी वी बुरे चाल - चलन दी निकली । शीलवती दी
 भैन समजियै में राजदत्ता गी व्याया हा । पर में ए नेई सोचेआ
 जे समुंदर छोलने कोला निकली दी अमृत दी धारा ते कालकूट
 हलाहल विष दी धारा वी ते इक्कै माता थमां पैदा होई दियां दो
 भैनां सियां । दैवगति गी कुन मिटाई सकदा ऐ । ए सोचियै राजा
 नै नां ते अपनी नमीं रानी पर ते नां गै उस गवरू पर रोह् कीता ।
 राजदत्ता गी उसनै उदियें दासियें समेत उदी भैनू शीलदत्ता कोल
 भेजी दित्ता । ए सारी घटना राजा नै अपने मंत्रियें गी सुनाई ।
 उसनै संसार दे भोग विलासैं दी बड़ी निंघा कीती । अंत च राजा
 विरक्त होइयै राजपाट त्यागियै वनैं गी चली गोआ । वन जाने दे
 पैह्लें उसनै अपना अद्दा खजाना शीलवती गी ते अद्दा ब्राह्मणें
 गी बंडी दित्ता । राजपाट गुणी ब्राह्मण पाप भंजन गी दान करो
 दित्ता । फी राजा नै श्वेतरश्मि राज हाथी गी अपने सामनै
 मंगवाया । औंदे गै राजा दे दिखदे - दिखदे हाथी नै अपना शरीर
 त्यागी दित्ता । दिब्व रूप धारण करियै ओ राजा गी आखन लग्गा—
 म्हाराज ! पैह्ले जन्म च अस सोमप्रभ ते देवप्रभ नां दे दो गंधर्व से ।

अऊं सोमप्रभ आं । मेरे भ्रा देवप्रभ दी रूपवती भारजा सी । इक
 दिन अस दोयै रलियै सिद्धवास नां दे थां पर गे । उत्थें मंदरै च अस
 गान लगे । उसै बेल्लै उत्थें इक सिद्ध आया । ओ मेरे भ्रा दी
 पत्नी राजवती पासै अक्खीं फाड़ी - फाड़ियै दिक्खन लगी पेआ ।
 मेरे भ्रा गी गुस्सा आई गोआ । ओ सिद्ध गी आखन लगा—भई
 जनेआ तूं सिद्ध होइयै वी बगानी जनानी पासै दिक्खै करनां ऐं ए
 कुत्थूं दी सिद्धि ऐ । उदी गल्ल सुनियै सिद्ध गी वी क्रोध आई
 गोआ । बोलेआ—में मधुर गीत दी कला लेई तेरी जनानी पासै
 दिक्खेआ कोई बुरी नजरा कन्ने नेईं । ए आखियै सिद्ध नै मेरे
 भ्राऊ गी शाप दित्ता जे मेरा अपमान करने कारण तूं मनुक्खा
 दी जूना च जन्म लै । उत्थें तूं अपनी नारी गी बगाने मरदै कन्ने
 विहार करदे दिखगा । ए शाप सुनियै में गुस्से कन्ने चिट्ठे रंगै
 दा हाथी—खडौना जेड़ा मेरे हत्थै च हा सिद्ध पर छंडेआ । सिद्ध नै
 मिगी वी शाप दित्ता जे तूं वी चिट्ठे हाथी दे रूप च मर्त लोकें
 च जन्म लै । शाप सुनियै मेरा भ्रा सिद्ध दियां लीलड़ियां कड्डन
 लगा । सिद्ध गी देआ आई । ओ आखन लगा—तूं भगवान् दी
 किर्पा कन्ने मर्तलोकें च राजा बनगा ते ए तेरा निकड़ा भ्रा उत्थें
 तुगी चिट्ठे हाथी दे रूप च प्राप्त होग । तेरियां उत्थें अस्सी
 ज्हार रानियां होडन, पर होडन सब कवत्तियां । इस लेई तूं
 अपनी इस भारजा मानुषी दे रूप च व्याहगा । पर किश समै
 वाद इसी वी तूं पर - पुरष कन्ने विहार करदे दिखगा । ए
 दिक्खियै तुगी संसार कोला वराग होई जाग ते तूं अपना राज-
 पाट दान करियै बनैगी चली जागा । बन जाने दे समै जिसलै तूं
 अपने भ्रा सोमप्रभ गी हाथी दी जूना कोला छुटकारा पाए दे
 दिखगा तां भारजा समेत तेरे शाप दा वी अंत होई जाग । ए पूर्व
 जन्म दी घटना सुनाइयै सोमप्रभ राजा गी आखन लगा—इस चाल्ली
 अस त्रैवे गंधर्व सिद्ध दे शाप दे कारण मर्त लोकें च आए । हून
 असं सबनै दे शाप दा अंत होई गोआ ऐ । अपने पूर्व - जन्म दे भ्रा
 सोमप्रभ दी गल्ल सुनियै राजा गी वी अपना पैह्ला जन्म जाद
 आई गोआ । उसनै ते उदी भारजा राजदत्ता ने वी मनुक्ख शरीर

त्यागियै गंधर्व शरीर धारण करी ले । परैत त्रैवै जीव गंधर्व-लोक
गी चली गे ।

ए कथा सुनाइयै युव - रानी रत्नप्रभा नरवाहनदत्त गी
आखन लगी जे संसारै च कोई वी मर्द अपनी जनानी दे सिरै पर
नियंत्रण दा कुंडा रक्खियै उदे चरित्र गी नेई वचाई सकदा ।
जनानी दे चरित्र गी बड़ा उदा अपना आत्मवल ते सद्भाव गै
वचाई सकदा ऐ । जनानी पर जे सख्त नगरानी दा कुंडा रक्खेआ
जा तां इदे कन्ने उदे मनै च खतोला पैदा हुंदा ऐ ते ओ नियंत्रण
दी जंजीरा गी त्रोड़ियै बे-लगाम होने दा जतन करदी ऐ ।

त्रिय्या तरंग

इस्सै परसंग च मंत्री गोमुख नरवाहनदत्त गी आखन लगा—
युवराज जी जनानियां सुभा कोला गै चपल हुंदियां न । सतो
इस्त्रियां दुनियां च मतियां घट्ट लवदियां न । द्रिष्टान्त दे रूप च
अऊं तुसैंगी इक कहानी सनानां ।

निश्चयदत्त वणिया : उज्जयिनी नगरी च निश्चयदत्त
नां दा इक गवरू वणिया राँहूदा हा । उसी जुए दी खो ही । जुए
च धन जित्तियै प्रतिदिन छिप्रा नदी च शनान करियै ओ महाकाल
ही पूजा करदा हा । पूजा परैत जित्ते दा धन ओ ब्राह्मणें ते दीन
दुखियें गी दान करी दिंदा हा । महाकाल मंदर दे कोल शमशानै
च जाइयै ओ अपने शरीरै पर चंदन दा लेप करदा । शमशानै च
इक पत्थर दा थ'म्म सा । उसी चंदनै दा लेप करियै वणिया
अपनी पिठु उस थ'म्मै कन्ने रगड़दा हा । थ'म्मे कन्ने रोज पिठु
रगड़ने करी थोड़े दिनें च गै ओ थ'म्म बड़ा कोमल होई गेआ ।
इक बारी इक चित्रकार ते उदा साथी मूर्तिकार उस रस्ते चा
लंघे जित्थें ओ थ'म्म खड़ोता दा हा । थ'म्मै गी कोमल दिक्खियै
ने टंक कन्ने उससै कलमी मूरता दी घाड़मीं मूरत बनाई ते मूर्तिकार
उंदे चले जाने वाद इक विद्याधर कन्या उत्थें आई । उसने थ'म्मै
पर बनी दी गौरी दी पूजा कीती ते वसां लेई थ'म्मै दे अंदर परवेश

करी गई। इन्ने चिरै च निश्चयदत्त गवरू वणिया वी उत्थें आई
 पुज्जा। थ'म्मै पर वनी दी पार्वती दी मूरत दिक्खियै उसी वड़ा
 चरज लगा। उसने अपने अंगें पर चंदन दा लेप कीता ते थ'म्मै
 पर वी चंदन दा लेप कीता। फी थ'म्मै पर जित्थें चंदन मलेदा
 हा उत्थें अपनी पिठु रगड़न लगा। ए दिक्खियै थ'म्मै दे अंदर
 छप्पी दी दी विद्याधर कन्या गवरू दे शलैपे गी निरखियै उदे पर
 मोहूत होई गई। ए सोचियै जे इस वचारे दी पिठु मलने आला
 कोई नई, आपूं गे पिठु थ'म्मै कन्ने रगड़ी जा करदा ऐ, थ'म्मै दे
 वाहूर हत्थ कडियै ओ उस गवरू वणिये दी पिठु मलन लगी
 पेई। वणिये नै पिठु मलदी - मलदी दा उदा हत्थ तुरंत मजबूती
 कन्ने काबू करी लेआ। थ'म्मै दे अंदरा दा विद्याधर कन्या बोली—
 भलेआ लोका ! मेरे हत्थे गी छोड़ी दे, में तेरा केहू वगाड़ेआ ऐ।
 वणिये नै आखेआ तूं पैहूलें मिगी वचन दे जे थ'म्मै दे वाहूर
 आइयै तूं मिगी दर्शन देगी। उदे कोला वचन लेइयै निश्चयदत्त
 नै उदा हत्थ छोड़ी दिता। उससै बेल्लै ओ विद्याधर कन्या थ'म्मै
 विच्चा वाहूर आई। परम रूपवती ओ दिव्व कन्या उदै सामनै
 बेइयै अपनी बहानी इस चाली सुनान लगी—

प्रालेय पर्वतै पर पुष्करावती नां दी इक नगरी वस्सी दी
 ऐ। उत्थें विध्यपन्न नां दा विद्याधर राज करदा ऐ। अऊं अनुरागपरा
 नां दी ओहू दी धी आं। महाकाल शिवें दी पूजा लेई अऊं इत्थें आई
 ही। पूजा दे बाद इस थ'म्मै च वसां लैकरदी ही। तुं दी मोहूनी मूरत
 दिक्खियै पैहूलें में तुं दे प्रेम वन्ने अपना हिदा रंगेआ पिच्छें
 पिठु मलदे - मलदे अंगराग कन्ने तुं दा हत्थ रंगी ओड़ेआ। इदे
 बाद दी सारी गल्ला दा तुसेंगी पता ऐ। अच्छा हून अऊं अपने
 घर चली। निश्चयदत्त वणिया आखन लगा—सुंदरी ! तूं मेरा
 मन चुराई लेआ ऐ। जिन्ना चिर इसी मोड़ी नेई दिदी तूं किया
 जाई सकनी ऐं। ओ बोली जे तुस मेरे कन्ने सादी नगरी चलो
 तां अऊं तुं दे कन्ने ब्याहू करी लैड। ए आखियै ओ गासै च
 डोआरी मारियै अक्खीं दे ओलहै होई गई। उदे ध्यान च डुब्बा
 दा वणिया अपने घर आई गेआ। उसने निश्चै करी लेआ जे

जां ते अऊं उदे कन्ने उदी नगरी च जाई मिलड नेईं तां अपने
 प्राण त्यागी देड। सबेरा हुंदे गै ओ पुष्करावती दी खोजा च
 उत्तरापथ पासै मुंह करियै चली पेआ। चलदे - चलदे उदे कन्ने
 उत्तरापथ दे त्रै होर जात्रू आई रले। केईं नदी नाले ते जोआड़
 बीयावानें गी पार करियै ओ इक मलेछ भूमि पर पुज्जे। उत्थें
 ताजिक नां दे मलेछें इनेंगी फगड़ी लेआ। उनें जाइयै इनें त्रौनें जात्रुएं
 गी कुसै होर ताजिक दे हत्थ बेची दित्ता। उसने इनेंगी अगगै तोफे
 दे तौर पर मुरवार नां दे इक तुर्क कोल भेजी दित्ता। जदों ए उदे
 नगगर पुज्जे तां मुरवार मरी चुका दा हा। मुरवार दे पुत्रै
 ने सोचेआ जे कीज ए त्रैवे आदमी तोफे दे तौर पर मेरे पिता गी
 भेजे गेदे न, इसलेईं इनेंगी अपने पिता दे मुडदे कन्ने उदी
 कवरा च गै दवाई देना लोड़चदा ऐ। उन्न इनेंगी बेड़ियां
 पाइयै कैदखाने च सुट्टी दित्ता। रातीं मौता दे डरै करी
 कंवदे अपने साथियें गी निश्चयदत्त आखन लगा—साथियो !
 तुस धीरज धरो। डरौकल बनियै संकट नेईं कट्टेआ जाई
 सकदा। संकट पार कराने आली भगवती दुर्गा दा ध्यान
 करो। उदे आखने पर सवनें दुर्गा दा ध्यान कीता ते स्तोत्र
 पाठ कीता। दुर्गा दे ध्यान च मगन ओ सारे निद्रा दी
 गोदी च सेई गे। सुखने च दर्शन देइयै देवी उनेंगी आखन लगी—
 पुत्रो ! तुंदा बंधन में कट्टी ओड़ैआ ऐ तुस अपने - अपने थां गी
 चली जाओ। सबेरै जिसेल्लै उं दियां अक्खां खुल्लियां दिखदे के न
 जे उं दियां बेड़ियां टुट्टी दियां न। ओ चुपचाप कैदखाने चा
 निकलियै शैहूरा दा बाहर आई गे। निश्चयदत्त दे त्रै साथी मलेछें
 कोला डरियै उत्तरापथा दा घरै गी परतोई गे। पर वणिया अगगें
 गी गै चलदा गेआ। चलदे - चलदे रस्ते च उसी चार महाब्रतो
 साधु मिली गे। पंजें साथियें वितस्ता नदी पार कीती ते नदी दै पार
 उनें भोजन कीता। सज्रां बेल्लै चलदे - चलदे इन्दे रस्ते च इक
 घना जाड़ आई गेआ। अगगूं दा किश आदमी लकड़ियें दे भार
 चुक्कियै आवै करदे हे। ओ इनें पंजें साथिएं गी पुच्छन लगे—तुस
 इस बेल्लै इहर कुत्थें जाकरदे ओ। इस जंगलै च इक उज्जड़ै दा
 शिवाला ऐ। रातीं जेड़ा जात्रू इस शिवाले च जां इदे नेड़ै - त्रैड़ै

रौहूँदा ऐ उसी शृंगोत्पाटिनी नां दी जक्खनी भिड्डु' वनाइयै खाई
 जन्दी ऐ। ए सुनियै चार महाव्रती लापरवाही कन्ने आखन लगे—
 वचारी जक्खनी साढ़ा के वगाड़ी सकदी ऐ। अस शमशानें च
 रौहूँने आं। साढ़ा केई भूतें-प्रेतें ते डाकनिए' कन्ने वास्ता
 पौंदा ऐ। असें वी सिद्धियां प्राप्त कीति दियां न। इसलेई चलो
 अगो वधदे चलो। दिखनेआं ए कनेई जक्खनी ऐ। चलदे - चलदे
 चारे महाव्रती ते निश्चयदत्त वणिया तरकालें उस जुआड़ शिवालै
 कोल पुज्जे। पंजें जात्रू उदे अंदर जाई बड़े। उनें मंदरै दे अगों
 उदे बेहडे च डेरा लाई दित्ता। महाव्रतिएं थां गी साफ-सुथरा
 करियै चतरफी बभूता दी लकीर खिच्चियै पवित्तर मंडल वनाया।
 मंडलै अंदर अग वालियै उदै चवक्खी आसन लाइयै पंजें जने मंत्र
 दा जाप करन लगी पे। अद्दी रात होई तां महां-विकराल
 शृंगोत्पाटनी जक्खनी नचदी-नचदी ते मनुक्खै दी हड्डी दी
 तुरी गी वजांदी-वजांदी शिवालै दे हाते च आई पुज्जी। औंदे
 गै ओ वभूता कन्ने कहीले दे मंडपै दे चवक्खी नच्चन लगी पेई।
 चौं महाव्रतिएं चा इक पर नजर जमाइयै ओ नचदी-नचदी मंत्र
 पढ़न अगी। इस मंत्र' दे प्रभाव कन्ने उस महांव्रती बावे दे सिरै
 पर सिङ उगगन लगी पे ते बुद्धिभ्रष्ट होइयै ओ उट्ठी खड़ोता।
 जक्खनी दे शारे पर नचदे-नचदे उस सिंगें आले महांव्रती नै
 अग्गा दे भड़ांवे च शाल मारी दित्ती। अद्दे जले दे उदे शरीर गी
 वाहर खिच्चियै शृंगोत्पाटनी जक्खनी पलै च उदा सारा मास
 चट्ट करी गोई। इससै चाल्ली जक्खनी ने शृंगोत्पाटन मंत्र' दे
 प्रभाव कन्ने नचदे-नचदे वाकी दे त्रौं महांव्रतिएं गी वी वारी-
 वारी निगली ओड़ेआ। जिसेल्ले औ चौथे महाव्रती गी खाकरदी
 ही तां चानचके हड्डी दी तुरी जक्खनी दे हत्था दा भुजां डिग्गी
 पेई। निश्चयदत्त ताड़ा च हा। उसनै भवट्टा मारियै तुरत ओ
 तुरी अपने कवजै च करी लेई। हून ओ जक्खनी पर नजर जमाइयै
 नचदा-नचदा लगा तुरी वजान। कन्ने-कन्ने ओ जक्खनी कोला
 मुने दे मंत्र गी पढ़दा जंदा हा। इस क्रिया दे करने करी नेड़' गै
 हा जे जक्खनी दे सिरै पर सिङ उगगी औंदे ते ओ नचदी-नचदी

अग्गा च शाल मारियै भसम होई जंदी, अपनी मौता गी सामनै
 दिक्खियै ओ भट्ट निश्चयदत्त दे पैरें पर डिग्गी पेई ते लीनडियां
 कडदी आखन लगी—म्हाराज ! मिगी वचाई लौ । मेरे कोला
 भुल्ल होई ऐ । अऊं सारी उमर तुंदी दासी बनियै रौह्ग ते तुंदे
 कठन कम्म सिद्ध करड । जित्थें तुस जाना चाह्गेओ उत्थें तुसेंगी
 तौले लेई चलड । जक्खनी गी पूर्णरूप कन्ने अपने अधीन
 दिक्खियै निश्चयदत्त नै हड्डी दी तुरी वजाना ते श्रृंगोत्पाटन मंत्र
 दा पाठ बंद करी दित्ता । जक्खनी उदी दासी होई गई । दूऐ
 दिन तरकालें वणिया जक्खनी दे घनाडै चढ़ियै पुष्करावती नगरी
 गी चली पेआ । सारी रात जात्रा जारी रेई । सबेरा हुंदे गै जक्खनी
 उसी आखन—लगी म्हाराज ! हून दिन चढ़न लगा ऐ । अस
 निशाचर आं । सूरज भगवान् दे सामनै साढ़ी गति रुकी जंदी ऐ ।
 दिनें तुस इस वनै च वसां करो । रातीं अऊं फी औंग ते तुसेंगी
 अगों लेई चलड । ए आखियै जक्खनी बाऊ दा रूप धारियै छपी
 गई । निश्चयदत्त कल्ला गै उस वनै च इद्दर - उद्दर फिरन लगा ।
 उसनै उत्थें इक अगाध सरोवर दिक्खेआ जेड़ा उप्परा दा वडै शैल
 निर्मल जलै कन्ने भरेदा लवदा हा पर अंदर दा विषदा कुंड हा ।
 पानी दी मुशका कोला गै निश्चयदत्त गी पता लग्गी गोआ जे इदे
 च विष ऐ । ओ शीतल मधुर जल दी खोजा च पर्वत पर फिरन
 लगा । फिरदे - फिरदे उसनै इक वरमी-जन उच्ची जमीन दिक्खी ।
 लकड़ी कन्ने टोह् कराने करी किश मिट्टी वरमी परा भड़ी पेई ।
 वणिये ने उदे अंदर नजर दुड़ाई तां उसी उत्थें अंगियारिणं आंगर
 दो चमकदियां अक्खां लब्बियां । उसनै उस थां गी पुट्टेआ तां उदे
 चा जींदा वांदर निकलेआ जिदियां लालडिणं आला लेखा लाल
 अक्खी वणिये पासै विटविट दिक्खै करदियां हियां । जींदे वांदरै
 गी मिट्टी च दवोए दे दिक्खियै वणिये गी वड़ा चरज वभोआ ।
 उसी हरान दिक्खियै वांदर उसी मनुक्ख दी वोल्ली च आखन लगा—
 मित्रा ! अऊं जन्म दा मनुक्ख आं । कुसै कारणै कोला वांदर
 वनी गोआ । मेरा ब्राह्मण कुलै दा जन्म ऐ । तुसे मेरा उद्धार कीता
 ऐ, मिगी प्राणदान दित्ता ऐ । किन्ना क तुंदा धन्नवाद करां । ए

आखियै वांदर उदे पैरें पर डिग्गी पेआ । फी बोलेआ तुस भुक्खे ओ, अम्मी भुक्खा आं । आओ पैह्लें शनान करियै जलपान करी लैचै । फी अऊं तूसेंगी अपनी रामकहानी सनाइ । ए आखियै वांदर वणिये गी इक शीतल मधुर जलै आली प्हाड़ी नदी पर लेई गोआ । इत्थें निश्चयदत्त नै शनान कीता ते वांदरै दे आंदे दे स्वादले जंगली फलें गी खाइयै अपनी भुक्ख मटाई । वांदरै ने वी मते चिरें पिच्छू स्वादले फल खादे ते नदी दा मिट्ठा पानी पीता । दोऐ वड़े नंदै कन्ने अपने थां गी परतोए । उत्थें आइयै निश्चयदत्त वणिये ने वांदरै गी पुच्छेआ जे मित्रा ! तूं ए दस्स जे ब्राह्मण कुलै च जन्म लैने पर वी तूं मरकर कियां वनेआ । वांदरै नै अपनी रामकहानी इस चाल्ली शुरू कीती ।

मेरा जन्म वाराणसी दे नवासी चन्द्रस्वामी नां दे कुलीन ब्राह्मण दै घर होआ हा । मेरी माता दा नां सुवृत्ता हा । पिता नै मेरा ना सोमस्वामी रक्खेआ । अऊं जिसेल्लै जोआन होआ तां मिगी कामदेव नै लम्पट बनाई ओड़ेआ । इक दिन शैलशवीला वनियै अऊं वनारस दी गलियं च सैल करन लगा । सैल करदे गी मिगी बन्धुदत्ता नां दी कुसै वणिये दी जनानी नै, जेड़ी अपने प्यौके घर आई दी ही, दिक्खी लेआ । उसनै कुसै चाल्ली मेरा पता - थौह् करियै अपनी स्हेलड़ी गी साढ़ै घर मेरे कच्छ भेजेआ । उदी स्हेली मिगी गुप्तरूप अपने घर लेई गई । उत्थें बन्धुदत्ता वी आई पुज्जी । उस घरै च असैं दोनो दा संगम होई गोआ । इस चाल्ली अस दोऐ रोज परतोई औंदे । इक दिन बन्धुदत्ता दा घरै आला वराहदत्त वणिया अपनी जनानी गी लैने लेई सौह्रें आया । बन्धुदत्ता दा मेरे कन्ने इन्ना प्रेम होई गेदा हा जे ओ मेरे बिना इक खिन नेई रेई सकदी ही । उसने अपनी स्हेली सुखशया नां दी जोगनी कोला इस इस समस्या गी दूर करने दा उपा पुच्छेआ । जोगनी ने उसी दो मंत्र दस्से । इक मंत्र दे वल कन्ने मनुक्ख वांदर वनी जंदा हा । ते दूए मंत्र दा पाठ करने करी ओ वांदरै दा फी मनुक्ख वनी जंदा हा । उसै बेल्लै जोगनी सुखशया नै मिगी मंत्र दे वलै कन्ने निकका

जनेहूया वांदर वनाई ओड़ेआ । पति कन्ने अपने सौहूरै जंदे
 होई बंधुदत्ता पति गी आखन लगी जे मेरी स्हेली ने मेरे मनोरंजन
 लेई ए वांदरै दा वच्चा मिगी दित्ता ऐ, इसलेई अऊं इसी वी कन्ने
 लेई चलड । वांदर निश्चयदत्त गी आखन लगा—अऊं उसेल्लै भामें
 वांदर दे चोले च हा पर अऊं उं दियां सारियां गल्लां सुनै ते समजै
 करदा हा । में हुरान हा जे इसत्री चलित्तर किन्ना गूढा ते छलपूर्ण
 ऐ । बराहदत्त वणिया अपनी पत्नी बंधुदत्ता गी लेइयै मथुरा गो
 चली पेआ । उदे कन्ने नौकर वी हे । इक नौकरै नै मिगी अपने
 घनाड़ै चुक्के दा हा । सारे साथी मथरा पासे गी मुंह् करियै सफर
 करन लगी पे । चलदे - चलदे जदों त्रै दिन होई गे तां रस्ते च
 इक घना जंगल आया जेड़ा वांदरें कन्ने भरोचा दा हा । वांदरै दे
 चोले च मिगी मनुक्खे दे घनाड़े पर बैठे दे दिक्खियै जंगली वांदरें
 मिगी छुड़ाने लेई जात्रुएं पर भयंकर हमला करी दित्ता । जिस
 नौकरै मिगी अपने मूठे पर चुक्के दा हा सारे वांदर उदे पर
 टुट्टी पे । ओ वचारा अपनी जान वचाने लेई मिगी भुजां सुट्टियै
 आपू इक पासै गी दौड़ी गेआ । वांदरें दी इनें किलकिलें ते रौले-
 गौले च अम्मी इक भेठा मुंह् करियै जंगलै गी नट्टी गेआ । इक
 वनै कोला दूए वनै च फिरदे - फिरदे में इस वनै च आई पुज्जा ।
 अजें मिगी अपने बुरे कर्म दा होर फल भोगना हा । इक दिन इक
 जंगली हाथी नें मिगी अपनी सुंडा च पगड़ियै बरखा दे पानी कन्ने
 गिल्ली होई दी वरमी च नेया बुरी चाल्ली घसेड़ेआ जे उत्थूं दा
 बाह्र निकलना मेरे लेई असम्भव होई गेआ । ए कोई मेरा भाग चंगा
 हा जे में उत्थें फसियै मोआ नेई । उदे 'च फसेदा अऊं दिनरात
 शिवशंकर दा ध्यान करन लगा । शिवें दी किर्पा कन्ने अऊं जिन्ना
 चिर वरमी दे चिक्कड़ै च फसेआ रेआ उन्ना चिर मेरी भुक्ख त्रेह्
 सब जंदी रेई । अज्ज मुहता दे वाद तुसैं मिगी इस चिक्कड़ै दे
 दम - दमे थमां छुड़ाया ऐ । शिवें दी किर्पा कारण प्राण प्राप्त होने
 पर वी मेरे च इन्नी शक्ति नेई जे में अपने - आपगी वानर - दशा
 कोला मनुक्ख - दशा च बदली लैं । जिन्ना चिर मेरे गले च वज्जे
 दे गान्ने गी जोगनी उससै मंत्र कन्ने नेई खोलदी इन्नां चिर अऊं

मनुखवै दे रूपै च नेईं बदली सकदा । वांदर निश्चयदत्त गी आखन लगा—में अपनी रामवहानी तुसेंगी सुनाई दिती ऐ, हून तुस अपनी जीवन कथा मिगी सुनाओ । वांदर दे प्रश्न गी सुनियै निश्चयदत्त नै बी उसी आपवीती सारी कहानी सुनाई—जियां ओ विद्याधरी दी खोजा च घर - बाहर त्यागियै उत्तरापथ गी आया, रस्ते च मलेछ देश दा संकट, जक्खनी गी अपने वशै च करना, फी उदे घनाडै चढ़ियै उत्थै पुज्जना आदि सारी घटना वर्णन कीता । वणिये दी कथा गी सुनियै वांदरै दे रूपै च सोमशर्मा आखन लगा—तां मेरे आंगर तुसें बी जनानी दे पिच्छे इन्ना दुख भोगेआ ऐ । इस्त्री ते लच्छमी चंचल हुं दियां न । ए सदा इक थां नेईं टिकदियां । तुस विद्याधरी दी खोजा च इन्ना कष्ट स्हारै करदेओ । पर जनानी जात दा के वसाह् । होई सकदा ऐ जे ओ विद्याधरी अपनी जाति दे कुसै विद्याधर कुमारै कन्ने संगम होई जाने कारण तुसेंगी धोखा देई जा । तुसें अज्ज तक जेड़ा कष्ट भोगेआ, सो भोगेआ, उयै मता ऐ । हून अऊं तुसेंगी इयै सलाह् दिन्नां जे तुस जक्खनी पर सोआर होइयै चुपचाप उज्जयिनी गी परतोई जाओ । तुस विद्याधरपुरी पुष्करावती जाने दा विचार त्यागी ओड़ो । मेरा आखेआ मन्ने । विद्याधरी दे प्रेम कोला अपने मन गी हटाई लौ । मिम्मी पैह्लें अपने हितकारी मित्रै दा आखेआ नेईं मन्नेआ हा जिदे कारण अऊं नेक संकटें दा शकार वनेआ ते हूनै तक पछता करनां । जदों में बन्धुदत्ता दे प्रेमजाल च फसी गेआ तां मेरे मित्र भवशर्मा ने मिगी मता समझाया पर में उदी इक नेईं सुनी । भवशर्मा ने मिगी आखेआ हा—मित्रा ! जनानी दे जालै च नेईं फसेआं । उसने मिगी आपवीती कहानी सुनाई जे कियां ओ जनानी दे प्रेम च फसियै भांति - भांति दियें मसीवतें दा शकार वनेआ । ओ कहानी इस चाल्ली ऐ—

भवशर्मा ब्राह्मण : वाराणसी नगरी च इक्क अति रूपवती ब्राह्मणी राँह दी ही । ओ तंत्र - मंत्र ते जाहू - टूने जानदी ही । मंद भाग दे कारण मेरा उदे कन्ने संगम होई गेआ । अऊं उदे प्रेमजाल च जकड़ेआ गेआ । ए प्रेम दा बंधन दिनोदिन

वधदा गेआ । इक्क वारी मिगी उदे चालचलन पर शक्क होआ
 ते में उसी शैल करियै कुट्ट चाढ़ी । उसने मिगी किश नेईं आखेआ ।
 ओ अपने गुस्से गी अंदरो - अंदर पी गई । दूऐ दिन मेरे कन्ने
 प्रेम करदे - करदे उसनै मेरे गले च इक्क जंत्र वन्नी ओढ़ेआ ।
 जंत्र वन्नदे गै अऊं ततकाल बैल बनी गेआ । उसी ब्राह्मणी नै
 कुसै वपारी दे हत्थ बेची दित्ता । इस वपारी नै मेरे पर भार
 लदना शुरु करी दित्ता । मेरी दीन दशा गी दिक्खिए मोचनिका
 नां दी इक्क जोगनी गी मेरे पर तरस आया । ए जानिये जे इस
 वचारे गी सोमदा जोगनी ने बैल बनाई दित्ता दा ऐ । उसने मेरे
 गले च वज्झा दा जंत्र खोली ओढ़ेआ । अऊं फी मनुक्ख बनी
 गेआ । ए समजियै जे मेरा बैल रस्सा त्रोंडिऐ कुतै नट्टी गेआ ऐ,
 मेरा मालक मिगी तुप्पने लेई चतरफी दौड़ेआ पर उसी कुतै बैल
 नेईं लब्बा । अऊं मनुक्ख दे रूपै च बंध मोचनिका जोगनी कन्ने
 जा करदा हा । चानचक्क अगूँ दा सोमदा ब्राह्मणी आवै करदी
 ही । ओ मिगी मनुक्ख रूपै च दिक्खिए अग - बबूला होई गई ।
 ओ बंध मोचनिका गी कड़कियै आखन लगी—चंडालने ! तूँ इस
 पापी गी मेरे पंजे चा छुड़ाई लेआ ऐ । अऊं तुगी इस पाप दा
 दंड देड । अऊं कल्ल सबेरे तुगी ते इस पापी गी यमराज दे घर
 पुजाने लेई औंग । ए आखियै ओ जिसेल्लै चली गई तां मोचनिका
 मिगी आखन लगी ए पापन काली घोड़ी बनियै मिगी मारने लेई
 भ्यागा मेरे घर औंग । उस बेल्लै अऊं लाल घोड़ी बनी जाड ।
 जिसेल्लै असें दोनैं दी लड़ाई छिड़ी पवै तां तूँ तलवार लेइऐ काली
 घोड़ी पर पिछले पासेआ हमला करी देआं । इयां अस दोए
 मिलियै उस रंडी गी मारी लैगे । ए आखिए उसनै मिगी अपना
 घर दस्सी दित्ता । दूऐ दिन सबेरै अऊं तलवार लेइऐ उत्थें जाई
 पुज्जा । किश चिर होआ तां काली घोड़ी दे रूपै च सोमदा
 जोगनी उत्थें आई गई । मोचनिका जोगनी ने वी लाल घोड़ी दा
 रूप धारण करी लेआ । दलत्तियें ते दन्दें दे परहारें कन्ने दोनैं
 घोड़ियै दा खूप जुद्ध होआ । में पिछले पासेआ काली घोड़ी पर
 मते फट्ट मारे । अखीर असें दोनैं मिलिए उसी मारी ओढ़ेआ ।

ए संकट जिसेलै टली गेआ तां परतिज्ञा कीती जे अगें थमां में
कें पराई जनानी कर्ने संगम नेईं करड ।

ए कथा सुनाइऐ मेरा मित्र भवशर्मा मिगी आखन लग्गा—
मित्रा ! तूं बंधुदत्ता पिच्छें इन्ना की मरै करनां । जेड़ी जनानी
अपने पति दी नईं वनी ओ तेरी कियां वनग ? इसलेई उदे थमां
मन हटाई लै । वांदर निश्चयदत्त वणिए गी गलान लग्गा—उस
बेल्लै में अपने मित्र दी गल्ल नेईं मन्ती जिदे कारण अज्ज अऊं
इस बुरी दशा गी पुज्जी गेआं । ओ निश्चयदत्त वणिये गी आखन
लग्गा—इसलेई अऊं तुसेंगी ईऐ सलाह देड जे तुस अनुरागपरा
विद्याधरी दे प्रेम च दर-वदर नेईं फिरो । ओ तुसेंगी जरूर
धोखा देग । मखीर दी मक्खी जियां नमें- नमें फुल्लै गी तुपदी
फिरदी ऐ, इयां गै कवत्ती जनानी नमें- नमें मरदै दा शकार तुपदी
ऐ । वांदरै दी ए सलाह वणिये गी नेईं सखाई । ओ बोलेआ-
अनुरागपरा विद्याधर कुलै च जम्मी दी ऐ, मेरे कन्ने कदें धोखा
नेईं करग । ए गल्लां - वातां करदे - करदे तरकालां पेई गेइआं ।
जिसेलै चतरफी न्हेरा छाई गेआ तां शृंगोत्पाटिनी जक्खनी वी
आई पुज्जी । वांदरै थमां विदा मंगिए निश्चयदत्त उदे घनाड़े पर
वेई गेआ अही रातीं दोए विद्याधरें दी नगरी पुष्करावती पुज्जे ।
अपने विद्यावल कन्ने उसी पुष्करावती आएदा जानिए अनुरागपरा
विद्याधरी निश्चयदत्त दा स्वागत करने लेई उसै बेल्लै अपनी
नगरी दे बाहर आई । चिरकाल दे वजोग दे बाद मिलने करी
दोनों दे प्रेम दा वोआल उट्ठी खड़ोता । मता चिर दोनों दे वशकार
वजोग-कला दियां गल्लां - वातां हुंदियां रेइयां । अनुरागपरा ने
निश्चयदत्त कन्ने गंधर्व ब्याह करी लेआ । अपनी विद्याधरी विद्या
दे बल कन्ने पुष्करावती दे बाहर नमां नगर वसाइये उत्थें अपने
पति कन्ने रौह्न लगी । इस मायापुरी दा कुसै गी पता नेईं ।
लग्गा । उदे मातापिता गी वी पता नेईं लग्गा जे उंदी धी
अनुरागपरा कुसै मनुक्खै कन्ने गंधर्व ब्याह करियै नमीं नगरी च
रवै करदी ऐ । निश्चयदत्त ने वांदरै दे चोल्ले च वदले दे अपने मित्र
सोमस्वामी दी कहानी वी अपनी पत्नी अनुरागपरा गी सुनाई ।

कन्ने उसी पुच्छेआ जे मर्कट दशा थूं फी उसी मनुक्खै दे रूपै च
 बदलने दा जे कोई उपा होऐ तां दस्सो । तां जे ओ फी अपने मनुक्खै
 दे चोले च बदली जा, ए वड़ा पुन्नै दा कम्म होग । दूये दिन
 निश्चयदत्त ते अनुरागपरा गासै रस्तै उस वनै च गे जित्थें
 बांदर रौह्दा हा । दोनैं मर्कट रूप सोमस्वामी ब्राह्मणै गी
 मत्था टेकेआ । सोमस्वामी ने उनेंगी शीर्वाद दित्ती । सत्रां दोए
 अपनी नगरी पुष्करावती गी परतोई आए । दूऐ दिन निश्चयदत्त
 नै सोमस्वामी कोल जाने दा फी विचार प्रगट कीता । अनुरागपरा
 उस दिन उदे कन्ने नेईं गेई । उसी कल्ले गै जाना पेआ । उदे चली
 जाने बाद अनुरागपरा मेह्लै चा निकलिये वागै दे सैल करन
 लगी । उसी सैल करदे दिक्खियै इक्क विद्याधर कुमार उदे पर
 मोहूत होई गेआ । अपने विद्यावल कन्ने ए जानियै जे अनुरागपरा
 मनुक्खै कन्ने प्यार करदी ऐ ओ उदे कछ आइऐ उसी आखन लगा—
 तूं विद्याधरी होइयै मनुक्खै कन्ने प्रेम करनी ऐं । ए नामनासब
 गल्ल ऐ । अऊं राजभंजन नां दा विद्याधर कुमार आं । प्रेम च मरै
 करनां । तुगी लोड़चदा ऐ जे मनुक्ख जाति दे प्रेमी गी त्यागियै मेरे
 सजाती विद्याधर कुमार दे प्रेमजाल च फसी जा । विद्याधरी
 कन्ने प्रेम करियै जिसेल्लै विद्याधर कुमार राजभंजन उत्थूं चली
 गेआ तां निश्चयदत्त जंगलै च सोमस्वामी बांदरै कन्ने मिलियै
 पुष्करावती गी परतोई आया । पर अनुरागपरा ने अज्ज उदा
 प्रेम भरा स्वागत नेईं कीता, जनेआ ओ पैह्लें करदी ही । सिर
 पीड़ा दा पज्ज करियै ओ इक्क पासै पलंगै पर पेई रेई । निश्चयदत्त
 ने समजेआ जे अज्ज सिरपीड़ा दे कारण इदा जी ठीक नेईं । दूऐ
 दिन ओ फी अपने मित्र सोमस्वामी कन्ने मिलने लेई जंगलै गी
 गेआ । उदे जंदे गै विद्याधर कुमार राजभंजन सवेरै गै अनुरागपरा
 कछ आई गेआ । दोए आपू चें मता चिर प्रेमालाप ते बिहार
 करदे रे । बिहार परंत दोए गाढ़ी नींदरा च सेई गे । निश्चयदत्त
 जिसेल्लै अपने मित्र मर्कटरूप सोमस्वामी कोल पुज्जा तां उदा
 कमलाए दा चेह्वा दिक्खियै बांदरा नै उसी इदा कारण पुच्छेआ
 निश्चयदत्त नै इदा कारण ए दस्सेआ जे अज्ज मेरी पत्नी अनुराग-
 परा किश मांदी ऐ, मिगी उस्सै दी चिंता लग्गी दी ऐ । ए सुनियै

ज्ञानी मर्कट आखन लगा—अच्छा तू हूँ धरै गी परतोई जाओ
 ते अपनी मुत्ती दी जनानी गी गोदा च चुक्कियै गासै रस्तै मेरे
 कोल लेई आओ। अऊं तुसँगी इक चरज घटना दस्सनां। सोम-
 स्वामी दे आखने मतावक निश्चयदत्ता मुत्ती दी अनुरागपरा गी
 अपने विद्यावल कन्ने उत्थें चुक्की ल्याया। मर्कटरूप सोमस्वामी
 नै उसी दिव्व दृष्टि प्रदान करियै आखेआ—मित्रा ! हून दिक्ख
 अपनी प्रेमका पासै। जिसेल्लै निश्चयदत्ता नै उद्दर नजर दुडार्ई
 तां उनै अनुरागपरा गी कुसै विद्याधर कन्ने मुत्ते दे दिक्खेआ।
 ततकाल विद्याधर राजभजन जागेआ ते हक्काबक्का होए दा शाल
 मारियै गासै गी उड्डी गेआ। अनुरागपरा विद्याधरी नै जिसेल्लै
 दिक्खेआ जे उदी काली करतूता दा भांडा चराहे च भज्जी गेआ
 ऐ तां उसने शर्मा कन्ने मुंह नीदा करी दित्ता। निश्चयदत्ता दे
 नेत्रें च अत्थरू आई गे। आखन लगा—पापने ! तू ए के कीता।
 में तेरे पर बसाह कीता ते तू मेरे कन्ने ए दगा कीताई। किश चिर
 होआ तां अनुरागपरा वी डोआरी भरियै गासै च छप्पी गेई। उदे चली
 जाने वाद सोमस्वामी बोलेआ—मित्रा ! में तुगी पैह्लें गै आखेआ
 हा जे जनानियें पर विस्वास नेई करना लोड़चदा। उदी सिक्खा
 गी जाद करियै निश्चयदत्ता नै शिवें दी शरण लेई। दिनरात ओ
 शिवें दी राधना करन लगा। मर्कटरूप सोमस्वामी ते निश्चयदत्ता ने
 अपनी दशा पर संदोख करियै उससै बनै गी अपना घर बनाई
 लेआ। मरजी भगवान दी इक वारी उस बनै च चानचक मोक्षदा
 नां दी इक तपस्विनी आई जिसनै अपने जोगवल दी मैहमा द्वारा
 सोमस्वामी ब्राह्मण गी मर्कटा थमां फी मनुष्य बनाई ओड़ेआ।
 ए चमत्कार दस्सियै ओ तपस्विनी गासै च छप्पी गेई परंत संसारै थमां
 पूर्ण वरक्त होइऐ निश्चयदत्ता ते उदा मित्र सोमस्वामी उससै बनै च
 तपे दा जीवन वतीत करन लगो पे। अंत च उनें दोनै दिव्वगति
 प्राप्त कीती।

ए कथा सुनाइयै गोमुख नरवाहनदत्ता गी आखन लगा जे
 जनानियां सुभा कोला गै चपल ते चरित्रहीन हुं दियां न। चंगे
 बाल - चलन दियां जनानियां भतियां घट्ट लवदियां न।

राजा विक्रमादित्य : पाटलीपुत्र दे शैहरै च कदौ
 विक्रमादित्य नां राजा राज करदा हा । उदै दो मित्र राजे हे ।
 इक दा नां हयपति ते दुए दा गजपति हा । हयपति कोल भारी
 रसाला ते गजपति कोल असंख लड़ाके हाथी हे । इक राजा
 विक्रमादित्य दा शत्रु बी हा । ओ हा प्रतिष्ठान नगगरै दा राजा
 नरसिंघ जिदै कोल पैदल फौज अनसंब ही पर हाथी घोड़े मते
 घट्ट हे । इक वारी अपने शत्रु दी खौर फंडने लेई राजा विक्रमादित्य
 ने अपने दोनै मित्र राजे दी स्हायता कन्ने राजधानी प्रतिष्ठान नगगरै
 पर चढ़ाई करी दित्ती । राजा नरसिंघ बी अपनी पैदल फौज लेइयै
 मकावले लेई प्रतिष्ठान थमां वाहर निकलेआ । दोनै फौजे दा
 घमासान जुद्ध होआ । इक पास छड़ी पैदल फौज ते दूयै पास हाथी
 घोड़े दी फौज । अन्त च राजा नरसिंघ दी विजै होई । उसनै
 अनसम्ब पैदल सेना मदानै च सुटी दित्ती जित्ति शत्रु दे रसाले ते
 हाथिएं गी हराई ओड़ेआ । राजा विक्रमादित्य ते उदै मदतगार
 दो राजे रणभूमि चा नटिठ्यै अपने अपने नगगरें गी परतोई आए ।
 हार खाइयै राजा विक्रमादित्य गी बड़ी नमोशी होई । उसनै
 सोचेआ जे जेड़ा शत्रु शस्त्रें कन्ने नेई जित्तेआ जाई सकै उसी
 बुद्धिबल कन्ने जित्ताना लोडचदा ऐ । ए विचारियै उसने राजकाज
 अपने मंत्रिएं गी सौंपेआ ते बुद्धिबर नां दे विश्वासपात्र इक मंत्री गी
 अपने कन्ने लेइयै ओ चोरी अपने नगगरै कोला निकलियै प्रतिष्ठान
 नगगरै गी चली पेआ । उदै कन्ने इक सौ राजपुत्र ते पंज कुलीन
 शूरवीर हे । राजा ते उदै साथी सारे साधुएं दे लाब्वे च हे ।
 प्रतिष्ठान नगगरै च मदनमाला नां दी इक गणका राजे आला लेखा
 बड़े ठाठ कन्ने रौहू दी ही । राजा विक्रमादित्य ते उदै साथी गणका
 दे मैहू लें च गै जाई ठैहू रे । बेस्वा मदनमाला समझी गोई जे
 इस साधे दी जमाता दा नेता कोई महापुरुष ऐ । राजा दे साथिएं
 गी उसने अपने मैहू लें दे दुरेड्डै हिस्से च ठहराया, छड़े राजे गी
 अपने रौहू ने आले मैहू लें च ठहराया । राजे दे रूप ते गुणें पर
 मोहू त होइयै मदनमाला नै अपना - आप राजा गी समर्पण करी
 दित्ता ते ओ तनमन धन कन्ने राजा दी सेवा च लगगी पेई । इत्थू

तक जे उसनै कुसै ब्हान्नै प्रतिष्ठान दे राजा नरसिंघ दा अपने मैह्लें च औना बंद करी दिता । राजा विक्रमादित्य गुप्त रूपै च मदनमाला दे मैह्लें च रौहून लगा । राजा दीन - दुखिएं ते ब्राह्मणें गी प्रतिदिन मता दान दिंदा हा । इक रोज राजा अपने मंत्री बुद्धिवर गी आखन लगा—ए मदनमाला मेरी इन्नी सेवा करै करदी ऐ, जी करदा ऐ जे अम्मी कुसै चाल्ली इदा किश भला करां । मंत्री बोलेआ—म्हाराज ! जे तुंदी ईऐ मरजी ऐ तां ओ अनमोलरत्न जेड़े तुसेंगी प्रपंचबुद्धि भिक्खु ने भेंट कीते न उंदे चा किश थोड़े इसी मदनमाला गी देई देओ । राजा नै जवाब दिता जे भिक्खु दे भेंट कीते दे सारे रत्न वी इसी देई देआं तां वी अऊं उदे कीते दे उपकार दा बदला नेई चुकाई सकदा । मंत्री नै पुच्छेआ—म्हाराज ! पैह्लें ए दस्सो जे ओ रत्न सरकारा गी भिक्खु प्रपंच-बुद्धि कोला कियां प्राप्त होए । राजा आखन—लगा मंत्री जी सुनो, ओ कहानी इस चाल्ली ऐ—

पैह्लें पाटलिपुत्र राजधानी च ए भिक्खु रोज मेरे दरवारै च आइयै इक डब्बा मिगी भेंट करदा हा । व'रा भर इआं गै करदा रेआ । जियां ओ मिगी डब्बा दिंदा हा में उसी विना खोले तोशे-खाने च रक्खने लेई अपने भंडारी दे हत्थ फगडाई दिंदा हा । इक दिन दी घटना ऐ जे भिक्खु नै जिसेल्लै डब्बा मेरै हत्थ पगडाया तां ओ चानचक मेरे हत्था दा भुगां डिगियै भज्जी गेआ । उदे चा अग्गी दे डारे आला लेखा जगमगांदा इक लालरत्न निकली पेआ । में वरे भर दे कट्ठे होए दे डब्बें गी खोलियै उदे चा सारे रत्न कड्डी ले । में वड़े चम्भे कने भिक्खु गी पुच्छेआ जे ए अनमोल रत्न तुस कुत्थूं दा लैदे ओ ते इनेंगी मिगी सुगात देने दा तुंदा जे मतवल ऐ । जिसेल्लै सारे दरवारी चली गे तां ओ भिक्खु नकेवलै मिगी आखन लगा—म्हाराज ! अगली कृष्ण चतुर्दशी गी में शमशानै च इक साधना करनी ऐ उदे च मिगी तुंदी मदता दी लोड़ ऐ । ते में उदी गल्ल मन्नी लेई । आखर कृष्ण चतुर्दशी दा दिन आया । में शनान संध्या भोजन आदि दिनचर्या कीती ते रात पौने गी बलगन लगा ।

सत्रां दी संध्या कोला फारग होने बाद मिगी किश नींदर आई
गेई । सुखने च मिगी गरुड़ - बाहन पर स्वार विष्णु भगवान लब्बे ।
ओ आखन लगे—पुत्रा ! अज्ज रातीं तू शमशान जाना ऐ । प्रपंचबुद्धि
भिक्षु काली अगें तेरी वलि देना चाह्दा ऐ, इसलेई अस तुगी
खवरदार करनेआं । जिसेल्लै ओ धूर्त भिक्षु तुगी आखे जे देवता
अगें डंडोत परनाम कर तां तू आखेआं अस राजा लोक आं असें
कदे नेई परनाम कुसै अगें नेई कीती, तुस पैह्लें मिगी करियै
दस्सो तां फी अऊं करड । जिसेल्लै ओ डंडोत परनाम करियै
दस्सै तां तू तुरत अपनी तलवारा कन्ने उदा गला बड्डी ओड़ेआं
इंआं करने करी जेड़ी सिद्धि उसी मिलनी ही ओ तुगी मिली
जाग । इंआं मिगी खवरदार करियै विष्णु भगवान छप्पी गे ।
मेरी अक्ख खुल्ली तां में भगवान दा धन्नवान कीता । जिसेल्लै
रातीं दा इक पैह्र वीती गेआ तां में अपना खडग लेइयै शमशानै
गी चली पेआ । उत्थें जाइयै में दिक्खेआ जे उस मायावी भिक्षु
नै जोगनी दा मंडल बनाएदा ऐ । ओ मिगी दिक्खियै वड़ा
परसन्न होआ । मेरा स्वागत करियै किश खिन वीते तां भिक्षु
मिगी आखन लगा - म्हाराज ! तुस अक्खां मीटिग्रै वड़ी शर्दा कन्ने
इस मंडलै दे सामनै साष्टांग डंडोत परनाम करो । इंआं करने
करी असें दोनै गी दिव्व सिद्धि प्राप्त होग । में भिक्षु गी आखेआ
जे म्हातमा ! असें पैह्लें कुसै अगें नेई परनाम नेई कीती ।
इसलेई तुस पैह्लें ए परनाम करियै मिगी दस्सो फी अऊं तुं दे
दस्से मतावक करड । ए सुनियै ओ भिक्षु उलटै मुंह भुत्रां लम्मा
पेई गेआ । ततकाल में तलवारा दे इक्कै फट्टै कन्ने उस धूर्त
भिक्षु दा सिर धड़ै थमां वक्ख करी ओड़ेआ । उससै बेल्ले धनपति
कुबेर नै आकाशवाणी द्वारा आखेआ—राजन् ! तू इस पापी
भिक्षु दी जेड़ी मेरे अगें वलि चढ़ाई ऐ उदे करी अऊं तेरे पर
वड़ा परसन्न आं । इस भिक्षु नै गासै च बिहार करने दी
(खेचरी) जिस सिद्धि दी कामना कीती ही ओ सिद्धि हून तुगी
प्राप्त होग । अस तेरे धीरज पर वड़े परसन्न आं । तू कोई वर
मंग । ए सुनियै धनपति कुबेर गी परनाम कीती ते आखेआ

म्हाराज ! जदों कदें मिगी लोड़ पेई तां अऊं तुन्दे कोला ए
वर मंगी लैड । 'तथास्तु' आखियै धनपति अन्तर्धान होई
गे ।

अपने मंत्री बुद्धिवर गी ए कहानी सनाइयै राजा विक्रमादित्य
आखन लगा—धनपति कुबेर कोला ओ वर मंगियै अज्ज अऊं मदन-
माला दे उपकार दा बदला चुकाना चाह्नां । राजा नै बुद्धिवर
गी ए बी आक्खेआ जे हून तुस १०५ अपने साथिएं गी लेइयै
गुप्तरूप कन्ने पाटलिपुत्र गी परतोई जाओ । मदनमाला दे उपकार
दा बदला चुकाइयै अम्मी किश दिनें तक तुंदे कच्छ उत्थें आई
जाड । ए आखियै राजा नै अपने मंत्री बुद्धिवर ते १०५ राजपुत्रें
गी पाटलिपुत्र भेजी ओड़ेआ । उंदे चली जाने बाद ओ रात राजा
नै मदनमाला कन्ने कट्टी । सबेरै शनान - संध्या कोला फारग
होइयै जप करने दे ब्हान्नै राजा मदनमाला दे मंदरै च जाई बैठा ।
उत्थें उसनै धनपति कुबेर दा वोआन कीता । धनपति दे परतक्ख
दर्शन देने पर राजा नै प्रार्थना कीती जे म्हाराज मेरा मानत
रक्खेदा पैह्ला वर मिगी अज्ज देओ । कुबेर नै आक्खेआ—राजन् !
मंग जेह्ड़ा वर लोड़चदा ऐ । राजा बोलेआ—म्हाराज ! इस मंदरै
च पंज विशाल सुन्ने दियां पुरुष - मूरतां बनी जान जेड़ियां नां
कदें घटन ते नां नष्ट होन । जिदे अंग त्रोड़ने पर बी फी ओ अंग
नमें निकली पौन । राजा दी गल्ल सुनियै ने 'तथास्तु' आखियै
कुबेर वाऊ दा रूप धारण करियै उत्थें गै छप्पी गोआ । उससै बेल्लै
राजा ने दिक्खेआ जे उस मंदरै च सुन्ने दियां पंज विशाल मनुक्ख
मूरतां खडोती दियां न । उनेंगी दिक्खियै राजा ततखिन गासै
रस्तै अपनी राजधानी पाटलिपुत्र गी आई गोआ । जिसेल्लै मंदरै
अंदर वड़े दे राजा गी मता चिर होई गोआ तां मदनमाला गी किश
खतोला होआ ते अपने प्रेमी दा पता करने लेई ओ उस मंदरै
अंदर गई । राजा ते उसी उत्थें कुतै नेई लब्बा पर उदै थां उसनै
सुन्ने दियां पंज विशाल मनुक्ख-मूरतां दिक्खियां । उनेंगी दिक्खियै
उसी वड़ा चरज लगा । ओ अक्खियां मली - मली
उनेंगी दिक्खन लगी । सोचन लगी जे अऊं सुखना दिक्खै करनी आं

जे सचमुच मेरा प्रेमी अवश्य कोई विद्याधर जां गंधर्व होग, जेड़ा
 ए पंज सुन्ने दियां मनुक्ख - मूरतां मिगी देइयै आपूँ गासै रस्तै
 अपने लोक गी चली गेआ ऐ। पर उंदे विना अऊं इन्हें मूरतें गी
 के करां। मेरे लेई ए मूरतां छड़ा भार गै न। ओ घवराई दी
 मेह्लै अंदर ते वागै च अपने प्रेमी गी तुप्पन लगी। पर जिसेल्लै
 कुतै नेई लब्बा तां वरलाप करन बैई गई। उदे वजोग थमां दुखी
 होइयै अपना शरीर वी त्यागने गी तेआर होई गई। नौकर - चाकर
 सारे उसी आत्महत्या कोला रोकन लगे। ओ आखन लगे जे ओ
 कोई दिव्व पुरुष हा। ओ जरूर तुसेंगी फी मिलग। इदे करी
 मदनमाला गी किश दलासा मिलेआ। उसनै परतिज्ञा कीती जे
 छें म्हीनैं अंदर मेरा भरता मिगी नेई मिलेआ तां में अग्गी च
 परवेश करी जांड। ए परतिज्ञा करियै उसने ब्रह्मचर्य दा वर्त
 धारण करी लेआ। नित्त ओ ब्राह्मणें गी दान देन लगी। इक
 वारी उसने उनें पञ्जें मनुक्ख - मूरतें चा इक मूरता दियां दोए
 वामां भनियै ब्राह्मणें गी दान करी दित्तियां। दूए दिन ओ ए
 दिक्खियै दंग गै रेई गई जे ओ खंडत मूरत जिदियां वामां भन्नी
 ओड़ियां हियां फी सावत होई गई दी ऐ। उदियां खंडत वामां फी
 उग्गी आई दियां हियां। उसनै बाकी चौं मूरतें दियां वामां वी
 कप्पियै ब्राह्मणें गी दान करी दित्तियां। दूयै दिन चौनें मूरतें दियां
 खंडत वामां वी फी जम्मी आइयां। इन्हें मूरतें गी अक्षय अविनाशी
 जानियै मदनमाला इंदियां वामां कट्टी - कट्टियै रोज ब्राह्मणें
 ते वेदपाठिएं गी दान देन लगी। उदी दान - वीरता दी परसिद्धि
 सुनियै संग्रामदत्त नां दा इक गरीब वेदपाठी ब्राह्मण उदै घर आया।
 मदनमाला नै उदी पूजा करियै चार सुन्ने दियां वामां उसी दान
 दित्तियां। उसनै मदनमाला दी छे म्हीने वाद आत्महत्या करी
 लैने दी घोर परतिज्ञा वी सुनी। ओ ब्राह्मण उनें सुन्ने दिएं वामें
 गी ऊटें पर लदियै पाटलिपुत्र लेई गेआ। उत्थें जाइयै राजा
 विक्रमादित्य गी मदनमाला दी दान - वीरता ते घोर मरण - परतिज्ञा
 दी खबर वी सुनाई। राजा गी जिसेल्लै पता लग्गा जे मदनमाला
 मेरे वजोग च मरै करदी ऐ तां राजकाज मंत्रिएं गी सौंपियै आपूँ

ओ गासै रस्तै प्रतिष्ठान नगर पुज्जा । उसी दिक्खियै मदन-
माला दा हिर्दा खिड़ी उट्ठेआ । उसने राजा गी अपने भुजपाश
च जकड़ी लेआ ते अक्खी चा लगातार अत्थरुएँ दी तंदीड़ी बगान
लगी । राजा नै मदनमाला गी आपवीती सारी कहानी सुनाई,
जियां ओ इक योजना बनाइयै बुद्धिबल कन्ने राजा नरसिंघ गी
जित्तन आया, जियां उसनै भिक्खु प्रपंचबुद्धि दा बध कीता, ते
धनपति कुबेर कोला वर प्राप्त कीता, कियां ब्राह्मण वेदपाठी कोला
तेरे दान दी मैहूमा ते मरण परतिज्ञा सुनी । ए सारियां गल्लां
आखियै राजा बोलेआ—मदनमाला ! तू मेरी इक होर गल्ल
सुन । इत्थूँ दा राज नरसिंघ शस्त्रेँ कन्ने नेईं जित्तेआ जाई सकदा ।
इसलेईं तेरा सहारा लेइयै अऊं उसी अपने वसै च करनां
चाहन्नां । में सुनेआ ऐ ओ तेरा भगत बी ऐ । विक्रमादित्य दा
आक्खेआ सुनियै मदनमाला नै अपने द्वारपालें ते नौकरें गी
सद्देआ ते उनेंगी आखन लगी जे राजा नरसिंघ मेरे मैहूलें च
आइयै पुच्छै जे इत्थें कुन रौहूँ दा ऐ तां तुसें आखना जे इत्थें
मदनमाला दे मैहूलें च राजा विक्रमादित्य ठैहूँरे दा ऐ । फी
मदनमाला अपनी प्रतीहारी गी आखन लगी जे जिसेल्लै राजा
नरसिंघ इत्थें आवै तां उसी अंदर औंदे गी मत रोकना ।

मदनमाला दी दानवीरता दी कहानी प्रतिष्ठान दे राजा
नरसिंघ दे कन्ने तक बी पुज्जी । इक दिन ओ सुवर्णमय मनुक्खें
गी दिक्खने लेई मदनमाला दे घर आई गेआ । द्वारपालें उसी
बिना रोके मैहूलें दे अंदर जान दित्ता । जियां ओ मैहूलें दे
अंदर दाखल होआ बंदीजनें उदा गुणगान शुरू करी दित्ता ।
मैहूलें दे नौकर - चाकरें कोला राजा गी पता लगा जे इत्थें
पाटलिपुत्र दा राजा विक्रमादित्य ठैहूँरे दा ऐ । राजा नरसिंघ
सोचन लगा जे ओहो ए राजा किन्ना तेजस्वी ते निडर ऐ । इसने
अपने इत्थें औने दी खबर पैहूलें गै सारें च फैलाई ओड़ी ऐ ।
ए कल्ला गै मेरी राजधानी च उठी आया ऐ । इस जुगती कन्ने
इसनै मिगी जित्ती लेआ ऐ । में समजनां जे खुल्ला - मखुल्ला कल्ले
आएदे गी मारना महापाप ऐ । ए सोचियै राजा नरसिंघ मैहूलें

दे अंदर नधड़क उत्थें चली गोआ जित्थें राजा विक्रमादित्य बैठा दा हा । दोए राजे खुशी कन्ने आपू चें मिले ते इक दूए दा कुशल पुच्छन लगे । ए मलाप मदनमाला दे सामने होआ । राजा नरसिंघ नै सुन्ने दियां मनुख - मूरतां दिक्खने दी इच्छा प्रगट कीती । राजा विक्रमादित्य नै सारी रामकहानी भिक्खु प्रपंचबुद्धि कोला लेइयै अंत तक आखी सुनाई । राजा नरसिंघ विक्रमादित्य दी खेचरी विद्या ते अद्भुत शक्ति दे गुणें गो सुनियै बड़ा प्रभावित होआ । उसी उदार ते निष्कपट जानियै प्रतिष्ठान दे राजा नै विक्रमादित्य कन्ने मित्रता करी लेई । राजा नरसिंघ नै राजकीय शानशौकत कन्ने पाटलिपुत्र दे राजा विक्रमादित्य दा बड़ा स्वागत कीता । बुद्धिबल कन्ने राजा नरसिंघ गो अपना परम मित्र बनाइयै ते मदनमाला गो अपने कन्ने लेइयै विक्रमादित्य अपनी राजधानी गो परतोआ । राजा विक्रमादित्य दे पवित्र प्रेम च वज्जी दी मदनमाला नै देश घर - बाहूर त्यागियै राजा दा साथ दित्ता । घर त्यागने दै समै उसनै अपनी सारी सम्पत्ति ब्राह्मणें गो दान देई दित्ती ।

ए कथा सुनाइयै मरुभूति नरवाहनदत्ता गो आखन लगा युवराज जी ! कदें - कदें बेस्वाएं च बी नेआ सच्चा ते सुच्चा प्रेम हुंदा ऐ जिदे परभाव च आइयै ओ अपने प्रेमी दे सिरै परें सब किश वारी दिदियां न । कुलीन सती जनानिएं दा ते के आखना । मरुभूति दे मुंहा दा ए कहानी सुनियै नरवाहनदत्ता ते उदी नमीं लाड़ी रत्नप्रभा दा मता मनोरंजन होआ ।

पजमा तरंग

इस्सै परसंगै च मंत्री हरिशिख नरवाहनदत्ता गो आखन — लगा—महाराज ! कुलीन जनानिएं लेई पति कोला परें संसारै च होर कोई वस्तु श्रेष्ठ नेई । इस सरबंदै च अऊं तुसेंगी इक कहानी सनानां :—

वर्धमान नगरै च वीरभुज नां दा इक धर्मी राजा राज करदा हा । उदियां मतियां रानियां हियां । पर उनें सबनें च गुणवरा

उसी मती प्यारी ही । राजा दियां इन्नियां रानियां हियां पर उदै
 घर कोई संतान नेईं ही । राजा ने श्रुतवर्धन नां दे अपने राजबैद गी
 सहिए पुच्छेआ—बैद जी ! तुंदी समझा च कोई नेईं दुआ ऐ जिदे
 खाने करी मेरै घर पुत्तर दा जन्म होऐ । बैद नै जवाब दित्ता—
 म्हाराज ! ए कामना पूरी होई सकदी ऐ जे सरकार मिगी इक
 जंगली बकरा मंगवाई देन तां । राजा लेई जंगली बकरा
 मंगवाना केहू मुशकल हा । उसनै बैद गी तुरत बकरा मंगवाई
 दित्ता । बैद नै उस बकरे दे मास कोला रानिएं लेई इक रस
 तेआर कीती । सवनें रानिएं गी सहिए राजबैद ने बरावर मात्रा
 च ओ सारा रस रानिएं गी पलाई दित्ता । उससै बेल्लै राजा
 उत्थे आया । ए दिक्खियै जे उनें रानिएं च उदी परमप्यारी रानी
 गुणवरा शामिल नेईं ऐ राजा गी गुस्सा आया । ओ बैद गी
 आखन लगा—जिस रानी दा इत्थे होना मता जरूरी हा उयै इत्थे
 नेईं । उससै गी तुस भुल्ली गे । ए केहू तमाशा ऐ । उदे लेई तुसें
 कोई दुआ नेईं रखी । बैद नै रसोइए गी पुच्छेआ जे बकरे दा
 कोई अंग वाकी बचेदा ऐ ! ओ आखन लगे—छड़ा इक सिङ गै
 बचेदा ऐ होर किश नेईं । बैद नै आखेआ—अच्छा चलो सिङ गै लेई
 आओ । बैद नै उस सिङ थमां इक रस तेआर कीता । उदे च
 चूर्ण मिलाइयै ओ रानी गुणवरा गी पिलाई ओड़ेआ । इस आसव
 दे पीने करी नड़िनवै रानिएं गी गर्भ ठेहूरी गेआ । ते समा
 औने पर हर इक रानी नै पुत्तर गी जन्म दित्ता । गुणवरा नै
 वाकी रानिएं कोला किश देर कन्ने गर्भ धारण कीता । ते नौमें
 महीनें उसनै वी पुत्तर गी जन्म दित्ता । राजा नै गुणवरा दे पुत्तरै
 दा नां शृंगभुज रखेआ की जे ओ सिंग दे मास कोला पैदा होएदा
 हा । शृंगभुज आयु च वाकी राजकुमारें कोला लौहका हा पर
 गुणें च सारें कोला अगें हा । इनें राजकुमारें दे जन्म पर राजा
 नै बड़ा उत्सव मनाया । शृंगभुज राजकुमार रूप च कामदेव दे
 समान, धनुर्विद्या च अर्जुन समान ते वलै च भीमसेन दे समान
 पराक्रमी निकलेआ । वीरभुज राजा दियां वाकी रानियां रानी
 गुणवरा गी पुत्रवती दिक्खियै उदे कन्ने खार करन लगियां । इनें

सारिएं च अयशोलेखा नां दी रानी वड़ी दुमृ ही । उसनै वाकी
 रानिएं कन्ने सलाह् करियै गुणवरा दे विरुद्ध इक शड़यंत्र रचेआ ।
 इक दिन जिसेल्लै राजा उदे मैह्लें च आया तां ओ वड़े वसोसै
 कन्ने राजा गी आखन लगी—म्हाराज ! तुस लोकें दी रक्षा
 करदेओ पर अपने घरै च सलगी दी अग्गा गी नेईं बुझाई सकदे ।
 राजा ने हरान होइयै पुच्छेआ—रानी ! अऊं तुन्दा मतबल नेईं
 समजेआ । जरा खोलियै गल्ल करो । रानी बोली—राजा जी !
 सुरक्षित नां दा तुन्दा डयोढी अफसर तुं दी पटरानी गुणवरा कन्ने
 फसेदा ऐ । इक उयै जनाने मैह्लें अंदर जाई सकदा ऐ होर कोई
 मर्द नेईं जाई सकदा । जनाने मैह्लें दे सारे नौकर - चाकर इस
 गल्ला दी चर्चा करदे न । रानी दी जवानी ए गल्ल सुनियै राजा
 मता चिर सोच - विचार च डुब्बेआ रेआ । जनाने मैह्लें च जाइयै
 उसने इक - इक रानी कोला पुच्छेआ । उनें सबनैं अयशोलेखा दी
 गल्लां दा समर्थन कीता कीजे उनें सारिएं मिलियै गुणवरा दे
 विरुद्ध शड़यंत्र रचेदा हा । लम्में चौड़े विचार दे बाद राजा इस
 निर्णै पर पुज्जा जे रानी गुणवरा ते डयोढी दा अफसर निर्दोष
 न । उन्दे विरुद्ध ए तोहमत वित्कुल भूठ ऐ । फी बी राजा ने
 इस मामले दी परख करने दी जरूरत समझी । दूऐ दिन उसने
 रनवास दी डयोढी दे अफसर सुरक्षित गी सद्देआ ते मिथ्या क्रोध
 करियै आखेआ जे मिगी जोतशी कोला पसा लग्गेआ ऐ जे तू
 ब्रह्महत्या कीती ऐ इसलेईं जिन्नां चिर तू कश्मीर दे सबनैं तीर्थ
 दा दरशन करियै इस पाप थू छुटकारा नेईं पांदा तुगी अपनी
 सेवा च रक्खने गी तेआर नेईं । इस जुगती कन्ने राजा ने सुरक्षित
 गी तीर्थयात्रा करने लेईं टोरी ओड़ेआ । बाद च ओ रानी गुणवरा
 दे मैह्लें च गेआ । राजा गी दुआस दिक्खियै रानी बोली—
 म्हाराज ! अज्ज तुस मिगी किश मूरभाए दे लगदेओ के गल्ल
 ऐ ? राजा आखन लगा—अज्ज मिगी इक ज्ञानी ने दस्सेआ ऐ
 जे किश चिर अऊं तुसैंगी भोरे च पाइयै आपू उन्नां चिर ब्रह्मचर्य
 दा पालन करां । जे इयां नेईं कीता तां मेरा राज नष्ट - भ्रष्ट
 होई जाग । ते तुस बी शरीर त्यागी देगेओ । ए सुनियै गुणवरा

आखन लगी—पतिदेव ! तूस मिगी अज्ज गै भोरै पाई ओड़ो ।
 पति दे भले गित्त जे प्राण वी चली जान तां मेरे लेई इदे कोला श्रेष्ठ
 होर के गल्ल होई सकदी ऐ । इस लोकै च ते परलोकै च वी पति गै
 जनानिएं दा परम देवता ऐ । गुणवरा दी गल्ल सुनियै राजा दी
 अक्खें च अत्थरू आई गे । सोचन लगा जे इदे च शक्क नेई जे
 गुणवरा निष्पाप ऐ ते इयां गै सुरक्षित वी निरदोष ऐ । राजा नै
 गुणवरा लेई उस्सै दे मैह्लें च भोरा वनवाई दित्ता जिदे च रानी
 रौहूत लगी पेई । हून इस शडयंत्र दे रचने आली रानी अयशोलेखा
 अपने पुत्तर निर्वासभुज गी आखन लगी—पुत्रा ! गुणवरा गी ते
 असें भोरै च सुटाई ओड़ेआ ऐ जित्थें पेई पेई ओ गली सड़ी जाग ।
 हून कोई नेई जुगती सनाओ जे उदे पुत्तर शृंगभुज गी देस नकाला
 होई जा । निर्वासभुज ते वाकी रानिएं दे पुत्र शडयंत्र रचन लगे
 जिदे करी शृंगभुज सदा लेई देस छोड़ियै विदेस चली जा । इक
 दिन ए सारे राजकुमार अपने-अपने शस्तर लेइयै बाहूर निकले ते
 लगै भांत भांत दियां खेडां खेडन । उनें दिक्खेआ जे मैह्लें पर
 इक बड़ा गड़गील वगला आई बैठा ऐ । नेह् वगले गी दिक्खियै
 उनेंगी बड़ा चरज वभोआ । उद्दरा दा इक क्षयणक बावा लंघै
 करदा हा । ओ उनेंगी आखन लगा—राजपुत्रो ! ए वगला नेई ऐ ।
 ए कोई राक्षस ऐ जेड़ा नगरें गी नष्ट भ्रष्ट करदा फिरै करदा
 ऐ । इसी तूस तीर चलाइयै मारी ओड़ो । ए सुनियै नड़िनमें राजपुत्तरें
 वारी वारी वगले पर तीर चलाए, पर उन्दे चा कोई कोई राजपुत्र
 वी वगले गी नेई मारी सकेआ । अंत च राजकुमार शृंगभुज नै
 अपना धनुश चुक्केआ ते इक्कै तीर चलाइयै वगले गी घैल करी
 दित्ता । ए धनुश राजकुमार शृंगभुज दे पिता दा हा । ते तीर
 जेड़ा उसनै वगले पर चलाया सुन्ने दा हा । ए धनुशवाण उसी उदे
 शडयंत्री भ्राएं अंदरा दा आनी दित्ता हा । तीर दे लगदे गै ओ
 ते पलभरै च अक्खीं दै ओह्लै होई गेआ । ओ अपने कन्ने ओ सुन्ने
 दा तीर वी लेई गेआ जेड़ा उदे शरीरै च खुब्बे दा हा । जिसेल्लै
 शृंगभुज दे शडयंत्री भ्राएं दिक्खेआ जे सुन्ने दे वाण गी वगला

अपने शरीरै च लेई उड़्डेआ ऐ तां उनें करलाना शुरू करी दित्ता ।
 ओ शृंगभुज गी आखन लगे—तूं ओ सुन्ने दा तीर असेंगी आनी दे
 जेड़ा तूं बगले पर चलाया हा नेईं तां पता नेईं पिता जी साढ़ी
 के दुरदशा करदे न । खवरै ओ असेंगी इस गल्ली लेई घरा दा
 कड्डी देन । शङ्खचक्र भ्राएं दा ख्याल हा जे इस तीर दी खोजा च
 शृंगभुज सारी उमर गुजारी ओड़ग ते फी अपने राजै च मुंह, नेईं
 दस्सग । उन्दी गल्ल सुनियै शृंगभुज बोलेआ—भ्राओ ! करलाओ
 नेईं । अऊं राक्षस बगले गी मारियै उस सुन्ने दे तीर गी लेई
 आँग । ए आखियै ओ अपना धनुशवाण लेइयै उस पासे गी चली
 पेआ जिह्वा घैल बगला लऊ दियां बूदां चुआंदा उड़्डी गोआ हा ।
 चलदा चलदा ओ इक भयंकर जुआड़ा च जाई पुज्जा । उत्थें उसने
 इक विशाल नगरी दिक्खी । ओ उस नगरी दे इक बागै च वसां
 करने लेई बेई गोआ । किश चिर बैठे दे होआ तां उसने दिक्खेआ
 जे इक सुन्दर कन्या उदै पासै आबै करदी ऐ । उदे रूप गी दिक्खियै
 राजकुमार दा मन डोली गोआ । सोचन लगा—आहा ! विधाता
 नै नारी वी संसारै च इक चवात चीज बनाई ऐ । मिलाप च प्राण
 देने आली ते वजोग च प्राण हरने आली ऐ अमृत ते विख दी सांजी
 बेल ऐ । जिसेल्लै ओ कच्छ आई तां राजकुमार उसी पुच्छन
 लगा—सुन्दरी ! भला अऊं तुंदा पता थौह, पुच्छी सकनां । ओ
 कन्या बड़ी नम्रता ते मिट्टी वाणी च आखन लग्गी—कुमार
 जी ! ए धूमपुर नां दा नगर ऐ । इत्थें अग्निशिख नां दा राक्षस-राज
 राज करदा ऐ । अऊं रूपशिखा उदी पुत्तरी आं । तुं दे दिव्व रूप
 गी दिक्खियै अऊं अपना हिदै तुसेंगी अर्पण करी बैठी आं । हून
 तुस अपना परिचै देने दी किर्पा करो । जिसेल्लै शृंगभुज ने उसी
 अपनी राम-कहानी सनाई ते अपने औने दा कारण दस्सेआ तां
 ओ आखन लगी—में समजनियां तुं दे बरोवर तरलोकी च कोई
 हुआ धनुर्धारी नेईं । कीजे तुसें बगला रूपी मेरे पिता गी घाल
 करी दित्ता ऐ । ओ तुंदा सुन्ने दा तीर में सांवियै रक्खे दा ऐ ।
 मेरे पिता दा जखम उदै मंत्री महादेष्ट्र ने ठीक करी ओड़्डेआ ऐ
 ते हून ओ राजी-वाजी न । ए आखियै रूपशिखा अपने पिता

राक्षसराज कोल गई। उसी आखन लगी—पिता जी !
 श्रृंगभुज नां दा इक राजकुमार इत्थें आए दा ऐ। रूप, गुण, सुभा च
 उदे समान कोई दूआ संसारै च नेई। ओ मनुक्ख नेई देवता परतीत
 हुंदा ऐ। रूपशिखा दा पिता बोलेआ—पुत्तरी ! भामें मनुक्ख
 साढा भोजन ऐ पर जे उदे कन्ने व्याह् करने दा तेरा हठ ऐ तां तूं
 उसी मेरे कच्छ सद्दी लेई आ। में उसी दिक्खना चाह्नां। पिता
 दे आखने पर रूपशिखा उसी अपने पिता कोल लेई आई। राक्षस-
 राज अग्निशिख श्रृंगभुज गी आखन लगा जे तूं मेरी आज्ञा
 दा पालन करगा तां अऊं तुगी अपनी धी रूपाशिखा व्याही देंड।
 श्रृंगभुज उदी गल्ल मन्नी गेआ। अग्निशिख बोलेआ—अच्छा हून
 तूं जा ते न्हाई-धोइयै मेरे कोल आ। श्रृंगभुज जिसेल्लै चली गेआ
 तां ओ अपनी पुत्तरी रूपशिखा गी आखन लगा—अच्छा हून
 तूं जा ते अपनिएं सारिएं भैनैं गी मेरे कोल लेई आ। पिता दा
 हुकम सुनियै रूपशिखा बाह् आई। अगों श्रृंगभुज उसी बलगै
 करदा हा। रूपशिखा उसी आखन लगी कुमार जी !
 मेरियां सौ भैनां न। दिक्खने च अस सारियां इक्कै नेइयां आं ते
 साढ़ियां पशाकां वी इक समान न। असैं सबनें दे गलें च
 इक्कै नेह् हार न। असैं सबनें भैनैं गी कट्ठा करियै साढा पिता
 तुसेंगी आखग जे इंदे च जेड़ी तुस पसंद करदे ओ उदे गलै च
 जैमाला पाइऐ उसी वरी लौ। अऊं अपने हार गी गलै दे थां
 सिरै पर पाई लेंड। इस पशाना गी दिक्खियै तुसें जैमाला मेरे
 गले च पाई देनी। ए शारा देइयै रूपशिखा अपनी भैनैं कन्ने
 शनान करने लेई गंगा चली गई। सारियां भैनां गंगा - शनान
 करियै आइयां। राजकुमार श्रृंगभुज वी शनान करियै ते
 शैल पशाक पाइऐ उत्थें आई पुज्जा। सबनें धिएं गी कतारा च
 खडेरियै राजा अग्निशिख नै श्रृंगभुज दे हथै च जैमाला दित्ती
 ते आक्खेआ—मेरी जिस धी गी तूं पसंद करनां उदे गले च वनमाला
 पाई दे। श्रृंगभुज नै माला पगड़ी लेई ते दस्सी दी हारा दी पशाना
 कोला ओ वनमाला उसनै रूपशिखा दे गले च पाई ओड़ी। ए
 दिक्खियै अग्निशिख राक्षसराज श्रृंगभुज गी गलान लगा—कल्ल

तेरा ब्याह् अऊं रूपशिखा कन्ने करी देड। ए आखियै उसनै
 सारियां धियां अपने - अपने मैह्लें गी भेजी ओड़ियां। ओ जिसेल्लै
 चली गेआं तां राक्षसराज नै शृंगभुज गी सद्देआ ते आकखेआ—
 पुत्तरा ! सुन तूं इनें दौनें वज्जे दे बैलें गी खोल्लियै नगरै दे बाह्र
 खेत्तरै च लेई जा। उत्थें जाइयै ए करेआं जे हल चलाइए सौ खारी
 तिल राइए आई जा। शृंगभुज बैलें गी लेइयै रूपशिखा कोल
 आया ते उसी राजा दा नमां हुकम सुनाया। रूपशिखा आखन
 लगी—तुस चिंता नेईं करो। तुस नगर दे बाह्र खेत्तरें च जाओ
 उत्थें तुसेंगी सारा कम्म बने बनाये दा मिलग। जिसेल्लै शृंगभुज
 खेत्तरें च पुज्जा तां दिखदा ऐ जे जमीना च अगें गै हल्ल चलो
 दी ऐ ते सो खारीं तिल राहें गेदे न। ए सारा चमत्कार रूप-
 शिखा दी माया कन्ने होआ। उसनै जाइयै अग्निशिख अगें
 नवेदन कीता जे महाराज, जेड़ा सौ खारी तिल राह्ने दा कम्म
 तुसें दस्सेआ हा ओ सम्पूर्ण होई गेआ ऐ। ए सुनियै धूर्त राक्षसराज
 आखन लगा—नेईं - नेईं मेरे कोला भुल्ल होई गेई। ओ तिल
 खेत्तरें च राह्ने लेई नेईं हे, कुसै होर कम्मै आस्तै हे। हून तूं
 जा ते ओ सारे खेतरें च खलारे दे तिल चुनियै कट्ठे करियै मेरे
 कोल लेई आ। शृंगभुज नै राजा दा ए नमां हुकम आइयै रूप-
 शिखा गी दस्सेआ। रूपशिखा नै आकखेआ—चिंता मत करो खेतरें
 च खलारे दे सो खारी तिलें गी अऊं कट्ठा करी दिन्नी आं। ए
 आखियै रूपशिखा नै अपनी इंद्रजाल माया द्वारा उनें खेतरें च
 लक्खां कीड़ियां पैदा करी दित्तियां जिनें ओ राहें दे सारे तिल
 कट्ठे करी दित्ते। तिलें गी कट्ठे होए दे दिक्खियै राक्षसराज
 अग्निशिखा मता खिभेआ। ओ शृंगभुज गी आखन लगा—सुन
 गवरूआ मेरी गल्ल। इत्थूं दा चार क्रोह् दूर जंगलै च इक
 गरसाल शिवाला ऐ। उत्थें मेरा भ्रा धूमशिख रौह्दा ऐ। तूं जा
 ते मेरे पासेआ उसी साद्दा देई आ जे भ्यागा ओ नौकरें समेत
 रूपशिखा दे ब्याह् पर आवै। ए साद्दा देइयै तूं परतोई आमेआं।
 भ्यागा अऊं रूपशिखा कन्ने तेरा ब्याह् करी देड। शृंगभुज गी
 अपने भ्रा धूमशिख कोल भेजने दा उदा ए मतवल हा जे उत्थें

पुजदे गै धूमशिख उसी सारियै खाई ओड़ग ते शृंगभुज आला
 कंडा निकली जाग । शृंगभुज नै अग्निशिख दा नमां हुकम रूप-
 शिखा गी जाइयै सुनाया । रूपशिखा नै राजकुमार शृंगभुज गी
 मिट्टी, पानी, कंडे ते अग्गा दी डारी देइयै आखेआ—तुस मेरे
 घोड़े पर सोआर होइयै नधड़क धूमशिख कोल जाओ । उत्थें
 पुज्जियै पैहलें शिवालै जाइऐ शिवें गी नमस्कार करनी । फी तुसें
 धूमशिख कोल जाइयै मेरे पिता दा साहा दिंदे गै घोड़े पर फराकी
 सारियै घोड़े गी सरपट दुड़ाइयै घरै गी परतोई औना । जे धूमशिख
 तुंदा पीछा करै तां पैहलें तुसें उदै पासै मिट्टी दी मुट्ठ सुट्ठनी ।
 जे ओ नेईं रुकै ते फी पीछा करै तां उदै पासै तुसें पानी दी चूली
 बगानी । जे फी की नेईं मुड़ै तां पैहलें उदै पासै कंडें दी मुट्ठ
 ते सबनें कोला अखीर अग्गा दा डारा उदै पर बगाना । ए करने
 करी तुस मेरे कोल सेईं सलामत पुज्जी जागेओ । रूपशिखा
 दियां दस्सी दियां सारियां जुगतियां मनै च धारण करियै शृंगभुज
 उदै तेज घोड़े पर सोआर होइयै धूमशिख दे ठकाने गी चली पेआ ।
 उत्थें पुज्जियै पैहलें उसनै शिवालै च गोरीशंकर ते बिनायक गी
 नमस्कार कीती फी धूमशिख राक्षस गी अग्निशिखै दा साहा
 दित्ता । साहा दिंदे गै ओ ततकाल घोड़े गी सरतोड़ दुड़ाइयै
 घरै पासै गी दौड़ेआ । दौड़दे - दौड़दे जदू उसनै मुड़ियै पिच्छें गी
 दिक्खेआ तां उसी पता लग्गा जे धूमशिख बड़े वेग लन्ने उदै
 पिच्छें दौड़दा आवै करदा ऐ । रूपशिखा दी दस्सी दी जुगती
 मतावक शृंगभुज नै अपने पिच्छें मिट्टी दी मुट्ठ बगाई ।
 धूमशिख दे रस्ते च ए मिट्टी दी मुट्ठ प्हाड़ वनियै खड़ोई गेई ।
 पर धूमशिख नै इसी परवाह् नेईं कीती । इसगी पलै च लंघियै
 ओ फी शृंगभुज दे पिच्छें दौड़न लगा । ए दिक्खियै राजकुमार
 नै उदै रस्ते च रूपशिखा दे दित्ते दे पानी दी चूली बगाई ।
 इदे बगाने करी धूमशिख दे अगें इक प्रवल नदी ठाठां मारन
 लगी पेई । पर राक्षस इस भारी नदी गी बी टण्पी आया । राक्षस
 गी अजें बी अपने पिच्छें नठदे दिक्खियै शृंगभुज नै बांह लोआरियै
 उदै पासै गी कंडें दी मुट्ठ सुट्ठी । कंडे सुट्ठने करी उदै ते

धूमशिखी दे वशकार इक भारी कंडे दा जंगल खड़ा होई
 गेआ । धूमशिख नै कुसै जुगती कन्ने इस जंगलै गी वी पार करी
 लेआ ते अपनी दौड़ जारी रक्खी । ए जानिए जे हून इस राक्षस
 कोला छटकारा पाना मशकल ऐ श्रृंगभुज नै अपने वचा लेई
 रूपशिखा दा दस्सेदा अखीरी उपा वरतेआ । उसनै वांह, लोआरियै
 अग्गा दा डारा उदे रस्ते च वगाआ । डारा सुट्टने दी देर ही
 जे राक्षस दे अगें चतरफी दावानल दियां ज्वालां भड़की पेइयां ।
 इस दावानल गी पार करना राक्षसै लेई असम्भव हा । नराश
 होइयै ओ पिच्छे गी परतोई गेआ । उदे थमां छुटकारा पाइयै
 राजकुमार श्रृंगभुज धूमपुर पुज्जा । आइयै उसनै सारी घटना
 रूपशिखा गी सुनाई । परन्त उसनै राक्षसराज अग्निशिख गी जाई
 खबर दित्ती जे ओ धूमशिख गी साद्दा देई आया ऐ । अग्निशिख
 गी उसी जींदा दिक्खियै वड़ा चरज वजोआ । सोचन लगा ए
 मनुक्ख मेरे भ्रा धूमशिख दे हत्था दा कियां वची आया ऐ । ए
 मनुक्ख नेईं मलूम हुंदा । अवश्य कोई दिव्व प्राणी ऐ । जे नेह्
 दिव्व प्राणी गी अऊं अपनी धी व्याही देआं तां केह् हर्ज ऐ ।
 दूऐ दिन उसनै अपनी पुत्तरी रूपशिखा दा व्याह्, राजकुमार
 श्रृंगभुज कन्ने करी दित्ता । व्याह्, दे वाद लाड़ी म्हाराज मताचिर
 धूमपुर गै रेह् । इक दिन श्रृंगभुज रूपशिखा गी आखन लगा—
 प्यारी ! अऊं चाह्, नां जे हून अस वर्धमानपुरै गी चली पौचै ।
 इसलेई तूं अपने पिता दी आज्ञा लै । रूपशिखा बोली मेरा पिता
 मिगी धूमपुर कोला वाह्,र जाने दी आज्ञा कदे नेईं देन लगा ।
 इसलेई अस इत्थूं दा चुपचाप निकली चलचै तां चंगा होग । जे
 ओ साढ़ा पीछा करग तां अऊं उसी अपनी माया दे परभाव कन्ने
 भरमै च पाई देड । दूऐ रोज दोए शरवेग घोड़े पर सोआर होइयै
 वर्धमानपुर गी चली पे । रूपशिखा नै अपने कन्ने अनमोल मणि
 माणकें दी पटारी ते सुन्ने दा तीर वी लेई लेआ । अग्निशिख गी
 जिसेल्ले पता लगा जे उदी धी ते जोआई दोए धूमपुरा दा चोरी
 निकली गे न तां ओ उनेंगी पगड़ने लेई गासै रस्तै दौड़ेआ ।
 वदलें दी गर्जा आंगर उदे औने दा शब्द सुनियै रूपशिखा गी

पता लगी गेआ जे उदा पिता आवै करदा ऐ । उसनै अपने पति
 गी ते घोड़े गी कुतै रुखें दे भाड़ै च छपाई ओड़ेआ ते आपूँ मरदै
 दा भेस बनाइयै जाड़ै च लकड़ियां कट्टन लगी पेई । इन्ने
 चिरै च राक्षसराज अग्निशिख उत्थें आई पुज्जा । ओ मरदै दे भेसै च
 बदली दी अपनी धी नेई पशानी सक्केआ । ओ उसी पुच्छन लगा—
 की भेई तूँ इस रस्तै कोई मरद जनानी घोड़े पर चढ़े दे जंदे
 दिक्खेआ । रूपशिखा नै जवाब दित्ता—लकड़ियां कटदा-कटदा अऊं
 थकेमें कन्ने चूर होई गेदा आं । मिगी नेई पता जे इहरें कोई
 जनानी - मर्द लंघे नक नेई । अज्ज राक्षसराज अग्निशिख मरी
 गेआ ऐ । उदे संस्कार लेई अऊं लकड़ियां बड्डै करनां । ए सुनिए
 अग्निशिख सोचन लगा भला अऊं सचमुच मरी गेदा आं । तां फी
 मिगी रूपशिखा गी तुप्पने दी केहू लोड़ ऐ । अऊं घर जाइयै अपने
 नौकरें कोला पुच्छनां जे भला अऊं सचमुच मरी गेदां आं । ए
 सोचियै ओ घरै गी परतोई गेआ । घर जाइयै जिसेल्लै उसी
 अपने नौकरें - चाकरें थमां पता लगा जे ओ जिए करदा ऐ तां
 ओ फी रूपशिखा गी तुप्पने लेई गेआ । रूपशिखा गी फी पता
 लगी गेआ जे उदा पिता आवै करदा ऐ । उन्न अपने पति ते
 घोड़े गी फी कुसै भुंगै च छपाई ओड़ेआ । आपूँ मर्दै दै भेसै
 च हत्थै च चिट्ठी लेइयै चलन लगी पेई । इन्ने चिरै च अग्निशिख
 उत्थें आई धमकेआ । ओ उसी पुच्छन लगा—की भाई राहिया !
 तूँ इस रस्तै जंदे कोई जनानी मर्द दिक्खे न । पुरश-भेस रूपशिखा
 लम्मे साहू लेइयै आखन लगी—अज्ज राक्षसराज अग्निशिख
 जुद्धै च बुरा घैल होई गेआ ऐ । उसने निश्चा करी लेआ ऐ
 जे मरने दे पैहूँलें ओ राज अपने भ्रा धूमशिख गी देई जाग ।
 इसलेई उनें ए चिट्ठी लिखियै मिगी धूमशिख गी देने लेई दित्ती
 ऐ । ए चिट्ठी लेइयै अऊं उदे भ्रा धूमशिख गी देने गित्तै जा
 करनां । ए सुनियै अग्निशिख सोचन लगा—भला अऊं सचमुच
 गै जुद्धै च लड़दा - लड़दा घैल होई गेआ हा । इस भरमै दे
 चक्कर च पेदा ओ अपनी राजधानी धूमपुर गी परतोई गेआ ।
 रूपशिखा दा मायाजाल उदे पर नेआ छाई गेआ जे ओ ए नेई

जानी सक्केआ जे ओ चंगा-भला ऐ, बैल नेईं होए दा । लोक उदी मूर्खता पर मुंह दबू देइयै हस्सन लगे । ओ अपनी मूर्खता पर इन्ना शर्मिदा होआ जे उसनै रूपशिखा दी खोजा दा वचार छोड़ी दित्ता ।

परंत राजकुमार शृंगभुज ते रूपशिखा शरवेग घोड़ें पर सोआर होइऐ वर्धमानपुरै गी चली पे । चिरकाल थमां देस त्यागियै गेदे पुत्तर शृंगभुज गी नमीं लाड़ी समेत औंदे सुनियै उदा पिता राजा वीरभुज अगें आइयै पुत्तर कन्ने मिलेआ । पुत्तर शृंगभुज ते नूंह, रूपशिखा दोए घोड़े परा उतरियै राजा दे पैरें पर डिग्गी पेई । राजा ने दोनों गी गल्लें लाया । ते बाजे - गाजे कन्ने मैह्लै अन्दर उंदा परवेश कराया । पिता ने पुत्तर कोला चानचक मेह्लै चा गैव होने दा कारण पुच्छेआ । पुत्तर ने पिता गी आद थमां अन्त तक सारी घटना वर्णन करियै सनाई । उसनै बाकी सारे भ्राएं गी सहियै उनेंगी ओ सुन्ने दा तीर दित्ता । राजा वीरभुज गी जिसेल्लै सारे शङ्खत्र दा पता लगा तां उस बाकी सब रानियें ते उंदे पुत्तरें कन्ने सब सरबन्ध त्रोड़ी दित्ते । उस दिनै थमां ओ छड़ा रानी गुणवरा ते उन्दे पुत्तर शृंगभुज कन्ने गै प्यार करन लगा रातीं राजा अयशोलेखा रानी दे मैह्लै च गेआ । राजा दे औने थमां परसन्न होइयै रानी ने उस रातीं खूब मधुपान कीता । शराव दे नशे च मस्त होइयै ओ रातीं बकन लगी जे रानी गुणवरा निरदोश ही । जे अस उदे पर तोहमत नईं लांदियां तां राजा अज्ज मेरे मेह्लै च कियां औंदा । उदे बकवास गी सुनियै राजा गी निश्चा होई गेआ जे रानी गुणवरा निरदोस ऐ । ओ इस पापन रानी दे मैह्ला दा निकली आया । औंदे गै उसनै रानी गुणवरा गी भोरे चा बाहूर कडुआ । लम्में वजोग ते वाद दोनों दा फी मलाप होआ । राजा नै गुणवरा ते उदे पुत्तर शृंगभुज दे देस - नकाले दे शङ्खत्र दी सारी कथा सुनाई । उसी पुत्तर ते नूंह, कन्ने मलाया । शृंगभुज नै माता - पिता दे सामनै रूपशिखा दे कीते दे उपकार सुनाए । इनेंगी सुनियै रानी गुणवरा

बड़ी परसन्न होई । आखन लगी—पुत्तरा ! अऊं सुनियै हरान होई
 गई आं जे रूपशिखा ने तेरे हित लेई केहू किश उपा नेई कीते ।
 तेरे लेई इसने देश, सरबन्धी ते अपने सारे सुख त्यागे । ए रूपशिखा
 मेरी नूंह, पतिव्रता सती नारियें दी सिरताज ऐ । ए गल्लां अजें
 होऐ गै करदियां हियां जे जनाने मैहल दी डयौड़ी दा अफसर
 जिदे पर अयशोलेखा रानी नै तोहू मत लाई ही ते जेड़ा तीर्थयात्रा
 करन गेआ हा जात्रा समाप्त करियै लम्मे चिरै वाद घर परतोई
 आया । उसने आइयै राजा दे चरण छूते राजा गी डयौड़ी अफसर
 सुरक्षित ते गुणवरा दी निरदोशता जाद आई गई । गुस्से च
 आइयै उसनै हुकम दित्ता जे जिनें पापन रानिएं गुणवरा दे
 वरखलाफ शडयंत्र रचियै उसी भोरे च सुटाया हा । उनें सबनें
 रानियें गी पगड़ियै हून अऊं भोरे च पोआना । तां इनेंगी पता
 लगगा जे निरदोश मनुखै पर दोश लाना किन्ना पाप - कर्म ऐ ।
 ए सुनियै गुणवरा राजा दे पैर पगड़ियै आखन लगी—नां महाराज
 नां, ए नेई करेओ । जे सरकारा ने उनें मेरियें सौकनें गी भोरे च
 पाना ऐ तां मिगी वी उन्दे कन्ने गै भोरे च पाई ओड़ो । अऊं
 अपनियें भैनें गी भोरे च तड़फदियां नेई दिक्खी सकदी । ए
 आखियै उसने अपनी शडयंत्री सौकनें दे वधन गी रुकाई दित्ता ।
 उस दिनै कोला लेइयै राजा वीरभुज दे हिदै च गुणवरा दा होर
 वी मता आदर मान बधी गेआ । नेई रानी पाइयै राजा अपने
 आप गी धन्न ते पुन्नवान मन्नन लगा । राजा ने अपने वाकी नड़िन्नवै
 पुत्तरें गी अपने पापें दा प्राश्चित करने लेई तीर्थजात्रा पर भेजी
 दित्ता । भ्राएं गी तीर्थजात्रा पर जंहे दिक्खिये राजकुमार शृंगभुज
 पिता अगें प्रार्थना करन लगा जे महाराज ! सरकार मेरे इनें
 भ्राएं दे इस अपराध गी माफ करी देन । शृंगभुज दे आखने पर
 राजा ने वाकी नड़िन्नवै राजकुमारै दा कसूर माफ करी दित्ता । उस
 दिनै थमां सारे राजकुमार शृंगभुज गी अपना प्राणदाता समझियै
 उदा सच्चे दिलै कन्ने आदर - सम्मान करन लगे । अपने गुणें
 कारण राजकुमार शृंगभुज प्रजा दा प्यारा बनी गेआ । इनें गुणें
 कारण गै राजा वीरभुज ने उसी अपना युवराज चुनेआ । युवराज

वनियै शृंगभुज सेना लेइयै दिग्विजै लेई चली पेआ । उसनै अपने पराक्रम कन्ने नेक राजें गी जित्तियै अपने अधीन करी लेआ । उदे सारे भ्रा वी उदे परम भगत बनी गे । अपने भुजवल कन्ने चक्रवर्ती दी पदवी प्राप्त करियै शृंगभुज ने माता पिता ते संत म्हातमें दी शीरवाद कन्ने चिरकाल तगर अखंड राजसुख भोगेआ ।

ए कथा सुनाइयै मंत्री हरिशिख युवराज नरवाहनदत्त गी आखन लगा—म्हाराज ! गुणवरा जनेई सस्स ते रूपशिखा जनेई नूह् संसारै च मत्तियां घट्ट मिलदियां न ।

छमां तरंग

हूऐ दिन रत्नप्रभा दे मैह्लें च गोमुख ते बाकी सारे मंत्री आये । मंत्री मरुभूमि नै उस रातीं मधुपान कीता हा । इसलेई सुस्ती दे कारण ओ उत्थें किश बलम्ब कन्ने आया । हासे-हासे च गोमुख नै उसी आकखेआ जे यौगंधरायण मुख्यमंत्री दे पुत्तर होइयै वी तुसंगी राजनीति नेई आई । सबेरै शराव पीऐ तुस इस दशा च स्वामी दे सामनै औंदे ओ । मरुभूमि नशे दी हालता च गुस्से कन्ने बोलेआ—तू कुन हुन्नां मिगी ए गल्ल आखने आला । इस मामले च मिगी मेरे स्वामी आखी सकदे न । ओए इत्यक देआ पुत्तरा ! तू कुन ए मिगी इयां रमज मारने आला । गोमुख हस्सिए बोलेआ—स्वामी अपने मुंहा सेवक दे दोश नेई दसदा । उदे कोल रौहू ने आले गै सेवक दे दोश गी प्रगट करदे न । अऊं भामें इत्यक दा पुत्तर आं ते तुस मुख्यमंत्री ओ । तुंदा जड़पुना गै दसदा ऐ जे तुस सचमुच मुख्यमंत्री ओ, पर मिगी इस गल्ला दा चर्ज लगदा ऐ जे अजें तक तुं दे सिरै पर सिङ की नेई उगगे मरुभूमि नै जवाब दित्ता तेरा नां अगों गै गोमुख ऐ, इसलेई सिङ तेरे गै सिरै पर सजदे न । तेरे च जोड़ा धीरज नेई उदे कोला मलूम हुंदा ऐ जे तू वर्णशंकर वी ऐ । ए सुनियै सभा च बैठे दे सारे जने खिड़खड़ाइऐ हस्सी पे । इदे परा खिजियै गोमुख आखन लगा—मरुभूमि इक नेआ हीरा - मणि ऐ जे सौ जतन

करने पर वी इदे अंदर गुण (धागा) संजारने लेई मोरी करना सम्भव नेई । इस परसंगै च अऊं तुसंगी इक दृष्टांत सुनानां ।

तपोदत्त ब्राह्मण : प्रतिष्ठान नगरै च तपोदत्त नां दा इक ब्राह्मण हा । जदू ओ अजें बालक हा तां पिता नै उसी पढ़ाने लेई बड़ा जतन कीता । पर ओ किश नेई पढ़ेआ । जिसेल्लै ओ स्याना होआ तां सब लोक उदी निचा करन लगे । तपोदत्त बड़ा दुखी होआ । इस पाप दे प्राश्चित्त लेई ओ गंगा कनारे जाइयै तप करन लगा । उदी कठोर तपस्या दिक्खियै ब्राह्मणै दे भेस च इंद्र उदे कोल आया । गंगा दे कनारे बेइयै ओ सुक्की रेत पुट्टिऐ गंगा च सुट्टन लगा । उसी गंगा च सुक्की रेत सुट्टे दिक्खियै मौन त्यागिऐ तपोदत्त आखन लगा भलेआ लोका ! तूं ए नकम्मा कम्म की करै करनां । ब्राह्मण रूप इंद्र नै जवाव दित्ता अऊं गंगा दे आरपार जौने - जाने लेई पुल बना करनां । तपोदत्त बोलेआ— मूरखा ! गंगा च जिसेल्लै हाड़ आया तां तेरी सुट्टी दी सारी रेत रुढ़ी जाग तां फी पुल कियां पौग । इंद्र नै आक्खेआ—ब्राह्मण देवता ! जे तुगी कारण - कार्य सरबंधी इन्ना ज्ञान ऐ तां गुरुमुख कोला विना विद्या पढ़े ते पढ़े दे विषय पर विचार कीते विना मनुक्ख कियां विद्वान बनी सकदा ऐ । ब्राह्मणरूपी इंद्र दे समजाने पर तपोदत्त तपश्चर्या त्यागियै घरै गी चली गेआ ।

ए दृष्टांत सुनाइयै गोमुख आखन लगा—तपोदत्त जनेह् बुद्धिमान मनुक्खै गी सौखी सिक्ख दित्ती जाई सकदी ऐ । पर मरुभूमि जनेह् नौदाबुद्ध मनुक्खै गी सिक्ख काट नेई करदी । गोमुख दी गल्ला गी पुष्ट करने लेई मंत्री हरिशिख आखन लगा— इदे च विद वी शक्कशुवा नेई जे बुद्धिमान मनुक्खै दे दिलै पर सिक्ख - मत्ता वड़े तौले काट करदी ऐ । इस परसंगै च अऊं इक कथा सुनानां :—

विरूप शर्मा ब्राह्मण : वाराणसी नगरी च विरूप शर्मा नां दा इक बड़ा वदसूरत ते निर्धन ब्राह्मण राँह्दा हा । अपनी वदसूरती ते कंगाली कोला दुखी होइयै ओ धन ते शलैपा प्राप्त

करने लेई तपोवनै च तपस्या करन लगा । जिसेल्ले ओ तपस्या करै करदा हा तां इंद्र चाईं दे मारे दे गिद्दई दा रूप धारण करियै उदे कोल आई बैठा । मक्खिएं दे सताए दे वमारी दे मारे दे इस गंदे गिद्दई गी दिक्खियै विरूपशर्मा ब्राह्मण सोचन लगा चां दे मारे दे इस वचारे गिद्दई आंगर भयंकर रोगें दे सताए दे जीवजंत बी विधाता नै संसारै च बनाए न । इस रोगी गिद्दई कोला अऊं केई दर्जे चंगा आं । भला अऊं की हर समै दुखी रौह्नां । जे विधाता मिगी रोगी जां लूला—लंगड़ा बनाई दिंदा तां फी मेरा केहू बनदा । धन्न ऐं तूं प्रभु ! तूं मिगी नेआ नेई बनाया । ए वचारियै विरूपशर्मा ब्राह्मण तपस्या छोड़िऐ तपोवना दा घर उठी आया ।

ए कथा सुनाइयै मंत्री हरिशिख आखन लगा—बुद्धिमान मनुक्खै गी थोड़े जतन कन्ने बी समझाया जाई सकदा ऐ पर मूर्ख कन्ने किन्ना बी मत्था मारो ओ नेईं समजदा ।

मरुभूमि अजें तकर शराव दी मस्ती च हा । गोमुख ते हरिशिख दियां व्यंग-वाण रूपी गल्लां सुनिऐ उदा गुस्सा भड़की पेआ । तरारे च आइयै आखन लगा—ओ गोमुखा ! तेरे जनेहू लम्पट मनुक्खै दी वाणी च गै बल हुंदा ऐ वामें च नेईं । गालड़ू खुसरें कन्ने ब्हादरें दी लड़ाई इक शरम दी गल्ल ऐ । आखियै मरुभूमि जोशै च उसी खड़ोता ते गोमुखा कन्ने हत्थापाई करने गी तयार होई गेआ । उसी लड़ने गी तयार नरवाहनदत्त मुसकराया । उस नै इसी ठंडा करियै घर टोरी ओड़ोआ । दूऐ दिन सवेरै नरवाहनदत्त कोल फी सारे मंत्री आए । पैहू ले दिनै दी घटना गी याद करियै मरुभूमि अपने आपै च किश शर्मिदा हा । रानी रत्नप्रभा अपने पति नरवाहनदत्त गी आखन लगी—पतिदेव ! तुस धन्न ओ जिदे नेहू स्वामिभगत मंत्री न । ए सब पूर्व - जन्म दे चंगे कर्म दे गै फल ऐ । तपंतक आखन लगा—इदे च शक नेईं जे पूर्व जन्म दे शुभ कर्म दे कारण इस जन्म च चंगे सरबंधी ते मित्तर मिलदे न । इस परसंगै च अऊं तुसंगी इक कथा सुनानां ।

राजा विनयशील : विलासपुर दे नगरै च विनयशील
 नां दा राजा राज करदा हा । उदी रानी दा नां कमलप्रभा हा, जेड़ी
 राजा गी प्राणें कोला बी प्यारी ही । समां बीतने पर राजा गी
 बुढ़ापे नै आई घेरेआ । राजे गी चित्ता व्यापी गेई । अपने तरुणचंद्र
 नां दे बैद गी सहियै उसनै आखेआ जे मिगी कोई नेई दुआ बनाई
 देओ जे मेरा बुढ़ापा दूर होइयै मिगी फी जुआन्ती आई जा ।
 बैद राजा दी मूरखता पर अंदरो - अंदर हस्सेआ ते सोचन लगा जे
 राजा गी उल्लू बनाने दा भला मौका मिलेआ ऐ । आखन लगा —
 महाराज ! जे सरकार अट्ठ म्हीने भोरे च पेइऐ मेरी दुआ खान
 तां तुस फी जोआन होई सकदे ओ । मंत्रिएं राजा गी समजाया
 जे महाराज ए बैद सरकारा गी धोखा देना चांहुंदा ऐ । कदें
 कुसै दी गेई जोआन्ती बी परतोई ऐ । राजा नै मंत्रिएं दी सिक्खा
 पर ध्यान नेई दित्ता । बैद दे आखे मतावक मैह्लें च भोरा
 बनवाइयै ओ उदे च रौहून लगी पेआ । बैद दे आखने पर उसनै
 अपने कोल मंत्रिएं दा औना बंद करी दित्ता । इक छड़ा बैद ते
 उदा नौकर गै भोरे च राजा कोल आई - जाई सकदे हे ।
 बैद ने राजा दा लाज शुरू करी दित्ता । जिसेल्लै लाज करदे
 छे म्हीने बीती गे तां पत्तेवाज बैद नै इक होर चाल चली ।
 उसनै कुतूं दा राजा दी शकल दा इक जोआन आदमी तुप्पी
 आंदा । नकेवलै लेजाइयै बैद उसी आखन लगा—सुन जोआना !
 अऊं तुगी राजा बनाई देह पर तुगी मेरे आखने पर चलना होग ।
 उस आदमी गी अपने पंजे च लेइयै बैद नै कुसै जुगती कन्ने भोरे दे
 अंदर राजा गी मरवाई ओड़ेआ ते सुरगां रस्ते उदी लोथा गी
 भोरे चा बाहूर कड़ाइयै नष्ट कराई ओड़ेआ । ते उससै सुरंगा
 रस्तै उस नोजवान आदमी गी भोरे च दाखल करी दित्ता । दूऐ
 दिन बैद नै लोकें च खबर फलाई दित्तो जे में छें म्हीने च गी
 राजा विनयशील गी बुड़्डे कोला जोआन बनाई दित्ता ऐ ।
 दौं म्हीनैं दे वाद राजा दा रूप किश वदली जाग । जिसनै राजा
 गी जोआन होए दे दिक्खना होऐ ओ भोरे दे दरवाजे पर
 आइयै दिक्खी लै । ए चमतकार दिक्खने लेई मती खलकत आई ।

इनें सवनें गी वारी - वारी भोरे दे दरवाजे पर ल्याइयै अंदर
 बैठे दे कूट - राजा गी दस्सेआ । जिनें - जिनें राजा गी दिक्खेआ
 बैद ने वारी - वारी उंदे नां वी बोलियै राजा गी दस्से कन्ने उंदा
 परिचै वी दित्ता । इनें दौं म्हीनें च धूर्त बैद तरुणचंद्र ने कूट -
 राजा गी मंत्रिण, रानिये ते मेह्लै च औने - जाने आले ऐह्लकारें
 दे नां ते कम्म वी दस्ती ओड़े । जदू दो म्हाने बीतीगे तां बैद ने
 कूट राजा गी भोरे चा कड्हेआ । उसी दिक्खियै सारे लोक इयै
 समजे जे उऐ बुड्डा विनयशील राजा ऐ जेड़ा बैद दे लाज करने
 करी जोआन होई गेआ ऐ । हून ओ जोआन आदमी राजा वनियै
 सारे राजकी भोग भोगन लगा । उसने भेषजचंद्र ते पदमदर्शन ।
 नां दे अपने दौं मित्तरें गी धन - सम्पदा कन्ने खूब रजाया । तरुणचंद्र
 बैद परा उदा वसाह् उट्ठी गेआ—ए समजियै जे उसने अपने स्वामी
 पैह्ले राजा गी धोखा दित्ता हा । इक दिन ओ बैद नकेवलै
 राजा गी आखन लगा—महाराज ! में तुसेंगी राजा बनाया ते
 हून तुसें मिगी भुलाई ओड़ेआ ऐ । राजा बोलेआ—बैद जो !
 कुन कुसेंगी वनांदा ऐ । ए ते पूर्वजन्म दे कोते दे कर्में दा फल
 ऐ इसलेई तुस ए हंकार नेईं करो जे तुसें मिगी राजा बनाया
 ऐ । थोड़ा चिर हौंसला करो अऊं तुसेंगी इस गल्ला दा सबूत
 देड । ए सुनियै बैद तरुणचंद्र डरिऐ सोचन लगा ए नमां राजा ते
 मिगी कोई ज्ञानी परतीत हुंदा ऐ । इसलेई अऊं इदा भेद वी नेईं
 खोली सकदा मिगी इदी मरजी मतावक गै चलना लोड़चदा ऐ ।
 अऊं बलगनां ते दिक्खनां जे ए अपने कर्म दे सिद्धांत गी सावत करने
 लेई के परमाण दिदा ऐ । ए सारी गल्ल सोचियै बैद चुप होई
 रेआ । मौके दी परतीक्षा करन लगा । किश समां बीतेआ । ओ
 राजा इक रोज तरुणचंद्र बैद ते नौकर - चाकरें समेत सैल
 करने लेई नगरै दे वाहूर निकलेआ । नदी दे कंडै फिरदे - फिरदे
 राजा नै नदी प्रवाह् च पंज सुन्ने दे कमल अपने पासै ओई
 दिक्खे । नौकरें गी आखियै राजा नै पंजै सुवर्ण - कमल पानो चा
 वाहूर कढाए । उनें कमलें गी हत्थै च लेइयै राजा तरुणचंद्र बैद
 गी आखन लगा—बैद जो तुस नदी दे कंडे - कंडै उपरै गी जाओ

ते पता करो जे ए सुवर्ण - कमल कुत्थूँ दा आवै करदे न । तुस
 चवात चीजें दी खोज - पड़ताल करने च वड़े चतुर ओ । इसलेई
 ए कम्म असें तुसंगी सौंपेआ ऐ । इदा पता करियै तुस तुरत मिगी
 आइयै दस्सो । राजा दी आज्ञा दा पालन करने लेई बंद कमलें दी
 खोजा च नदी दे कंडै - कंडै उप्परै गी चली पेआ । बंद गी उद्दर
 भेजियै राजा अपनी राजधानी गी परतोई आया । नदी दे कंडै
 चलदा - चलदा बंद इक शिवालै च पुज्जा । मंदर दै कच्छ गै इक
 बड़ा भारी ब्होड़ा दा रुख हा जिदे पर इक मनुक्खै दा पिंजर
 लमकै करदा हा । बंद नै नदी च शनान करियै शिवें दी पूजा
 कीती । परंत ओ ब्होड़ा हेठ वसां करन बेई गेआ । इन्ने चिरै च
 समानै पर वद्दल छाई गे ते कणियां पौन लगी पेइयां । हून बंद नै
 इक चमतकार दिक्खेआ । जेड़ियां वरखा दियां कणियां ब्होड़ा पर
 लमके दे नर - पिंजरै पर पौंदियां ओ जिसेल्लै उदे परा होइयै
 नदी च डिगदियां तां ततखिन सुवर्ण - कमल वनिऐ नदी च रुढ़न
 लगी पौंदियां । तरुणचंद्र बंद गी बड़ा चर्ज लगा । सोचन लगा
 इदा कारण कुसी पुच्छां । ब्होड़ा पर टंगोए दा नर - पिंजरा गै
 इनें सुवर्ण - कमलें दा खान ऐ । तां पैह्लें अऊं इस नर - पिंजर
 गी रुक्खै परा नदी च सुट्टना ए सोचियै ओ ब्होड़ा पर चढ़ी
 गेआ । उप्पर जाइयै उसने उस हड्डिणं दे पिंजरै गी रुक्खै कोला
 खोलियै नदी च सुट्टी दित्ता । ओ दिन उसनै उत्थें गै बताया ।
 दूये दिन ओ विलासपुर गी परतोआ । राजा कोल आइऐ उसनै
 अवधीं दिक्खेआ सारा वरतांत राजा गी सुनाया । जिसेल्लै सारे
 दरवारी राजा कोला चली गे तां एकांत दिक्खियै राजा बंद गी
 आखन लगा—बंद जी हून तुसें अपनी अवधीं कन्ने सुवर्ण - कमलें दे
 पैदा होने दी थां दिक्खी लेई ऐ । ओ थां बड़ा उत्तम तीर्थ ऐ ते
 ब्होड़ा पर टंगोए दा नर - पिंजरा मेरा पैह्ला शरीर हा । पिछले
 जन्म च में इस पवित्तर रुक्खै पर उलटे मुंह, लमकियै तपस्या
 कीती ही ते तपस्या करदे - करदे गै शरीर त्यागेआ हा । उस्सै
 तपस्या दे परभाव कन्ने हून बी मेरे पैह्ले शरीर दे पिंजर कोला
 टपके दे जलविदुणं कोला सुन्ने दे कमल पैदा हुंदे न । मेरा पैह्ला

शरीर जेड़ा तूसें नदी च सुट्टेआ ओ वी चंगा कीता । तू मेरा पिछले जन्म दा मित्तर ऐं । भेषजचंद्र ते पदमदर्शन वी मेरे पूर्वजन्म दे मित्तर न । पिछले जन्म दे उससे तपोबल कने में ज्ञान ते राज प्राप्त कीते न । ते मिगी अपना पैहूला जन्म वी याद ऐ । इसलेई बैद जी तूसेंगी हंकार नेई करना लोड़चदा जे तूसें मिगी राजा बनाया ऐ । पैहूले कर्मे बिना कोई कुसै गी किश नेई दिदा । गर्भवास कोला लेइयै मरने तक मनुक्ख अपने पैहूले जन्म दे कर्मे दा गै फल भोगदा ऐ । उस दिन कोला लेइयै बैद नै राजा दै सामनै कदे कोई शकायत नेई कीती । राजा वी बैद दा सदा आदर - मान करदा रेआ । पूर्व - जन्म दे कर्मे करी प्राप्त राज-सुखै गी भोगदा राजा अंत च परम सद्गति गी प्राप्त होआ ।

ए कथा सुनाइयै तपस्यंतक युवराज नरवाहनदत्त गी आखन लगा—म्हाराज ! इयां पूर्व - जन्म दे कमाए दे पुण्य - पाप गै मनुक्खै लेई इस जन्म दे सुख - दुख दा कारण बनदे न ।

सतमां तरंग

युवराज नरवाहनदत्त युवरानी रत्नप्रभा दे मैहूले च बैठा दा हा । उससे बेल्लै उदे कनें च रोने दी बलेल पेई । उदे पुच्छने पर जे कुन रोऐ करदा ऐ दासियां बोलियां—महाराज ! मैहूल दा कंचुकी धर्मपाल रोऐ करदा ऐ । इदे कुसै मूर्ख मित्तर नै आइये हूनै इसी खबर दित्ती ऐ जे तीर्थयात्रा कोला औन्दा - औन्दा उदा भ्रा रस्तै च कुतै मरी गेआ ऐ । ए खबर सुनियै कंचुकी धर्मपाल रोन लगी पेआ । उसने वी नेई सोचेआ जे अऊं राजमैहूलै च बैठा दा आं । ए खबर सुनियै नरवाहनदत्त गी दुक्ख होआ । रत्न-प्रभा बोली दिक्खो ! निकट सरबधिणं दे मरी जाने पर मनुक्खें गी किन्ना गम हुंदा ऐ । विधाता नै मनुक्खै गी अजर - अमर की नेई बनाया । ए सुनियै मरुभूति बोलेआ—रानी जी ! मनुक्खें च ए गल्ल कुत्थें । इस परसंगै च अऊं तूसेंगी इक कथा सुनाना—

राजा चिरायु : कदे दी गल्ल ऐ चिरायु नां दे नगरै च चिरायु नां दा गै इक राजा राज करदा हा । बोधिसत्व दे अंश

कोला पैदा नागार्जुन नां दा उदा दयालु ते दानशील मंत्री हा ।
 भांत - भांत दिएं जड़िएं बूटिएं ते नुकशें दी करामाता कन्ने उसनै
 अपने गी ते राजा गी जराहीन ते चिरायु बनाई दिता । इक
 वारी मंत्री दा अपना पुत्तर मरी गेआ । जेड़ा उसी सारें पुत्तरें कोला
 प्यारा हा । मोए दे पुत्तरें गी जींदा करने लेई ते मनुक्खें गी अमर
 बनाने लेई उसनै अपने तप दे परभाव कन्ने इक नेई रसैन त्यार
 कीती जिदे खाने करी मनुक्ख - मात्तर सदा जोंदे रौहून । इस
 रसैन दा इंद्र गी पता लगा । उसनै देवतें दी सभा च वचार
 करियै अश्विनी कुमारें गी आखेआ जे तुस जाइयै नागार्जुन गी
 पुच्छो जे भलेआ लोका तूं मनुक्खौ गी अमर बनाने दी रसैन
 बनाइयै विधाता दे निजम गी भंग करना चाह्नां । ब्रह्मा नै
 मनुक्खौ गी मरण - धर्मा बनाया ऐ । तूं ब्रह्मा दी उस कारा गी
 गी टपप्पना चाह्नां । उसी जाइयै आखो जे ओ नेई रसैन बनाना
 बंद करी देऐ नेई तां देवता उसी शाप देई डेन । जिस अपने
 पुत्तर दी मौता कोला दुक्खी होइयै ओ ए रसैन बना करदा ऐ ओ
 इदा पुत्तर सुगें च वड़ा सुखो ऐ । अश्विनी कुमारें मर्तलोकें च
 जाइयै इंद्र दा सनेहा नागार्जुन गी दिता । नागार्जुन गी ए
 सनेहा सुनियै मता दुक्ख होआ । सोचन लगा जे अऊं देवराज इंद्र
 दा आखेआ नेई मनदा तां खवरै अश्विनी कुमार गै मिगी शाप
 देई देन । ए सोचियै ओ अश्विनी कुमारें गी आखन लगा—अच्छा
 म्हराज ! देवराज दे आखने करी अऊं अमृत रसैन नेई बनांदा ।
 जे तुस नेई औंदे तां अऊं पंजें दिनें अंदर सारी दुनियां दे मनुक्खें
 गी अजर - अमर बनाई दिदा । ए आखियै नागार्जुन नै जमीन
 पुट्टियै रसैन आला भांडा बाहूर कड्डी लेआ । अश्विनी कुमारें
 इस घटना दी खबर देवराज इंद्र गी दिती जिसी सुनियै ओ वड़ा
 परसन्न होआ । इनें दिनें च गै राजा चिरायु नै अपने पुत्तर
 जीवधर गी युवराज बनाया । युवराज बनियै जिसेल्ले ओ अपनी
 माता रानी धनपरा गी मत्था टेकन आया तां माता उसी आखन
 लगी—पुत्तरा ! तूं युवराज बनियै ते भूठी खुशी मना करनां ऐ ।
 तेरे पिता दे केई पुत्तर युवराज बनी - बनी मरी गे । पर राज

कुसै गी नेईं मिलेआ । भंडी ते हासोआनो गै होई । मंत्री नागार्जुन
 नै तेरे पिता गी नेईं रसैन खलाई दी ऐ जे ओ उदे खाने करी
 अट्ठ सौ वरें दा होई गेदा ऐ । के पता अजें उसनै होर किन्ने सौ
 वरे जीना ऐ ते अपने किन्ने पुत्तरें गी युवराज वनाइयै यमराज दे
 घर टोरना ऐ पुत्तरा ! जे तू राज लैना चाह्नां तां जियां आऊं
 आखनियां उंयां कर । मंत्री नागार्जुन प्रतिदिन शनान - संध्या
 करियै भोजन करने दे बेल्लै घोशणा करदा ऐ जे कोई दीन
 दुखिया दान लैना चाह्दा ऐ तां ओ मेरै सामनै आवै ते दस्सै जे
 ओ के चीज दान लैदा ऐ । उस बेल्लै तू सामने होइयै उसी
 आखेआं जे अऊं तुंदा सिर दान लैना चाह्नां । दूयै दिन दपैहूरीं
 दे भोजन दे बेल्लै युवराज जीवधर नागार्जुन दे घरै कोल खड़ोई
 रेआ । जिसेल्लै अंदरा दा दान लैने आलें गी हक्क पेई तां तुरत
 जीवधर नागार्जुन दे सामनै जाई खड़ोता । नागार्जुन नै युवराज
 गी पुच्छेआ जे तुस मेरे कोला के चीज दान लैना चाह्दे ओ ।
 युवराज बोलेआ—तुंदा सिर । नागार्जुन पुच्छन लगा—युवराज ! तुस
 मेरा सिर लेइयै के करगे ओ । मेरा सिर ते छड़ा मास हड्डी ते बालें
 दा पिंड ऐ । पर जे ए तुंदे कुसै कम्म आई सकदा ऐ तां बशक्क
 इसी कप्पो लौ । ए आखियै नागार्जुन नै अपना गला युवराज दै
 अगें करी दित्ता । जीवधर नें नागार्जुन दा गला कप्पने दे जिन्ने
 जतन कीते ओ सारे बेकार गे । जेड़ी वी तलवार उसनै उदं गले
 पर मारी उए खंड - खंड होई गेई । राजा चिरायु गी जिसेल्लै
 इस घटना दी खबर मिली तां ओ दौड़दा - दौड़दा मंत्री नागार्जुन
 दे घर पुज्जा । उसनै अपने पुत्तर गी इस कम्मै कोला रोकेआ
 नागार्जुन राजा गी आखन लगा—राजन् ! अऊं जातिस्मर आं ।
 मिगी अपने सारे पिच्छले जन्म याद न । में अपने पैहूले जन्में च
 नड़िनबे वारी अपने सिर दान कीते न । अज्ज सौमीं वारी अऊं
 सिर दान करै करनां । तुस मिगी इस शुभ कम्मै कोला मत रोको ।
 अऊं अर्थी गी कदें निराशा नेईं जान देड । इसलेई अऊं अज्ज
 तुंदे पुत्तरै गी सिरै दा दान देइयै गै साह्लैड । अऊं सरकारा दा
 मुंह दिवखने लेई गै बलगै करदा हा । ए आखियै नागार्जुन

राजा चिरायु दै गलें लगा । उसनै अपने घरा दा इक चूर्ण मंगवाइयै जीवधर दी तलवारा दी धारा पर मलेआ ते उसी आकखेआ जे लै हून अपनी तलवारा दा फट्ट मेरी मुंडी पर मार । इयां करने करी जीवधर नै तलवारा दे इक्को फट्ट कन्ने मंत्री दा सिर धड़ै कोला वक्ख करी ओड़ेआ । मंत्री दे प्राण त्यागने पर राजा चिरायु वी मरने लेई त्यार होई गेआ । लोकें च हाहाकार मची गेई । उससै बेल्लै आकाशवाणी नै आकखेआ—राजन् तू अपने प्राण विना कारण दे मत त्याग । दिव्व वाणी सुनियै राजा नै मरने दा दृढ़ संकल्प त्यागी ओड़ेआ । परोपकार दे कम्में च सौ बार अपना सीस देने दे कारण नागार्जुन नै बुद्ध दी पदवी प्राप्त करी लैत्ती । राजा तपस्या लेई वनै गी चली गेआ । उत्थें कठोर तपस्या करदे - करदे उसनै परमगति प्राप्त कीती । परंत उदा पुत्तर जीवधर पिता दी गद्दी पर बैठेआ । पर अजें उसी राज करदे किश वरे होआ हा जे नागार्जुन दे पुत्तरै पिता दा बदला लैने लेई उसी मरवाई ओड़ेआ । पुत्तरै दे बेमौके ते बेमौती मरने कारण माता दा कलेजा फटी गेआ ते उदी मौत होई गेई । मंत्रिएं खाली गद्दी पर दूई रानी कोला पैदा होए दे राजा चिरायु दे पुत्तरै गी बहाली दित्ता । नागार्जुन नै मनुक्खें गी अमर बनाने लेई जेड़ी रसैन त्यांर करना शुरू कीती ही ओ देवतें सिरै नेई चढ़न दित्ती । जीवधर द्वारा उनें नागार्जुन गी खत्म कराई ओड़ेआ ।

ए कथा सुनाइयै मरुभूति युवराज नरवाहनदत्त गी आखन लगा—युवराज जी ! विधाता दे नियम मतावक ए जीवलोक नाशवान ऐ । इस नियम दे विरुद्ध मनुक्ख कोई कम्म नेई करी सकदा । मंत्री मरुभूति दी इस कथा गी सुनियै नरवाहनदत्त ते वाकी मंत्रिएं दा बड़ा मनोरंजन होआ ।

अठमां तरंग

दूऐ दिन युवराज नरवाहनदत्त अपने पिता वत्सराज कन्ने जंगल च शकार खेडन गेआ । उंदे कन्ने सारे मंत्री, ऐह्लकार ते हाथी घोड़े समेत सेना वी ही । शकार खेडदे - खेडदे ओ थक्की

गेआ । गोमुख दै संग दूए जंगलै च जाइयै ओ खिन्नू खेडन लगी
 पेआ । इन्ने चिरै च कुसै पासेआ इक तपस्विनी उत्थें आई निकली ।
 चानचक खिन्नू उड़कियै उदे सिरै च आई लग्गा । तापसी
 नरवाहनदत्त गी व्यंग बोली च आखन लगी—युवराज ! जे हूनै तुगी
 इन्नी मस्ती छाई गेई दी ऐ तां उस बेल्लै तेरे दमागै दा पारा
 कुत्थें चढ़ी जाग जदू कर्पूरिका तुगी भारजा प्राप्त होग । ए
 सुनियै नरवाहनदत्त नै घोड़े परा उतरियै तपस्विनी दे चरण छूते
 ते ए आखियै माफी मगन लगा—भगवती ! तुसेंगी दिक्खेआ नेई ।
 मेरे हत्था दा खिन्नू छुटिऐ अकस्मात् तुसेंगी जाई लग्गा । इस
 लेई मेरी भुल्ला गी माफ करो । तापसी बोली—पुत्तरा ! मिगी
 तेरे पर विंद वी गुस्सा नेई । अऊं तेरे पर मती परसन्न आं ।
 तपस्विनी दे शांत सुभा गी दिक्खियै युवराज बड़ी नम्रता कन्ने
 पुच्छन लगा—भगवती ! ए कर्पूरिका कुन ऐ, जिदा तुसें हूनै नां लेआ
 ऐ । उसनै जवाब दित्ता—समुंदरै पार कर्पूर सम्भव नगगरै च
 कर्पूरक नां दा राजा शासन करदा ऐ । कर्पूरिका उससै राजा दी
 धी ऐ । इस राजपुत्तारी दी अऊं के सिफत करां । इयां वजोदा जे
 समुंदरै गी छोलियै देवतें जिसेल्लै उदी पुत्तारी कमला गी हरी
 लेआ तां समुंदरै नै उस घाटे गी पूरा करने लेई अपनी दूई
 कर्पूरिका दी सर्जना कीती । कर्पूरिका राजपुत्तारी मदें कन्ने घृणा
 करदी ऐ । पर मेरा विश्वास ऐ जे ओ कदें तुगी दिक्खी लै तां
 तेदे कन्ने ब्याह् करने गी राजी होई जाग । इसकरी पुत्तरा तूं
 उत्थें जा ते उसी ब्याही लै । कर्पूरसम्भव नगगरै दा रस्ता बड़ा
 औखा ऐ पर तूं उत्थें अवशष पुज्जी जागा । ए आखियै तपस्विनी
 वाऊ दा रूप धारण करियै उत्थें गै छप्पी गेई । गोमुख मंत्री दे
 रोकने पर वी युवराज घोड़े पर फराकी मारियै ततकाल कर्पूर-
 संभव नगगरै दी खोजा च चली पेआ । उसी कल्ले जंदे दिक्खियै
 गोमुख वी अपने स्वामी दै पिच्छें - पिच्छें चली पेआ । दोनैं दे
 उद्दर चले जाने बाद वत्सराज मरुमि ते वाकी साथी अपनी
 राजधानी उज्जयिनी परतोई आए, ए समजियै जे युवराज ते गोमुख
 सेना कन्ने पिच्छें आवै करदे न । पर उत्थें आइयै उनेंगी पता

लगा जे ओ दोए गुम्म न । सवनें गी वड़ी चिंता लग्गी । पर
 रत्नप्रभा नै अपनी विद्याधरी शक्ति कन्ने असली कारण बुझो
 लेआ । सवनें गी तसल्ली लेई आखन लग्गी - चिंता करने दी कोई
 लोड़ नैई । युवराज अपने मंत्री गोमुख दे संग कर्पूरिका राज-
 पुत्तरी दी खोजा च कर्पूरसम्भव नगरै गी गे न । कर्पूरिका गी
 व्याहिए ओ तौले गी परतोई औडन । पति दा रस्ता मंगलमय
 बनाने लेई रत्नप्रभा ने दूई विद्याधरी विद्या दा बी परजोग कीता ।
 घोड़े पर सोआर नरवाहनदत्त गोमुख कन्ने जिसेल्लै इक जुआड़
 वीयावान च जाकरदा हा तां उसी रस्ते च चानचक इक कुड़ी
 मिली । ए कुड़ी नरवाहनदत्त गी आखन लग्गी जे युवराज जी
 रानी रत्नप्रभा दी भेजी दी अऊं मायावती नां दी विद्याधरी विद्या आं ।
 अऊं तुं दे अंगसंग रेइयै तुं दी रक्षा करड । ए आखियै ओ
 विद्याधरी विद्या अदृश होई मेई । चलदे - चलदे युवराज ते
 गोमुख सत्रां बेल्लै इक सरोवर पर पुज्जे । दोनैं उदे च शनान
 कीता ते स्वादले जंगली फल खादे । रात निश्चित बनाने लेई
 दोनैं अपने - अपने घोड़े हेठ बढे ते आपूँ रुखै पर चढ़ियै बेई गे ।
 अही रातीं डरिए घोड़े कुहन ते हिन - हिनान लगे । रुखै पर
 चढ़े दे दोए जने जागी उठे । उने दिक्खेआ जे दरखतै थल्लै इक
 शेर खड़ोता दा ऐ दिखदे - दिखदे शेर नै नरवाहनदत्त दे घोड़े पर
 हमला करी दिता । नरवाहनदत्त नै दरखतै परा नशाना वन्नियै
 कटार शेरै गी मारी । इस चोटा कन्ने शेर बुरी चाल्ली घैल होई
 गेआ । पर इस हालता च बी उसनै दोनैं घोड़ें गी मारी ओड़ेआ ।
 ए दिक्खियै नरवाहनदत्त नै गोमुख दी तलवारा कन्ने शेर दे दो
 खंड करी ओड़े । सबेरै दोए पैदल गी अपने रस्ते पर चली पे
 राजकुमार दे मनोरंजन लेई गोमुख नै इक कथा सुनाई जेड़ी
 इस चाल्ली ऐ—

राजा परित्यागसेन : एरावती नगरी च परित्यागसेन नांदा इक
 राजा राज करदा हा । उदियां दो रानियां हियां । उंदे च इक रानी
 जिदा नां अधिकसंगमा हा जेहूड़ी मंत्री दी धी ही । काव्यालंकारा

नां दी दूई रानी कुसै राजवंश दी कन्या ही । राजा दे घर कोई
पुत्तर नेईं होआ । उसनै दोनै रानिएं समेत अम्बिका देवी दी
कठोर राधना कीती । उदी तपस्या कोला परसन्न होइयै देवी नै
सुखने च राजा गी दो फल दित्ते ते आखेआ—पुत्तरा ! उट्ठ ते
इंदे चा इक - इक फल अपनिएं दोनै रानिएं गी खलाई दे । तेरै
घर दो पराक्रमी पुत्तर होइन । सबेरै जिसेल्लै राजा दी अक्ख
खुल्ली तां उदे हत्थें च दो फल से । उसनै परसन्न - चित्त शनान
करियै वर्त पोआरेआ । रातीं ओ वड्डी रानी कोल गेआ । ए रानी
मुख्यमंत्री दी पुत्तरी ही । राजा ने उसी इक फल दित्ता जिसी
ओ खाई गई । रातीं राजा उत्थें गै सुत्ता । दूआ फल उसने
निकड़ी रानी लेई अपने सरैह्ने रखेआ । जिसेल्लै राजा गाड़ी
नींदरा च सेई गेआ तां रानी उट्ठी ते दौ पुत्तरें दी मां बनने दे
लालचा कन्ने उसने राजा दे सरैह्ने हेठा कडिह्यै दूआ फल वी
खाई लेआ । सबेरै उटिह्यै राजा अपने सरैह्ने हेठ दूआ फल
तुप्पन लगा तां वड्डी रानी उसी आखन लगी जे ओ फल वी
में खाई ओड़आ ऐ । ए सुनियै राजा गी वडा दुक्ख होआ । अज्जै
दी रातीं राजा निकड़ी रानी दे मैह्लें गेआ । जिसेल्लै इस रानी
ने अपने हिस्से दा फल मंगेआ तां राजा ने वड़े वसोसै कन्ने उसी
दस्सेआ जे उस फल गी वी वड्डी रानी चुराइयै खाई गई ऐ ।
लौह्की रानी दा नां काव्यालंकारा हा । इसी जिसेल्लै पता लग्गा
जे इदा हिस्सा वी इदी सौकन रानी खाई गई ऐ तां इसी अत्यंत
दुक्ख होआ । समां वीतने पर वड्डी रानी अधिकसंगता दे घर
दो पुत्तर होए । दो पुत्तर दिक्खियै राजा परित्यागसेन दा हिर्दा
खिड़ी उट्ठेआ । इस खुशी च उसने वडा भारी उत्सव मनाया
ते दीन दुखिएं गी मता दान दित्ता । उसने जेठे पुत्तरै दा नां
इंदीवरसेन ते निकड़े दा अनिच्छासेन रखेआ । निकड़े दा अनिच्छासेन
नां इसकरी रखेआ जे वड्डी रानी नै निकड़ी रानी दे हिस्से दा
फल उदी मरजी विना खाई लेआ हा । रानी काव्यालंकारा गा
वडी ईर्ष्या लग्गी । उसने अपनी सौकना कन्ने वदला लैने दा
निशचै कीता । ओ सोचन लगी जे कोई जुगती लड़ां ज इस

चंडालना दे दोए पुत्तर नष्ट होई जान । राजा दे ए दोए पुत्तर
 जियां - जियां बरेसा च बड्डे होन लगे उंयां गै निकड़ी रानी दे
 कलेजे च बदला लैने दी भावना प्रवल हुंदी गई । जदू दोए
 राजकुमार जोआन होइयै शस्त्रास्त्र विद्या च प्रवीण हो गे तां
 इन्दे मनै च दिग - विजै करने दा विचार उट्ठेआ । दोए अपने
 पिता राजा परित्यागसेन गी आखन लगे—पिता जी असेंगी आज्ञा
 देओ जे अस दिग-विजै करियै अपनी धनुर्विद्या गी सफल बनाचै ।
 उन्दी गल्ल सुनियै राजा गी वड़ी खुशी होई । उसने अपने पुत्तरें
 दी मदता लेई सेना त्यार कीती । दिग - विजै लेई प्रस्थान करने
 दे मौके पर राजा पुत्तरें गी आखन लगा—पुत्तरो ! तुन्दा जनम
 भगवती दुर्गा दे वरै कन्ने होएदा ऐ । इसलेई दिग-विजै दे समें
 जे तुसेंगी कोई संकट आई पवै तां तुसैं भगवती दा सिमरण करना ।
 ओ तुन्दे संकट गी कट्टी देग । ए सिक्ख ते कन्ने शीरवाद देइयै
 राजा ने सेना ते मंत्रिएं समेत अपने दौनें पुत्तरें दी दिग-विजै जात्रा
 लेई विदा कीता । इनें पुत्तरें पैहलें पूरव दिसा दे राजें गी जित्तेआ ।
 फी दक्खन दिसा दे राजें पर चढ़ाई करी दित्ती । उन्दी विजै दियां
 कहानियां सुनियै पिता दी खुशी दा पारावार नेई रेआ, पर
 उन्दी मात्रेआं दा कालजा जली गेआ । इनें राजकुमारें दे नाश
 लेई निकड़ी रानी ने इक शड़यंत्र रचेआ । इसने सेना दे सेनापति
 दे नां इक कूट-पत्र लिखेआ । इस गुप्त पत्र गी लिखियै रानी ने
 इदे पर राजा परित्यागसेन दे नकली दसखत करियै ते मोहूर
 लाइयै दक्खन गी प्रस्थान करने आली अपनी सेना दे बड्डे सेनापति
 गी सरकारी नौकरें हत्थें भेजी । इस चिट्ठी च लिखे दा हा—जे
 मेरे राजभगत सेनापति ! मिगी अपने गुप्तचरें कोला पता लग्गा ऐ
 जे मेरे दौनें पुत्तरें दा पक्का निश्चा ऐ जे अपने भुजबल कन्ने
 सारी पृथ्वी गी जित्तियै परंत मेरी हत्या करियै सारी दुनिया पर
 निस्कंटक राज करडन । इसकरी जे तुस मेरे भगत ओ तां इस
 चिट्ठी गी पढ़दे गै मेरे इन दौनें विद्रोही पुत्तरें दा वध करी
 ओड़ो । निकड़ी रानी दा पत्र लेइयै नौकर गुप्त रूप कन्ने दक्खना-
 पथ दी विजै लेई जाने आली सेना दे शिविर च चली गेआ । उत्थें

जाइयै उसने ओ पत्तर सेनापति दे हत्थ देई दित्ता । सेनापति ने
 सामन्तें कन्ने मिलियै ओ पत्तर बाचेआ ते उदे पर विचार कीता ।
 इस पत्र गी स्वामी दी अटल आज्ञा समझियै उनें विद्रोही राजकुमारें
 दा वध करने दा फसला करी लेआ । पर इस होने आली दुरघटना
 दी खबर कुसै भेतियै ने राजपुत्तरें दे नाने गी पुजाई दित्ती । नाने
 ने कुसै जुगती कन्ने दोनैं राजकुमारें गी उससै रातीं उत्थूं दा नठाई
 ओड़ेआ । दोए राजकुमार घोड़े पर सोआर सारी रात चलदे-चलदे
 रस्ता भुल्लियै विध्याचल दी बीयावाना च जाई पुज्जे । रात बीती
 ते सवेरा होआ । ओ फी बेतुके चली पे । उन्दे कन्ने उन्दा नाना
 राजमंत्री बी हा । भुक्ख त्रेह् दा सताए दा उन्दा बुड्डा नाना
 व्याकल होइयै विध्याटवी च प्राण त्यागी बैठा । भुक्खे भाने
 राजपुत्तरें दे सोआरी दे घोड़े बी इस जुआड़ा च मरी गे । दोए
 राजकुमार सोचन लगे जे साढ़ा पिता किस लेई असेंगी मरवाना
 चाहंदा ऐ । ए घोर पाप ओ अवशश साढ़ी मात्रेआं दे आखैं करै
 करदा ऐ । चिता दे सागरै च डुब्बे दे दोने राजकुमारें इस संकटै
 च दुर्गा भगवती दा ध्यान कीता जियां उन्दे पिता ने विजै - जात्रा
 दे मौके पर उनेंगी सिक्ख दित्ती ही । ध्यान करने दे बाद ओ
 विध्यावासिनी देवी दे दर्शनै लेई चली पे । उत्थें पुज्जियै देवी दे
 मंदरै अगें उनें दोनैं निराहार वर्त रक्खेआ । उद्दर दक्खनापथ
 आली सेना दे कैम्प च जिसेल्लै सेनापति ते उदें अधीन अधिकारी
 सामंत राजकुमारें दी हत्या करने लेई तयार होइयै आये तां उनेंगी
 पता लगा जे दोए राजकुमार अपने नाना मुख्यमंत्री समेत
 शिविर चा चोरी नट्टी गे न । ए जानियै जे गुप्त चिट्ठी च लिखे
 दे शङ्खत्र दा भेत दा भेत खुल्ली गेआ ऐ सेनापति ते सामंत राजा
 परित्यागसेन कोल गे । उनें जाइयै राजा गी ओ चिट्ठी दस्सी ते
 बाकी दी सारी घटना दा बी वर्णन कीता । ओ चिट्ठी पढ़ियै राजा
 गुस्से च आइयै अग - बबूला होई गेआ । आखन लगा—मूरखो !
 जिनें पुत्तरें गी में देवी भगवती दी राधना कन्ने प्राप्त कीता हा
 उन्दे मरवाने लेई अऊं चिट्ठी लिखदा । इस गल्ला पर तुस कदें
 विश्वास करी सकदे ओ ? तुस ते भामें उनेंगी मारी गै दिदे पर

उन्दे शुभ कर्म उन्दी रक्षा कीती ऐ । परंत राजा ने सामंतें समेत
 सेनापति गी, शङ्खयंत्र रचने आली रानी गी, ते होर सबनें गी जिनें
 इस शङ्खयंत्र च भाग लेआ हा जेलखाने च डक्की ओढ़ेआ । अपनी
 निक्की रानी काव्यालंकारा गी जिसने ए सारा शङ्खयंत्र रचेआ हा
 राजा ने भोरे च बंद करी दित्ता । राजा ते दौनें राजकुमारें दी
 माता रानी अधिकसंगमा अपने पुत्तरें दे कुशल-मंगल लेई भगवती
 दुर्गा दा सिमरन करन लगे । अपने गुप्तचरें गी भेजिये ओ नगर-
 नगर ते ग्रां-ग्रां थमां राजकुमारें दा पता थौहू लैन लगे । उदर
 दौनें राजकुमारें दी राधना थमां परसन्न होइयै भगवती विंध्यावासनी
 ने बड्डे राजकुमार इंदीवरसेन गी सुखने च दर्शन दित्ते । देवी
 राजकुमार गी खडग देइयै आखन लगी—पुत्तरा ! इस खडगा दे
 कन्ने तूं सारे शत्रुएं गी जित्ती लैगा ते जिस - जिस कामना गी
 चाह्गा ओ पूरा होई जाग । ए आखियै देवी छप्पी गेई । सवेरे
 जिसेल्लै राजकुमार इंदीवरसेन जागेआ तां उसने हथ्यै च देवी दा
 दित्ता दा खडग दिक्खेआ । परंत उसने जंगली फल खाइयै वर्त
 पोआरेआ । इस खडग गी लेइयै ते भगवती गी परनाम करियै दोऐ
 राजकुमार उत्थूं चली पे । रस्ते च उनें इक बड़ा बड्डा नगर दिक्खेआ
 उत्थें उनें इक राजकीय मैहलें दे दरवाजे पर लैटे दे द्वारपाल गी
 पुच्छेआ जे इस नगरी दा कुन स्वामी ऐ । उसने जवाब दित्ता
 जे ए शैलपुर नां दा नगर ऐ । इदा स्वामी यमदंष्ट्र नां दा राक्षसराज
 ऐ—ए सुनियै राजकुमार इंदीवरसेन यमदंष्ट्र गी मारने लेई जिसेल्लै
 मैहलें दे अंदर जान लगा तां द्वारपाल ने उसी रोकेआ । राजकुमार
 ने तलवारा दे इक्कै फट्टै कन्ने उसी मारी ओढ़ेआ । उसी
 मारियै राजकुमार जदूं मैहलें अंदर दाखल होआ तां उसने यमदंष्ट्र
 राक्षसराज गी संघासनै पर बैठे दे दिक्खेआ । संघासनै दी इक
 भेठा इक सुन्दर जनानी ही ते दूए पासै इक दिव्व कन्या । राक्षस
 गी दिक्खियै इंदीवरसेन ने उसी जुद्ध लेई ललकारेआ । ललकार
 सुनियै राक्षसराज तलवार लेइयै राजकुमार गी मारने गी दौढ़ेआ ।
 दौनें दा घमासान जुद्ध होआ । इंदीवरसेन ने केई वारी उदा सिर

कप्पेआ पर हर वारी कप्पे दे सिरै दे थां नमां सिर उग्गी पौंदा हा । राक्षस दी इस माया गी दिक्खियै संघासनै कच्छ बैठी दी कन्या ने हत्थै दी सैनत करियै राजकुमार गी किश समभाया । हून राजकुमार नै जिसेल्लै राक्षसै दा सिर कप्पेआ तां तुरंत तलवार दे दूए फट्टै कन्ने इस कटोए दे सिरै दे दो खंड करी ओड़े । सिरै दे दो टुकड़े करने करी राक्षसराज दे गलै पर फी नमां सिर नेई उग्गेआ । ते यमदंष्ट्र मरी गेआ । उदे मरने पर संघासन दे कच्छ बैठी दियां दोए जनानियां वडियां परसन्न होइयां । दौनें राजकुमारें इनें जनानियें गी पुच्छेआ जे तुस कुन ओ ते इस राक्षस दे मरने पर तुस खुश की होइयां ओ । राजकुमार दे प्रश्नै दे उत्तरै च कन्या बोली—

“इस शैलपुर नां दे नगरै च वीरभुज नां दा राजा राज करदा हा । उदी रानी दा नां मदनदंष्ट्रा हा । इस राक्षसै नै जिसी तुसें मारेआ ऐ उस राजा गी खाई लेआ ते उदी रानी गी अपनी जनानी बनाई लेआ । मेरा नां खडगदंष्ट्रा ऐ । अऊं इस राक्षस दे निकके भ्रा दी पुत्तरी आं । तुसेंगी दिक्खियै अऊं अपना मन तुसेंगी देई बैठी आं । इसलेई इसी मोये दा दिक्खियै असेंगी वडी खुशी होई ऐ । हून तुस भिगी ब्याही लौ । उदे आखने पर कुमार इंदी वरसेन नै उदे कन्ने गंधर्व ब्याह् करी लेआ ते देवी दी किर्पा कन्ने दोए उस्सै नगरै च रौह् न लगी पे । इक वारी कुमार इंदीवरसेन नै अपने दिव्व खडग दी शक्ति कन्ने विमान तयार कीता ते इदे च अपने निकड़े भ्रा कुमार अनिच्छासेन गी वठाइयै पिता गी खबर देने लेई भेजेआ । कुमार विमान द्वारा थोड़े चिरै च गै इरावती नगरी च अपने पिता कोल पुज्जी गेआ । चिरकाल दे वाद अपने विछड़े दे पुत्तरै गी दिक्खियै माता - पिता दा हृदय - कमल खिड़ी पेआ । उनेंगी इयां बभौआ जियां देर दा गुम्म होएदा अनमोल रत्न लब्बी गेआ होऐ । माता - पिता अपने नै कनेठे पुत्तरै दे मुंहा उंदे नेक संकटें दी कहानी सुनी । उनेंगी ए वी पता लगा जे भगवती विंध्य-वासिनी दी किर्पा कन्ने हून ओ मुखै दा जीवन वतीन करै करदे न । कुमार अनिच्छसेन मते दिन पिता दी राजधानी एरावती नगरी च

रेआ । रातीं उसी बुरा सुखना आया । सवेरै पिता दी आज्ञा
 लेइयै ओ उससै विमानै पर बेइयै बड्डे भ्रा दी सुध लैने लेई
 शैलपुर परतोआ । जियां ओ भ्रा दे मैह्लें च दाखल होआ तां
 दिखदा के ऐ जे कुमार इंदीवरसेन संघासनै हेठ बेहोश पेआ ऐ ते उदे
 कोल यमदंष्ट्रा ते खडगदंष्ट्रा रोऐ करदियां न । कुमार अनिच्छासेन दे
 पुच्छने पर जे तुस की रोऐ करदियां ओ, कि खडगदंष्ट्रा आखन लगी—
 तुं दी गैर-हाजरी च इक दिन जदू अऊं शनान करन गई दी ही तां
 नकेवला दिक्खियै तुं दा भ्रा मदनदंष्ट्रा कन्ने हत्थापाई करन लगी
 पेआ । जदू अऊं शनान करियै परतोई तां में इसी अपनिएं
 अक्खिएं मदनदंष्ट्रा कन्ने रमण करदे दिक्खेआ । में इसी फटकारेआ ।
 में समजी जे तुं दे बड्डे भ्रा गी इस कारण हंकार होई गेआ ऐ
 जे उदे कोल ओ चमत्कारी दिव्व खडग ऐ । गुस्से च आइयै रातीं
 मे ओ खडग अग्गी च सुट्टी दित्ता । अग्गी दे सेकै कन्ने ओ खडग
 कुरूप ते बदरंग होई गेआ । खडग गी बदरंग दिक्खियै तुं दा भ्रा
 बे-होश होइयै संघासनै परा भुवां डिग्गी पेआ । इदे दुख गी
 दिक्खियै असैं दोनैं अपने प्राण त्यागने दी मिथी लेई ही । हून तुस
 इस तलवारा कन्ने मेरा पापना दा सिर टुक्की ओड़ो । तांजे
 मिगी अपने पापें दा फल मिली जा । राजकुमार अनिच्छासेन गी
 अपनी भरजाई दे वध करने दी हिम्मत कियां पौंदी । उसनै
 सोचेआ जे की नेईं इस तलवारा कन्ने अऊं अपना गै सिर बड्ढियै
 सदा लेई इस सुख-दुख दे भगडै कोला मुक्ति पाई लैं । ए
 सोचियै जियां उसनै अपना सिर बड्ढने लेई खडग लोआरेआ
 ततकाल आकाश वाणी आखन लगी—राजकुमार ! ए अनर्थ मत
 कर । तेरा बड्डा भ्रा इंदीवरसेन अजें मोआ नेईं जींदा ऐ ।
 इदे पर देवता दा कोप ऐ कीजे इसनै अपने दिव्व खडग दी
 सम्हाल करने च लापरवाई कीती ऐ । इसलेई इसी मूर्छा आई
 गई ऐ । खडगदंष्ट्रा दा वी इदे च दोश नेईं ते नां गै मदनदंष्ट्रा
 दा ऐ । ए दोऐ राजकुमार इंदीवरसेन दियां पूर्व-जन्म दियां
 भारजां न । इस मौकै अपनी कामना दी सिद्धि लेई तुगी भगवती
 विध्यवासिनी दा सिमरन करना लोड़चदा ऐ । इस दिव्व वाणी

गी सुनियै अनिच्छासेन आत्म-हत्या दे निश्चै कोला रुकी गोआ ।
 उसनै अग्गी दा जले दा कलंकित खडग चुक्की लेआ ते विमानै च
 बेइयै ओ उस्सै बेलै विध्यावासिनी देवी दी शरणा च गोआ ।
 उत्थें अपने सिरै दी बलि देइयै उसनै जिसेल्लै भगवती गी परसन्न
 करने लेई खंडा चुक्केआ तां फी आकाशवाणी उसी आखन लगी—
 पुत्तरा ! ए दलेरी नेईं कर । घरै गी जा । तेरे जदे गै कुमार
 इंदीवरसेन जी उट्ठग ते मेरा दित्ता दा दिव्व खडग वी अग्गी दे
 कलंक कोला छुटियै निर्मल होई जाग । इस वाणी गी सुनियै ते
 अपने हत्थै च दिव्व खडग गी निर्मल दिक्खियै राजकुमार अनिच्छासेन
 नै भगवती दी परदक्खना लेई ते विमान पर बेइयै शैलपुर गी
 प्रस्थान करी दित्ता । उत्थें पुज्जियै उसनै अपने वड्डे भ्रा गी
 होशा च औंदे दिक्खेआ । ततखिन प्रेम दे अत्थरू वगाइयै उसनै
 भ्रा दे पैर पगड़ी ले । कुमार इंदीवरसेन नै अपने निकके भ्रा गी
 चुक्कियै छाती कन्ने लाई लेआ । खडगदंष्ट्रा ते मदनदंष्ट्रा दोए
 भरजाइयां अनिच्छासेन दे चरणें पर डिगियै आखन लगियां—तुसैं
 अपनी अलोकक ब्हादरी कन्ने मेरे पति दी रक्षा कीती ऐ ।
 इंदीवरसेन गी अपने निकड़े भ्रा कोला पता लग्गा जे उदे माता-
 पिता उसी दिक्खने लेई किन्ने उत्सुक न । अपनिएं दोनैं पतनिएं ते
 लौह्के भ्रा समेत कुमार इंदीवरसेन विमानै पर बेइयै इरावती
 नगरी पुज्जा । उत्थें विमानै चा उतरियै मैह्लै दे अंदर पिता
 कन्ने मिलन गोआ । माता - पिता गी दिक्खियै उंदे चरणें पर
 डिग्गी पेआ । अत्थरूएं दी धारा कन्ने उसनै उंदे चरणें गी धोई
 ओड़ेआ । माता - पिता नै उसी चुक्कियै कलेजे कन्ने लाई लेआ ।
 ए सुनियै जे खडगदंष्ट्रा ते मदनदंष्ट्रा उदियां पैह्ले जन्म दियां
 भारजां न—उनें गी परम संदोख ते सुख होआ । हून कुमार
 इंदीवरसेन अपने माता - पिता ते भाईबंदे च पिता दी राजधानी
 इरावती नगरी च रौह्न लगा ।

इक्क वारी अपने पिता राजा परित्यागसेन दी आज्ञा लेइयै
 इंदीवरसेन निकड़े भ्रा अनिच्छासेन कन्ने फी दिग - विजै लेई
 चली पेआ । अपने दिव्व खडग दे परताप कन्ने सारी पृथ्वी

जित्तियै ओ जित्ते दे राजें दियां कीमती भेटां ते सगातां लेइयै नगरी गी परतोआ । विजेता दे रूप च उसी औंदे दिक्खियै माता - पिता ते पर्जा गी परम नंद होआ । दूऐ दिन कीमती सुगातें दे रूप च पिता गी सारी पृथ्वी दान करदे समै कुमार इंदीवरसेन गी चानचक अपना पूर्व - जन्म याद आया । ओ पिता गी आखन लगा—पिता जी ! मिगी अपने पूर्व - जन्म दा ज्ञान जागो उठेआ ऐ । सुनो उदी कहानी इस चाल्ली ऐ :—

हिमालै पर्वतै च मुक्तापुर नां दा इक नगर ऐ । उदे च मुक्तासेन विद्याधर राज करदा ऐ । उदी रानी दा नां कम्बुवती ऐ । इस रानी दे दो पुत्तर होए । इक दा पदमसेन ते दूए दा रूपसेन । आदित्यप्रभा नां दी विद्याधर कन्या नै स्वयंवरविधि कन्ने पदमसेन गी बरी लेआ । जिस बेल्लै उदी स्हेली चंद्रवती गी पता लगा तां उसनै बी पदमसेन गी गै अपना पति बरी लेआ । पदमसेन दियां दो जनानियां होई गेइयां । आदित्यप्रभा चंद्रवती कन्ने ईर्षा करन लगी । इसलेई दुखी होइयै कुमार पदमसेन नै अपने पिता मुक्तासेन गी आखेआ—पिता जी में दोनैं जनानिएं दी परस्पर ईर्षा दे कारन घर नेईं रेई सकदा । इसकरी मिगी तप लेई तपोवन जाने दी आज्ञा देओ । बार - बार तपोवन जाने दा हठ करने लेई पिता गी क्रोध आई गेआ । ओ पदमसेन गी आखन लगा—तू तपोवन जाइयै के करगा । जा सिद्धा मर्तलोकै गी । उत्थें तेरी ए लड़ाकी जनानी आदित्यप्रभा राक्षस कुलै च जन्म लेइयै तेरी भारजा बनग । ते दूई जनानी चंद्रवती, जड़ी तेरे कन्ने मता प्रेम करदी ऐ, बी राक्षसकुलै च गै जन्म लेइयै तेरी पत्नी बनग । तेरा निकड़ा भ्रा रूपसेन जेड़ा तेरा भगत ऐ, ओ बी मर्तलोक च जन्म लेइयै उत्थें बी तेरा निकड़ा भ्रा बनग । दौं जनानिएं कारण मर्तलोकै च बी तुगी किश दुख भोगना पौग । राजा मुक्तासेन फी बोलेआ—जिसेल्ल सारा पृथ्वी जित्तियै तू अपने पिता गी भेंट करगा तां तेरे शाप दा अंत होई जाग ते तू फी अपने विद्याधर लोक गी परतोई औगा ।

ए कहानी सुनाइयै कुमार इंदीवरसेन अपने पिता राजा परित्यागसेन गी आखन लगा—पिता जी ! इस चाल्ली पिछलै जन्म पिता दे शाप दे कारण अऊं मर्तलोकै च तुंदै घर इंदीवरसेन दे नां कन्ने जम्मेआ । ते मेरा निकड़ा भ्रा रूपसेन इस जन्म च अनिच्छासेन होआ । आदित्यप्रभा ते चंद्रावती मेरियां पैहलियां भारजां इस जन्म च खडगदंष्ट्रा ते मदनदंष्ट्रा होइयां । हून साढ़े शाप दी अवधि होई गई ऐ । ते अस विद्याधर-लोक गी जन्नेआं । ए आखियै इंदीवरसेन नै अपने निकड़े भ्रा अनिच्छासेन ते दौनें जनानिएं—खडगदंष्ट्रा ते मदनदंष्ट्रा समेत मनुक्ख शरीर त्यागियै दिव्व शरीर धारण करी ले । अपने दिव्व रूप च सारे विमानै पर चढ़ियै विद्याधर-लोक गी चली गे ।

ए कथा सुनाइयै गोमुख नरवाहनदत्त गी आखन लगा—युवराज जी ! महापुरशें गी दुख वी भोगने पौंदे न ते दुखें दे वाद सुख वी मिलदा ऐ । तुस रानी रत्नप्रभा दी दिव्व विद्या दे बल कन्ने सुरक्षित कर्पूरिका राजपुत्तरी गी तौले गै प्राप्त करगेओ । अपने साथी गोमुख दी मन परचाने आलियां कहानियां सुनदा - सुनदा युवराज नरवाहनदत्त रस्ते दियें तकलीफें गी भुल्ली गेआ । चलदे - चलदे दोए सत्रां इक रमणीक सरोवरै दे कंडै पुज्जे । दोनें सरोवरै च शनान कीता । फी शिवपूजन करियै स्वादले जंगली फलें दे भोजन दे वाद दोए सरोवरै दे कंडै गै सेई रेह् ।

नौमां तरंग

सबेरा हुंदे गै नरवाहनदत्त गोमुख गी आखन लगा—अज्ज रानी सुखने च मिगी इक दिव्व कन्या लव्वी । ओ मिगी आखन लगी—पुत्तरा ! हून तू नचित होई जा । थोड़ी दूर समुंदरै दे कंडै तुगी कर्पूरसम्भव नगर लव्वग । उत्थें तौले गै राजकुमारी कर्पूरिका कन्ने तेरी मुलाकात होग । ए आखियै देवी छप्पी गई ते मेरी नींदर खुल्ली गई । ए सुनियै परसन्न मुखमंत्री गोमुख नै नरवाहनदत्त गी बधाई दित्ती ते आखेआ—युवराज जी, हून जल्दी गै तुंदी कामना पूरी होने आली ऐ । परंत

दोए समुंदरै पासै चली पे । थोड़े चिरै च गै समुंदरै दा कनारा
 लबबन लगी पेआ । उत्थें उनें दूरा दा कर्पूरसम्भव नगरै दे दर्शन
 कीते । इदे भवन - मंदर सब मुन्ने दे वने दे हे । दोनें शैहरै
 अंदर परवेश कीता । दोए शैहरै दी शोभा - सजावट दा नंद
 लैदे राज-मैह्लें पासै चली पे । वजारें च उनें दिक्खेआ जे हट्टियें
 पर बैठे दे वपारी, शैहरी लोक, हाथी घोड़े सब काठ दे वने दे
 जींदे मनुक्खें ते जीव - जंतें आला लेखा अपना - अपना कम्म
 करै करदे न । जदू ओ राज मैह्लै दे कच्छ गे तां उत्थें वी
 उनें उयै हाल दिक्खेआ । उत्थें वी हाथी घोड़े ते जीवजंत सब
 काठे दे वने दे जंत्रें दे वलै कन्ने चलदे फिरदे दिक्खे । नरवाहनदत्त
 गोमुख कन्ने मैह्लै अंदर वड़ेआ । अंदर जाइयै उसनें दिक्खेआ जे
 रत्न - संघासनै पर इक बड़ा शैल चेहरे मोहरें आला मनुक्ख
 बैठा दा ऐ । मैह्लै च कम्म करने आले नौकर - चाकर वी सारे
 काठे दे वने जंत्रें दे जोर चली - फिरियै अपना - अपना कम्म-
 काज करै करदे न । इनें सबनें च इक छड़ा संघासनै पर बंठा दा
 मनुक्ख गै चेतन हा । इसै मनुक्खै दी चेतन सत्ता कन्ने शैहरै दे
 सारे जंत्रमय जीव - जंत जानदार मलूम हुंदे हे । जियां मनुक्खै दे
 शरीरै च चेतन आत्मा दी सत्ता द्वारा अचेतन इंद्रियां ते प्राण कम्म
 करदे न । उयां गे इस इक चेतन मनुक्खै दी सत्ता द्वारा सारे
 निरजीव नगरै दा कारोवार चलै करदा हा । रत्न संघासनै पर
 बंठा दा ओ मनुक्ख नरवाहनदत्त ते गोमुख गी दिक्खियै अपने
 आसनै परा उट्ठेआ ते इनें दोनें गी वड़े आदर-मान कन्ने संघासनै
 कच्छ लेई गेआ । दोनें गी शैल आसनै पर बठाइयै ओ इनेंगी
 पुच्छन लगा—महाराज ! तूस दोए मित्तर किस कारण इस जुआड़
 नगरै च आए । नरवाहनदत्त नै उसी अपनी राम - कहानी सुनाई
 ते उस वचित्तर मनुक्खै कोला उदी राम-कहानी सुनने दी इच्छा
 प्रगट कीती । उस मनुक्खै नै आपवीती कहानी सुनाना इस
 चाहली शुरू कीती :—

दक्खनापथ दी रमणीक कांची नगरी च बाहुवल नां दा राजा
 राज करदा हा । अपने भुजवल कन्ने इसने विजली आंगर चंचल

लच्छमी गी अपने खजाने च वन्नियै रक्खे दा हा । इस राजा दे
राज च अस दो भ्रा विसकम्मै दा कम्म करदे हे । मेरे वड्डे भ्रा
दा नां प्राणधर हा । अऊं उदा निकड़ा भ्रा राज्यधर आं । अस
मयाधर दी इन्द्रजाल विद्या अनसार जंत्रें द्वारा चलने आलियां
पुतलियां बनाने च वड़े स्याने हे । मेरे वड्डे भ्रा गी बेस्वा - गमन
दी बुरी आदत ही । अऊं उदा वड़ा भगत ते आज्ञाकारी हा ।
इस बुरी आदता दे कारण उसनै वड्डें वडेरें दी ते अपनी सारी
कमाई इस कुकर्म च स्वाहा करी ओड़ी । उदी लोड़ा गी पूरा करने
लेई मिम्मी अपनी सारी कमाई उसी देइयै गोआई ओड़ी । मेरे
वड्डे भ्रा दी बेस्वा - गमन दी इल्लत इन्ती प्रबल होई गई जे
उसनै काठ दे दो जंत्रमय हंस बनाए । इनें जंत्रमय हंसें गी ओ
रातीं दे न्हैरे च डोरा कन्ने वन्नियै राजा बाहुबल दे खजाने गी
भेजी दिदा हा । जंत्र चालित ए हंस लो-दानै दे रस्तै खजाने अंदर
वड़ियै कोई कीमती गैह्ना जां होर चीज प्राणधर कोल लेई औंदे
हे । इसी बैचियै मेरा वड्डा भ्रा अपनी इल्लता गी पूरा करदा
हा । में उसी मते वारी रोकेआ पर ओह् मनुक्ख कुसै दी सिक्ख-
मत्ता नेई सुनदा । इयां करने करी राजा दे खजाने चा मतियां
कीमती चीजां गुम्म होई गेइयां । राजा वड़ा हरान होआ जे नां
कोई जंद्रा त्रुटदा ऐ, नां दरवाजा खुलदा ऐ, फी बी चोरी होई
जंदी ऐ । ए के तलिस्मान ऐ । चोर कुदरा दा औंदा ऐ ते
कुदरें बाह् र निकली जंदा । राजा नै अपने सारें नौकरें - चाकरें
ते पैह् रेदारें गी चकन्ना करी ओड़ेआ । उसनै खजानै अंदर
पैह् रेदार वठाई ओड़े ते उनेंगी आक्खेआ जे चोरें दा पता कड्डो ।
इक दिन अदी रातीं इनें पैह् रेदारें दो जंत्र हंसें गी लो-दानै दे रस्तै
खजाने अंदर वड़दे दिक्खेआ । अंदर वड़ियै हंसें चुंजें च इक
गैह्ना चुक्केआ । गैह्ना लेइयै जियां ओ लो-दान रस्तै बाह् र
निकलने दा जतन करन लगे पै ह् रेदारें उन्दे चलाने आली डोर
वड्डी ओड़ी । ए दोए हंस राजा दे खजाने अंदर फगड़े गै ते डोरा
दी संचालन क्रिया बन्द होई गई । इस घटना दा मेरे वड्डे भ्रा

गो पता लग्गी गेआ । ओ डरे दा मेरे कोल आया जे मेरे जंत्रमय
 हंस फगड़े गे न । हुन राजा असें दौनें गी फगड़ियै कैद करी देग
 कीजे जंत्रमय चीजां बनाने आले अस्सै कारीगर आं । इसलेई
 हुनै जंत्रमय विमानै च बैइयै इत्थूं नट्ठी जाना चाहीदा ऐ भ्रावा ।
 में जे तेरी सिक्ख - मत्त नेईं मन्नी अज्ज उदा फल अऊंऐ भोगड
 तुगी वी भुगाड । पर मिगी वसोस ऐ जे तूं बेकसूर ऐं ते तुगी
 धडानें गै मेरी करनी दा फल भोगना पवै करदा ऐ । अऊं शर्मा
 दे मारै डुग्गी जा करना । ए आखियै मेरा बड्डा भ्रा प्राणधर
 कटुम्ब समेत विमानै पर बैइयै कुतै पासेगी उट्ठी गेआ । ओदे
 आखने पर वी अऊं उस विमानै च नेईं बैठा । ओ विमान अगें
 गै नक्कोनक्क भरोए दा हा । बड्डे भ्रा दे चली जाने वाद अऊं
 सोचन लगा जे ओ ते जान बचाइयै नट्ठी गेआ । हुन सवेरै राजा
 दा सारा गुस्सा मेरे पर निकलग । ए सोचियै अऊं अपने बनाए
 दे दूए यंत्रमय विमानै च कांची नगरी थमां चार सौ योजन दूर
 चली गेआ । उत्थूं दा समुंदर नेईं गै हा । इसलेई
 अऊं विमानै परा उतरियै पैदल समुंदरै पासै चली पेआ । चलदा-
 चलदा इस नगरै च पुज्जा । ए नगर निर्जन हा । फिरदा-फिरदा
 अऊं इस राज - मंदर आया । इस मैह्लें च में ए दिक्खियै
 चकत होई गेआ जे इत्थें राजें महाराजें दे वरतने - जोग सब समान
 रक्खे दा हा पर उन्दे वरतने आला कोई मनुक्ख नजर नेईं आँदा
 हा । रातीं अऊं राजकीय पलंगै पर सेई गेआ । पलंगै पर लेटे दा
 अऊं सोचन लगा जे इस जुआड़ शैह्रै च अऊं कियां रौह्ग । इसलेई
 कल्ल इत्थूं चली जाड । ए निश्चा करियै अऊं सेई रेआ । रातीं
 सुखने च मिगी मयूर-वाहन स्वामी कार्तिकेय लब्बे । ओ आखन
 लगे—राजधरा तूं इत्थूं जाने दी सोचै करना । मेरी आज्ञा ऐ
 जे तुगी इत्थें गै रौह्ना पौग । ए आखियै स्वामी कार्तिकेय छप्पी
 गे । अऊं समझी गेआ जे ए नगर कार्तिकेय दा वसाए दा ऐ ।
 इत्थें रोह्ने करी अवश्र मेरा कल्याण होग । सवेरे में शनान संध्या
 करियै फारग होआ । दर्पहरीं भोजन दे समें मेरे सामनै सुन्ने दे
 पात्तरें च भांत - भांत दे दिव्व भोजन आई रक्खोए । भोजन करियै

मिगी बड़ा संदोख होआ । हून अऊं वड़े नंदै कन्ने इस दिब्व नगरै च रौहून लगा । जिस चीजा दा अऊं ध्यान करदा उयै मेरै सामनै आई टिकदी । छड़ी मनुक्खें, पशुएं वगैरा चेतन वस्तुएं दी नाफत ही । ए हालत दिक्खियै में सोचेआ जे की नेईं अऊं अपनी इंद्रजाल विद्या दे वलै कन्ने जंत्रमय जीव बनाइयै इस नगरै गी वसां । इदे कन्ने शैहूरे दा कारोवार वी चली पौग । उस दिनै कोला में इस नगरै च नर नारी घोड़े हाथी आदि जंत्रमय जीव-जंत दी रचना करियै शैहूरे गी जींदा जागदा करी दित्ता । इनें जंत्रमय नर नारिएं गी तुसें औंदे होई वजारें च कम्म करदे दिक्खेआ होग । अज्ज तुस स्वामी कार्तिकेय दे इस्सै नगरै च वसां करो । अऊं तुन्दा दिलै कन्ने स्वागत करनां । परन्त ओ युवराज नरवाहनदत्त ते उदे साथी गोमुख गी राजकीय वागै च लेईं गेआ । उत्थें दौनें साथिएं वौली च शनान करियै शिवें दी पूजा कीती । फी त्रैनें मैहूलें च आइयै अदृग्ग हत्थें दा परोसे दा दिब्व भोजन कीता । परंत अदृग्ग हत्थें दे पेश कीते दे पान खादे ते मधुपान कीता । इस नगरै दी शोभा दा सिमरन करदा - करदा नरवाहनदत्त पलंगै पर गेआ । लेटे - लेटे उसी राजकुमारी कर्पूरका दी याद सतान लगी । राज्यधर आखन लगा—युवराज जी तुस किस सोचै च पेदे ओ । सौंदे की नेईं । युवराज ने कर्पूरिका राजकुमारी दी गल्ल सुनाई । राज्यधर बोलेआ—तुस चिंता नेईं करो, नचिंत होइऐ सेई जाओ । तुन्दी कामना तौले गै पूरी होई जाग । ब्हादर मनुक्खै गी लच्छमी ते नारी आपू वरी लैंदियां न । ए मेरी अक्खें दिक्खी घटना ऐ—

में कांची नगरी दे राजा बाहुबल दी उप्पर चर्चा कीती ऐ । उदे प्रतीहार दा नां अर्थलोभ सा । लोभी लालची होने दे कारण ओ अपने नौकरें पर वसाह् नेईं करदा हा । इसलेईं उसने अपने कारोवार दा परबन्ध करने लेई मानपरा नां दी अपनी जनानी गी मकर कीता । मानपरा मुंहां दी मिट्ठी ते घरै दा कारोवार चलाने च बड़ी स्यानी ही । जदूं कोला लेइयै उसनै कारोवार सम्हालेआ अर्थलोभ दा कम्म दिन दूना ते रातीं चौगना चमकेआ ।

इक वारी कांची नगरी च सुखधर नां दा विदेशी वपारी आया । इदे
 कोल अन्तं वांके अरबी घोड़े ते चीनदेश दे रेशमी वस्तर हे ।
 अर्थलोभ नै अपनी जनानी मानपरा गी वपारी कोल इसलेई
 भेजेआ जे ओ उत्थें जाइयै उदे कन्ने पंज ज्हार अरबी घोड़ें ते इक
 ज्हार रेशमी वस्तरें दा सौदा करै । मानपरा जिसेल्लै उदे कोल
 गई तां ओ वपारी इदा रूप दिक्खियै इदे पर लट्ठू होई गेआ ।
 ओ नकेवलै जाइऐ मानपरा गी आखन लगा—सुंदरी ! अऊं मुल्ल
 लेइयै इक घोड़ा ते इक रेशमी वस्तर वी देने गी तयार नेईं । हां
 इक गल्ल ऐ । जे तूं इक रात मेरे कछ रमें तां अऊं मुखत गै
 सौ अरबी घोड़े ते पंज ज्हार रेशमी कपड़े देई देड । ए सुनिए
 औनियां कीजे पति दी आज्ञा विना अऊं ए पापकर्म नेईं करी
 सकदी । ए आखिए घर आई । उसने वपारी दी आखी दी सारी
 गल्ल अपने पति गी दस्सी दित्ती । उदा पति अर्थलोभ महं-
 चंगे-माड़े दी पशान ते धर्म-अधर्म दा ववेक उदा नष्ट होई गेदा
 हा । ओ अपनी जनानी गी आखन लगा भलियै लोके जे इक रात
 वगाने मर्दे कन्ने रेइयै पंज सौ घोड़े ते इक ज्हार रेशमी कपड़े
 मिली जान तां इदे च के हरज ऐ । इसलेई अज्ज दी रात तूं उस
 वपारी कोल चली जा । सबेरै तुरत घरै गी उठी आमेआं ।
 निरलज्ज लालची पति दी बशर्मो दी गल्ल सुनियै मानपरा सोचन
 लगी जे अपनी धर्मपत्नी गी बेचने आले इस पापी पति
 गी लानत ऐ । जे अऊं इक रातीं उस वपारी कोल रोआं तां
 मेरा सतीपन ते नष्ट होई जाग । धन दे लोभी इस पापी पति नै
 मेरा ए मुल्ल पाया । की नेईं अऊं उससै गी अपना पति बनाई
 लै जेड़ा इक रातीं दा मेरा मुल्ल पंज सौ घोड़े ते इक ज्हार रेशमी
 वस्तर पांदा ऐ । ए विचारिए मानपरा सुखधन वपारी कोल चली
 गई । ते जाइयै उसनै अपना - आप उसी समर्पण करी दित्ता ।
 सबेरै जिसेल्लै अर्थलोभ प्रतीहार दे नौकर मानपरा गी वपारी
 सुखधन दे घरा दा आनन गे तां मानपरा नै उनेंगी ए आखियै

वापस टोरी ओढ़ेआ जे जाओ उस पापी गी आखी देओ जे हून
अऊं उदी किश नेईं लगदी । उसनै मिगी सुखधन वपारी दे हत्थ
भारी मुल्लै पर बेची दिता ऐ ।

जदू नौकरें अपने स्वामी अर्थलोभ गी मानपरा दा खरा-
खरा टके जनेआ जवाव आइऐ सुनाया तां उदे टौ फुल्ली गे ।
उसनै जवरदस्ती मानपरा गी घर आनने दा निश्चै कीता । उदा
मित्तर हरवल उसी आखन लगा—मित्तरा सुखधन बड़ा शेरदिल
वपारी ऐ । पैसा खर्च करने दी ओ प्रवाह् नेईं करदा । तूं डरौकल
ते पैसे दा पुत्तर ऐं । तेरी इन्नी हिम्मत कुत्थें जे तूं उदे कन्ने मत्था
लाइयै मानपरा गी घर लेई आमें । दूई गल्ल ए ऐ जे खबरै
मानपरा वी तेरे जनेह् डरौकल ते धन दे लालची कोल वापस
औना नेईं चाह्दी । जे तूं राजदरवारै च जाई फरयाद कीती तां
सारे तुगी गै दोशी ठरांगन कीजे तूं धन दे लोभ लेई अपनी जनानी
गी इक रातीं लेई आपूं बेचेआ हा । इस लेई मेरी इयै सलाह्
ऐ जे इस मामले च चुप्प रौह्ना गै तेरे आस्तै ठीक ऐ ।
मित्तर दे रोकने पर वी अर्थलोभ नै अपने शपाही लेइयै सुखधन
वपारी दा घर घेरी लेआ । पर सुखधन दे शपाहिणें अर्थलोभ दे
शपाहिणें गी मारी - मारियै नठाई दिता । ए दिक्खियै अर्थलोभ
नै राजा अगें जाई फरयाद कीती जे म्हाराज ! मेरी जनानी गी
सुखधन वपारी चुराई लेई गेआ ऐ । मेरी रक्षा करो । राजा
बाहुवल गी विचार आया जे ओ सुखधन गी उदे शपाहिणें समेत
मुष्कां बहनाइऐ अपने दरवारै च मंगवा । पर उदे मंत्री संधान नै
राजा गी समझाया जे म्हाराज ! सुखधन वपारी दा बहनानां
मुशकल ऐ । उदे ते उदे सोलें मित्तरें कोल इक लख कोला वी
मते रसाले दे घोड़े न । सरकारा गी इस भगड़े दे बीज - कारण
दा वी पता नेईं । इसलेई तुस दूत भेजिए सुखधन गी अपने
दरवारै च सहो । राजा बाहुवल मंत्री दी सलाह् पर चलेआ ।
जिसेल्लै दूत नै जाइयै सुखधन गी राजा दा बुलावा दस्सेआ तां
मानपरा नै दूत गी सारी गल्ल समझाई । दूत नै आइऐ मानपरा

दी आखी दी सारी गल्ल राजा गी सुनाई । दूत दा आक्खेआ
 सुनिए राजा अर्थलोभ गी अपने कन्ने लेइए आपूँ सुखधन वपारी
 दे घर गेआ । उथें जाइए राजा नै दिक्खेआ जे सुखधन बड़ा भला
 आदमी ऐ । राजा नै मानपरा दे अपूर्व रूप लावण्य गी वी
 दिक्खेआ । मानपरा नै राजा गी परनाम कीता । राजा दे पुच्छने
 पर उसनै सारी घटना अपनी जवानी राजा गी सुनाई । मानपरा
 दा वयान सुनिए राजा नै चरज कन्ने अर्थलोभ पासै दिक्खेआ ।
 पर ओ भूठा हा उदे कोल मानपरा दी गल्लें दा कोई जवाब नेईं
 हा । राजा नै मानपरा गी पुच्छेआ जे तूँ ए दस्स हून इस भगड़े
 दा के फ़ैसला कीता जा । ओ बोल्ली—महाराज ! हून सरकार गै
 दस्सन जे जिस पति नै विना कुसै संकोच दे धन दे लालचै कन्ने
 अपनी सती पतनी गी वगाने मर्दे दे हत्थ बेची ओडेआ होऐ उदे
 कन्ने हून अऊँ कियां रेई सकनियां । मानपरा दा वयान सुनिए
 राजा पर बड़ा परभाव पेआ । आखन लगा—मानपरा ! तूँ ठीक
 आखनी ऐं । राजा दे ए शब्द अर्थलोभ गी चंगे नेईं लगगे ।
 ओ अंदरो - अंदर जली भुज्जी गेआ । बोलेआ—महाराज ! जे
 सरकारा दी आज्ञा होऐ तां सुखधन ते अऊँ अपनी - अपनी सेना
 लेइयै भिड़ी लैचै । जेड़ा जित्ती जाग मानपरा उससै दी होग ।
 सुखधन आखन लगा जे तेरी ए मर्जी ऐ तां सेना मरवाने दी केहू
 लोड़ ऐ । की नेईं अस दोए दुंद जुद्ध करियै इस भगड़े दा फ़ैसला
 करी लैचै । राजा मन्ती गेआ । दोए अपने - अपने घोड़ें पर
 सोआर होइयै शस्त्र - अस्त्र लेइयै जुद्ध करने लेई खाड़े च उतरी
 आए । दोनों पैतरे वदली - वदलियै इक दूए पर परहार करने
 शुरू करी दित्ते । भालें दिएं सट्टें कन्ने दोनों दे घोड़े उछलन
 लगे । लऊ - लुहान होइयै टटूए दे फुल्लें आला लेखा लाल सूहे
 थल्लै सुट्टियै चार वारी भुजां लटाई दित्ता पर उसी जानी कोला
 नेईं मारेआ । पत्रमीं वारी लड़दे - लड़दे जिसेल्लै अर्थलोभ दा
 घोड़ा धरती पर डिग्गी पेआ तां अर्थलोभ घोड़ै परा डिग्गिए बेहोश
 होई गेआ । इस बेहोशी दी हालता च अर्थलोभ दे नौकर उसी

चुक्कियै घर लेई गे । राजा ने ते तमाशवीनें सुखधन दी बहादरी दी मती सराहना कीती । राजा बाहुबल नै उदा बड़ा आदर-मान कीता । उदो दित्ती दी भेंट राजा नै उसी नामा दे तौर पर देई दित्ती । राजा नै अर्थलोभ दी पाप दी कमाई! दा सारा धन अपने कवजै च करी लेआ । उस दिनै कोला लेइयै मानपरा सुखधनै कोल बड़े सुख - चैन कन्ने रौह्न लगी ।

ए कहानी सुनाइयै राज्यधर बोलेआ जे लोक डरौकल मनुक्खै दा सर्वस्व खोई लैंदे न इत्थूँ तक जे उदी जनानी वी उसी छोड़ियै बहादर मर्दे कोल जाई बाँदी ऐ । इसलेई युवराज जी तुस नचित होइयै सेई जाओ । तौले गै ओ समां औने आला ऐ जदूँ राजकुमारी कर्पूरिका कन्ने संगम होग । राज्यधर थमां हाँसला बधाने आली गल्ल सुनियै नरवाहनदत्त नचित होइयै सेई गेआ । सबेरै जलपान करने परैत गोमुख राज्यर गी आखन लगा—तुस जल्दी नेआ जंत्रमय विमान बनाओ जिदे पर चढ़ियै युवराज नरवाहनदत्त राजकुमारी कर्पूरिका कोल पुज्जी जा । गोमुख दा आखना गै हा जे पलभरै च सज्जा सजाया विमान उत्थें आई गेआ । इदे पर सोआर होइयै युवराज अपने साथी गोमुख कन्ने समुंदरै च स्थित कर्पूर द्वीप दे कंठै वस्से दे कर्पूरसम्भव नगरै च पुज्जी गेआ । विमानै परा उतरियै दोए नगरै दे सैल करन लगे । ए जानियै जे इयै कर्पूर-सम्भव नगर ऐ दोए पुच्छदे - पुच्छदे उस पाससे गो चली पे जिस पाससै राजा दे मैह्ल हे । राजभवन दे कोल इक बुड्ढी दा घर हा । ए दोए उससै मकानै च जाई टिके । मौका पाइयै युवराज नै बुड्ढी गी उत्थूँ दे राजा दा नां पुच्छेआ ते कन्ने उदे परिवार दी जानकारी प्राप्त करने दी इच्छया प्रगट कीती । इनैंगी परदेसी समजियै बुड्ढी आखन लगी—इस नगरै दा नां कर्पूरसंभव ऐ ते इत्थूँ दे राजा दा नां कर्पूरक ऐ । इस राजा दी कोई संतान नेई ही । इसनै संतान पाने लेई निराहार रेइयै मता चिर शिवें दी राधना कीती । इक दिन रातीं राजा गी सुखने च दर्शन देइयै शिवशंकर आखन लगे—पुतरा ! अस तेरी तपस्या पर बड़े परसन्न आं । तेरै घर पुतर कोला वी मता यश देने आली कन्या

जन्म लैग। इस कन्या दा पति विद्याधर चक्रवर्ती होग। सबेरै जिसेल्लै राजा जागेआ तां उसनै शिवें दा सुखने च दर्शन ते वरदान अपनी रानी बुद्धिकारी गी दस्सेआ। दोनैं वर्त पोआरेआ। किश समां वीतने पर राजा दे घर इक कन्या नै जन्म लेआ। कन्या इन्नी सुंदर ही जे उदे शलैपे गी दिक्खियै मैह्लै दे जगमगांदे भाड़-फनूस ते दिये वी शर्मादे हे। शर्मा कन्ने निम्मोभान होइयै दिये दुखै दे जेड़े हौकारे छोड़े उंदा कज्जल बनना शुरू होई गेआ। इस कन्या दा नां राजा नै कपूर्िका रक्खेआ। बुड्ढी नरवाहनदत्त गी आखन लगी—पुत्तरा ! ए राजकुमारी हून जोआन होई गेई ऐ। पिता उदा व्याह् करना चाहंदा ऐ पर राजकुमारी नेई मनदी। सुभा कोला गै ओ मनुक्खें कन्ने घृणा (किर्क) करदी ऐ। इक दिन मेरी धी नै उसी पुच्छेआ—राजकुमारी जी तुस व्याह् की नेई करदी। ओ आखन लगी मिगी अपना पिछला जन्म याद ऐ ते अऊं तुगी अपने पिछले जन्म दी कहानी सुनानियां—

इक महान् सागर दै कनारै इक बड़ा भारी चंदन दा रुक्ख हा। उदे कच्छ गै इक सरोवर हा जिदे च कमल खिड़े दे हे। पैह्ले जन्म च अऊं इस सरोवरै च हंसी दे रूप च रौह्दी ही। में ते मेरे पति राजहंस नै उस महान् चंदन दे बूटे पर आलड़ा वनाए दा हा। ए बूटा समुंदरै दे ऐन कंठे पर हा। अस दोए पति पत्नी इदे पर बने दे आलड़े च नवास करदे हे। जदू अऊं इस आलड़े च अंडे दिदी ही समुंदर उनेंगी चुराइयै लेई जंदा हा। जदू समुंदरै नै मेरे मते सारे वच्चे चुराई ले तां अऊं शिर्वालिंगै दे शिखर पर वेइयै तपस्या करन लगी। में दिन रात रोंदी रौह्दी ही ते में खाना - पीना सब छोड़ी दित्ता। जिसेल्लै अऊं इस हालता च तपस्या करै करदी ही तां मेरा पति राजहंस मिगी आइयै आखन लगा—प्यारी। छोड़ परें ए रोना - धोना। मोए दे पुत्तरें लेई केह् रोना। साढ़े होर वच्चे होई जाडन। जींदा - जीव कदें नां कदें फी सुखै दे दिन दिखदा ऐ। इसलेई अऊं आखनां दिलै गी मता दुख नेई ला। पति दे नेह् रुक्खे सुक्के वचन सुनियै मेरे हिर्दे पर भारी चोट लग्गी। में सोचन लगी हे परमेसरा ! मर्द कनेह् निर्दय

ते पत्थरदिल हुंदे न । अपने वच्चे कन्ने वी इंदा प्रेम नेईं हुंदा । अपनी पतिव्रता इस्त्रिएं कन्ने वी इंदा वरतावा रुक्खा - सुक्का गै रौह्दा ऐ । फी मेरे मनै च वोआल उठ्ठेआ जे नेह् अपने पति कन्ने सबंध बनाई रक्खना बेफायदा ऐ । ए सोचियै अपने पति राजहंस दे दिखदे - दिखदे में शिवें गी नमस्कार करियै समुंदरै च आत्महत्या करी लेई । शिवें दी तपस्या करने कारण अऊं इस जन्म जातिस्मरा होई ते मिगी अपना पिछला जन्म याद रेआ । अऊं मरदें दे हिंदै दी कठोरता गी नेईं भुल्ली । इसै लेई अऊं इस जन्मै च मदें दे मत्थै लगना पसंद नेईं करदी । इयै कारण ऐ जे अऊं ब्याह् करना नेईं चांह् दी ।

बुड्ढी नरवाहनदत्त गी आखन लगी जे राजकुमारी कर्पूरिका नै मेरी धी गी ब्याह् नेईं करने दा ए कारण दस्सेआ हा । पर इस राजकुमारी दे भागें च विद्याधर चक्रवर्ती कन्ने ब्याह् करना लिखेआ ऐ । ते मिगी बभोऐ करदा ऐ जे विद्याधर चक्रवर्ती दे सारे लच्छन तेरे च मजूद न । इसलेई इदे च शक्क नेईं जे विधाता नै राजकुमारी कर्पूरिका दा भावी पति तुगो गै बनाया ऐ । नरवाहनदत्त ते गोमुख नै अज्ज बुड्ढी दे घर गै खाना खाहा ते रात उत्थें गै कट्ठी । सबेरा हुंदे गै युवराज नरवाहनदत्त नै नकेवलै बैइयै गोमुख कन्ने इक योजना बनाई । इस योजना मतावक युवराज नै अपना भेख इक ब्रह्मचारी दा बनाई लेआ । गोमुख गी कन्ने लेइयै ब्रह्मचारी दे भेख च जोर - जोर कन्ने “हा हंसी, हा हंसी” आखदा कई वार राजमैह्लै दे अगूं दा लंघेआ । उसा इयां वार - वार रट लांदे सुनियै जनाने मैह्लें दिएं दासिएं इदी खबर राजकुमारी कर्पूरिका गी दित्ती । दासियां आखन लगियां— राजपुत्तरी ! इक अति सुंदर ब्रह्मचारी असें मैह्लें दे दरवाजे पर दिक्खेआ ऐ । ओ अपने साथी समेत ‘हा हंसी हा, हंसी’ दी रट लांदा मैह्लै अगें फेरे मारै करदा ऐ । अस उस ब्रह्मचारी दे शलैप्पे दी केह् परशंसा करचै । उदे सामनै तुंदा शलैप्पा वी फिक्का लवदा ऐ । ए सुनियै राजपुत्तरी गी बड़ा चवात लगा ।

उसनै दासिएं द्वारा ब्रह्मचारी दे भेख च युवराज गी अपनै सामनै
 सदेआ। उदी सुंदरता गी दिक्खियै राजकुमारी अपने आपगो
 भुल्ली गई। विना अक्खियां भूमके उदै पास दिखदी उसी आखन
 लगी—ब्रह्मचारी जी ! तुसें 'हा हंसी, हा हंसी' दी कनेई रट
 लाई दी ऐ, किश समज नेई आँदा। राजकुमारी दे पुच्छने पर
 नरवाहनदत्त नै शुदाई आला लेखा इक वारी फी जोरै कन्ने
 'हा हंसी, हा हंसी, हा हंसी' आखेआ। उदा साथो गोमुख कर्पूरिका
 गी आखन लगा—राजकुमारी जी ! संखेप कन्ने इदा कारण अऊं
 तुसेंगी दस्सनां। ए ब्रह्मचारी पैहूले जन्मै च हंस हा। अपनी हंसी
 कन्ने समुंदरै दे कंडूहै इक चंदनै दे बूँट पर ए रौहदा हा। इंदे
 जिन्ने वच्चे होए ओ सारे समुंदरै ने अपने चढ़ाऽ च रुढ़ाई ले।
 इदे कोला दुखी होइयै हंसी नै समुंदरै च डुब्बियै आत्महत्या करी
 लेई। हंसी दे वजोग च दुखी होइयै ए बी आत्महत्या करने गी तयार
 होई गेआ। इसनै मरदे - मरदे शिवेँ अगें प्रार्थना कीती जे में
 अगले जन्म च जातिस्मर होआं ते मेरी सती भारजा हंसी बी
 करियै इसनै शिवशंकर गी नमस्कार कीती ते समुंदरै च डुब्बियै
 आत्महत्या करी लेई। इस जन्म च इसनै कौशाम्बी नगरी च
 वत्सराज उदयन दै घर जन्म लेआ ऐ। इदा नां राजकुमार
 नरवाहनदत्त ऐ। इदे जन्म पर आकाश-वाणी होई ही जे ए
 विद्याधर चक्रवर्ती बनग। इदे पित्ता वत्सराज नै इसी अपना
 युवराज वनाई लेआ ऐ। विद्याधर कन्या मदनमंचुका कन्ने इदा
 व्याह, बी होई गेआ ऐ। हेमप्रभ नां दे विद्याधर - पति दी पुत्तरी
 रतनप्रभा बी इदी पतनी ऐ। फी बी ए पूर्वजन्म दी पत्नी हंसी दा
 सिमरण करदा रौहदा ऐ ते इसी धीरज नेई आँदा। ए राजकुमार
 कन्ने इदी मिलाटी होई जिसनै इसगी दस्सेआ जे तेरा अगला व्याह,
 राजकुमारी कर्पूरिका कन्ने होग जेड़ी पिच्छलै जन्म हंसी ही।
 उदी गल्ल मुनियै ए राजकुमार कर्पूरिका दी खोजा च घरा दा
 निकली पेआ। मित्तरता दे रिश्ते कारण में इदा साथ दित्ता। इस

मेरे मित्तरै नै रस्तै च नेक संकट स्थारे न । हेमपुर नगरै च अस
 राज्यधर जांत्रिक कन्ने मिले । उदे बनाए दे विमानै पर अस इस
 शैहूरै च पुज्जे आं । ए कारण ऐ जे मेरा मित्तर हर समै 'हा हंसी'
 दी रट लाई रखदा ऐ । हून तुसेंगी दिक्खियै इसी किश संदोख
 होआ ते । तुसेंगी लोड़चदा ऐ जे मेरे मित्तर दा जथाजोग आदर-
 सतकार करो ।

गोमुख दे मुंहा दा ए कथा सुनियै मर्दे दे मतल्लक
 कर्पूरिका दे विचार बदले । उसी पता लगा जे सारे मर्द इक्कै
 लेहू कठोर नेई हुंदे । पिच्छले जन्म दा मेरा पति ए हंस नेआ
 पत्थर - दिल नेई ऐ जियां अऊं समजी बैठी ही । नेई तां इदा
 मेरे कन्ने इन्ना प्रेम कियां हुंदा जे ए मेरे लेई सारे संसार दी खेहू
 छानदा फिरदा । मेरे पैहू ले जन्म दे प्रेम दे कारण ए इस जन्म
 च बी 'हा हंसी' आखी - आखियै अपनी जिंदू गी रोलै करदा
 ऐ । ए सोचियै राजकुमारी कर्पूरिका युवराज नरवाहनदत्त गी
 आखन लगी—युवराज जी ! धन्न ऐ ओ हंसी जिदे पिच्छें तुसें दौं
 जन्में च इन्ना कष्ट भोगेआ ऐ । इसलेई मिगी माफ करो । अज्जै कोला
 लेइयै मिगी अपनी दासी समजो । दासिएं गी आखियै राजकुमारी
 नै नरवाहनदत्त ते गोमुख गी शनान ते राजकीय भोजन कराया ।
 उसनै उंदे औने दी पिता गी बी खबर दित्ती । खबर सुनियै पिता
 तुरत उत्थें आया । जिसेल्लै उसी पता लगा जे उदी धी ब्याहू
 करने लेई मन्नी गेई ऐ ते उदा भावी पति नरवाहनदत्त ऐ जेड़ा
 भविक्खवाणी मतावक विद्याधर चक्रवर्ती दी पदवी गी पाग, तां
 उदी खुशी दी कोई हृद नेई रेई । उसनै अपने आपगी कृतार्थ
 जानेआ ते भगवान दा धन्नवाद कीता । थोड़े दिनें अंदर
 गै उसनै राजकुमारी कर्पूरिका दा ब्याहू युवराज नरवाहनदत्त
 कन्ने करी दित्ता । उसनै दाजै च अनंत धन-धाग्य अपनी
 पुत्तरी गी दित्ता । ब्याहू दे समै वर-वधू दे अग्निदेव॥ दी
 परदक्खना करने बेल्लै हर परदक्खना च राजा नै अपने जोआई
 गी त्रै कोटि सुन्ना ते इन्ना गै कपूर दित्ता । किश दिन

सौहृदै रेइयै नरवाहनदत्त नै कौशाम्बी परतोने दा निश्चै कीता ।
 उसने नमीं युवरानो कर्पूरिका गो अपना विचार दस्सेआ ।
 ओ आखन लगी—अस की नेईं उसै विमानै च कौशाम्बी चलचै
 जिदे, च तुस आए ओ । जे ए विमान सारें लेई काफी नेईं तां
 अस तौले गै इक्क दूआ वनवाई लैन्ने आं । साढ़े कोला प्राणधर
 नां दा इक्क जांत्रिक ऐ जेड़ा परदेसा थमां साढ़े शैहूर आइयै
 वस्सेदा ऐ । ओ विमान ते होर जंत्रमय चीजां बनाने च बड़ा
 स्याना ऐ । कर्पूरिका ने पति संग कौशाम्बी जाने दी अपनी
 मरजी पिता अगें प्रगट कीती । पिता नै आज्ञा देई दित्ती ।
 प्राणधर जांत्रिक इक्क नमां विमान त्यार करन लगी पेआ ।
 नरवाहनदत्त अपने मनै च सोचन लगा जे मिगी मलूम हुंदा ऐ
 जे प्राणधर जांत्रिक हेमपुर वाले राज्यधर जांत्रिक दा बड्डा भ्रा
 ऐ । जेड़ा राजा बाहुवल दे डरै थमां कांची नगरो त्यागियै बाहूर
 नट्टी गेआ हा । इन्ने चिरै च उत्थें राजा कर्पूरक आया ते
 प्राणधर जांत्रिक वी आई गेआ । प्राणधर ने राजा गी खबर
 दित्ती जे महाराज बड्डा विमान त्यार होई गेआ ऐ । नरवाहनदत्त
 ने उसी बड़े आदर कन्ने पुच्छेआ जे तुस राज्यधर दे बड्डे भ्रा
 प्राणधर ओ । प्राणधर नै बड़े विनय कन्ने जवाब दित्ता जे हां
 महाराज ! अऊं राज्यधर दा बड्डा भ्रा प्राणधर आं । नरवाहनदत्त
 नै प्राणधर गी ओ सारी कथा सुनाई जियां हेमपुरै च उदा संगम
 राज्यधर कन्ने होआ ते जियां राज्यधर ने उनेंगी कर्पूरसंभव
 नगर औने लेई विमान दी स्थायता दित्ती । कौशाम्बी जाने दी
 त्यारी मकम्मल होई जाने पर, नरवाहनदत्त, युवरानी कर्पूरिका,
 गोमुख जांत्रिक प्राणधर ते बाकी नौकर - चाकर दोनें विमानें पर
 सोआर होई गे । इनें विमानें च बेशकीमती दाज वी लही लेआ ।
 निरविघ्न जात्रा लेई ब्राह्मणें मंगलपाठ ते स्वस्तिवाचन पढ़े ।
 वृद्धजनें अपनियां शुभकामना ते शीवदि दित्ते । कर्पूरसंभव
 नगरा दा उड्डिए दोऐ विमान कौशाम्बी गी चली पे । नरवाहनदत्त
 प्राणधर जांत्रिक गी आखन लगा—पैहू, लें अस समुंदरै दे कंढै
 वस्से दे हेमपुर नगर चलने आं, उत्थूं दा होइऐ फी कौशाम्बी दी

जात्रा करगे । किश चिरै दे वाद विमान हेमपुर उतरे । चिरै दे
 वछोड़े वाद उत्थै प्राणधर ते राज्यधर दोनै भ्राएँ दा मलाप
 होआ । दोनै दी अक्खियें थमां अत्थएँ दियां धारां वगी निकलियां
 ते अपने लम्में वजोग दा संताप उनें दूर कीता । इदे परंत दोए
 विमान कौशाम्बी गी उड्डे । किश घड़ियां उड्डे होआ तां विमान
 कौशाम्बी आई पुज्जे । कौशाम्बी दी जनता नै बड़े चरजै कन्ने
 इनेंगी गासै परा उतरदे दिक्खेआ । उंदी हरानी ते खुशी दा
 कोई ठकाना नेईं रेआ जदूँ उनें युवराज नरवाहनदत्त, युवरानी
 कर्पूरिका, गोमुख, प्राणधर ते नौकर-चाकरें गी विमानें परा
 उतरदे दिक्खेआ । उंदे औने दी खबर सुनियै वत्सराज, महारानी
 वासवदत्ता, रानी पदमावती ते उदे पुत्तरै दियां लाड़ियां मदन-
 मंचुका ते रतनप्रभा सारे नरवाहनदत्त दे स्वागत लेईं मैहूलेँ दा
 बाहूर आए । माता - पिता ने पुत्तर गी ते नमीं लाड़ी गी गलें
 लाया ते उनेंगी शीर्वाद दित्ती । कर्पूरिका ते युवराज
 दे कन्ने आए दे जांत्रिक प्राणधर दा म्हाराज नै बड़ा आदर
 कीता । वत्सराज ने बड़े हिखें कन्ने गोमुख दे मुंहां दा सारा
 वरतांत सुनेआ जियां नरवाहनदत्त नै राजकुमारी कर्पूरिका गी
 व्याया हा । गोमुख नै वनै च तपस्विनी कन्ने मुलाकात ते उदे
 वाद दी सारी घटना विस्तार कन्ने आखी सुनाई । गोमुख ने
 वत्सराज गी आवखेआ—महाराज ! ए सारा भाग्यचक्र दा चमत्कार
 ऐ । इयै सारे कम्मैं गी सोआरदा ऐ ते इयै बगाड़दा ऐ । नेईं तां
 कुत्थें शकारै लेईं वनै गी जाना कुत्थें तपस्विनी कन्ने मलाटी ते
 उदी जवान्नी राजकुमारी कर्पूरिका दा पता लगना । कुत्थें समुंदरै
 कंठे जुआड़ हेमपुर नगगरै च जांत्रिक राज्यधर कन्ने मेल ते उदे
 बनाए दे विमानै च समुंदर पार करियै कर्पूरसंभव नगगरै च
 पुज्जना ते उत्थें राजधर दे बड्डे भ्रा जांत्रिक प्राणधर कन्ने संगम ।
 इयै लेहू शुभ समागम ते साधन दयालु विधाता मनुक्खै दे रस्ते च
 आपूँ कट्ठे करदा ऐ । सवनें गोमुख दी स्वामि भगती दी ते
 युवरानी रतनप्रभा दी पतिभगती दी सराहना कीती जिसनै अपनी
 विद्याधरी विद्या दे बलै कन्ने नेक संकटें च रक्षा कीती । उसनै इस

गल्ला दी रत्ती परवाऽ नेईं कीती जे उदा पति उदे सिरै पर इक
 होर सोकन लैन गेदा ऐ । किश समां कौशाम्बी नगरी च वास्सा
 करियै इक दिन जांत्रिक प्राणधर ते कर्पूरद्वीपा कोला आए दे
 प्रतीहार नै वत्सराज कोला टापू गी परतोई जाने दी आज्ञा मंगी ।
 उनें वत्सराज गी गलाया—महाराज ! साढ़े स्वामी राजा कर्पूरक
 नै आक्खेआ हा जे राजकुमारी कर्पूरिका गी कौशाम्बी पुजाइयै
 तुसैं तौले गै परतोई औना । वत्सराज दी आज्ञा लेइयै प्राणधर
 उनेंगी आखन लगा—महाराज ! हून असेंगी राजकुमारी कर्पूरिका
 कौला अपने हत्था दी लिखी दी चिट्ठी लेई देओ जिदे च उदे बल्ला
 लिखे दा होऐ जे ओ कौशाम्बी नगरी च कुशलपूर्वक पुज्जी गेइयां
 न । ए चिट्ठी दिक्खियै राजकुमारी दे पिता गी बड़ी खुशी ते
 संदोख होग । जंदे - जंदे प्राणधर वत्सराज गी आखन लगा—
 महाराज ! किश समै वाद अऊं कटुं व समेत सरकारा ने चरणें च
 आई जाड । कीजे हून सिगी युवराज दे चरणें कोला दूर कुतै
 शान्ति प्राप्त नेईं होनी ।

सूर्यप्रभ (अठमां लम्बक)

पह्ला तरंग

इक दिन जहूँ युवराज नरवाहनदत्त कौशम्बी नगरी च अपने पिता दे मँहलै च बैठा दा हा तां उदै सामने इक दिब्ब मनुख अंतरिक्ष चा उतरियै इंदै पासै पासै आया । कोल आइयै उसनै वत्सराज ते युवराज नरवाहनदत्त गी परनाम कीती । दोनै उदा शैल आदर - सतकार कीता ते उसी उच्चे आसनै पर बठाया । अनन्तर वत्सराज नै उदा पता - थौह् ते औने दा कारण पुच्छेआ । उसनै अपनी राम-कहानी इस चाल्ली शुरू कीती -

हिमालै दी पर्वतावली च वज्रकूट नां दा विद्याधरें दा नगर ऐ । अऊं वज्रप्रभ नां दा विद्याधर स्वामी उत्थूँ दा शासक आं । मेरा शरीर वज्र दा बने दा ऐ इससै लेई लोक मिगी वज्रप्रभ आखदे न । मेरी कठन तपस्या पर परसन्न होइयै शिवें मिगी वर दित्ता जे संसारै च मेरे पर कोई विजै नेईं पाई सककग । अज्ज अऊं अपने भावी स्वामी युवराज नरवाहनदत्त दे दर्शन करने लेई इत्थें आया आं । में अपनी दिब्ब विद्या दे बलै कन्ने जानी लेआ ऐ जे कामदेव दा अवतार नरवाहनदत्त शिव - शम्भु दे वरै कन्ने मनुख होने पर बी विद्याधर लोक दी दोनै वेदिणं दा चक्रवर्ती

स्वामी बनग । पैह्ले समै च वी सूर्यप्रभ नां दा इक मनुक्ख शिवें दे परसाद कन्ने इक कल्प तक विद्याधर - चक्रवर्ती बनेआ हा । पर ओ विद्याधर-लोक दी छड़ी दक्खनी वेदि दा गै चक्रवर्ती हा । उस बेल्लै उत्तर दी वेदि दा स्वामी श्रुतशर्मा विद्याधर हा । हून दक्खन - उत्तर वेदिएं दे वक्खरे - वक्खरे स्वामिएं दे थां दोनैं वेदिएं दा इक्कै स्वामी विद्याधर चक्रवर्ती होग । इस पदवी लेई भगवान शंकर नै युवराज नरवाहनदत्त गी चुनेआ ऐ । विद्याधर - पति वज्रधर दी वारता सुनियै वत्सराज दे नरवाहनदत्त नै उसी पुच्छेआ जे किर्पा करियै तुस असेंगी ओ कथा सुनाओ जे कियां मनुक्ख होने पर वी सूर्यप्रभ नै विद्याधर चक्रवर्ती दी पदवी प्राप्त कीती । उंदे आग्रह करने पर वज्रप्रभ नै ओ कथा इस चाल्ली शुरू कीती—

प्राचीन काल च मद्रदेश दी राजधानी शाकल नां दा नगर हा । उत्थें राजा संगारप्रभ दा पुत्तर चंद्रप्रभ राज करदा हा । ए राजा प्रजा गी आनंद देने आला ते शत्रुएं गी पीड़ा देने आला हा । इदी रानी दा नां कीर्तिमती हा । किश काल परंत दोनैं दै घर सूर्यप्रभ नां दा अति भागवान पुत्तर जम्मेआ । उदे जन्म लैने पर आकाशवाणी होई जे ए जागत बड्डा होइयै विद्याधरें दा चक्रवर्ती राजा बनग । ए राजकुमार पिता दै घर बधन लगा । बालपनैं च गै ओ सबनैं विद्याएं ते कलाएं च पार पाई गेआ । सो'लें वरें दी वरेसा च पिता नै उसी अपना युवराज बनाई लेआ । ते भास, प्रभास, सिद्धार्थ ते प्रहस्त अपने मंत्रिएं दे पुत्तरें गी युवराज दे मंत्रिएं दे पदें पर मकरं कीता । ए मंत्री - पुत्तर राज-काज च युवराज गी पुरी महत्त देन लगे । इक बारी राजा चंद्रप्रभ दे मिलने लेई मयासुर आया । उस बेल्लै युवराज सूर्यप्रभ वी अपने पिता कच्छ बैठा दा हा । मयासुर राजा गी आखन लगा— राजन् ! भगवान् शिवशंकर दी आज्ञा ऐ जे तुंदा पुत्तर विद्याधरें दा चक्रवर्ती राजा बनग । इसलेई तुस मिगी आज्ञा देओ जे अऊं युवराज सूर्यप्रभ गी अपने घर लेजाइयै हूनै कोला इनैंगी विद्याधर-चक्रवर्ती बनने जोग विद्या पढ़ां । इंद्र नै इदा इक शत्रु वी बनाया

ऐ। उदा नां ऐ श्रुतशर्मा जेड़ा खेचरो (गास च उट्ठने दी) विद्या
 जानदा ऐ। मेरी पढ़ाई दी विद्या दे वलै कन्ने बलवान होइयै
 युवराज सूर्यप्रभ अपने शत्रु श्रुतशर्मा गी जित्ति यै विद्याधर - चक्रवर्ती
 दा पद प्राप्त करग। राजा चंद्रप्रभ नै आक्खेआ जे अस बड़ें
 भागवान आं जे तुसैं युवराज दी मद्दत करने दा संकल्प करी लेआ
 ऐ। तुस सूर्यप्रभ गी बड़ी खुशी कन्ने अपनै घर लेई जाओ।
 राजा दी अनुमति कन्ने मयासुर युवराज सूर्यप्रभ गी उदे मंत्रिण
 समेत पताल लेई गेआ। उत्थैं जाइयै उसनै युवराज गी भांति-
 भांति दिण विद्याण ते कलाण दी शिक्षा दिती। उसी विमान
 बनाना बी सखाया। विवध विद्याण च पारंगत होइयै सूर्यप्रभ
 भूतासन नां दे विमान पर सोआर होइयै पताला दा अपने नगगर
 परतोआ। उदे कन्ने मयासुर बी आया। आइयै मयासुर राजा
 चंद्रप्रभ गी आखन लगा—महाराज ! सूर्यप्रभ हून सब विद्याण ते
 कलाण च परवीन होई गेआ ऐ। तुस युवराज गी सम्हालो। अऊं
 फी कदें तुं दे दर्शनैं लेई औड—ए आखियै मयासुर विदा होई
 गेआ। सूर्यप्रभ नै अपने इक उमरी दे मंत्रिण कन्ने विमान पर
 चढ़ियै थोड़े समै च गै सारे मुखबै दा दौरा कीता। जिस - जिस
 देसै च ओ गेआ उत्थू - उत्थू दी राजकुमारी नै उसी आपू वरी
 लेआ। केई राजें दी पुत्रिण गी ओ बलपूर्वक खोइयै लेई आया।
 उदी ब्हादरी थमां डरियै कूसै शत्रु राज्य गी हिम्मत नेई पेई जे
 उदे कन्ने लड़ै जां उदै विरुद्ध कोई गल्ल करै। इस चाल्ली सूर्यप्रभ
 युवराज दियां नौ रानियां होई गेइयां। पिता दा सनेहा औने पर
 सूर्यप्रभ विमान द्वारा पिता दी राजधानी शाकलपुर पुज्जा। उत्थैं
 ताम्रलिप्ति दे राजा वीरभद्र नै दूत दै हत्थ राजा चंद्रप्रभ गी चिट्ठी
 भेजी। चिट्ठी च लिखेदा हा जे तुं दे पुत्तर युवराज सूर्यप्रभ नै
 मेरी दोनैं धिएं दा अपहरण करी लेआ ऐ। अच्छा जेकिश होआ
 ओ चंगा होआ। मिगी इस गल्ला दी खुशी ऐ जे युवराज नै मेरी
 पुत्रिण कन्ने ब्याह करी लेआ ऐ। जे तुं दा साढ़े कन्ने प्रेम ऐ तां
 तुस पुत्तर समेत इत्थैं आई जाओ जिसकरी अऊं तुं दा जथाजोग
 सतकार करी सकां। दूत द्वारा ए चिट्ठी पाइयै राजा चंद्रप्रभ नै

ताम्रलिप्ति जाने दा निश्चै करी लेआ । दूए दिन राजा चंद्रप्रभ
 रानी कीर्तिमती, युवराज सूर्यप्रभ, युवरानियां विलासिनी ते मदन-
 लेखा गी लेइयै विमान द्वारा ताम्रलिप्ति नगरी पुज्जा । उत्थूं दे
 राजा वीरभट नै नगरी दे वाहूर आइयै इंदा शानदार स्वागत
 कीता । राजमैहलें च आइयै राजा वीरभट नै अपने पूजाजोग
 अतिथिएं दा बड़ा आदर - सत्कार कीता । उसनै अपनी तसल्ली
 लेई अपनियां दोयै पुत्रियां विलासिनी ते मदनसेना विवाह - वेदी
 च शास्त्रविधि अनुसार युवराज सूर्यप्रभ गी ब्याही दित्तियां ।
 दाज च अनंत धनराशि ते वेशमार कीमती चीजां दित्तियां । उसै
 बेल्लै वज्रसार नगर दे राजा रम्भ दा दूत उत्थें आया । ओ
 अपने स्वामी अल्ला राजा चंद्रप्रभ गी आखन लगा जे तुंदे पुत्तर
 सूर्यप्रभ नै अपने विद्यावल दे हंकार कन्ने पुत्तरी दा अपहरण कीता
 ऐ । असेंगी पता लग्गा ऐ जे इनें दिनें च तुस राजा वीरभट कोल
 ताम्रलिप्ति आए दे ओ । साढ़े आंगर इनेंगी वी तुंदे पुत्तरै दे
 खिलाफ शकायत ऐ । जियां राजा वीरभट गी मनाने लेई तुस
 ताम्रलिप्ति आए दे ओ इयां गै सुलाह् दी गल्लवात करने लेई
 तुस मेरे कच्छ वी आओ । नेईं तां आपू - चें लड़ाई लग्गने दा डर
 ऐ । ए सुनियै राजा चंद्रप्रभ युवराज दे मंत्री प्रहस्त गी आखन
 लगा जे तुस राजा रम्भ कोल जाइयै उसी आखो जे ओ विर्था
 दुखी नेईं होन । विधाता नै साढ़े पुत्तर युवराज सूर्यप्रभ गी भावी
 विद्याधर चकवर्ती बनाया ऐ । इदे भागें च तुंदी ते होर मते राजें
 दिएं पुत्रिएं कन्ने ब्याह् करना लिखेदा ऐ । इसलेईं उनेंगी इस
 मामले च क्रोध नेईं करना लोड़चदा । किश दिनें तक अस तुंदे
 कोल औगे । तुस साढ़े भित्तर ओ । प्रहस्त नै राजा चंद्रप्रभ दी
 आखी दी सारी गल्ल राजा रम्भ गी जाइयै दस्सो दित्ती । चंद्रप्रभ
 नै प्रभास मंत्री गी अपनी राजधानी शाकल भेजियै राजा रम्भ दी
 पुत्तरी तारावली गी उत्थें नोआई लेआ । परंत तारावली ते
 युवराज सूर्यप्रभ समेत राजा चंद्रप्रभ राजा वीरभट गी कन्ने लेइयै
 राजा रम्भ दी राजधानी गी गेआ । राजा रम्भ नै अपनी राजधानी
 दे वाहूर आइयै राजा चंद्रप्रभ ते उदे साथिएं दा बड़ा स्वागत

कीता । फी ओ उनेंगी आदर कन्ने अपने मैह्लें च लेई गोआ ।
 उत्थें उसनै मंडप बनाया ते उदे च सजाई दी वेदि रचियै शास्त्र-
 विधि अनसार सूर्यप्रभ गी अपनी पुत्तरी तारावली ब्याही दित्ती ।
 अजें इस ब्याह् दा उत्सव होयै करदा हा तां उससै बेल्लै राजा
 रम्भ दै कोल कांची दे राजा दा दूत किश सनेहा लेई आया ।
 उसी सुनियै रम्भ राजा चंद्रप्रभ गी आखन लगा—महाराज !
 अज्ज मेरे वड्डे भ्रा कांची दे राजा कुम्भीर दा पुत्तर आया ऐ ओ
 लिखदे न जे राजा चंद्रप्रभ दं पुत्तर सूर्यप्रभ नै पैह्लें मेरी पुत्तरी
 दा अपहरण कीता फी तुंदी पुत्तरी दा । मिगी पता लग्गा
 इस मामले च राजा चंद्रप्रभ कन्ने सुलाह् करी लेई ऐ । इसलेई
 उदे कन्ने तुस मेरी सुलह् बी करवाओ । जे ओ कुमार सूर्यप्रभ
 गी लेइयै मेरे कोल औन तां में विधि - पूर्वक अपनी पुत्तरी दा
 ब्याह् कुमार कन्ने करी ओड़ड । राजा चंद्रप्रभ नै राजा रम्भ दी
 गल्लेमन्नी लेई । उसनै युवराज दे मंत्री प्रहस्त गी भेजियै राजा
 कुम्भीर दी पुत्तरी वरुणसेना गी उत्थें मंगवाइयै उसी कांची नगरी
 च उदे पिता कोल लेत्ता । दूऐ दिन चंद्रप्रभ युवराज ते वाकी
 साथिए समेत विमान द्वारा कांचीपुरी पुज्जा । राजा कुम्भीर नै
 शास्त्रविधि अनसार अपनी पुत्तरी वरुणसेन युवराज सूर्यप्रभ गी
 ब्याही दित्ती । उसनै दाजै च अनन्त धनराशि, रेशमी वस्तर,
 हाथी - घोड़े - रथ बी दित्ते । इससै चाल्ली श्रीकंठ देश दे राजा
 कांतिसेन नै ते कौशाम्बी दे राजा जनमेजय नै कांतिमती ते
 परिपुष्टा अपनियां - अपनियां पुत्रियां युवराज सूर्यप्रभ गी विधि-
 पूर्वक ब्याही दित्तायां । अजें जदू इनें ब्याहें दी खुशी दा दौरदौरा
 चलै करदा हा तां दिखदे - दिखदे समान लाल होई गोआ ।
 चतरफी जुद्ध दे भयंकर नगारे वज्जन लगी पे । इयां वजोया जे
 कोई भारी सेना अंतरिक्ष दे रस्तै हमला करन आवै करदी ऐ ।
 उससै बेल्लै जोरदार अंधी आई । थोड़े चिरै च गै पता लग्नन
 लगी पेआ जे इक बड़ी भारी विद्याधर सेना जुद्ध लेई गासै च छाई
 गई ऐ । इदा सेनापति इक बांका विद्याधर कुमार हा । इस सेना
 कन्ने आए दे भाटें ते बंदी-जनें ततकाल अपने सेनापति दा गगनभेदी

कजौरा बोलेआ जिदा ए मतवल हा जे इस विद्याधर सेना दा सेनापति
 आषाडेश्वर दामोदर ऐ । ओए मर्तलोक दे रौहू ने आलेआ जीवा
 सूर्यप्रभा ! तूं साढ़े सेनापति दे चरणें पर डिग्गी पौ । ओए राजा
 जनमेआ । तुम्मी इस विद्याधर कुमार अगें मत्था टेक । तुसें अपनियां
 पुत्तरियां जोग्यवर दामोदर गी देनियां हियां, सूर्यप्रभ मनुखै
 गी की दित्तियां । इसलेई हून तुस सारे विद्याधर दामोदर दी
 शरणा च आई जाओ । नेई तां तुसेंगी इदा दंड भलेआं भोगना
 पौग । ए सुनियै युवराज सूर्यप्रभ गी क्रोध आई गोआ । अपनी
 ढाल - तलवार लेइयै अपनी विद्या दे वलै कन्ने ओ तुरत गासै
 अल उछलेआ । उदे कन्ने उदे मंत्री विद्याधर सेना भयंकर टक्कर
 होई । सूर्यप्रभ ते दामोदर इक दूए दी फोजा पर भुक्खे शेरें आंगर
 टुट्टी पे । लऊ दी नदी बगी निकली । लऊ कन्ने रंगोई दियां
 तलवारां शूरवीरें दे शरीरें पर यमराज दी जीभा आला लेखा
 पौन लगियां । युवराज सूर्यप्रभ ते उदे मुट्ठ भर जोआनें बी विद्याधर
 सेना दे छक्के छड़ाई ओड़े । परंत सूर्यप्रभ दा दामोदरै कन्ने बुरदो-
 बुरदी जुद्ध होआ । युवराज नै दामोदर गी धरती पर पछाड़ी
 मारेआ । जियां सूर्यप्रभ हांवे दे दामोदर दा सिर कट्टन लगा
 गासै च विष्णु भगवान नै भयंकर हुंकारा भरेआ । सूर्यप्रभ नै
 पछाड़ै दे दामोदर नी छोड़ी दित्ता ते विष्णु अगें मत्था टेकेआ ।
 दामोदरै गी अपने कन्ने लेइयै विष्णु भगवान गासै च समाई गे ।
 समाना थमां उतरियै सूर्यप्रभ पिता कोल आया । उसी नमै-
 नरोए दिक्खियै उत्थै कट्ठे होए दे सारें राजें युवराज दी मती
 सराहूना कीती । जिसेल्लै सूर्यप्रभ दी शूरवीरता दी परशंसा
 होयै करदी ही उससै बेल्लै राजा सुभट दे दूत नै कच्छ आइयै
 राजा चंद्रप्रभ दे हत्थ इक चिट्ठी दित्ती । ए चिट्ठी कोंकण दे
 राजा सुभट ने राजा चंद्रप्रभ दे नां भेजी ही । इदे च लिखे दा हा
 जे रातीं दे बेल्लै कोई मेरी पुत्तरी गी चुराइयै लेई गोआ । हून
 मिगी पता लगा ऐ जे मेरी पुत्तरी दा हरण करने आला तुंदा
 पुत्तर युवराज सूर्यप्रभ हा । ए जानियै असेंगी बड़ी खुशी होई ऐ ।
 हून मेरी प्रार्थना ऐ जें तुस कुमार सूर्यप्रभ ते मेरी पुत्तरी गी कन्ने

लेइयै साढ़ा घर पवित्तर करो । अस अपनी लाडली धी गी दिक्खने
 गी तरसै करने आं । कन्ने साढ़ी अभलाशा ऐ जे अस अपने हत्थें
 शास्त्र - विधि अनसार अपनी धी सूर्यप्रभ गी ब्याही देचै । मिगी
 मेद ऐ जे तुस मेरी प्रार्थना गी स्वीकार करगे ओ । राजा चंद्रप्रभ
 ने दूत दा आदर - सत्कार कीता । राजा ने तत्काल मंत्री भेजियै
 राजधानी शाकल थमां राजा सुभट दी पुत्तरी चंद्रिकावती गी
 उत्थें सहियै उदे पिता दे घर भेजी दित्ता । दूयै दिन राजा चंद्रप्रभ
 युवराज सूर्यप्रभ ते सरबंधी राजें गी कन्ने लेइयै विमान द्वारा
 कोंकण देश दे राजा सुभट कोल गोआ । राजा सुभट ने अपनी
 पुत्तरी चंद्रिकावती दा ब्याह् विधिपूर्वक सूर्यप्रभ कन्ने करी दित्ता ।
 दाजै च उसने अनन्त धनराशि ते अनमोल चीजां अपनी पुत्तरी गी
 दित्तियां । अजें सूर्यप्रभ उत्थें गै हा जे लावाणक दे राजा दा दूत
 बी उत्थें आई पुज्जा । उसने राजा चंद्रप्रभ गी आखेआ—महाराजा !
 मेरे स्वामी ने साहबें गी ए सनेहा भेजेआ ऐ जे साढ़ी पुत्तरी
 सुलोचना गी तुंदा पुत्तर सूर्यप्रभ हरियै लेई गोआ हा । असेंगी
 इस गल्ला दा कोई गिला नेई । पर अस चाह्ने आं जे अस अपनी
 पुत्तरी दा ब्याह् कुमार सूर्यप्रभ कन्ने विधिपूर्वक अपने हत्थें करी
 देचै । राजा चंद्रप्रभ नै सुरक्षा दा परबन्ध करियै सुलोचना गी
 उदै पिता दे घर भेजी दित्ता । दूयै दिन राजा चंद्रप्रभ कुमार
 सूर्यप्रभ गी लेइयै जिसेल्लै आपू उत्थें पुज्जा तां सुलोचना दे पिता
 ने शास्त्रविधि अनसार अपनी पुत्तरी दा ब्याह् युवराज सूर्यप्रभ
 कन्ने करी दित्ता । ते अपार धन - सम्पत्ति दाजै च दित्ती । इस
 ब्याह् दे सम्पूरण होई जाने पर चीन देश दे राजा सुरोह ने अपनी
 पुत्तरी विद्युत्लता दा ब्याह् सूर्यप्रभ कन्ने करी ओड़ेआ । मता
 चिर चीन देश च सौह्रै घर रेइयै अखीर युवराज सूर्यप्रभ नमीं
 युवरानी विद्युत्लता समेत भूतासन विमान पर सोआर होइयै
 अपने पिता दी राजधानी शाकल नगर परतोई आया । उं दे औने
 पर नग्नरै दे लोकें भारी उत्सव मनाया :

दूआ तरंग

इक वारो जदू राजा चंद्रप्रभ युवराज सूर्यप्रभ ते मंत्रिणं

समेत दरबारै च बैठा दा हा तां चानचक्क सभा दी धरती फटी
 गई । पैहू लें उदे अंदरा सुगन्धत (ह)वा निकली परंत मायासुर प्रगट
 होआ । राजा ने उदा बड़ा सतकार कीता ते उसी रतन जड़त
 संघासनै पर बठाया । मयासुर राजा चंद्रप्रभ गी आखन लगा—
 राजन् ! तुसें संसार दे बतेहरे भोग भोगी ले न । हून अगलें दा
 बेल्ला ऐ । इसलेई तुसेगी इस पाससै ध्यान देना लोड़चदा ऐ । तुस
 दूतें गी भेजियै अपने सरबन्धी राजें गी बुलाई लौ । इन्ने चिरै च
 अस सुमेरू विद्याधरपति दी मदता कन्ने श्रुतशर्मा गी जित्तियै खेचरी
 शक्ति प्राप्त करने आं । विद्याधरें दा स्वामी सुमेरू साढ़ा स्थायक
 दी रक्षा करेआं ते परंत अपनी धी उसी व्याही देआं । मयासुर दे
 आखने पर राजा चंद्रप्रभ ने दूत भेजियै अपने मित्तर राजें गी
 बुलाई लेआ । इससै बेल्लै देवर्षि नारद गासा थमां उतरे । राजा
 ने उंदा बड़ा मान-सतकार कीता ते उनेंगी शैल उच्चे आसनै पर
 बठाया । किश चिर आसनै पर वसां लेइयै नारद आखन लगे—
 राजन् ! मिगी तुं दे कोल इंद्र ने भेजेआ ऐ । देवराज आखदे न
 चक्रवर्ती दी पदवी प्राप्त कराने दा जतन करै करदे ओ, तुसेंगी ए
 जतन नेई करना लोड़चदा । कीजे असें ए निश्चै करी लेआ ऐ
 जे ए पदवी विद्याधर श्रुतशर्मा गी मिलै । तुस श्रुतशर्मा दे विनाश
 लेई कोशश करै करदे ओ । ए कोशश करना मेरे कन्ने दुशमनी
 करना ऐ । जहू तुस रुद्रयज्ञ करै करदे हे तां में तुसेंगी आखेआ
 हा जे पैहू लें तुस अश्वमेध यज्ञ करो । पर तुसें मेरी गल्ल नेई
 मन्नी । तुसें हंकारियै जेड़ा शिवें गी ए सम्मान दित्ता ऐ इदे करी
 तुसें देवतें दा अपमान कीता ऐ । ए तुं दी बड़ी भारी मूर्खता बी
 ऐ । इदे कन्ने तुन्दा कल्याण नेई होग । नारद जी ने जिसेल्लै ए
 इंद्र दा सनेहा राजा चंद्रप्रभ गी दित्ता तां मयासुर आखन लगा—
 भला इंद्र गो सूर्यप्रभ दी ब्हादरो दा उस बेल्लै पता नेई लगा
 जिसेल्लै जुद्धै च सूर्यप्रभ नै दामोदर विद्याधर गी धरती पर

पछाड़ेआ हा । मनुख गै आत्मबल कन्ने बड़े - बड़े पद प्राप्त
 करदा ऐ । भला राजा नहुष नै इंद्र दा पद प्राप्त नेईं कीता हा ।
 इंद्र ने जेड़ी ए गल्ल आखी ऐ जे उसने श्रुतशर्मा गी विद्याधर
 चक्रवर्ती दी पदवी दित्ती ऐ, ए बी ठीक नेईं । महेश दे मकाबले
 च इंद्र के चीज ऐ । जे महेश्वर कुसै गी वर दिदे न तां उसो कुन
 टाली सकदा ऐ । इदे च के अधर्म ऐ जे अस शत्रु गी हराने आं ।
 अस नां ते इंद्र आंगर कुसै मुनि दी भारजा गी नठाने आं नां गै
 उदे आला लेखा ब्रह्म - हत्या दा पाप करने आं । जे असें अश्वमेध
 यज्ञ नेईं कीता तां उदा इंद्र गी के दुख लगा ऐ । जेड़ा रुद्रयज्ञ
 करी लै उसने सारे यज्ञ करी ले । जे शिवशंकर परसन्त तां समझो
 सारे देवता परसन्त होई गे । जिसेल्लै मयासुर ने ए गल्लां कीतियां
 तां देवर्षि नारद अपनी वीणा चुक्कियै नारायण दा गुणगान करदे-
 करदे गासै रस्तै देवलोक गी चली चली गे । राजा चंद्रप्रभ गी
 चिंतातर दिक्खियै मयासुर बोलेआ—राजन् ! तुसेंगी इंद्र कोला
 डरना नेईं लोड़चदा । अऊं सारे असुर ते राजा लोक तुं दी
 सहायता करइन्त । अपने मदतगार सारे राजे जिसेल्लै आई गे तां
 मयासुर दी राऽ मतावक राजा ने रुद्र-महाबलि कीती । पूर्णहिंति
 दे समै अग्निकुंडै चा नंदी शिवगण प्रगट होइयै आखन लगे—
 राजन् ! शिव-शम्भु ने तुसेंगो संदेसा भेजेआ ऐ जे तुसेंगी इक
 इंद्र कोला केहू सौ इंद्रें कोला बी नेईं डरना लोड़चदा । सूर्यप्रभ
 विद्याधरें दा चक्रवर्ती अवशश बनग । ए आखियै नंदीगण अग्नि-
 कुंडै च समाई गेआ तां राजा चंद्रप्रभ मयासुर ते दूए मित्तर राजें
 दे कन्ने राजधानी गी परतोई आया । जिसेल्लै सारे चलो गे तां
 एकांत जानियै मयासुर राजा चंद्रप्रभ गी आखन लगा—राजन् !
 अऊं अज्ज तुसेंगी इक बड़ी गुप्त गल्ल दस्सनां । ओ ए ऐ जे पिछले
 जनम तूं सुनोथ नां दा मेरा असुर पुत्तर हा ते सूर्यप्रभ समुंडीक
 नां दा तेरा निकड़ा भ्रा हा । तुस दोऐ देवासुर जुद्ध च मारे गे हे ।
 तेरे उस पैहूले आसुरी शरीर गी में केई दिब्ब जड़ी-बूटिणें दे लेपै
 कन्ने अजें तक सुरक्षित रखेदा ऐ । हून तूं पताल लोक जाइयै
 उस अपने पैहूले शरीरें च परवेश करगा । उदे च परवेश करने

करी तेरी शक्ति केई गुणा वधी जाग ते तू जुद्ध च विद्याधरें पर
 विजै पागा । सूर्यप्रभ इसैं सुंदर मानुशी शरीर दे चोले च सुमुंडीक
 दा अवतार विद्याधर चक्रवर्ती दी पदवी प्राप्त करग । राजा
 चंद्रप्रभ ने मयासुर दी गल्ल मन्नी लेई । युवराज सूर्यप्रभ दा मंत्री
 सिद्धार्थ आखन लगा—जदू राजा दी आतमा दूए शरीरै च दाखल
 होग तां ए असैं सबनें गी भुल्ली जाडन । मयासुर बोलेआ—अऊं
 तुन्दे सामने राजा गी नेई जोग दी जुगती कन्ने दूई देह् च परवेश
 करांड जे इसी असुरी शरीरै च बी इस शरीर दियां सारियां घटनां
 जाद रौडन । आसुरी शरीर च प्रवेश करने करी राजा बुढ़ापे ते
 रोगें थमां छुटकारा पाई जाग । तुस पताले च जाइयै जिसेल्लै
 अमृतपान करगेओ तां तुसेगी दिव्व शरीर प्राप्त होडन । दूए दिन
 सारें राजें गी कन्ने लेइयै राजा चंद्रप्रभ चंद्रभागा ते एरावती नदिएं
 दे संगम पर आई गोआ । उत्थें सारे राजें गी बाहूर वठाइयै अपनी
 रानी सिद्धार्थ ते दूए मंत्रिएं समेत राजा चंद्रप्रभ नदिएं दे
 जलै च जाई वड़ेआ । उत्थें मयासुर दी दस्सी दी गुफा दे मुहै च
 दाखल होआ । उस गुफा च मता चिर चलने दे बाद राजा ने इक
 देवमंदर दिक्खोआ । अपने साथिएं समेत राजा इस मंदरै अंदर
 गोआ । जदू राजा चंद्रप्रभ ते उदे साथी उत्थें बैठे दे हे तां समानै च
 विद्याधर आइयै छाई गे । इनें विद्याधरें अपनी इंद्रजाल माया दे
 बलै कन्ने स्तम्भन मंत्र छोड़ियै सबनें गी जकड़ी ओड़ेआ । ते ततकाल
 सूर्यप्रभ दी सारिएं पतनिएं गी हरी लेआ । उसैं बेल्लै आकाशवाणी
 होई जे ओ पापी श्रुतशर्मा जे तू सूर्यप्रभ दी कुसै पतनी गी हत्थ लाया
 ता सेना समेत तेरा नाश होई जाग । तू इनें जनानिएं गी माता
 समान समहाली रक्ख । तुगी मारियै जेड़ा में इनेंगी नेई छुड़ाया
 उदा कोई कारण ऐ । इस दिव्व वाणी गी सुनियै विद्याधर सेना
 गासै च गै समाई गई । उसैं बेल्लै इस मंदरै च बैठे दे राजा गी
 मयासुर आखन लगा—राजन् ! हून अऊं तुसेंगी दूए शरीरै च
 प्रवेश करने दी जोग-जुगती समझाना । ए आखियै मयासुर ने
 सबनें दे सामने राजा सूर्यप्रभ गी सांख्य ते योगशास्त्रें च वर्णत जुगती
 विस्तार कन्ने दस्सी इस जोग-जुगती द्वारा मनुक्ख पूर्ण ज्ञान प्राप्त

करियँ मोक्ष दा अधिकारी बनी सकदा ऐ। जोग दी इस मजला च पुज्जियँ जोगी सुर्गलोक दी वी इच्छा नेईं करदा। इस परसंगै च अऊं तुसैंगी इक कथा सुनानां—

पह्ले कल्प च काल नां दा इक ब्राह्मण कुतै रौह्दा हा। पुष्कर तीर्थ पर जाइयँ उसनै दिन - रात अखंड जप शुरू कीता। उसी जप करदे-करदे दो सौ दिव्व वरे वीती गे। उस समै इस ब्राह्मण दे सिरै चा प्रचंड प्रकाश निकलन लगा जिदा सेक दस जहार सूरजें दे सेक बराबर हा। इदे कन्ने त्रिलोकी सड़न लगी। ब्रह्मा, इंद्र ते दूए देवता दौड़दे - दौड़दे उदे कोल आए ते आखन लगे— भगवन् ! जेड़ा वर तुस चांह्दे ओ दस्सो। तुं दे सिरै थमां निकले दे प्रचंड तेज कन्ने त्रिलोकी जलै करदी ऐ। इस तेज गी अपने शरीरै च गै समेटी लौ। ब्राह्मण बोलेआ - अऊं इयँ वर मंगनां जे जपै गी छोड़ियँ होर कोई चीज मिगी चंगी नेईं लगै। बार-बार प्रार्थना करियँ जदू देवता ब्राह्मण गी मता सतान लगे तां ब्राह्मण उस थां गी त्यागियँ कुतै दूर हिमालै च जाइयँ जप करन लगा। उत्थें वी जिसेल्लै ब्राह्मण दे सिरै दा तेज त्रिलोकी गी जालन लगा तां इंद्र ने उदे जपै च विघन पाने ले अपसरां भेजियां। पर अपसरां ब्राह्मण गी लुभाई नेईं सकियां। फी देवतें ब्राह्मण गी मारने लेईं मौता गी भेजेआ। मौत उदे कोल आइयँ आखन लगी—ब्राह्मण देवता ! मनुक्ख इन्नी उमर नेईं भोगदे जिन्नी तुस भोगै करदेओ। इसलेईं तुस भगवान दी इस आज्ञा गी भंग नेईं करो। तुस हून अपना - आप मेरै सपुर्द करी देओ। ब्राह्मण बोलेआ जे मेरी उमरा दी अवधि मुक्की गई ऐ तां तूं मिगा संसारै चा की नेईं चुक्की लैदी। किसलेईं बलम्ब करै करनो ऐं। ओ मौते ! अऊं आत्म - हत्या दा महापाप करियँ शरीर त्यागना नेईं चाह्दा। मौत उदे तप दे परभाव कन्ने उसी छूई नेईं सकको ते नराश होइयँ उत्थूँ दा चली गई। जदू काल वी उस तपस्वा ब्राह्मण दा किश नेईं वगाड़ी सक्केआ तां देवराज इंद्र उसा जबरदस्ती चुक्कियँ देवलोक गी लेईं गेआ। उदी घोर तपस्या दे कारण जिसेल्लै देवलोक वी तपन लगा तां देवता फी उसी

मर्तलोक च छोड़ी गे । इंद्र ते बाकी देवता फी उदे कोल आइयें
 आखन लगे—जे ब्राह्मण देवता तूं साढ़े थमां वर मंग । इस्सै
 बेल्लै उत्थें सूर्यवंशी राजा इक्ष्वाकु आई गेआ । जदूं इक्ष्वाकु
 गी सारी गल्ला दा पता लग्गा तां ओ जापक ब्राह्मणै गी
 आखन लगा—महाराज ! जे तुस देवतें थमां वर मंगना नेईं
 चाह्दे तां मेरे कोला मंगो । अऊं वर देने गी त्यार आं ।
 ए सुनियै ब्राह्मण हस्सियै बोलेआ—में तुं दे कोला के वर मंगना
 ऐ, जद में देवतें दे वरें गी ठोकर मारी ओड़ी ऐ । राजा इक्ष्वाकु
 नै आखेआ जे में वर देने दे समर्थ नेईं ते तुस अपने आप गी समर्थ
 समजदेओ तां तुस्सै मिगी वर देओ । ब्राह्मण बोलेआ जेड़ा वर
 तुस चाह्दे ओ अऊं देने गी त्यार आं, मंगो । ए सुनियै राजा
 इक्ष्वाकु सोचन लगा—अऊं क्षत्री आं । अऊं दान देआं ते ब्राह्मण
 दान लै, ए ते मनासब गल्ल ऐ, पर ब्राह्मण दान देयै ते क्षत्री
 दान लै ए गल्ल ना - मनासब ते शास्त्र दे विरुद्ध ऐ । अजें राजा
 इस सोचै च पेदा हा जे उत्थें दो ब्राह्मण भगड़ा करदे आई पुज्जे ।
 राजा गी दिक्खियै उनें अपना - अपना विवाद राजा गी सुनाया ।
 उं दे चा इक ब्राह्मण बोलेआ—महाराज ! इस दूए ब्राह्मणै ने मिगी
 दक्खना समेत गौ दान दित्ती । हून अऊं इयें गौ इसी वापस करै
 करनां । ए की नेईं लैदा । दूआ ब्राह्मण बोलेआ—महाराज !
 मेरी अर्ज सुनो । न ते पैह्लें में इसी ए गौ दान दित्ती ऐ ते नां
 हून अऊं इदे कोला मंगै करनां । ए मिगी गौ देयै करदा ऐ ।
 राजा बोलेआ—इदे च बादी दा दोश ऐ । पैह्लें गौ दा दान
 लेइयै फी ए दान देने आले गी गौ की वापस दिदा ऐ । जियां
 राजा नै ए फैसला सुनाया तां मौका दिक्खियै इंद्र बोली उट्ठेआ
 जे राजन् ! जे तुस इस निजम गी जानदेओ तां तुस इस तापक
 ब्राह्मण कौला पैह्लें वर मंघियै वर मिलने पर ओ वर की नेईं
 लैदे । राजा गी इदा कोई जवाब देना नेईं आया । राजा उसी
 आखन लगा—ब्राह्मण देवता ! मिगी तुस अपने जपै दा अद्दा
 फल देई देओ । ब्राह्मण नै राजा गी मंगेआ वर देई दित्ता ।
 इस वरै दे कारण राजा इक्ष्वाकु दी सवनें लोकें च गति सम्भव

होई गेई । ते जप करने आले ब्राह्मण गी शिवलोक प्राप्त होआ ।
मते कल्प शिवलोकै च वास्सा करियै ओ ब्राह्मण फी मर्तलोक च
आया । अपने योगबलै कन्ने उसनै परमगति पाई ।

ए कथा सुनाइयै मयासुर राजा चंद्रप्रभ गी आखन लगा
जे सुर्ग दे सुख गी ठुड्डा मारियै योगी - जन जिस परम सिद्धि
गी प्राप्त करदे न ओ सिद्धि अज्ज तूसें प्राप्त करी लेई ऐ । इसलेई
हून तुस अपनी इच्छा कन्ने अपने पैहूले शरीरै च प्रवेश करो ।
ए आखियै मयासुर राजा चंद्रप्रभ गी दूए पताललोकै च लेई गेआ ।
उत्थें उनें इक्क दिब्ब भवनै च प्रवेश कीता जित्थें इक महांपुरश
सुंदर पलंगै पर लेटे दा हा । इदे शरीर गी उत्थें दिब्ब जड़ी - बूटिएं
दे लेप कन्ने सुरक्षित रक्खे दा हा । इदे कन्ने इदी असुर वंश दी
भारजा बी ही । मयासुर चंद्रप्रभ गी आखन लगा—ए तुंदा पैहूला
शरीर ऐ । हून तुस मेरी दस्सी दी जोग जुगती द्वारा इदे च
प्रवेश करी जाओ । मयासुर दे आखने पर चंद्रप्रभ दी आत्मा उस्सै
जोगजुगती कन्ने अपने आसुरी शरीरै च प्रवेश करी गेई । पलंगै
पर लेटे दे मनुक्खै नै अवासी मारी ते अक्खां खोली दित्तियां ।
इयां उट्ठियै पलंगै पर बेई गेआ जियां कोई सुत्ता दा उट्ठी
बैठा होयै । उदे जींदे होई जाने करी पताल लोकै च खुशी दी
लैहूर उट्ठी खड़ोती पर युवराज सूर्यप्रभ ते उदे साथिएं दे हिंदें
च दुख छाई गेआ । चंद्रप्रभ जिदा पैहूला नां सुनीथ हा अपने
नमें चोल्ले च अपने पिता मयासुर गी दिक्खियै उदे पैरें पर डिग्गी
पेआ । पिता नै उसी गले कन्ने कन्ने लाई लेआ ते पुच्छेआ—पुत्तरा !
तुगी इस बेल्लै अपने दोनैं जनमें दा सिमरण होग । सुनीथ आखन
लगा—हां पिता जी मिगी दोने जनमें दियां सारियां घटनां जाद
न । सुनीथ नै अपनी पैहूलिएं जनानिएं गी ते सूर्यप्रभ ते दूए
पुत्तरें दिएं पतनिएं गी इक - इक करियै पछानेआ ते
उंदे अपने - अपने नां लेइयै उनेंगी कोआलेआ । जदू सारें गी
जकीन होई गेआ जो चंद्रप्रभ सुनीथ दी आसुरी देह च परवेश
करी गेआ ऐ तां युवराज सूर्यप्रभ ते उदे साथिएं सुनीथ गी परनाम

कीती । परंत मयासुर सुनीथ ते साथिएं गी इक दूए नगरै च लेई
 गेआ जेड़ा सुन्ने ते रतनें दा बनेदा हा । इत्थें उनें मणिमय
 बौली दे अमृतरस गी पीता । उदे पीने करी सबनें दे शरीर सुन्ने
 आला लेखा चमकीले ते महां - बलवान होई गे । बाद च मयासुर
 सुनीथ गी चौथे पतालै च उदी माता कोल लेई गेआ । इदी
 माता दानव - कन्या ही । उदा नां लीलावती हा । चौथे पताल
 दी शोभा दिखदा - दिखदा सुनीथ इक सुवर्णमय नगरै च पुज्जा ।
 उत्थें उसनै अपनी माता दे दर्शन कीते । मोए दे पुत्तरै गी जींदा
 दिखियै माता दा कलेजा खिड़ी उट्ठेआ । मता चिर पुत्तरै गी
 छात्ती कन्ने लाइयै अक्खियें चा प्रेम दे अत्थरुं वगांदी रेई ।
 मयासुर नै अपनी पत्नी लीलावती गी सुनीथ दे फी जींदा होई
 जाने दी सारी घटना उसी सुनाई । ओ लीलावती गी आखन
 लगा—देवी ! तेरा दूआ पुत्तर सुमंडीक हून इस चंद्रप्रभ - सुनीथ
 दा पुत्तर सूर्यप्रभ ऐ, राजकुमार ऐ । इसी शिवें दा वर ऐ जे
 अगें चलियै ए विद्याधर चक्रवर्ती दी पदवी प्राप्त करग । मयासुर
 दी गल्ल सुनियै सूर्यप्रभ ने अपनी पिछले जन्म दी दादी लीलावती
 दे चरणें पर सीस नोआया । लीलावती नै उसी छात्ती कन्ने लाया
 ते आखन लगी—पुत्तरा ! तूं इस्सै मानुशी शरीरै च सोहना
 लगानां । तूं शिवें दे वरै कन्ने इस्सै शरीरै च विद्याधर चक्रवर्ती
 दी पदवी पा । उस्सै बेल्लै मयासुर दे सिमरण करने पर मंदोदरी
 ते वभीषण उत्थें प्रगट होई गे । सारे नकेबलै बेइयै गल्लवात
 करने लगे । वभीषण मयासुर गी आखन लगा—असुरराज ! अऊं
 तुसेंगी इक सिक्ख दिन्नां, मेद करनां जे तुस इसी मन्ती लैगे
 ओ । सिक्ख ए ऐ जे तुसें कदें देवतें कन्ने दुशमनी नेई करनी ।
 ए सुनियै मयासुर बोलेआ—राक्षसराज ! अऊं कदे बी देवतें कन्ने
 जुद्ध करने गी त्यार नेई । पर तुस दस्सो जे इंद्र देव सेना लेइयै
 साढ़े पर हमला करै तां असेंगी केहू करना लोड़चदा ऐ । इस
 प्रश्नै दा उत्तर दित्ते बगैर वभीषण मंदोदरी गी कन्ने लेइयै लंका
 गी चली गेआ । परंत मयासुर अपने पुत्तर सुनीथ गी त्रीऐ पताल
 असुरराज बलि कोल लेई गेआ । उत्थें सबनें असुरराज दा दर्शन

कीता । सारें उनेंगी परनाम वी कीती । बलि नै प्रह्लाद गी
 उत्थें सदाया । सबनें प्रह्लाद दे चरण छूतें । असुरराज बलि
 नै सुनीथ ते सूर्यप्रभ दे पताल औने पर अपना बड़ा मान ते गौरव
 समजेआ । उनें आखेआ जे इनें दौनें दे औने करी साढ़ी किसमत
 चमकग । बलि दे बचन गी सुनियै दैत्यगुरु शुक्राचार्य आखन
 लगे—जेड़ा मनुख धर्म पर चलदा ऐ उदा कदापि पतन नेईं
 हुंदा । इसलेईं अजें तुसें सबनें गी धर्म पर चलना लोड़चदा ऐ ।
 सारें असुरें गुरु दे इस बचन गी सराह्या । इन्ने चिरै च उत्थें देवर्षि
 नारद वी आई बराजे । राजा बलि दा आदर-मान स्वीकार
 करने परंत ओ अपने आसन पर बेइयै आखन लगा—राजन् !
 मिगी देवराज इंद्र नै सनेहा देइयै तुंदे कोल भेजेआ ऐ । ओ
 आखदे न जे असेंगी ऐ सुनियै बड़ी खुशी होई ऐ जे मयासुर दा
 पुत्तर सुनीथ मोए दा फी जी उट्ठेआ ऐ । हून तुसें साढ़े कन्ने
 बिना कारण दे बैर नेईं करना । नां गै तुसें कदे बिना कारण
 श्रुतशर्मा कन्ने बैर करना । ऐ सुनियै प्रह्लाद नारद जी गी गलान
 लगा—असें अज्ज गै गुरु दे सामनै सगंध चुक्की ऐ जे बगैर कारण
 दै अस कुसै कन्ने बैर-वरोध नेईं करगे । पर जे श्रुतशर्मा देवते
 दी मदता कन्ने साढ़े पर हमला करग तां उपा करना साढ़ा धर्म
 ऐ । उदे च साढ़ा कोई दोश नेईं होग । शिवशम्भु नै पैह्लें गै
 भविष्यवाणी कीती दी ऐ जे सूर्यप्रभ विद्याधर चक्रवर्ती दी
 पदवी पाग । इस मामले च देवराज इंद्र गी वी समजी-सोचियै
 चलना लोड़चदा ऐ । ऐ सुनियै नारद जी प्रह्लाद दी परशंसा
 करियै गासै रस्तै देवलोक गी चली गे । उंदे उठी जाने बाद
 राजा बलि नै सभा दा विसर्जन कीता । प्रह्लाद ते बाकी सारे
 सभासद अपने-अपने घरें गी चली गे । मयासुर, सुनीथ, सूर्यप्रभ
 ते उदे साथी वी राजा बलि गी परनाम करियै अपने घरेंगी उठी
 गे । घर औंदे गै लीलावती नै उंदा बड़ा सतकार कीता ते उनेंगी
 भांति-भांति दे खड़रस भोजन ते पान-सपारी दित्ते । लीलावती
 नै अपने पुत्तर सुनीथ दी मुलाकात उदिएं पतनिएं कन्ने कराई ।
 इंदे च कुबेर दी पुत्तरी तेजस्वती, तुम्बुरु गंधर्ब दी पुत्तरी मंगलावती

ते प्रभास दी पुतारी कीर्तिमती सबनें थमां परधान हियां ।
 उस रातीं सुनीथ रानी तेजस्वती दे मैह्लें च रेह्या । उस रातीं
 कल्ले होने दे कारण सूर्यप्रभ गी नींदर नेई आई । उसदे साथी
 प्रहस्त गी बी नींदर नेई आई । अही रात होई तां इंदे कमरे च
 इक दिव्व कन्या नै अपनी स्हेली समेत प्रवेश कीता । सूर्यप्रभ दे
 कोल आइयै ओ अपनी स्हेली गी आखन लगी—भैने ! तूं अपने
 ठंडे हत्थें कन्ने राजकुमार गी जगा । ठंडा हत्थ लगाने करी
 सूर्यप्रभ नै अक्खीं खोलियां ते उनेंगी पुच्छन लगा—तुस कुन ओ
 ते अही रातीं तुस इत्थें की आइयां । ए सुनियै स्हेली आखन लगी—
 कुमार जी ! ए राजकन्या कलावती असुरराज हिरण्याक्ष दे पुत्तर
 अमील दी पुत्तरी ऐ । अमील नै निश्चं करी लेआ ऐ ओ अपनी
 धी तुसेंगी ब्याही देग । मेरी स्हेली कलावती अपने पिता दे इस
 संकल्प गी सुनियै तुंदे दर्शन लेई इत्थें आई ऐ । कलावती दी
 स्हेली दी गल्ल सुनियै कुमार सूर्यप्रभ नै फी अक्खीं मीटी लेइयां ।
 उसी सुत्ता दा जानियै कलावती नै सारी गल्ल अपनी स्हेली दी
 जवानी प्रहस्त गी दस्सी । परंत दोए अपने मैह्लें गी जान लगियां ।
 प्रहस्त सूर्यप्रभ कोल जाइयै पुच्छन लगा—युवराज जी ! के गल्ल
 ऐ, तुस की सेई गे ओ । सूर्यप्रभ बोलेआ—मिगी नींदर कुत्थूं आवैं ।
 हूनै इत्थें अपनी स्हेली कन्ने इक दिव्व कन्या आई ही जेड़ी मेरा जी
 चुराइयै कुतै छप्पी गई ऐ । ए सुनियै प्रहस्त बाहूर गेआ । उसनै
 स्हेली समेत कलावती गी खड़ोते दे दिक्खेआ । ओ उसी आखन
 लगा—राजकुमारी ! में तुंदे आखे मतावक इस सरबंधै च गल्ल-
 जाओ । तुस अंदर आइयै इक वारी फी उनेंगी दर्शन देई
 अंदर जाना मनासव नेई समजेआ । पर प्रहस्त हत्था दा पगड़ियै
 उसी अंदर लेई गेआ । युवराज सूर्यप्रभ आखन लगा—सुंदरि !
 तुंदे लेई मनासव ऐ जे तुस इक परदेसी दा दिल चुराइयै चप्प
 करियै चली जाओ ? में तुसेंगी इस चोरी दे अपराध लेई पगड़ी
 लेआ ऐ । हून छोड़इ नेई । स्हेली वोल्ली—कुमार जी इंदे पिता
 नै इसी पंहलें गै इसी तुसेंगी ब्याही देने दा संकल्प करी लेदा ऐ ।
 इसलेई इसी जेड़ा दंड तुस देना चाहंदे ओ वशक्क देओ ।

सूर्यप्रभ नै बलपूर्वक कलावती गी आलिंगन करने दी कोशिश कीती पर राजकुमारी करलाई जे अऊं अजें कोआरी आं ए मत करो । प्रहस्त आखन लगा—राजकुमारो ! इदे च कोई चिंता - फिकर दी गल्ल नेई । आखर राजकुमार ते राजकुमारिण दे गंधर्व-विवाह हुंदे आए न । ए आखियै प्रहस्त ते राजकुमारो दी स्हेलड़ी दोए कमरे थमां बाहुर निकली आए । दोनैं गंधर्व ब्याह करी लेआ । रातभर कुमार दै कोल रेइयै कलावती सबेरै अपने मंहलै गी चली गई ।

परभात होने पर दैत्यपति प्रह्लाद नै इक सभा बुलाई जिदे च घोशत कीता जे सुनीथ दे जी उठने पर इक बड़ा भारी जलसा कीता जाग । दूयै दिन दैत्यपति ने नेक दैत्य - दानव-असुरें गी सद्वियै षडरस भोजन ते मधुपान कराया । दैत - दानव कन्याएं दा नृत्त बी होआ । इस धाम ते नृत्त गी दिक्खने आलें च मयासुर, सुनीथ ते सूर्यप्रभ बी शामिल हे । नृत्त च कई नचवने आलियै हिस्सा लेआ । इंदे च इक प्रह्लाद दी पुत्तरी महल्लिका बी ही । ए अपनी सुंदरता ते नृत्त - कला च अदुतीय ही । नृत्त दे समै महल्लिका दी नजर बार - बार सूर्यप्रभ पर पौंदी हा । ते सूर्यप्रभ बी विना अक्खीं भवके नरंतर उदे पासै गै दिखदा हा । दोनों दे गूत प्रेम ते शारें गी दर्शकें बुझी लेआ । नृत्त समाप्त होने पर महल्लिका दानवेंदरें गी नमस्कार करियै अपने मंहलै गी चली गई । सारे निमंत्रित लोक बी उट्ठियै अपने - अपने घरें गी चली गे । सूर्यप्रभ बी अपने डेरे गी उठी आया । रातीं कलावती फी उदे कोल आई । ते सारी रात उत्थें गै रेई । इससै रातीं महल्लिका बी सूर्यप्रभ दे दर्शन लैई आई । जदुं युवराज दे कमरे च दाखल होन लगी तां उसी कुमार दे मंत्री प्रज्ञाद्वय नै दिक्खी लैता । कोल आइयै ओ महल्लिका गी आखन लगा—देवी ! तुस जरा इत्थें इन्ना चिर बलगो जिन्ना चिर युवराज सूर्यप्रभ अंदर औने दी अनुमति नेई दिदा । ए आखियै प्रज्ञाद्वय अंदर गेआ । उसनै सूर्यप्रभ गी जगाइयै महल्लिका दे औने दी खबर दिती । सुत्ती दी कलावती कोला उट्ठियै सूर्यप्रभ तुरत बाहुर

आया । महल्लिका गी दौं स्हेलड़िं कन्ने खड़ोती दी दिक्खियै
 ओ उसी आखन लगा—धन्नभाग मेरे जे तुसें इत्थें औने दा कष्ट
 कीता । ए आखियै सूर्यप्रभ महल्लिका गी दूए कमरे च लेई गेआ ।
 पैह्ले दिन दे जलसे दी चर्चा करियै युवराज नै आखेआ—कुमारी
 जी ! कल्ल उत्सवै च तुंदा रूप ते नृत्तकला दिक्खियै मेरा
 हिदैं अपने वस्सै च नेई रेआ । ए हून तुंदा होई चुका दा ऐ ।
 ए आखियै सूर्यप्रभ नै राजकुमारी महल्लिका दा कर-कमल अपने
 हत्थें च पगड़ने दी कोशश कीती । डरै कन्ने कम्बियै महल्लिका
 वोल्ली—नां कुमार जी ए केह् करदेओ । अऊं कुआरी कन्या आं ।
 पर-पुरश कन्ने खुल्लियै गल्लवात करनी मेरे लेई महं—पाप ऐ ।
 प्रज्ञादय बोलेआ—कुमारी जी भला जनानी—मर्द गंधर्व व्याह्
 नेई करदे आए । फी एब्बी गल्ल ऐ जे तुं दे पिता नै निश्चै करी
 लेदा ऐ तुंदा व्याह् युवराज सूर्यप्रभ कन्ने करडन । जिसेल्लै ए
 गल्लवात होयै करदी ही तां दूए कमरे च कलावती दी नींदर
 खुल्ली । कुमार सूर्यप्रभ दा पलंग खाली दिक्खियै ओ बाह्
 निकली । कन्ने दे कमरे च उसनै सूर्यप्रभ गी महल्लिका कन्ने गल्लां
 करदे दिक्खेआ । उसी गुस्सा आया । उसी दिक्खियै महल्लिका
 गी शर्म आई कन्ने ओ डरी । सूर्यप्रभ कलावती गी दिक्खियै काठै
 दी पुतली आंगर सुन्न होई गेआ । कलावती महल्लिका कोल
 आइयै तान्ना मारियै आखन लगी—सुना भैन ! राजी ते ऐं ।
 अही रातीं इत्थें औने दी केह् लोड़ पेई । महल्लिका बोल्ली—ए
 पताल ते मेरा घर ऐ । तूं ते दूए पताल दी रौह्ने आली इत्थें
 मेरे घरै दी परौह्नी ऐं । कलावती जरा व्यंग दी मुसकराहट
 कन्ने आखन लगी—सचमुच तूं इस पताल दी मालकन ऐं । इत्थें
 आए दे हर मनुक्खै गी अपना परौह्ना समजियै उदी खातर लेई
 आई जन्नी ऐं । ए सुनियै महल्लिका क्रोध कन्ने कम्बन लगी पेई ।
 ते बोल्लो—कलावती तूं बड़ी निरलज्ज ऐं । अऊं पिता दे बगैर
 दित्ते तेरे आंगर बगाने मर्दे कन्ने रात ते नेई कटदी । लानत ऐ
 तुगी । महल्लिका दियां कौड़ियां—कसैलियां गल्लां सुनियै कला-
 वती नै त्रिक्खी नजरी कन्ने सूर्यप्रभ पाससै दिक्खेआ ते उत्थूं दा

चली गई । महल्लिका वी गुस्से दी भरी दी स्हेलिएं समेत
 उत्थूं उट्ठी खड़ोती । जंदे - जंदे ओ सूर्यप्रभ गी आखन लगी—
 साढ़े चली जाने करी तुसेंगी केह् घाटा ऐ । तुंदियां होर
 वतेहरियां प्यारियां ऐन । उंदे उठी जाने पर सूर्यप्रभ उत्थूं
 दा उट्ठियै अपने कमरे च आई गेआ । कलावती दियां चालां
 जानने लेई प्रभास मंत्री गी ते महल्लिका दियां चालां जानने लेई
 उसनै प्रहस्त गी भेजेआ । किश समां वीतेआ तां प्रभास ने आइयौ
 राजा गी खबर दित्ती जे दूए पताल च जदूं अऊं गुप्तरूप धारियौ
 कलावती दे मेह्लै च गेआ तां ड्यौढी च बैठी दियां उदियां
 दासियां आपूं-चें नकेवलै गल्लां करै करदियां हियां । उंदे चा
 इक दूई गी आखन लगी—भैने ! तुगी पता ऐ जे अज्ज साढ़ी
 मालकन की दुआस ऐ । दूई बोली—भैने इसनै राजकुमार
 सूर्यप्रभ दे शलैप्पे पर मोहूत होइयै अपना - आप उसी समर्पण
 करी दित्ता ऐ । अज्ज जदूं ओ रातीं उदे कोल गई तां महल्लिका
 वी उत्थें आई । यवराज सूर्यप्रभ गी महल्लिका कन्ने बंठे दे
 दिक्खियै ए रोह् कन्ने घर परतोई आई । घर आइयै ए आत्महत्या
 करने गी तयार होई गई पर इसी इदी भैन सुखावती नै वचाई
 लेआ । प्रभास जिसेल्लै ए गुप्त खबर युवराज गी देयै करदा हा
 उससै बेल्ले प्रहस्त वी उत्थें आई पुज्जा । ओ युवराज गी आखन
 लगा—जदूं अऊं महल्लिका दे मेह्लै च गेआ तां में उसी बड़ी
 दुआस ते खिन - चित्त अपनी स्हेलड़िं दे विच्च बैठे दे दिक्खेआ ।
 अपनी विद्या दे बल कन्ने वाऊ दा रूप धारण करियै अऊं उस
 कमरे च जाई बड़ेआ जित्थें ओ सारियां बैठी दियां हियां ।
 उत्थें में महल्लिका दियां वारां स्हेलड़ियां दिक्खियां जेड़ियां शकला
 च विलकुल महल्लिका आंगर हियां । महल्लिका रतन - जड़त
 पलंगै पर बैठी दी ही ते स्हेलड़ियां उदं चवक्खी खड़ोती दियां
 हियां । उदं चा इक महल्लिका गी पुच्छन लगी—राजकुमारी जो
 अज्ज तुस इन्नियां दुआस की ओ जद तुंदा ब्याह् भ्यागा सूर्यप्रभ
 कन्ने होने आला ऐ । तुस धन्न ओ जे तुसेंगी नेह्या पति मिलै
 करदा ऐ । हून असेंगी ए चित्ता खा करदी ऐ जे ब्याह् होई जाने

पर तस असेंगी भुल्ली जागियां ओ । महल्लिका बोल्ली जे ए गल्ल
 ऐ तां अऊं पिता जी गी आखड जे ओ तुंदा ब्याह् वी सूर्यप्रभ
 कन्ने करी ओड़न । इयां अस सारियां स्त्रेलियां कट्ठियां रौह् गियां ।
 स्त्रेलियां आखन लगियां - राजकुमारी जो ! तुस कनेई गल्ल
 करदेओ । असेंगी सुनियै लज्जा औंदी ऐ । राजकुमारी नै आखेआ—
 भैनो ! इदे च शरमा आली के गल्ल ऐ । युवराज सूर्यप्रभ गी
 मते दैत्ते - दानवें ते राजें अनियां धियां दित्ती दियां न । इसनं
 केई विद्याधर कन्यां ते मानुशी कन्यां ब्याही दियां न । फी जे
 तुंदा ब्याह् वी इदे कन्ने होई जा तां इदे च लज्जेआ आली के
 गल्ल ऐ । ए करने करी ते अस सारियां स्त्रेलियां कट्ठियां
 रौह् गियां । ए अक्खीं दिक्खी घटना सुनाइयै प्रहस्त सूर्यप्रभ गी
 आखन लगा—युवराज जी ! जिसेल्लै महल्लिका ते उदिएं स्त्रेलिएं
 च ए गल्लां होयै करदियां हियां तां अऊं उत्थूं टुरी आया ।
 प्रहस्त दियां गल्लां सुनियै युवराज सूर्यप्रभ नै सारी रात जागदे
 कट्ठी । परभात होने पर ओ सुनीथ ते मयासुर कन्ने असुरराज
 प्रह्लाद दे दर्शनं लेई गेआ । उत्थें प्रह्लाद सुनीथ गी आखन
 लगा—सुनीथ जी ! अऊं अपनी पुत्तरी महल्लिका सूर्यप्रभ गो
 ब्याही देना चाह्नां । ए अपना निश्चै प्रगट करियै असुरराज
 प्रह्लाद नै शुभ लगनं च वेदि गड्डियै अपनी धी महल्लिका दा
 ब्याह् युवराज सूर्यप्रभ कन्ने करी दित्ता । ते अनन्त धन - राशि
 दाजै च दित्ती । रातीं सूर्यप्रभ नमीं लाड़ी महल्लिका दे मैह्लै च
 गी रेह्या । सबेरा होने पर दानवपति अमील प्रह्लाद ते दूए
 दानवपतिं गी आखन लगा—अज्ज तुसें आइयै मेरा घर पवित्तर
 करना । अऊं अपनी पुत्तरी कलावती कुमार सूर्यप्रभ गो ब्याही
 देना चाह्नां । सबनं दानवपतिं अमील दे इस विचार गी
 सराहेआ । सारे लोक मयासुर ते सूर्यप्रभ दे कन्ने उसै बेल्लै दूए
 पताल लोकै गी गे । उत्थें अमील नै अपनी धी कलावती दा ब्याह्
 सूर्यप्रभ कन्ने करी दित्ता । सूर्यप्रभ नै ओ दिन उत्थें गै बताया ।
 दूए दिन दुरारोह असुरपति युवराज गी अपने पंजमें रसातल
 च लेई गेआ । उत्थें जाइयै उसनै अपनी पुत्तरी कुमुदावती

सूर्यप्रभ गी व्याही दित्ती । दूए दिन असुरराज तंतुकछ
 सूर्यप्रभ गी सरबधिएं समेत सतमें पताल अपने घर लेई
 गेआ । उत्थें उसनै अपनी मनोवती धी युवराज गी व्याही दित्ती ।
 इससै चाल्ली असुरपति सुदाम ने अपनी पुत्तरी सुभद्रा, दैत्यपति
 वलि ने अपनी पुत्तरी सुंदरी, मयासुर ने अपनी पुत्तरी सुमाया
 गी विधिपूर्वक युवराज सूर्यप्रभ कन्ने व्याही दित्तियां । अपने विद्याबल
 कन्ने नेक शरीर धारण करियै सूर्यप्रभ रातीं हर रानी कोल बक्ख-
 बक्ख रौहू दा हा । पर महल्लिका कन्ने उदा खास प्रेम हा । इक
 दिन रातीं महल्लिका दे मैहूले च सहवास करदे उसनै उसी
 पुच्छेआ—प्यारी ! उस राती तुंदै कन्ने दो स्हेलड़ियां आइयां हियां
 ते हून ओ कुत्थें न । फी कदें लब्बियां नेईं । महल्लिका बोली—
 युवराज जी ! तुसैं खूब मिगी उंदा सिमरन कराया ऐ । ओ मेरी
 स्हेलियां दो नेईं वारां न, उनेंगी मेरा चाचा सुर्गलोका दा हरियै
 ल्याया हा । इंदे च केईं मुनि-कन्यां ते केईं गंधर्व-कन्यां न । ए
 सब अपसराएं दियां कन्यां होने करी दिव्व कन्यां न । में पैहू लें
 अपने पिता जी गी आखेआ हा जे ओ मेरियां सारियां स्हेलियां
 तुसेंगी व्याही देन पर ओ आखन लगे—अऊं अपने भ्रा दी सलाह
 वगैर ए कम्म नेईं करी सकदा । महल्लिका किश नराश-जन होइयै
 युवराज गी बोली—कुमार जी तुसैं किन्नियां कन्यां व्याही लेइयां
 न, पर तुस मेरियां स्हेलियां व्याहने थमां की कतरांदे ओ । उंदे
 वगैर अऊं पल भर नेईं जी सकदी । महल्लिका दे हठ करने पर
 सूर्यप्रभ ने उदियां ओ वारां स्हेलियां बी व्याही लेइयां । इंदे च
 अमृतप्रभ परधान ही । ए वारां स्हेलियां रात भर सूर्यप्रभ कन्ने
 रेइयां । परभात होने पर युवराज दा मंत्री प्रभास इनेंगी महल्लिका
 दी सलाह कन्ने चौथै रसातल कुतै गुप्त थारै पर छोड़ी आया ।

सवेरे प्रभास अलख रूप च महल्लिका कन्ने दानवपति प्रह्लाद
 दी सभा च गेआ । उत्थें प्रह्लाद मयासुर ते सुनीथ गी आखन
 लगा जे तुस सारे दैतें ते दानवें दी माताएं दिति ते दनु दे दर्शनें
 लेई जाओ । दैत्यपति दे आखने पर सारे भूतासन विमान पर
 चढ़ियै सुमेर परवत दे शिखर पर कश्यप ऋषि दे आश्रमै गो ने ।

उत्थें सबनें दौनें माताएं दे दर्शन करियै उंदे पैर छूते ते अपने
 जनम गी धन्न जानेआ । दौनीं दैत्त मातां सुनीथ गी दुवारा जोंदे
 होए दे दिक्खियै मतियां परसन्न होइयां । उनें उसी अपना शोर्वाद
 दित्ता । सुमुंडीक दे अवतार सूर्यप्रभ गी दिक्खियै दोए मातां
 खुशी कन्ने खिड़ी उट्ठियां । दोए मातां दिति ते दनु मयासुर,
 सुनीथ, सूर्यप्रभ गी प्रजापति कश्यप दे दर्शन लेई उंदे आश्रमै च
 लेई गेइयां । उत्थें सारें उस दिव्व आश्रमै च प्रजापति दे दर्शन
 करियै परम - आनंद ते पुन्न प्रापत कीता । ऋषि दे चरण छूइयै
 उनें अपना जनम धन्न जानेआ । उनें गी दिक्खियै परसन्नमुख
 महर्षि कश्यप आखन लगे—अपने पुत्तरें गी दिक्खियै अज्ज मिगी
 जेड़ा नंद ते सुख मिलेआ ऐ उदा वर्णन करना कठन ऐ । पुत्तर मय
 तूं धन्न ऐं जड़ा धर्म अनसार आचारण करै करना ऐं । पुत्तर
 सुनीथ बी धन्न ऐ जिसनै गेदे प्राण फी प्रापत करी ले न । सूर्यप्रभ
 बी बड़ा भागवान ऐ जेड़ा विद्याधर चक्रवर्ती दी पदवी प्रापत करने
 आला ऐ । अग्गें अपने जीवन च तुसेंगी धर्म मार्ग पर गै चलना
 लोड़चदा ऐ । इस मार्ग पर चलदं तुसेंगी कदें बी हार नेई दिक्खनी
 पौग । फी प्रजापति बोले—पुत्तर सुनीथ पैहू, लें देवासुर जुद्ध च
 जेड़े असुर मारे गे हे ओ हून मनुक्खें दे रूप च मर्तलोक अंदर
 पैदा होए न । जेड़ा तेरा निकड़ा भ्रा सुमुंडीक हा ओ हून सूर्यप्रभ
 राजकुमार ऐ ते उदे जेड़े असुर जनम च साथी हे हून मनुक्ख
 रूपै च उदे फी साथी बने दे न । शम्बर नां दे महासुर नै सूर्यप्रभ
 दे मंत्री प्रहस्त दे रूप च जनम लेदा ऐ । त्रिशरा असुर उदा
 सिद्धार्थ मंत्री ऐ । वातापि दानव प्रजाद्वय मंत्री दे शरीरै च जम्मेदा
 ऐ । उलूक दानव सूर्यप्रभ दा शुभंकर नां दा मित्र ऐ । सुंद-
 असुर हून इदे स्थिरबुद्धि ते महाबुद्धि नां दे वजीर न । प्रजापति
 कश्यप आखन लगै—पुत्तरो ! जे तुस धर्म दे मार्ग पर चलदे रेहू,
 तां फी तुं दी किसमत चमकग । ते असुर जाति दी उन्नति होग ।
 महर्षि कश्यप जिलेले दानवपति ऐं गी ए उपदेश दयै करदे हे तां
 उत्थें दपैहूरी दे सोमजग्गा लेई उंदियां सारियां पतनियां आइयां ।

उन्हें अपने पति महर्षि गी नमस्कार कीती ते मय, सुनीथ आदि असुरें गी शीर्वाद दित्ती । उससै बेल्लै इंद्र वी लोकपालें समेत प्रजापति दे दर्शनें लेई उत्थें आया । उन्हें महर्षि कश्यप ते उंदिएं पतनिएं दिति - दनु गी नमस्कार कीती । इंद्र ने सूर्यप्रभ पाससै घरिआखी कन्ने दिक्खेआ । इंद्र सूर्यप्रभ पासै शारा करियै मयासुर गी आखन लगा दिक्खो, ए छोकरा विद्याधर चक्रवर्ती दी पदवी प्रापत करने दे सुखने लै करदा ऐ । इंद्र दी पदवी गी की नेई पसंद करदा, विद्याधर चक्रवर्ती दी पदवी ते उदे मकाबले च किश वी नेई । ए सुनियै मयासुर बोलेआ—देवराज ! जिस परमेसरै ने तुसेंगी इंद्र दी पदवी दित्ती उससै परमेसरै ने सूर्यप्रभ गी विद्याधर चक्रवर्ती दी दी पदवी दित्ती ऐ । इंद्र हस्सियै व्यंग दे वचनें च आखन लगा जे इस सुलक्खन छौकरे दी नेह्यी शैल शकल ऐ जे इदे लेई विद्याधर चक्रवर्ती दी पदवी लौहकी ऐ । मयासुर ने जवाब दित्ता जे श्रुतशर्मा उस शकला कन्ने विद्याधर चक्रवर्ती दे जोग ऐ तां इदे च शक्क नेई जे श्रुतशर्मा अपनी शकला दे मुल्लै पर इंद्र दी पदवी दे जोग्ग ऐ । ए सुनदे गै इंद्र गी सन कपड़े अग्ग सलगी उट्ठी । क्रोध कन्ने अपना वज्र चूक्कियै ओ उट्ठी खड़ोता । इंद्र दी इस हरकता गी दिक्खियै महर्षि कश्यप नै क्रोध दा हुंकारा भरेआ । दैत्यमाता दिति ते दनु दे मुंह गुस्से कन्ने लाल होई गे । इंद्र डरेआ जे महर्षि कुतै मिगी शाप नेई देई देन । इस डरै कारण उसने अपना वज्र म्यानै च पाई ओड़ेआ । महर्षि ते उंदी पतनिएं दे पैरें पर डिगियै हत्थ जोडियै इंद्र आखन लगा—म्हाराज । श्रुतशर्मा गी जेड़ा विद्याधर पद में दित्ता ऐ उसी खोने लेई सूर्यप्रभ हून तयार होई गेआ ऐ । ते मयासुर उदी मदत करै करदा ऐ । ए सुनियै महर्षि बोले सुनो इंद्र तुस चाहंदे ओ जे श्रुतशर्मा विद्याधर चक्रवर्ती बनै ते शिवशंकर दी मरजी ऐ जे सूर्यप्रभ बनै । जे भगवान् शिवशंकर दी ए मरजी ऐ तां दस्सो मयासुर दा के अपराध ऐ । मय धर्म-मार्ग पर चलै करदा ऐ । ज्ञानी ते गुरुभगत वी ऐ ।

जे तुस इदे च कोई उत्पात मचागेओ तां साढ़ी क्रोधाग्नि तुसेंगी
 भसम करी देग । देवमाता अदिति इंद्र गी आखन लगी—श्रुतशर्मा
 कुन ऐ डसी इत्थें सद्दियै मिगा दस्स । इंद्र दे आखने पर मातलि
 श्रुतशर्मा गी तुरत उत्थें लेई आया । ओ प्रजापति कश्यप ते माताएं
 गी परनाम करियै उत्थें बेई गेआ । सवनें दौनें गी दिक्खेआ ।
 परंत देव माता ते दैत माता महर्षि कश्यप थमां पुच्छन लगियां—
 म्हाराज तुसें दी सम्मति च इनें दौनें चा केड़ा विद्याधर चक्रवती
 दी पदवी दे जोगा ऐ । महर्षि आखन लगे—श्रुतशर्मा ते सूर्यप्रभ दे
 मंत्री प्रभास दे समान वी नेई, सूर्यप्रभ कन्ने ते इदा के मकाबला ।
 सूर्यप्रभ दे अंदर नेह् दिव्व लच्छन ते गुण न जे इसी इंद्र दे आसन
 पर वी बठाया जा तां ओ वी थोड़ा ऐ । कश्यप दे वचन गी सुनियै
 सवनें गी असलीयत दा पता लग्यो गेआ । महर्षि ने मयासुर गी
 वर दित्ता जे पुत्तरा, वज्र चुक्कियै इंद्र ने जेड़ा तेरे पर हमला
 कीता ते जेड़ा तूं इस मामले च संजम ते धीरज दस्सेआ इदे पर
 परसन्न होइयै अऊं तुगी वर दिन्नां जे अज्जै कोला तेरे अंग वज्रमय
 होई जाडन जे तूं अजर-अमर होई जागा । ए तेरा पुत्तर सुनीथ
 ते पोत्तरा महावली सूर्यप्रभ वी अजेय होडन । ए मेरा पुत्तर
 सुवासकुमार संकट दे बेल्लै सिमरन करने पर तेरै सामनै आई
 जाग । देवमाता अदिति अपने पुत्तर इंद्र गी आखन लगी—पुत्तरा !
 तूं दिक्खी लेआ ऐ जे नम्रता दा किन्ना मिट्ठा फल हुंदा ऐ ।
 तेरै सामनै मयासुर गी किन्ने वर मिले न । इसलेई तूं मयासुर
 गी मनाइयै उदे कन्ने सुलाह् करी लै । माता दे हुकम गी सुनियै
 इंद्र नै मय दे पैर पगड़ी ले । सूर्यप्रभ दे सामनै श्रुतशर्मा नेह्, या
 फिक्का पेई गेआ जियां सूरज सामनै चंद्रमा । देवराज लोकपालें
 समेत महर्षि कश्यप गी परनाम करियै अपने अपने लोकें गी चली
 गे । इयां गे मयासुर ते उदे साथी महर्षि कश्यप गी परनाम करियै
 ते उन्दी आज्ञा पाइयै अपने कम्मै दी सिद्धि लेई आश्रम थमा
 वाहूर आई गे ।

त्रिय्या तरंग

महर्षि कश्यप दे आश्रम थमां निकलियै मयासुर, सुनीथ

ते सूर्यप्रय उत्थें आए जित्थें चंद्रभागा ते एरावती नदिएं दा संगम
 हुंदा हा । इत्थें सूर्यप्रभ लेई मित्रवर्ग दे राजा वलगै करदे हे ।
 सूर्यप्रभ गी आए दे दिक्खियै सारे राजे रोंदे-रोंदे उट्ठी खड़ोते ।
 उनें गी जिसेल्लै उदे पिता चंद्रप्रभ गी नेईं दिक्खेआ तां ओ बेहाल
 होई गे ते उंदा दुक्ख होर बी वदी गोआ । इस दुक्ख दा अनुभव
 करियै युवराज सूर्यप्रभ ने उनेंगी सारी घटना सुनाई ते दस्सेआ
 जे उदा पिता पताल लोकै च जाइयै अपना मनुक्खै आला चोल्ला
 छोड़ियै योग दी विधि कन्ने अपने पैह्ले आसुरी शरीरै च परवेश
 करी गोआ ऐ । उनें दानें सूर्यप्रभ गी ए बी खबर दित्ती जे श्रुतशर्मा
 युवराज दी भारजा गी हरियै लेई गोआ ऐ । सूर्यप्रभ ने प्रतिज्ञा
 कीती जे ब्रह्मा बी इदी रक्षा करने लेई औग तां बी अऊं इसी दंड
 दित्ते बिना नेईं छोड़ड । ए परतिज्ञा करियै उसनै शुभ म्हूरतै च
 श्रुतशर्मा पर चढ़ाई करने दा निश्चै करी लेआ । सूर्यप्रभ गी
 अपने निश्चै पर अटल जानियै मयासुर उसी आखन लगा—
 पुत्तरा ! जे तू सचमुच श्रुतशर्मा पर हमला करने दा निश्चै करी
 लेआ ऐ तां अऊं तुगी आखना चाह्नां जे तेरी पतनिएं गी श्रुतशर्मा
 नै नेईं चुराया । अऊं उनेंगी सुरक्षा लेई पताल छोड़ी आया आं ।
 मय दे वचन सुनियै सबनें गी खुशी होई । उसै नदिएं दे संगम
 आली गुफा दे रस्ते मयासुर सारेंगी चौथै पताल लेई गोआ । उत्थें
 उसने मदनसेना ते युवराज दियां बाकी भारजां उसी देई दित्तियां ।
 पतनिएं गी लेइयै सूर्यप्रभ असुरराज प्रह्लाद दे दर्शन लेई गोआ ।
 प्रह्लाद उसी बड़े गुस्से च लाल - पीला होइयै आखन लगा—ओ
 दुराचारी ! तू मेरे भ्रा द्वारा जित्ती दिएं वारें देव - कन्याएं गी
 हरी लेई गोआ ऐं । हून में तुगी जींदा नेईं छोड़ड ए आखियै
 प्रह्लाद नै अपनी तलवार म्याना चा सूतरी लेई । सूर्यप्रभ बड़ी
 नम्रता कन्ने आखन लगा—म्हाराज ! तुस स्वामी ओ । जे तुस
 समझदे ओ जे अऊं अपगधी आं तां मिगी अवश दंड देओ । ए
 सुनियै प्रह्लाद हस्सी पेआ । आखन लगा—धन्न ऐं पुत्तरा ! में
 छड़ी तेरी परख कीती ऐ । तेरे च बिंद बी हंकार नेईं । अऊं
 तेरे पर बड़ा परसन्न आं । तू मेरे कोला कोई वर मंग । सूर्यप्रभ

ने जवाब दित्ता—म्हाराज ! मिगी इयै वर देओ जे गुरुजनें च
 ते भगवान शिव - शंकरै च मेरी भगती अटल रवै । परसन्न होइयै
 असुरराज प्रह्लाद ते अमील नै अपनियां दूइयां धियां यामिनी ते
 सुखावती बी युवराज सूर्यप्रभ गी व्याही दित्तियां । इनें दिनें च
 गै किश सुनीथ दियां ते किश उदियां अपनियां पतनियां गर्भवती
 होई गेइयां । इनें गर्भवतिएं जनानिएं गो जिसेल्लै ए पुच्छेजा जे
 उंदी किस चीजा दे खाने - पीने जां दिक्खने दी मरजी करदी ऐ
 तां उनें सवनें आखेआ—असेंगी इक महांजुद्ध दिक्खने दी मरजी
 करदी ऐ । उंदी इस 'दोहद' इच्छा गी सुनियै मयासुर आखन
 लगा मिगी वभोंदा ऐ जे इंदे गर्भे च असुर जाति दे ओ पराक्रमी
 वीर न जेड़े पैह्लें देवासुर संग्राम च मारे गे हे । इस्सै लेई इनें
 गर्भवती नारिएं दे मनै च महांजुद्ध दिक्खने दी अभलाशा पंदा
 होई ऐ । ए गल्लवात करदे छे दिन बीती गे । सतमें रोज सूर्यप्रभ
 ते वाकी शूरवीर अपनी पतनिए समेत रसातल थमां वाहूर निकली
 आए । वाहूर आइयै चंद्रप्रभ दे निकड़े पुत्तर गी राजसंघासना पर
 वठाइयै सारे राजे भूतासन विमान पर चढ़ियै गंगातीर पर वने दे
 तपोवनै च विद्याधरपति सुमेरु कोल गे । सुमेरु नै उंदा आदर-
 सतकार कीता ते मयासुर दे मुंहा दा सारा वरतांत सुनियै शिवशकर
 दी पैह्ली आज्ञा दा सिमरण कीता । हुन सूर्यप्रभ नै श्रुतशर्मा दे
 विरुद्ध जुद्ध दियां तयारियां शुरू करी दित्तियां । अरिभट वगैरा
 सूर्यप्रभ दे साले अपनी - अपनी सेना लेइयै आई गे । फी हृष्टरोम,
 महामाय, सिंहदंष्ट्र, प्रकम्पन, तन्नुकच्छ, धूमकेतु आदि पैह्ले
 थमां सतमें पताल तक दे वसनीक असुर, दैता ते दानव अपनिये
 फौजें समेत सूर्यप्रभ दी मदता लेई आई गे । इंदिएं फौजें च ज्हारां
 रथ ते लक्खां हाथी घोड़े ते पैदल शपाई हे । मयासुर, सुनीथ,
 वसुदत्त ते सुमेरु दियां अपनियां फौजां बी इत्थें आइयां । इस सारे
 सेना दे अपार समुंदरै गी टिब्बे पर वस्से दे कलापग्राम थमां सवनें
 राजें ते सेनापतिएं दिक्खेआ । इस भारी सेना गी दिक्खियै
 विद्याधरपति समेरु आखन लगा जे श्रुतशर्मा दी सेना साढ़ी सेना
 कोला मती ऐ । उदी सेना च १०१ ते छड़े विद्याधरपति शामिल

न। हर इक विद्याधरपति दै अधीन वत्ती राजे न। खैर कोई डर
 नेई। अऊं अपनी जूगती कन्ने इंदे छा किश राजें गी फोड़ियै अपने
 पास करी लैनां।

सवेरै फगन दी कृष्ण अष्टमी गी सारे सेनापति बल्मीक
 तीर्थ पर गे। इस तीर्थ पर विद्याधर चक्रवर्ती दे लकखनें दा पता
 लगदा हा। इसै लेई उस दिन उत्थें अनगिनत विद्याधर बी आए
 हे। इनें विद्याधरें अगन-कुंड जलाइयै तीर्थ पर होम करना शुरू
 करी दित्ता। सूर्यप्रभ नै बी अपने विद्यावल कन्ने इक्क अग्नि कुंडे
 च अग्न जलाई। इस चमतकार गी दिक्खियै सुमेरु बड़ा परसन्न
 होआ। पर विद्याधर खार खाइयै जली - भुज्जी गे। इक विद्याधर
 सुमेरु गी आखन लगा—धक्कार ऐ तुगी जे तू विद्याधरपति दे
 पद गी त्यागियै सूर्यप्रभ मनुखै दे आसरै दिन कट्टे करना।
 सुमेरु नै उसी फटकारेआ। सूर्यप्रभ दे पुच्छने पर जे ऐ कुन ऐ
 सुमेरु बोलेआ जे भीम नां दे इक विद्याधरै दा ब्रह्मगुप्त नां दा ऐ
 परकट्ट वर्णसंकर पुत्तर ऐ। हून सूर्यप्रभ ते सुमेरु इक्कै अग्निकुंडे
 च हवन करन लगी पे। पलभर बीतेआ तां उस अग्निकुंडे चा
 इक महान अजगर निकलेआ। उसी पगड़ने लेई ब्रह्मगुप्त विद्याधर-
 पति उदे पिच्छें नट्ठेआ। जियां उसने अजगर गी पगड़ने गी हत्थ
 बधाया उस महान-सर्प ने फुंकारा मारेआ जिदे करी ब्रह्मगुप्त सुक्के
 पत्तरै आला लेखा सौ हत्थ दूर जाई पेआ। तां तेजप्रभ नां दे
 दूए विद्याधर ने उसी पगड़ने दा जतन कीता। उसी बी अजगरै
 ने फुंकारे कन्ने डोआई ओड़ेआ। इस चाल्ली मते विद्याधरें अजगरै
 गी पगड़ने दा जतन कीता पर सबनें दा उयै हाल होआ जेड़ा
 ब्रह्मगुप्त ते तेजप्रभ दा होआ हा। फुंकारे दे छंडे दे इनें सबनें
 विद्याधरें दे शरीर चूर - चूर होई गे। इस तमाशे गी दिक्खियै
 श्रुतशर्मा विद्याधरपति हंकारे दा दौड़ियै आया ते अजगर गी
 पगड़न लगा पर महासर्प ने उदी बी उयै दुरगत कीती जनेई वाकिण्
 दी कीती ही। उदे अंग बी निस्सल होई गे। नमोशी दा मारे दा
 मुशकल कन्ने उट्ठियै चली गेआ। उदे जाने बाद सुमेरु ने

युवराज सूर्यप्रभ गी उदे पगड़ने लेई भेजेआ । सारे विद्याधर हस्सन
 लगे जे जिस कम्मै च विद्याधर सफल नेई होई सके उस
 असंभव कम्मै गी ए ढीठ मनुक्ख जाति दा जीव कियां करी
 सक्कग । सूर्यप्रभ गी अपने पाससै औंदे दिक्खियै अजगर इक
 विला च बड़ने दी कोशश करन लगा । सूर्यप्रभ नै उछलियै
 उदी पूछल पगड़ी लेई ते खिच्चियै उसी विला थमां बाहूर
 कड्डेआ । बाहूर निकलदे गै ओ अजगर तरकस दे रूपै च
 बदली गेआ । ते गासा चा फुल्लें दी बरखा होई । ततकाल
 आकाशवाणी आखन लगी—सूर्यप्रभा ! ए तरकस तुगी शिवें
 दी किर्पा कन्ने प्राप्त होआ ऐ । ए तीरें कन्ने सदा भरोचे दा
 रौहूग कदें खीन नेई होग । जुद्ध च ए तेरे बड़े कम्म
 औग । उससै बेल्लै श्रुतशर्मा दा दूत आइयै सूर्यप्रभ गी आखन
 लगा—मेरा स्वामी तुसेंगी आज्ञा करदा ऐ जे ऐ दिब्ब तरकस
 असेंगी देई देओ । सूर्यप्रभ नै दूत गी जवाब दित्ता जे तू
 जाइयै अपने स्वामी श्रुतशर्मा गी आखी दे जे इस जुद्ध च
 जेड़ा साढ़ा आपू - चें छिड़ने वाला ऐ तेरा शरीर गै मेरे
 तीरें दा तरकस बनी जाग फिकर नेई कर । सुमेरु विद्या-
 धरपात नै युवराज सूर्यप्रभ गी शीर्वाद दित्ती ते कन्ने आखेआ—
 युवराज ! बड़ी नंदै दी गल्ल ऐ जे अज्ज शिवें दा वचन
 सफल होआ जे तुसेंगी ए दिब्ब तरकस मिलेआ ऐ । हून
 नेई रेह्या । परंत सूर्यप्रभ सुमेरु विद्याधर कन्ने धनुश रत्न दी
 सिद्धि लेई मानसरोवर गेआ । जदू दोए सरोवरै दी शोभा
 दिक्खै करदे हे तां श्रुतशर्मा वी अपने साथिएं समेत उत्थें आई
 पुज्जा । सूर्यप्रभ ते विद्याधरें सरोवरै पर होम कीता । होम
 होई । समानै चा काला नाग डिग्गेआ । ए नाग कमान बनी गेआ
 जिसी सूर्यप्रभ नै धारण करी लेआ । किश समां गुजरेआ तां
 सरोवरै चा फी उयै लेया बहल उट्ठेआ बरखा होई ते समानै
 चा दूआ नाग डिग्गेआ । ए नाग उस कमान दा चिल्ला बनी

गेआ । उस्सै बेल्लै अंतरिक्ष थमां पुष्पवरखा होई ते कन्ने
 आकाशवाणी आखन लगी—सूर्यप्रभा ! ए दिव्व धनुश तुगी शिवें
 दिता ऐ । मयासुर नै सुमेरु विद्याधर कोला पुच्छेआ जे नेह्
 धनश कुत्थें पैदा हुंदे न ? ओ बोलेआ—इत्थें इक दिव्व बंजें
 दा जंगल ऐ । इनें बंजें गी कप्पी - कप्पियै विद्याधर मानसरोवरै
 च सुटी दिंदे न । समां पाइयै ए बंज दिव्व धनश बनी जंदे न ।
 प्राचीन समै च इनें दिव्व धनशें गी असुरें गंधर्वें ते विद्याधरें प्राप्त
 कीता । चक्रवर्तिणं दे अमृतवल नां दे धनशें गी देवतें इस
 सरोवरै च सुट्टेआ । इनें धनशें गी भावी विद्याधर चक्रवर्ती
 अपनी साधना द्वारा प्राप्त करदे न । इस्सै भगवान दे प्राचीन
 नियम दे अनसार अज्ज इस दिव्व धनश गी सूर्यप्रभ नै प्राप्त
 कीता ऐ । सुमेरु फी आखन लगा जे सूर्यप्रभ दे मित्तर मंत्री बो
 कीचक बनै च जाइयै अपनी - अपनी सिद्धि मताबक धनश पाई
 सकदे न । ए सुनियै सूर्यप्रभ दे प्रभास ते बाकी मित्तर - सरबंधी
 धनश लैने लेई कीचकवनै गी गे । उत्थें बनै दे पैह्रेदार
 चंडदंड गी जित्तिायै उनें बंज कप्पियै सरोवरै दे जलै च रक्खे
 ते आपू सरोवरै दे कढे पर बेइयै हवन ते जप करन लगी
 पे । इस साधना करी इंदे धनुश सत्तें दिनें च सिद्ध होई गे ।
 इनें सबनें साथिणं गी कन्ने लेइयै सूर्यप्रभ सुमेरु विद्याधरपति
 दे तपोवनै च गेआ । उत्थें सुमेरु सूर्यप्रभ गी आखन लगा—
 युवराज जी ए बड़ी विचित्र गल्ल ऐ जे तुंदे साथिणं वेणुवन
 दे पैह्रेदार अजेय चंडदंड गी बी हराई ओड़ैआ । उदे कोल
 मोहिनी विद्या ऐ जिदे कारण उसी कोई जित्ती नेईं सकदा ।
 पर उसनै ए मोहिनी अस्त्र परधान शत्रु लेई रक्खे दा ऐ ।
 इस्सैलेई उसनै इसी तुंदे मित्तरें पर नेईं चलाया ऐ । अस्त्र
 इक्कै बारी अपना फल दिंदा ऐ । मयासुर सूर्यप्रभ गी आखन
 लगा—कुमार जी तुसेंगी बाकी सब विद्यां ते सिद्धियां प्राप्त होई
 गेइयां न, पर मोहिनी ते परिवर्तिनी दो सिद्धियां अजें तुसेंगी
 नेईं मिलियां । इनें सिद्धिणं गी महर्षि याज्ञवल्क्य बिना होर
 कोई नेईं जानदा । इसलेई इनें सिद्धिणं लेई तुस उंदे कोल

जाइयै प्रार्थना करो । ए सुनियै सूर्यप्रभ गी सत्त दिन भुजगहृदै
च ते त्रै दिन पत्रगनि च रक्खेआ । भुजगहृदै च रौह्ने करी
सूर्यप्रभ पर सप्प विच्चू ते वाकी ज्हरीले जीवें दा विश
असर नेई करी सकदा हा । त्रै दिन पत्रगनि तप्पने करी उसी
परिवर्तिनी सिद्धि प्राप्त होई गेई । इनें दोनों सिद्धिएं गी
प्राप्त करी लैने दे वाद महर्षि याज्ञवल्क्य नै सूर्यप्रभ गी अग्निकुंड च
प्रवेश कराया । उसै बेलै युवराज लेई महापदम विमान गासै
परा उतरेआ । ए विमान महारतनें दा बनेदा हा । इदे च
१०८ फंग ते इक सौ पुर हे । ततकाल दिव्ववाणी सूर्यप्रभ
गी आखन लगी—पुत्तरा ! चक्रवर्ती विमान तेरे लेई बनेआ
ऐ । इनें पुरें च तेरियां रानियां रौडन । इनें पुरें गी कोई नेई
जित्ती सकदा । बड़ी नम्रता कन्ने सूर्यप्रभ गुरु याज्ञवल्क्य गी
आखन लगा—भगवन् अऊं तुसेंगी केह् दक्खना देआं । महर्षि
बोले—युवराज ! मिगी होर कुसै दक्खना दी लोड़ नेई । हां,
जिसेल्लै तेरा राजतिलक होयै उसेल्लै तू मिगी याद करेआं ।
हून तू अपनी सेना च जा ।

परंत सूर्यप्रभ महर्षि गी नमस्कार करियै विमान पर सोआर
होइयै सुमेरु दे तपोवन कोल जमा होई दी अपनी सेना च
आई गेआ । उत्थें सबनें युवराज दे नमें विमान गी
दिक्खेआ । सुनीथ दे सिमरन करने पर ततकाल कुमार सुवास उत्थें
आई प्रगट होआ । मयासुर ते दूए राजें गी ओ आखन लगा जे
सूर्यप्रभ गी दिव्व विमान मिलो गेआ ऐ । ते सारियां सिद्धियां
बी प्राप्त होई गेइयां न । हून तुसेंगी शत्रु पर चढ़ाई करी देनी
चाही दी हे । इस गल्ला पर विचार करियै सबनें प्रहस्त गी दूत
बनाइयै श्रुतशर्मा कोल भेजेआ । उसै बेलै सूर्यप्रभ आखन लगा—
अज्ज रातीं दे पिछले पैहूर मिगी सुखना आया जे इक बड़ा
भारी हाड़ आया ते अस सारे सेना समेत उदी लपेटा च आई
गे । पर अस हाड़ दे पानी च नचदे रेह् डुब्बे नेई । हाड़
दे ढली जाने पर कुसै महांपुरण नै असेंगी परचंड अगा दे

भडाम्बे च सुट्टी दित्ता । पर अस उदे च जले नेईं । ततखिन
 काले मेघ गासै च छाई गे ते लऊ दी वरखा होई । जिदे कारण
 सारियां दिसां लऊ दे रंगै दियां नजर औन लगियां । परंत मेरी
 अक्ख खुल्ली गोई । सुनियै मुनिपुत्तर सुवास आखन लगा—
 युवराज जी ! इस सुखने थमां पता लगदा ऐ जे तुं दी विजै अवश्य
 होग । पर सफलता प्राप्त करने लेई तुसेंगी बड़ा परिश्रम करना
 पौग । हाड़ दा मतवल ऐ जुद्ध । हाड़ै च नेईं डुब्बना धीरज
 रखना ऐ । जिस तेजस्वी महानुराग गी तुसें सुखने च दिक्खेआ
 ओ साक्षात् शिवशंकर हे । जेड़ा उनें तुसेंगी अग्गा च सुट्टेआ
 उदा मतलव ऐ जुद्ध च कुद्दी पौना । काले मेघ महाभय दे
 प्रतीक न, लऊ दी वरखा दा अभिप्राय ऐ महानुराग टली गोआ ।
 ए सुखना तुसें रातीं दे पिछले पेहरै च दिक्खेआ ऐ इसलेई
 जुद्ध तौले गै होने आला ऐ । सुखने दा फलादेश सुनियै सबनै
 दे मनै च किश संदोख होआ । सूर्यप्रभ ने उदे साथिएं भोजन
 वगैरा दिनचर्या कीती । इन्ने चिरै च श्रुतशर्मा कोल भेजे दा
 दूत वी वापस उठी आया । उसनै सारा हाल सूर्यप्रभ ते उदे
 भित्तरें गी दस्सेआ । ओ ओ आखन लगा—युवराज दे भेजने
 पर अऊ त्रिकूटाचल पर वस्सी दी त्रिकूट पताका नां दी नगरी
 च गोआ । उत्थें में विद्याधर - पतिएं द्वारा घिरे दे श्रुतशर्मा गी
 दिक्खेआ । उदे पिता त्रिकूटसेन गी वी बैठे दे दिक्खेआ । विक्रम-
 शक्ति ते दामोदर जनेहु, शूरवीर विद्याधरपति वी उत्थें कट्ठे
 होएदे हो । आसनै पर बेई जाने परंत में तुं दा पत्तर श्रुतशर्मा गी
 दित्ता । इदे च तुसें लिखे दा हा—में शिवशंकर दी किर्पा कन्ने
 सारियां सिद्धियां प्राप्त करी लेइयां न । इसलेई तुस मेरी
 (अ)धीनता स्वीकार करी लौ ते आइयै मेरे कन्ने मिली जाओ
 अऊ शत्रुएं दा नाश करने आला आं पर कन्ने गै शरणां च आए
 दे दी रक्षा वी करनां । सुनीथ दी कामचूडामणि नां दी जेड़ी
 पुत्तरी तुसें चुराई ऐ उसी तुरंत वापस करो ।

तुं दे पत्तर गी विद्याधरें दी सभा च वाचेआ गोआ ।

उसी सुनियै श्रुतशर्मा ते उदे साथी गुस्से कन्ने लाल - पोले
 होई गे । आखन लगे—कुन हुंदा ऐ सूर्यप्रभ असेंगी हुकम करने
 आला । मनुक्खें अगें भामें ओ जेड़ी मरजी ऐ डोंग मारै ।
 पर विद्याधर - पतिएं अगें डोंग मारने दी उदी के मजाल ऐ ।
 में उनेंगी खबरदार कीता जे कन्त खोल्लियै मेरी गल्ल सुनी
 लौ । शंकर भगवान नै कुमार सूर्यप्रभ तुंदा चक्रवर्ती बनाया
 ऐ । जे ओ मनुक्ख ऐ तां के ऐ । मनुक्खें देवतें दियां पदवियां
 प्राप्त कीतियां न । तुस विद्याधर लोक पैहू लें उदा पराक्रम
 दिक्खी चुक्के ओ । इदे च शक्क नेईं जे जेकर कुमार सूर्यप्रभ
 नै तुंदे पर हमला करी दित्ता तां तुंदा सर्वनाश होई जाग । मेरा
 इन्ना आखना गे हा जे श्रुतशर्मा दी सभा च रौला पेई गेआ ।
 श्रुतशर्मा दे धुरंधर मिगी मारने गी दौड़े पर दामोदर नै ए आखियै
 उनेंगी रोकी लेआ जे शास्त्रें च लिखेदा ऐ जे दूत ते ब्राह्मणै दी
 हत्या करनी महां-पाप ऐ । विक्रमशक्ति मिगी आखन लगा—सुन
 ओ दूत ! श्रुतशर्मा गी जाइयै आखी दे तेरे आंगर असेंगी बी
 परमेसरै बनाया ऐ । इसलेई ओ बशक्क अपना दलवल लेइयै इत्थें
 आई जा, अस उदा शैल स्वागत करगे । उदी हंकार दी गल्ल
 सुनियै में उसी हस्सियै आखेआ जे हंस कमल - बनै च उन्ना चिर
 गै नाच करदे न जिन्ना चिर ओ सौन म्हीने दी काली घटा दी
 गरज नेईं सुनदे ।

प्रहस्त दी कहानी सुनियै सबनें गी बड़ी खुशी होई । जुद्ध
 दी तयारी होन लगी पेई । सूर्यप्रभ ने प्रभास गी अपना सेना दा
 सेनापति बनाया । जुद्ध च बिजै पाने लेई सबनें सुवास कुमार थमां
 दीक्षा लेइयै वर्त रक्खेआ । रात पेई तां सूर्यप्रभ वर्त रक्खने लेई
 एकान्त कमरे च दाखल होआ । अही रातीं इक दिब्ब कन्या स्हेली
 समेत चुपचाप इस कमरे च कुतूं दा आई बड़ी । सूर्यप्रभ ने अक्खीं
 मीटियै नींदरा दा ब्हाना बनाई लेआ । ओ कन्या कोल आइयै
 स्हेली गी आखद लगी—भेने ! जे इस राजकुमार दी सुत्ते दे दी
 नेह्यी रूप - शोभा ऐ तां जागदे दी कनेई होग । इसी दिक्खी ते

लेआ ऐ, जगाने दी केह, लोड़ ऐ । इदे च अऊं अपना मन की
 व'न्नां । कल्ल श्रुतशर्मा कन्ने इदा जद्ध होना ऐ । के पता कुन
 जित्तग ते कुन हारग । शूरवीर जुद्ध च प्राणें दी वाजी लाई
 दिदे न । अऊं चाहन्तो आं इस कुमार दी विजै होयै । पता नेई
 मेरा दिल की इस कुमार पासै खिच्चेआ जा करदा ऐ । जिन्न
 काम - चूड़ामणि गी दिक्खी लेआ ऐ ओ मिगी दिक्खियै केह, करग ।
 स्हेली बोली—भैने तेरा मन जेड़ा इस कुमार च रमी गेआ ऐ ए
 कुदरती गल्ल ऐ । जिसी दिक्खियै काम-चूड़ामणि दा दिल डगमगान
 लगी पेआ हा तां वाकी नारिएं दा केह, आखना । ए कुमार भावी
 विद्याधर चक्रवर्ती ऐ । सिद्धें दा ए भविक्ख वचन ऐ । ते ए बी
 उंदा वचन ऐ जे काम-चूड़ामणि ते सुप्रभा दौनें गी ए व्याह्ग
 इसलेई जुद्ध च इदी हार नेई होई सकदी । कुमारी जी ! रूप च
 तुस कुसै कोला घट्ट नेई ओ । ए सुनियै ओ कन्या बोल्ली—
 भैने तू ठीक आखनी ऐं । मिगी वाकी सरबंघिएं कन्ने के वास्ता ।
 अपनी विद्या दे वलै कन्ने अऊं जाननी आं जे इस कुमार दी अवश
 विजै होग । इसनै वाकी सब विद्यां ते रतन सिद्ध करी ले न पर
 'औषधियां' अजें इसनै सिद्ध नेई कीतियां । ए चाटा मेरे मनै च
 खड़कदा रौह्दा ऐ । ए सारियां औषधियां (जड़ियां - बूटियां)
 चंद्रपाद परवतै दी गुफा च गुप्त पेदियां न । इनेंगी धर्मात्मा
 विद्याधर चक्रवर्ती गै सिद्ध करी सकदा ऐ । इसी लोड़चदा ऐ जे
 अज्ज गै जाइयै ए उनें औषधिएं गी सिद्ध करी लै । कीजे भ्यागा
 जुद्ध छिड़ी पौना ऐ ।

सूर्यप्रभ नींदरा दा ब्हान्ना करियै पलंगै पर लेटे दा हा ।
 कन्या दियां गल्लां सुनियै तुरंत उट्ठी खड़ोता । बड़ी मिट्ठी
 बोल्ली च उसी आखन लगा—सुन्दरी ! तुसैं मेरे भले लेई मतियां
 गल्लां आख्यां न । अऊं तुंदा धन्नवाद करनां । भला अऊं जानी
 सकनां जे तुस कुन ओ । ए सुनियै कन्यां ते लज्जया कन्ने चुप रेई
 पर उदी स्हेली आखन लगी—कुमार जी ! ए मेरी स्हेली विद्याधर-
 पति सुमेरु दे निकड़े भ्रा दी पुत्तरी विलासवती ऐ । ए तुंदे दर्शन
 लेई इत्थें आई ही । परन्त दोए उत्थूं दा चली गेइयां ।

उससे बेल्लै सूर्यप्रभ ने अपने मंत्री प्रहस्त गी चंद्रपाद परवत
 पर 'औषधियां' सिद्ध करने लेई भेजी दित्ता । रात पौने पर
 कुमार सूर्यप्रभ, सुनीथ, सुमेरु, मयासुर ते मंत्रिण कन्ने आपूं वी
 चंद्रपाद परवत पर गेआ । उदे रस्ते च शस्त्रधारी यक्ष, कूष्माण्ड
 ते गुह्यक केई किसम दे विघन पान लगे । इन्हें विघनें पर कावू
 पाइयै ए लोक चंद्रपाद परवत पर पुज्जे । उत्थें भयंकर शिवगण
 गुफा दे दरवाजे पर पैहूरा देयै करदे हे । सवनें शिव - शंकर दी
 मैहूमा गाई । शिवें दी स्तुति गी सुनियै शिवगण वड़े परसन्न होए ।
 सूर्यप्रभ गी आखन लगे अस इस गुफा दे दरवाजे गी छोड़ियै परें
 हटी जन्ने आं । तुस गुफा च रक्खी दियां औषधियां अपने अधिकार
 च लेई लौ । ए सुनियै प्रभास गुफा दे अंदर दाखल होआ । उदे
 अंदर बड़दे गै सारी न्हेंरी गुफा प्रकाश कन्ने जगमग करन लगी
 पेई । अंदर चार विकराल राक्षस गुफा दी रक्षा करै करदे हे ।
 उनें उट्ठियै प्रभास गी परनाम कीती ते उसी गुफा च प्रवेश करने
 लेई आखेआ । प्रभास नै अंदर जाइयै उत्थें गुप्त रक्खी दियां सत्त
 दिव्व औषधियां अपने कवजे च करियै कुमार सूर्यप्रभ गी देई
 दित्तियां । ततकाल आकाशवाणी ने आखेआ—सूर्यप्रभ ! ए सत्त
 औषधियां अपूर्व चमतकार रखदियां न । ए सुनियै सूर्यप्रभ ते उदे
 साथी परसन्न-चित्त अपनी सेना च परतोई आये । उत्थें सुनीथ ने
 सुवास कुमार गी पुच्छेआ—मुनि जी ! तुसें सूर्यप्रभ गी छोड़ियै गुफा
 च प्रवेश करने दा अधिकार प्रभास गी की दित्ता । ते शिवगणें ते
 राक्षस इंदा आदर-सतकार की कीता । मुनिकुमार ने जवाब दित्ता—
 सुनो अऊ दस्सनां । प्रभास सूर्यप्रभ दा परम हितकारी ऐ । दोए इक
 प्राण न । इ दे च कोई भेद नेई । प्रभास दे वरोवर कोई शूरवीर
 नेई । पूर्व जनम च वी ए गुफा इसै दी ही । इस परसगै च अऊ
 इदी पूर्व जनम दी कथा सुनानां—

प्राचीन समें च नमुचि नां दा इक बड़ा भारी प्रतापी दानव
 हा । ओ इन्ना दानी हा जे जेकर शत्रु वी उदे कोल दान लैने लेई
 आया तां उसने उसी वी नराश करियै नेई टोरेआ । दस
 ज्हार वरें कठोर तपस्या करियै उसने ब्रह्मा कोला ए वर

लेआ जे धाता दे, लोहे दे जां पत्थर वगैरा कुसै पदार्थ दे
 वने दे शस्तर - अस्तर कन्ने उदी मौत नेईं होयै । उसनै केईं
 वारी इंद्र गी जित्तेआ ते उसी सुर्गा दा नठाईं दित्ता । अखीर
 कश्यप ऋषि नै उदी देवतें कन्ने सुलाह्, कराई ओड़ी । सुलाह्,
 परंत देवतें ते दानवें मिलियै समुंदरै गी मथेआ । इदे चा
 जेड़े रतन मिले उनेंगी दोनैं आपू - चें बंडी लेआ । उच्चै :
 श्रवा घोड़ा नमुचि दे हत्थ लग्गा । अखीर समुंदरै चा अमृत
 निकलेआ जिसी देवतें छलै कन्ने हरी लेआ । इस गल्ला थमां
 फी देवतें ते दानवें दी लड़ाई लग्गी पेई । इस जुद्धै च जिस
 जिस असुर गी देवता मारदे हे, उसै गी उच्चै:श्रवा घोड़ा
 सिधियै जींदा करी दिंदा हा । इस कारण असुरें गी जितना
 मशकल होई गोआ । इंद्र गी वड़ी चिंता होई । देवगुरु
 बृहस्पति नै इंद्र गी सलाह्, दित्ती जे इंद्र जाइयै दानव-पति
 नमुचि कोला उच्चै:श्रवा घोड़े दा दान मंगै । बृहस्पति नै इंद्र
 गी आखेआ जे तू भामें उदा शत्रु ऐ पर ओ तुगी अर्थी जानियै
 घोड़े दा दान जरूर देई देग कीजे ओ जनम थमां वचाई दी अपना
 दानशीलता पर कलंक नेईं लग्गन देग । गुरु दी सिक्ख सुनियै
 इंद्र नै मंगते दे रूप च जाइयै नमुचि कोला घोड़े दा दान
 मंगेआ । नमुचि सोचन लग्गा अज्ज तक जेड़ा वी दान लैने
 आला मेरे कोल आया में उसी नराश नेईं टोरेआ । सारी उमर
 दी कमाई दी अपनी दानशीलता गी भंग करियै अऊं अज्ज
 कलंक दा टिक्का कियां मुल्ल लैं । ए विचारियै दैत्यगुरु शुक्राचार्य
 दे रोकने पर वी ओ दिव्व घोड़ा दानव-पति नमुचि नै इंद्र गी
 दान देई दित्ता । इयां नमुचि थमां घोड़ा ठगियै इंद्र ने वज्र च
 छपाली दी गंगा दी भग्गा कन्ने शस्तर - अस्तर कन्ने नेईं मरने
 आले उस दानव-पति नमुचि गी मारी दित्ता । जदू नमुचि दी माता
 दनु गी पुत्तर दे मरने दी खबर मिली तां उसी अति दुक्ख होआ
 उसनै कठोर तपस्या कीती । अपने तपोबल कन्ने संकल्प कीता
 जे इयै मेरा पुत्तर नमुचि फी मेरे गर्भें चा जनम लेइयै देवतें कन्ने

अपना बदला लै। अगलै जनम च नमुचि दनु दे गर्भा थमां प्रवल नां दा असुर होआ। इस असुर नै अपने तपोवल कन्ने वलवान होइयै इंद्र गी सौ वारी जित्तेआ। देवता कट्ठे होइयै फी उदे कोल आए ते आखन लगे—दैतराज ! पुरुषमेघ यज्ञ सम्पूरण करने लेई तूस अपना शरीर असेंगी दान देओ। ए सुनियै दानव-पति प्रवल नै अपना देह देवतें गी दान देई दित्ता। उदे शरीर गी देवतें खंड-खंड करिये सुट्ठी दित्ता। उयै प्रवल नां दा दानव अज्ज प्रभास दे रूप च जम्मेआ ऐ। दिव्व औषधिएं वाली गुफा पैह्लें प्रवल दानव दी गुफा ही। प्रभास कीजे प्रवल दा गै अवतार ऐ इसलेई इस जनमै च बी ए गुफा प्रभास दी ऐ। इस गुफा दे थल्लै प्रवल दा मंदिर ऐ जिदे च उदियां वारां भारजां नवास करदियां न। उत्थें गै अनगिनत रतन शस्त्र-अस्त्र चिंता-मणि ते लक्खां जोद्धा ते हाथी-घोड़े न। हून ए सारियां चीजां प्रभास दी सम्पत्ति ऐ।

मुनिकुमार कोला ए सारी कथा सुनियै सूर्यप्रभ, मयासुर, प्रभास आदि गुफा दे थल्लै रक्खे दे रतन पाने लेई उस तैह्खाने दे दरवाजे आली विला पर गे। उस रस्तै उनें प्रभास गी पताल भेजेआ। उस रस्तै पताल च प्रवेश करियै प्रभास दानव-पति प्रवल दे मैह्लै च पुज्जा। उत्थूं दा प्रवल दिये पतनिए ते चिंतामणि वगैरा रतन गी लेइयै ओ उससै रस्तै मर्तलोक गी परतोई आयो। आइयै उसनै ए सारियां चीजां कुमार सूर्यप्रभ गी भेंट कीतियां। परंत सूर्यप्रभ सारें समेत अपनी सेना दी शौनी च आई गेआ। जिसेल्लै उदे साथी दानव-पति अपने-अपने घरे गी चली गे तां सूर्यप्रभ नै ओ रात रण-दीक्षा अनसार कुशा दे विस्तरे पर बड़े समय कन्ने गुजारी।

चोथा तरंग

सवेरै समेरु दे तपोवना दा निकलियै सूर्यप्रभ सेना समेत श्रुतशर्मा पर विजै पाने लेई चली पेआ। त्रिकूटाचल दे कोल श्रुतशर्मा दी विद्याधर सेना गी नठाइयै उसने अपनी सेना दी

शौनी उत्थें बनाई । किश समां होआ तां उत्थें श्रुतशर्मा दा दूत
 आया । ओ सूर्यप्रभ गी आखन लगा जे तुसेंगी श्रुतशर्मा दे पिता
 ने सनेहा भेजेआ ऐ । ओ आखदे न जे जिन्ना चिर तुस साढ़े
 थमां दूर हे अस तुंदा कोई आदर - सतकार नेईं करी सके ।
 अज्ज तुस साढ़े घर आई गे ओ । हून असेंगी तुंदा आदर-सतकार
 करने दा शौल मौका मिलेआ ऐ । शत्रु दे इस व्यंग भरे सनेह गी
 सुनियै सुमेरु ने इदा जवाव दित्ता । उसने दूत गी आखेआ जे
 तूं जाइयै अपने स्वामी गी साढ़ा वी सनेहा देई दे । उनेंगी साढ़े
 वल्ला आखेआं जे अस वी तुंदा आदर - सतकार स्वीकार करने
 गी त्यार आं । साढ़े जनेह्या परौह्ना तुसेंगी कुत्थें मिलना हा ।
 असें परौह्नें दा सतकार करने दा उचत फल तुसेंगी इस्सै लोकै च
 मिली जाग । परलोक जाने दी लोड़ नेईं । विद्याधर-पति सुमेरु
 दा सनेहा लेइयै दूत अपने स्वामी कोल परतोई गेआ । युवराज
 सूर्यप्रभ ते उदे सेनापतिएं प्हाड़ी पर चढ़ियै अपनी फौजा दा सारा
 कम्प दिखेआ । सुनीथ अपने पिता मयासुर गी आखन लगा—
 पिता जी तुस दस्सो जे रणभूमि च अपनी रथसेना, गजसेना, पैदल
 सेना, रसाला आदि दी ब्यूह - रचना कियां करनी लोड़चदी ऐ ।
 पुत्तर दे प्रश्न दे जवाब च मयासुर ने रथसेना दे केई विभाग
 गिनियै सुनाए । रथसेना दे अफसरें च केई वड़े तजरबेकार कुशल
 रथ - जोद्धा हे जिनेंगी अपनी - अपनी योग्यता मतावक वड़े-
 वड़े तकमे मिले दे हे । इंदे च किश पूर्णरथ, किश द्विरथ, किश
 त्रिरथ, केई चतुर्गुण रथ, केई पंचरथ, छड़गुण रथ, किश महारथ,
 अतिरथ ते रथातिरथ हे । इंदे च केई राजे रथातिरथ यूथप, केई
 अतिरथ यूथप ते चार अतिरथ - यूथाधिपति दे वी पति हे । ते
 दो महारथ यूथाधिपतियें दे यूथ दे अधिपति हे । शत्रु दी सेना च
 इनें श्रेणिएं दे वीर गिनती च मते न, पर शिव - शंकर दी किर्पा
 कन्ने ओ साढ़े मकावले च कमजोर गै सिद्ध होइन । जिसेल्लै
 मयासुर ते सुनीथ दी आपू - चें ए गल्ल - वात होयै करदी ही तां
 श्रुतशर्मा दा इक होर दूत आया । ओ आखन लगा—साढ़ा स्वामी
 आखदा ऐ जे शूरवीरें लेई जुद्ध इक महान उत्सव हुंदा ऐ । ए

जुद्ध भूमि बड़ी सुगंड़ी दी ते उच्ची नीची ऐ । इसलेई दोए सेना कलाप ग्राम दे खुल्ले मदानै च जंग लड़न । ए सुनियै सूर्यप्रभ दी सेना कलाप ग्राम दे मदानै च जाई डटी । श्रुतशर्मा दी विद्याधर सेना वी दलबल समेत जुद्ध लेई तयार होई गई । विद्याधर-पति दामोदर ने अपनी सेना च महानुची ब्यूह रचना कीर्ती । उदे कच्छ श्रुतशर्मा खड़ोई गेआ । सबने दे अगें दामोदर हा । बाकी महारथी इहर - उहर अपने - अपने ठकानें पर लैस हे । सूर्यप्रभ दी सेना दा सेनापति प्रभास हा । उसने अपनी फौजा च अर्धचंद्र ब्यूह दी रचना कीती । ओदे बशकार ओ आपू खड़ोई गेआ । कुंजरकुमार ते प्रहस्त नुक्करें पर खड़े हे । सूर्यप्रभ ते सुनीथ पृष्ठगोप दे रूप च अपनी सेना दी पिछले पासेआ रक्षा करदे हे । उससै बेल्लै दोनो देवतागण अपने - अपने विमानें च सोआर होइयै गासै च छाई गे । लोकपालें समेत इंद्र, पार्वती समेत शंकर, शरीरधारी वेदें महर्षिएं ते सावित्री समेत ब्रह्मा, लक्ष्मी ते गरुड़ वाहन संग विष्णु, पतनिएं समेत महर्षि कश्यप, आदित्य, वसु, यक्ष, राक्षस, नागेंद्र, प्रह्लाद वगैरा सारे असुरराज अपने विमानें पर चढ़ियै रण दा महोत्सव दिक्खने लेई अंतरिक्ष च विहार करदे नजर औन लगी पे ।

उससै बेल्लै रणभूमि च दौनें पासें दे बहादरें भयंकर जुद्ध-नाद कीता । दूए खिनै च दौनें फौजें दे दरम्यान जंग शुरू होई गेआ । चक्खी वाणें दा ताना - बूना बज्जो गेआ । भाले ते तलवारां चमकन लगी पेइयां । जुद्ध च मोए दे ते जखमी होए दे अनगिनत वीरें दे लऊ दी नदी वगी निकली । इस नदी च शूरवीरें दियां लोथां मगरमच्छ हियां । रुढ़दियां ढालां कशोपड़ हे । इस घमासान च नेक राजें ते वीरें दा द्वंद - जुद्ध वी होआ । श्रुतशर्मा दे अट्टहास नां दे सेनापति नै सूर्यप्रभ दी फौजा च बड़ा उतपात मचाया । उसनै इदी सेना दे केई वीरें गी धरती पर लटाई दिता । अंत च ओ सूर्यप्रभ दे सेनापति हर्ष दे हत्था बुरी चाल्ली मारेआ गेआ । अट्टहास दे मारे जाने पर विद्याधर चक्रवाल नै जंग च

खूब हत्थ दस्से । अखीर उदा मुकावला सूर्यप्रभ दे सेनापति किर्धान कन्ने होई गोआ । इन्दा घोर जुद्ध होआ । दोए लड़दे - लड़दे मारे गे । विद्याधर सेना दे सेनापति कालकम्पन नै वी घोर जुद्ध कीता । इन्न राजपुत्तर प्रकम्पन गी मारी दिता । इस नै गोपक, सोमिल वगैरा सूर्यप्रभ दे वीरें गी वी मारी मुकाया । कालकम्पन द्वारा कीते दे सेना संहार गी दिक्खियै सुगण राजपुत्तर इदा मुकावला करने लेई दौड़ेआ । पर ओ वी मारेआ गोआ । उसै बेल्लै संभ पेई गई । उस दिन दे जुद्ध च श्रुतशर्मा दी सेना दे त्रै ते सूर्यप्रभ दी सेना दे तेत्ती जोद्धा मारे गे । सूर्यप्रभ नें अपने इन्ने वीरें दे मारे जाने करी दुखी होइयै ओ रात बड़ी चिंता च कट्टी । सारी रात ओ अपने मंत्रिण कन्ने दिनभर दे जुद्ध दियां गल्लां करदा रेह्य़ा ।

मोए दे शूरवीरें दियां जनानियां सोगै च डुब्बी दियां कट्ठियां होइयां ते इक्क दूई कन्ने मिलियां । ओ रोंदियां - रोंदियां इक दूई गी दलासा दिदियां हियां । ओ केड़ा खिन ऐ जदू जनानियां इक दूई कन्ने मिलियै मुंह वन्द रखदियां न । गल्ले-वातें दे परसंगै च इक राजपुत्तरी आखन लगी जे बड़ा चरज ऐ जे अज्ज राजकुमार सूर्यप्रभ जनानी विना रात कियां कट्टे करदा ऐ । दूई बोल्ली—अपने नेक वीरें दी मौत दिक्खियै कुमार गी अज्ज बड़ा दुक्ख होयै करदा ऐ । उसी अज्ज भोग - विलासैं दी पेई दी ऐ । त्री बोल्ली जे युवराज गी अज्ज इक नमीं जनानी मिली जा तां उसी सारा दुक्ख भुल्ली जा । चौथी आखन लगी—भामें युवराज इस्त्री - लम्पट ऐ, फी वी नेह् दुक्ख दे समै ओ नेह्य़ा नेई । पंअमी बोल्ली जे तुस मिगी ए दस्सो जे इन्नियां नमियां जनानियां होने पर वी युवराज इन्ना इस्त्री - लम्पट की ऐ ? जनानिएं कन्ने उदा जी गै नेई भरदा । ए सुनियै उंदे चा इक तजरबेकार जनानी आखन लगी—अऊं दस्सनी आं जे राजा - लोक की नमियां जनानियां पसंद करदे न । देश, रूप, कटाक्ख ते बुद्धि दे भेद दे कारण चंगिएं नारिएं दे वक्खरे - वक्खरे गुण हुंदे न । इक जनानी

च सारे गुण नेईं होई सकदे । करनाटक गुजरात, सोरठ,
 मध्यभारत आदि देसैं दियां नारियां अपने अपने गुणें कन्ने मर्दे
 दा मन परचांदियां न । केइएँ दे मुंह, चंद्रमा आंगर गोल हुंदे
 न । केइएँ दे थन कुम्भै आला लेखा हुंदे न । केइएँ दे पट्ट
 कामदेव दे संघासन आंगर मुट्टे ते सुख देने आले हुंदे न ।
 इयां गै कुसै जनानी दा कोई अंग मनोहर ते कुसै दा कोई ।
 कोई जनानी गोरी कोई गदमी, कोई गुलाबी, कोई नमीं
 जं आन्नी च, कोई पूरी जोआन्नी च, केई कामकेलि च स्यानियां
 वृसै दा हास्सा मनै गी लुभाने आला, कोई गुस्से च वी दिल-
 कश, कोई गजगामिनी, कोई हंसगामिनी, कोई मधूरवाणी कन्ने
 कन्ने च अमृत घोलने आली, कोई अक्खीं दे शारे करने च
 चतुर, कोई नृत्त कन्ने ते कोई गाने कन्ने मनै गी हरने आली,
 कोई वीणा वजाने दी कला च निपुण आदि । भिन्न - भिन्न
 देसैं च पैदा होई दिएँ भांत - भांत दिएँ नारिएँ दे केड़े - केड़े
 गुणें गी गिनां, कुसै च कोई गुण, कुसै च कोई सारे गुण इक
 नारी च मिलना कठिन ऐ । इसलेई भांत - भांत दे रस चक्खने
 दे लोभी राजा - लोक नित्त नमीं - नमीं जनानी लैने दी लालसा
 रखदे न । उत्तम मर्द पराई नारी गी नेईं चाहंदे, इसलेई
 युवराज सूर्यप्रभ दा इदे च कोई दोश नेईं । इस मामले च असेंगी
 आपूँ - चें खार नेईं खानी लोडचदी । मनोवती रानी दी इस
 व्याख्या पर वाकी रानिएँ वी अपने - अपने मनैं दियां भावनां
 दस्सियां । इन्हें बं - लगाम पति गी अपने (अ)धीन करने दियां
 गुप्त जुगतियां वी दस्सियां । कट्ठियां बैठी दियां जनानियां
 जिसेल्लै पूरी स्वतंत्रता कन्ने गल्लां करदियां न तां बेवस होइयै
 दिलै दे वड़े - वड़े गुप्त भेद खोल्ली दिदियां न । (अ)खीर इन्हें
 कट्ठी होई दिएँ जनानिएँ दियां गप्पां ते चगड़ - कत्थां उस
 बेल्लै वड़े मुशकल समाप्त होइयां जिसेल्लै रातीं नै इंदे कोला
 विदा मंगी । सूर्यप्रभ नमां जुद्ध छेड़ने लेई वड़े चिरै दा रात समाप्त
 होने दी डीका च बैठा दा हा ।

पजमां तरंग

सवेरा हुंदे गै जुद्ध फी जोर-शोर कन्ने शुरू होई गेआ । तमाशा दिक्खने आले देवतें दे विमान अज्ज वी गासै च मंडला करदे हे । श्रुतशर्मा दी फौजा च अज्ज दामोदर नै चक्र-व्यूह दी रचना कीती ते सूर्यप्रभ दी सेना च प्रभास ने वज्र-व्यूह बनाया । कन्ने गी फाड़ी देने आले दोनैं सेनाएं दे भयंकर जुद्धनाद दै विच जुद्ध दा आरम्भ होआ । सेनापति प्रभास दामोदर दे बनाए दे चक्र-व्यूह गी भन्नियै श्रुतशर्मा दी फौजा अन्दर वड़ेआ । दामोदर ने आइयै इस व्यूह-भंग गी रोकेआ । हून दामोदर ते प्रभास दा मकावला शुरू होई गेआ । सूर्यप्रभ ने जिसेल्लै दिक्खेआ जे प्रभास कल्ला गै शत्रु - सेना कन्ने लड़ै करदा ऐ तां उसने उदी मदता लेई पंदरां महारथी भेजे । सारे महारथी दौड़ियै चक्र-व्यूह दे दरवाजे पर गे । इस जुद्ध च दामोदर ने अपूर्व पराक्रम दस्सेआ । ओ कल्ला गै पंदरें महारथिएं कन्ने लड़न लगा । उदी शूरवीरता गी दिक्खियै विमानै च बैठ्ठा दा इंद्र देवर्षि नारद गी आखन लगा—देवर्षि जी ! सूर्यप्रभ ते उदे साथी असुरें दा अवतार न । श्रुतशर्मा मेरा अंश ऐ ते बाकी विद्याधर देवतें दे अंशावतार न । इस दृष्टिकोण कन्ने दिक्खेआ जा तां ए जुद्ध देवासर-संग्राम ऐ । इदे च विष्णु भगवान सदा देवतें दी मदत करदे आए न । दामोदर वी विष्णु दा अंश ऐ । इंद्र अजें ए आखै गै करदा हा जे दामोदर सेनापति दी सहायता लेई चौदां महारथी निकली आए । दामोदर समेत इनें पंदरें वीरें सूर्यप्रभ दे पंदरें महारथिएं गी चक्र-व्यूह दे दरवाजे पर रोकी लेआ । इनें महारथिएं दे आपू-चें बरदो - बुरदी जुद्ध वी होए । दामोदर कन्ने प्रकम्पन दा जुद्ध होआ । ब्रह्मदत्त कन्ने धूम्रकेतु दा, अतिवल कन्ने महाभय दा इयां जद्वं ए महारथी चक्र-व्यूह दे मुहै पर बुर्दोबुर्दी जंग करै करदे हे तां सुनीथ अपने पिता मयासुर गी वड़े दुख कन्ने आखन लगा—पिता जी ! प्रभास दी मदता लेई असैं जेड़े पंदरां महारथी भेजे हे उनेंगी शत्रुएं दे महारथिएं रस्तें च गै रोकी लेआ ऐ । पता नेई व्यूह दे अंदर

प्रवेश करियै प्रभास दा केह् हाल ऐ । तां सुवास कुमार बोलेआ—
 सुनीथ जी ! तुस रत्ती चिता नेईं करो । देवता असुर मनुक्ख
 सारे मिलियै बी प्रभास दा किश नेईं वगाड़ी सकदे । इनें वचारें
 विद्याधरें उदा के वगाड़ना । इस्सै बेल्लै कालकम्पन जिसनै पिछले
 दिन जुद्ध च शूरवीरता दस्सी ही प्रभास दे मकावले च लड़ने लेईं
 अगें वधेआ । दौनें दा घमासान ज़द्ध होआ । प्रभास ने अपने
 वाणें दी वरखा कन्ने उदे सारथी ते रथ दे घोड़ें गी मारी दित्ता ।
 परंत अपने तीखन वाणें कन्ने कालकम्पन दी वामें, हथें ते कन्ने
 गी कट्टियै उदे सिरै गी बी धड़ै थमा वक्ख करी ओड़ेआ । उसी
 मोए दा दिक्खियै कालंजर दा राजा विद्युत्प्रभ प्रभास दे मकावले च
 आया । घोर जुद्ध दे वाद प्रभास ने उसी बी मुड़दा बनाइयै धरती
 पर लटाई दित्ता । ए दिक्खियै गुस्से कन्ने जलदा-वलदा श्रुतशर्मा
 अपने महारथिएं गी आखन लगा—दिक्खो इस प्रभास ने साढ़े
 दौं महारथिएं गी मारी मकाया ऐ । तुस केह् दिक्खै करदेओ,
 पेई जाओ इदे पर टुट्टियै, खिन - मात्तर च इसी यमपुरी दा
 राही बनाई ओड़ो । ए सुनियै श्रुतशर्मा दे अट्ठ महारथी कट्ठे
 प्रभास पर टुट्टी पे । इनें प्रभास पर भयंकर वाण - वरखा कीती ।
 इन्नी वाण - वरखा दी रोक - थाम करियै प्रभास नै अपने वाणें
 कन्ने इनें महारथिएं चा कुसै दे घोड़े मारी ओड़े, कुसै दा सारथी,
 कुसै दा धनख छिन्न-भिन्न करी दित्ता ते कुसै दा ध्वज । अट्ठें
 महारथिएं चा मेघाकर नां दे महारथी गी चौं वाणें कन्ने बेधियै
 धरती पर लटाई दित्ता । परंत अंजलिक वाणै कन्ने प्रभास ने
 ऊर्ध्वराम महारथी दा सिर कलम करी दित्ता ते बाकी महारथिएं
 गी भालें कन्ने बुरी तरां जखमा करियै रण - भूमि च सुआली
 उड़ेआ । उस्सै बेल्लै प्रभास पर गासा दा फूल्लें दी वरखा होई ।
 अपने महारथिएं गी मोए दे दिक्खियै श्रुतशर्मा ने चार होर
 महारथी भेजे । भयंकर जुद्ध करियै ए चार महारथी बी प्रभास
 दे हत्था दा मारे गे । वाद च श्रुतशर्मा ने चार होर महारथी
 प्रभास दे मकावले च भेजे । इनें रणभूमि च आइयै प्रभास पर

दिव्व अस्त्र - शस्त्रें कन्ने हमला कीता । प्रभास ने नारायण अस्त्र
 दा प्रयोग करियै उं दे सारे दिव्व शस्त्र - अस्त्रें गी अकारथ वनाई
 दिता । उं दे सारथिएं ते घोड़ें गी मारियै उनें महारथिएं गी पैदल
 वनाई दिता । ए दिक्खियै श्रुतशर्मा ने दस्स होर महारथी रणभूमि
 च धकेली दित्ते । इस मदता दे पुज्जने पर उनें चौं पैदल महारथिएं
 गी नमें रथें पर चढ़ने दा मौका मिली गेआ । चौदें महारथिएं
 मिलियै प्रभास पर धावा वोल्ली दिता । पर ओ प्रभास दा किश
 नेई बगाड़ी सके । प्रभास परवतै आला लेखा अटल उं दे सामने
 खड़ोता रेह्या । प्रभास गी कल्ला दिक्खियै सूर्यप्रभ ने उदी मदता
 लेई कुंजरकुमार ते प्रहस्त नां अपने दे दौं महारथिएं गी भेजेआ ।
 इनें पैदल गै जुद्ध करियै रथ पर बैठे दे यम ते नियम महारथिएं
 गी वाण वरखा कन्ने व्याकल करी दिता । उं दे धनशें गी छिन्न-
 भिन्न करी ओड़ेआ ते सारथिएं गी मारी ओड़ेआ । रथहीन होई
 जाने दे कारण श्रुतशर्मा दे दोए महारथी यम ते नियम अक्खीं दे
 ओल्है होइयै गासै गी उड्डी गे । कुंजरकुमार ते प्रहस्त उं दे
 रथें च वेई गे । उनें गी बिना सारथी दै दिक्खियै सूर्यप्रभ ने अपने
 दो मंत्रो महाबुद्धि ते अचलबुद्धि रथ चलाने लेई भेजे । प्रहस्त ने
 अक्खीं च सिद्धांजन लाइयै दिक्खेआ तां उसी यम ते नियम गासै च
 खड़ोते दे लब्बे । प्रहस्त ने उं दे पर नेई प्रचंड वाण वरखा कीती
 जे दोयै रणभूमि थमां नट्ठी पे । हून प्रभास ते प्रहस्त ने मिलियै
 वाकी वारां विद्याधर महारथिएं गी ललकारेआ ते अस्तर-शस्तर
 दे भयंकर प्रहारें कन्ने उं दे रथें दे सारथी ते घोड़े नष्ट करी
 ओड़े । इदे करी ओ वी रणभूमि छोड़िये नट्ठी गे । इस गड़बड़ा
 गी दिक्खियै श्रुतशर्मा ने चंद्रगुप्त ते नगरंगम नां दे अपने महारथी
 मंत्रिएं गी भेज्जेआ । प्रभास ते प्रहस्त ने उं दे सारथिएं गो मारियै
 उनें गी वी रथहीन करियै रणभूमि थमां नठाई दिता । ए दिक्खियै
 सूर्यप्रभ दी सेना च महान आनंद दा जैकारा उट्ठेआ जिसो सुनियै
 श्रुतशर्मा ते उदे मदतगार विद्याधर महारथिएं दे दिलें च भै ते
 विसाद दा पड़दा छाई गेआ । अपनी सेना दी दुरदशा दिक्खिये
 श्रुतशर्मा अपने चौं महारथिएं समेत रण च कुद्दी पेआ । क्रोध

कन्ने अन्ने होएदे श्रुतशर्मा ते उदे चौं साथिएं कन्ने प्रभास, प्रहस्त
 कुंजरकुमार लड़न लगे । पैह्लें जिन्दे रथ भंग होई गे । हे
 ओ विद्याधर महारथी आइयै फी श्रुतशर्मा कन्ने मिली गे । ते
 लड़ाई च भाग लैन लगी पे । श्रुतशर्मा दे महारथिएं दी संख्या
 गी मता जानियै सूर्यप्रभ नै अपने पक्ष दे होर वीरें गी प्रभास दी
 महता लेई भेजेआ ते भूतासन विमान द्वारा उनेंगी रणभूमि च
 रथ पुजाए । जदू सारे जोद्धा रथें पर चढ़ी बैठे तां श्रुतशर्मा दे
 होर महारथी वी उदी स्हायता लेई आई गे । इनें कट्ठे होए दे
 विद्याधर महारथिएं कन्ने प्रभास ते उदे साथी महारथिएं कन्ने
 घोर जुद्ध छिड़ी पेआ । इस जुद्ध च दौनों पासें दी अनगिनत फौजा
 दा नाश होन लगा । प्रभास ने मते सारे विद्याधर महारथिएं गी
 धरती दी सेजा पर लम्मे पाई दिता । सूर्यप्रभ दे स्हायक राजा
 शतानीक ने श्रुतशर्मा दे सामने दस विद्याधर महारथिएं गी मौता
 दे मुंह धकेलआ । विद्याधरें दे नाश गी दिक्खियै श्रुतशर्मा आपू
 शतानीक पर लपकेआ । सारा दिन दौनों दा घोर जुद्ध होआ
 जिदे च अनगिनत सेना मारी गई । इस जुद्ध गी दिक्खियै देवता
 वी चकत होई गे । उस दिन तरकालें जुद्ध बंद होई जाने पर वी
 सैकड़ें कबंध रणभूमि च नचदे दिक्खे गे । संज्रा बेल्लै दोए सेनां
 जुद्ध बंद करियै अपने - अपने कैम्पें च चली गेइयां । अज्ज वी
 सूर्यप्रभ दी सेना च खुशी ही ते श्रुतशर्मा दी फौजा च डर ते वसोस ।
 उसै बेल्लै दो विद्याधर महारथी श्रुतशर्मा दी सेना गी त्यागियै
 सूर्यप्रभ दी सेना च आई मिले । सुमेरु इनेंगी सूर्यप्रभ दे सामने
 लेई आया । उनें सूर्यप्रभ गी परनाम कीती ते आखन लगे—अस
 विद्याधर आं । साढ़े नां महायान ते सुमाय न । सिंहवल नां दा
 विद्याधर साढ़ा त्रीया साथी ऐ । असें शमाशान सिद्धि कीती ऐ ।
 असेंगी कोई विद्याधर जित्ती नेई सकदा । इक दिन अस शमशानें
 च वसां करै करदे हे । साढ़े सामने शरभमना योगिनी आई ।
 असें उसी प्रश्न कीता जे तुस कुत्थें रौह् दी ओ ते तुसें इत्थें के अजीव
 चीज दिक्खी ? ओ बोली—अऊ योगनिणें कन्ने महाकाल दे दरशनै
 लेई गई ही । उत्थें साढ़ै सामनै इक बेतालपति आया ते आखन
 लगा—म्हाराज ! विद्याधरें द्वारा मारे गे साढ़े अग्निक नां दे

सेनापति दी पुत्तरी गी चानचक तेजप्रभ हरियै लेई गोआ ऐ । सिद्धे
 दा वचन ए जे ओ विद्याधर चक्रवर्ती दी पतनी वनग । इसलेई
 तुस उस कन्या गी वचाओ ते उस दुष्ट दे पंजै चा छुड़ाओ । जिन्ना
 चिर ओ उसी हरियै दूर नेईं लेई जंदा । वेताल दी दर्दभरी प्रार्थना
 गी सुनियै महाकाल ने असेंगी आज्ञा दित्ती जे तुस जाइयै तुरत उस
 कन्या गी छुड़ाओ । असें उससै बेल्लै गासै रस्तै जाइयै उस कन्या
 गी छुड़ाया । जदू अस तेजप्रभ कोला उस कन्या गी खोयै करदे
 हे तां ओ असेंगी आखन लगा—अऊं इस कन्या गी भावी चक्रवर्ती
 श्रुतशर्मा आस्तै लेई जा करदा हा । असें खोइयै उस कन्या गी अपने
 स्वामी द सपूद कीता । उसने ए कन्या अपने बंधु गी देई दित्ती ।
 योगिनी आखन लगी—अऊं किश दिन उत्थें रइयै महाकाल गी
 परनाम करियै इत्थें आई आं । शरभानमा योगिनी
 दी गल्ल सुनियै असें उसी पुच्छेआ—भगवति ! तुस दस्सो जे
 विद्याधर चक्रवर्ती कुन वनग, तुस जानीजान ओ, दस्सो । ओ
 बोली—कुमार सूर्यप्रभ वनग, होर कुन ? उससै बेल्लै सिंहवल बोलेआ
 —ए योगिनी भूठ बोलदी ऐ । देवराज इंद्र ते वाकी सारे देवता
 श्रुतशर्मा दे पाससै न । उयै चक्रवर्ती होग । सूर्यप्रभ नेईं होई
 सकदा । ए सुनियै योगिनी आखन लगी जे तुसेंगी जकीन नेईं तां
 मेरी गल्ल सुनो । किश दिनें तक श्रुतशर्मा ते सूर्यप्रभ दा घोर
 जुद्ध होग । इस जुद्ध च तुन्दे सामने जदू कोई वीर सिंहवल गी
 मारी मुकाग तां उस नशानी थमां तुसें समझी लैना जे सूर्यप्रभ
 विद्याधर चक्रवर्ती होग । ए आखियै ओ योगिनी चली गई । दोए
 विद्याधर आखन लगे म्हाराज ! किश दिन बीतने र ओ जुद्ध
 शुरू होआ ते अज्ज असें दिक्खी लेआ जे साढ़े सामने कुसै मनुक्खै
 सिंहवल विद्याधर गी मारी मुकाया । फी विद्याधर महायन ते
 सुमाय सूर्यप्रभ गी आखन लगे जे इस नशानी थमां असेंगी पूरा
 निश्चै होई गोआ ऐ जे तुस्सै विद्याधर चक्रवर्ती बनने आले ओ ।
 सूर्यप्रभ नै दौनें विद्याधरें दा बड़ा सतकार कीता । अज्ज दे जुद्ध च
 श्रुतशर्मा दी भारी हानि दिक्खियै इंद्र ने उसी दलासा दित्ता जे
 तू धीरज रक्ख, भ्यागा दे जुद्ध च अऊं तेरी पूरी मदत करइ ।

सूर्यप्रभ गी इस गल्ला दी बड़ी खुशी होई जे शत्रु दी फौजा च फुट्ट पेई गेई ऐ। हून विजै अवश साढ़ी होग। सूर्यप्रभ अज्ज बी सेना दे कैम्पा च रेआ ते सारी रात उसने ब्रह्मचर्य वर्त धारण करियै बताई।

छेमा तरंग

कैम्प च बैठा दा सूर्यप्रभ रातीं अपने मंत्री वीतभीति गी आखन लगा—मंत्री जी ! मिगी नींदर नेई आवै करदी। रात वताने लेई कोई विचित्र वीरगाथा सुनाओ। सूर्यप्रभ दी ए मरजी दिक्खियै वीतभीति ने कथा इस चाल्ली शुरू कीती :-

उज्जयिनी नगरी च महासेन नां दा इक राजा राज करदा हा। राजा बड़ा रूपवान, विद्वानें ते कलाकारें दी कदर करने आला हा। उदी रानी अशोकवती सुंदरता च अपनी मसाल आपूं गै ही। तरलोकी च ओदे वरोवर रूपवती कोई नारी नेई ही। राजा गुणशर्मा नां दे ब्राह्मणै दा बड़ा मान करदा हा। गुणशर्मा जनेहूया बांका जोआन हा उयै नेआ शूरवीर बी हा। ओ वेदविद्या दा पारंगत विद्वान ते कलाएं च परवीण हा। इक दिना दी गल्ल ऐ रातीं दे समें जिसेल्लै राजा रानी समेत रनवासै च नाच दिक्खै करदा हा तां दौनें उसी आक्खेआ—गुणशर्मा जी ! असें सुनेआ ऐ जे तुस सब कलाएं च स्याने ओ इसलेई साढ़ी मरजी ऐ जे तुस अज्ज असेंगी अपना नृत्त दस्सो। ए सुनियै गुणशर्मा मुसकराया ते आक्खन लगा—म्हाराज ! अऊं नृत्त ते जाननां पर सभा च नच्चना मिगी शोभा नेई दिदा ते फी ओ बी राजा ते रानी दे सामनै। रानी दे शारा करने पर राजा बोलेआ—गुणशर्मा जी ! नेई गल्ल नेई। तुसें कोई जनता दे सामने मंडुए च थोड़ा नच्चना ऐ जे तुन्दी हंसवानी होग। ए ते साढ़ी अपनी अंतरंग गोष्ठी ऐ। इदे च मन परचाने लेई अपने गुणै दा परकाश करदे के हरज ऐ। फी अऊं इस बेल्लै तुंदा राजा नेई मित्तर आं। अऊं अज्ज तुंदा नृत्त दिक्खै विना अन्न—जल ग्रहण नेई करड। नौकर स्वामी दी आज्ञा गी कियां टाली सकदा ऐ। अखीर गुणशर्मा गी नच्चना

पेआ । पर बाह ! कनेईं विचित्र ही गुणशर्मा दी नृत्त-कला !
 जियां-जियां बांका गवरू गुणशर्मा नटखट बेल्लू आंगर अपने
 अंगें गी ल्हाई - ल्हाई नचदा हा उंआं गै राजा रानी दे मनै
 दे मोर वी पाह्ल्लां पांदे हे । नृत्त समाप्त होने पर राजा
 नै गुणशर्मा गी वजाने लेई सतार दित्ती । सतार दी तारें
 गी सुर करदे - करदे उसनै राजा गी आखेआ जे म्हाराज
 ए सतार ठीक नेईं कोई होर देओ । इदै अंदर कुत्ते दा बाल
 फसे दा ऐ । ए आखियै उसनै सतार राजा गी बापस देई दित्ती ।
 राजा नै जिसेल्लै सतारा गी खुलाइयै दिक्खेआ तां सचमुच उदे
 चा कुत्ते दा बाल निकलेआ । मनै च उदे गुणै दी परशंसा करदे
 राजा नै उसी दूई सतार दित्ती । सतार हत्थै च लेइयै गुणशर्मा
 नै जिसेल्लै इदिएं तारें पर उंगलां चलाइयां तां इक समां
 वज्झी गेआ । राजा - रानी तसवीरा आला लेखा जड़ होई गे ।
 फी गुणशर्मा नै राजा गी शस्त्र विद्या दा चमतकार दस्सेआ ।
 ओ राजा गी आखन लगा - तुस शस्त्र लेइयै मेरे पर परहार
 करदे जाओ । ए सुनियै राजा नै जिस - जिस शस्त्र कन्ने गुणशर्मा
 पर हमला कीता उयै - उयै शस्त्र उसने मंत्र दे बल कन्ने
 वन्नियै नकारा करी दित्ता । उदे चमतकारें गी दिक्खियै राजा
 समजी गेआ जे गुणशर्मा राज चलाने दे कम्मै च किन्नी मद्दत
 देई सकदा ऐ । दूऐ पासै रानी उदे रूप ते गुणै गी दिक्खियै
 उदे पर मोहूत होई गेई । सोचन लगी जे नेआ बांका
 गवरू ते गुणै दा गुथला गुणशर्मा मेरे बसै च आई जा तां अऊं
 किन्नी भागवान होई जां । ए सोचियै उसनै राजा गी आखेआ
 जे तुस गुणशर्मा गी आखो जे ओ मिगी वीणा - वादन सिखा ।
 इदी वीणा वादन कला गी दिक्खियै अज्ज मेरे मनै च इस कला
 दे सिक्खने दी चानचक अभिलाशा पैदा होई गेई ऐ । राजा
 नै रानी गी ए कला सखाने लेई शुभ म्हरतै च गुणशर्मा गी नियुक्त
 कीता । किश दिन बीतने पर गुणशर्मा गी मलूम होआ जे उदे
 सरबंघै च रानी दा भाव दिनो - दिन बदलदा जा करदा ऐ ।
 उसनै अनुभव कीता जे रानी उसी गुरु दी भावना कन्ने नेईं

वल्कि प्रेमी दी भावना कन्ने दिक्खन लगी पेई ऐ । इक्क दिन
 जदों राजा भोजन करने लेई बैठा तां गुणशर्मा उत्थें गै हा ।
 जिल्लै रसोइयै नै राजा लेई भोजन परोसेआ तां गुणशर्मा तुरत
 बोली पेआ—म्हाराज ! इस भोजन गी मत खाओ इदे च विख
 मिलेदा ऐ । ए सुनियै राजा हरान होई गेआ ते डरेआ बी ।
 परख लेई गुणशर्मा नै ओ भोजन उसै रसोइयै गी खलाया ।
 खंदे गै ओ बेहोश होई गेआ । गुणशर्मा नै दोआई देइयै उसी
 राजी करी लेआ । उसी होश आई गई । गुणशर्मा राजा गी
 आखन लगा—ए विख इस्सै रसोइयै नै भोजन च मलाया हा ।
 अऊं इदी शक्की नजरा ते विगड़ी दी भं-भीत मुखमुद्रा थमां गै
 समजी गेआ हा जो इसनै भोजन च जैहूर पाएदा ऐ । राजा
 दे पुच्छने पर रसोइया बोलेआ—म्हाराज ! मिगी बंगाल दे राजा
 विक्रमशक्ति नै भोजन च विख मिलाइयै तुसेंगी मारने लेई भेजेआ
 हा । अऊं अपना गलत नां-धां दस्सियै सरकारा दे रसोईखाने
 च नौकर होई गेआ । में जरूर भोजन च विख मलाआ हा ।
 अगें सरकार मालक ऐ । राजा नै इस रसोइए गी सखत सजा
 दित्ती । गुणशर्मा गी प्राण वचाने दे नाम च इक जहार रपे
 दित्ते । राजा दे आखने पर गुणशर्मा नै फी रानी गी वीणा
 दी शिक्षा देनी शुरू करी दित्ता । इक्क दिन जिसेल्लै गुणशर्मा
 रानी गी वीणा - वादन सिखा करदा हा तां रानी बेवस होइयै
 गुणशर्मा कन्ने मखोल ठट्टा करन लगी पेई । गल्ल इत्थूं तक
 बधी गई जे रानी अशोकवती गुणशर्मा कन्ने हत्थापाई करने
 पर उतरी आई । कामवश होइयै उसनै गुणशर्मा कन्ने आलिगन
 करना चाहेआ । गुणशर्मा रानी गी परें हटा करदा हा पर ओ
 उसी अपने पासै खिच्चै करदी ही । रानी गुणशर्मा गी आखन
 लगी—प्यारेआ ! में वीणा सिक्खने दा ते इक ब्हान्ता बनाया
 हा । मेरा तेरे कन्ने सच्चा प्रेम होई गेआ ऐ । तूं मेरी
 गल्ल मन्न । गुणशर्मा नै जवाब दित्ता—देवी ! ए मत कर ।
 तूं मेरे स्वामी दी पत्नी एं । अऊं स्वामी कन्ने ए नमकराहमी
 नेई करड । ए कुकर्म करियै अपयश ते पाप दा भागी नेई

वनड । रानी क्रोध कन्ने जली-वली दी आखन लगी जे तू मेरी गल्ल नेईं मन्नी तां तेरे वजोग च अऊं मरी जाड । पर मरने दे पैह्लें अऊं तुगी मारियै मरड, ए जाद रक्ख । गुणशर्मा आखन लगा—देवी ! कोई डरै आली गल्ल नेईं । अऊं संसार च कलंकित होइयै मरने कोला सच्चे मार्ग पर चलदा - चलदा मरना श्रेष्ठ समजनां । रानी नै फी उदो मिन्नत कीती ते आक्खेआ जे तू मेरी गल्ल मन्नी जाएं तां में राजा गी आखियै तुगी अनंत धनराशि, गां, हाथी, घोड़े दोआंग जिसी पाइयै तू सामंत आंगर ठाठ कन्ने जीवन वतागा । होई सकदा ऐ जे तूयें राजा बनी जाएं, फी तुगी कुदा डर रौहूग । रानी दे हठै गी दिक्खियै गुणशर्मा नै सोचेआ चलो किश बहाना बनाइयै इस वला गी किश समां लेई टालनां । होई सकदा ऐ जे इन्ने चिरै च रानी आपूँ गै समजी जा । ए सोचियै गुणशर्मा रानी गी आखन लगा—देवी ! मिगी किश दिन इस मामले पर विचार करन देओ । अऊं नेईं चाहून्दा जे तुंदै वरख-लाफ चलने करी मेरा सर्वनाश होई जा । खवरै कोई रस्ता निकली आवै । रानी गी ए तसल्ली देइयै गुणशर्मा दिन कट्टन लगा ।

इक वारी राजा महासेन नै चढ़ाई करियै राजा सोम-केशवर गी उदे किले च घेरी लेआ । जिसेल्लै महासेन इस किले गी घेरियै बैठा दा हा तां मौका पाइयै गौडदेश दे राजा विक्रमशक्ति नै अपनी सेना कन्ने इस घेरी लेआ । महासेन गुणशर्मा गी पुच्छन लगा जे मंत्री जी ! हून असेंगी केहू करना लोड़चदा ऐ । गुणशर्मा ने जवाब दित्ता - महाराज ! तुस चित्ता नेईं करो अऊं इदा उपा करनां । रात पेई तां अंतर्धान अंजन दे द्वारा अदृश्य होइयै गुणशर्मा राजा विक्रमशक्ति दे कैम्प च जाई वड़ेआ । उत्थें सुत्ते दे राजा दे तम्बू च जाइयै उसनै राजा गी जगाया ते आक्खेआ—राजन् ! सुनो जे किश अऊं आखनां । अऊं देवदूत सुर्गा दा आयां । अऊं तुगी हुकम दिन्नां जे तू राजा महासेन कन्ने सुलाहू करियै सेना समेत

इत्थूँ दा तुरत चली जा । नेईं तां तेरा सर्वनाश होई जाग ।
 मिगी भगवान विष्णु नै तुगी खबरदार करने लेई भेजेआ ऐ ।
 राजा विक्रमशक्ति सोचन लगा ए अवश कोई देवदूत ऐ । नेईं
 तां मनुख इत्थें किआं आई सकदा ऐ । ए सोचियै राजा नै
 जवाव दित्ता--धन्न आं अऊं जिदे कच्छ भगवान विष्णु नै अपना
 दूत भेजेआ ऐ । राजा दं दिखदे - दिखदे गुणशर्मा नै चुपगुम
 अंतर्धान गुटिका अपने मुंहै च रक्खी ते अदृश होई गोआ ।
 राजा गी विश्वास होई गोआ जे ए जरूर गै देवदूत हा ।
 सबेरा होआ तां विक्रमशक्ति नै राजा महासेन कन्ने संधि करी
 लेई ते अपनी फौजा गी समेटियै अपने दंसै गी चलो गोआ ।
 राजा महासेन बी सोमकेश्वर गी जित्तियै अपनी राजधानी
 उज्जयिनी गी परतोई आया । किश दिन बीते तां कुसै गल्ला
 कोला विक्रमशक्ति ते महासेन दा जुद्ध छिड़ी पेआ । जिसेल्लै
 दोए बुर्दोबुर्दी लड़ै करदे हे तां राजा महासेन दा पैर तिलकी
 गोआ ते ओ धरती पर डिगगी पेआ । भुआं डिगो दे महासेन
 गी दिक्खियै विक्रमशक्ति जिसेल्लै उदे पर तलवारा दा प्रहार
 करन लगा तां गुणशर्मा नै चक्र चलाइयै उदो तलवारा आलो
 वांह कट्टी दित्ती ते गदा दा प्रहार करियै उसी सदा लेई
 धरती पर लिटाई दित्ता । महासेन नै कृतज्ञता कन्ने गुणशर्मा
 दा धन्नवाद कीता ते आक्खेआ जे अज्ज तुसें पत्रमीं वार मेरे
 प्राण बचाए न । विक्रमसेन दे मरी जाने पर उदी फौज नट्ठी
 गई । गुणशर्मा दी मद्दता कन्ने महासेन नै होर बी मते राजें
 गी जित्तेआ ।

हून रानी अशोकवती दे मनै च गुणशर्मा लेई फी प्रेम
 दा वोआल उट्ठेआ । उसनै गुणशर्मा गी बुलाइयै फी उदे कोला
 प्रेम दी भिक्ख मंगी । पर धर्म दे मार्ग च अटल गुणशर्मा
 अपने निश्चै थमां नेईं हटेआ । उदं निश्चै गी अटल जानियै
 रानी नै बुरी दशा वनाई लेई ते रोन लगी पेई । राजा महासेन
 जिसेल्लै उदे मैह्लै च आया तां उदी बुरो हालत दिक्खियै

बड़ा हराण होआ । पुच्छन लगा—प्यारी ! के गल्ल ऐ कुन्न तेरी
 ए हालत बनाई दिती ऐ । रानी बोली—धन दे लोभै थमां तुं दे
 वरखलाफ गौडेश्वर कन्ने मिलियै गुणशर्मा राज—विद्रोह करना
 चाहंदा ऐ । तुंदा खजाना उसी दुआने लेई उसनै अपना दूत
 गुप्तरूप कन्ने उदे कोल भेजेआ । गौडेश्वर दा अपना स्थान उसी
 आखन लगा—म्हाराज ! इस कम्मै लेई तुस धन विर्था नेई
 खर्च करो । अऊं इस कम्मै गी मुखत गै सिद्ध करी
 दिन्नां । तुस गुणशर्मा दे दूत गी इत्थें डक्की रक्खो । ए
 आक्खियै ओ स्थान सरकारा गी बिख देने लेई इत्थें उठी आया ।
 अपना नां बदलियै तुं दे रसोईखाने च कम्म करन लगी पेआ ।
 इन्ने च गुणशर्मा दा दूत जिसी गौडेश्वर नै कैद करी रक्खेदा
 हा—कुसै तरीके कन्ने छुटियै इत्थें उठी आया । उसनै औंदे गै
 गुणशर्मा गी सारी गल्ल दस्सी दिती ते तुं दे रसोईखाने च कम्म
 करने आले गौडेश्वर दे रसोईए गो वो गुप्तरूप कन्ने उसी
 दस्सी दिता । इयै कारण हा जे तुसंगी बिख दिंदे उस स्थानै
 गी गुणशर्मा नै पगड़ियै मरवाई दिता हा । अज्ज उस स्थानै
 दी मां, जनानी ते भ्रा उसी तुप्पन इत्थें आए हे । उनेंगी इत्थें
 आए दे जानियै गुणशर्मा नै उस स्थानै दी मां ते जनानी गी
 मरवाई ओड़ेआ । उदा भ्रा डरेदा नट्टियै मेरे मेह्लै अंदर आई
 छप्पेआ । जिसेल्लै ओ मिगी अपने दुखै दी कहानी सना करदा हा
 तां गुणशर्मा मेरे मेह्लै च आया । उसी दिक्खियै पता नेई
 स्थानै दा भ्रा केड़े पासे गी नट्टी गोआ ऐ । उसी नठदे दिक्खियै
 गुणशर्मा दा चेहूरा फक्क होई गेआ । में उसी नकेवलै पुच्छेआ—
 गुणशर्मा जी ! अज्ज तुस इन्ने चिंतातर ते बेचैन की
 ओ । ए समजियै जे हून मेरा पोल खुल्ली गोआ ऐ गुणशर्मा
 आखन लगा—रानी जी ! भला मिगी चैन कुत्थू । अऊं तुं दे प्रेम
 दी अग्गी च दिन - रात भुज्जै करनां । इस अग्गा गी बुजाइयै
 तुस मिगी बचाई लौ । ए आक्खियै ओ मेरे पैरें पर डिग्गी
 पेआ । उट्ठियै मिगी जफ्फी मारने गी तयार होई गोआ ।

ततकाल मेरी दासी पल्लविका मेरे कमरे च आई गई । उसी दिक्खियै ओ डरियै नट्टी गेआ । म्हाराज, जे पल्लविनी कमरे च नेईं औंदी तां जरूर गै ओ मेरे सतीत्व गी नष्ट करी दिंदा । ए आक्खियै रानी अशोकवती रोन लगी पेई । रानी दी गल्ल सुनियै राजा क्रोध कर्ने कम्बन लगी पेआ । बोलेआ -- रानी धीरज रक्ख । अऊं इस दुष्ट गी कठोर दंड देड । पर उसी दंड देने लेई कोई जुगती तुप्पनी पौग । नेईं तां मेरी बदनामी होग । लोकें गी पता ऐ जे उसनै पज वारी मेरे प्राण वचाए न ते तेरे कन्ने जेड़ी हत्थापाई उसनै कीती ऐ उसी अस सभा च खोलियै नेईं दस्सी सकदे ।

राजा नै जाइयै सभा लाई । उदे च राजा दे दर्शनें लेई राजा लोक, सामंत, राजपुत्तर, मंत्री वगैरा सारे आए । उससै बेल्लै गुणशर्मा वी घरा दा राज-सभा लेई चली पेआ । रस्ते च उसी अवसगन लब्बे । सोचन लगा मेरा अनिष्ट भामें होयै, पर हे भगवान ! मेरे स्वामी दा अनिष्ट नेईं होयै । राज-सभा च आइयै ओ पैहूले आंगर अपने आसन पर बेई गेआ । राजा नै उसी गुस्से दी नजरा कर्ने दिक्खेआ । गुणशर्मा सोचन लगा जे के गल्ल ऐ अज्ज राजा मेरे पर विगडे दा नजर आवै करदा ऐ । इन्ने चिरै च उदे पासै दिक्खियै त्यूहड़ी चढ़ाइयै राजा सभासदें गी आक्खन लगा—तुसेंगी मलूम ऐ जे में अपने पुराने मंत्रिणें दे हक्कें गी कुचलियै गुणशर्मा गी उच्चे कोला उच्चा ओहूदा दिता ते इसी अपने वरोवर बनाया । उदा फल मिगी ए मिलेआ जे इसनै मेरे शत्रु गौडदेश दे राजा कन्ने मिलियै मिगी मरवाने दे मनसूब बनाए । ए आक्खियै राजा नै ओ सारियां गल्लां सभासदें गी दस्सियां जेड़ियां रानी नै आख्यां हियां । ए सुनियै गुणशर्मा वड़ा हरान होइयै राजा गी पुच्छन लगा—म्हाराज ! मिगी सरकार ए दस्सन जे मेरै वर-खलाफ ए बेसिर पैर दियां शकायतां कुसनै लाइयां न । ए सुनियै राजा बोलेआ—ओ पापिया ! उस दिन भोजन च मिले द विख दा तुगी कियां पता लग्गी गेआ हा ? ए आक्खियै राजा नै

दौड़ियै गुणशर्मा पर छुरे दा प्रहार कीता । राजा दे अंगरक्षक
 वी छुरे कड़ियै उदे पर टुट्टी पे । गुणशर्मा अपने विद्यावल
 ते चलाकी कन्ने सवनें दे हमले कोला वची निकलेआ । ओ
 सभा छोड़ियै वाहरै गी दौड़ी पेआ । उदै पिच्छें राजा दे
 सौ शस्तरधारी सपाही दौड़े पर उनें सवनें गी भाड़ी - फंडियै
 ते मौता दे घाट तुआरियै ओ उस पंकटा कोला साफ वची
 गोआ । कोई उदा वाल वी वीका नेईं करी सक्केआ । शैह्-रा
 दा वाहर निकलियै अंतर्धान अंजन दा परयोग करियै उसनै वाऊ
 दा रूप धारण करी लेआ ते दक्खनापथ दे रस्ते पर चली
 पेआ । चलदे - चलदे सोचन लगा ए बिख राजा दे कन्नें च
 अवशश गै अशोकवती ने उगलेआ होग । नेइयां जनानियां बिख
 कोला वी मतियां घातक हुंदियां न । इनें जनानिएं दे जाल च
 फसेदे राजा लोक भले लोकें लेईं किन्ने खतरनाक हुंदे न ।
 अपने विचारें च डुब्बा दा गुणशर्मा इक ग्रां पुज्जा । उत्थें
 उसनै वोहूड़ा हेठ बैठे दे इक ब्राह्मण गी दिक्खेआ जेड़ा अपने
 शिष्यै गी पढ़ा करदा हा । गुणशर्मा उस आचार्य ब्राह्मणै कन्ने
 मिलेआ । दोनें इक दूए दा परिचय पुच्छेआ । गुणशर्मा नै उसी
 अपना नां - थां ते औने दा कारण दस्सेआ । जिसेल्लै ब्राह्मणै
 गी पता लग्गा जे गुणशर्मा महान विद्वान, गुणी ते सारिएं
 कलाएं च निपुण ऐ तां उसी वड़ा चम्भा लग्गा । उसनै ए जानने
 दी इच्छा प्रगट कीती जे तुस इन्नी ल्हौकी वरेसा च सारिएं
 विद्याएं ते कलाएं च पारंगत कियां होईं गे । उदे ए प्रश्न करने
 पर श्रुतशर्मा नै अपनी जीवन कहानी इस चाल्ली आखना शुरू
 कीती—

उज्जयिनी नगरी च आदित्य शर्मा नां दा इक ब्राह्मण रौहूदा
 हा । अजें ओ ज्याना गै हा जे उदा पिता मरी गेआ ते
 माता पति कन्ने चिखा पर चड़ियै सती होईं गेई । अनाथ
 आदित्यशर्मा अपने मामे दे घर पलन लग्गा । जिसेल्लै ओ किश
 बंडा होआ तां उस संन्यासी कन्ने घना मेलजोल होईं गेआ ।
 दोए शमशानै च जाइयै यक्षणी सिद्ध करने पिच्छें लगी पे ।

किश समां उनेंगी ए साधना करदे होआ तां संन्यासी दे सामनै
 इक रूपवती कन्या आई । इदे सग होर वी कन्यां हियां ।
 कन्या आखन लगी—संन्यासी जी ! अऊं विद्युन्माल यकखनी आं
 ते बाकी दियां मेरै अधीन कम्म करने आलियां यकखनियां न ।
 तुस इनें यकखनिएं चा इक यकखनी गी लेई लौ । तुसें जेड़ी
 साधना कीती ऐ वस उदा इन्नां गै फल ऐ । तुसें गी पूर्ण
 मंत्रसिद्धि दा ज्ञान नेईं । इस्सें लेई तुस मिगी सिद्ध नेईं
 करी सके । हून मती साधना करने दी लोड़ नेईं । विद्युन्माला
 दे आखने पर संन्यासी नै उंदे चा इक यकखनी लेई लेई ।
 परंत विद्युन्माला गासै च समाई गेई । आदित्यशर्मा संन्यासी
 दी यकखनी कोला पुच्छन लगा जे विद्युन्माला थमां बड्डी वी
 कोई यकखनी ऐ । ओ बोली—यकखनिएं च त्रै यकखनियां उत्तम
 न । इंदे नां विद्युन्माला चंद्रलेखा ते सुलोचना न । उंदे चा
 वी सुलोचना सब कोला उत्तमी यकखनी गिनी जंदी ऐ ।
 आदित्यशर्मा नै यकखनी गी फी पुच्छेआ जे सुलोचना यकखनी
 गी सिद्ध करने दी विधि कुन जानदा ऐ । ओ बोली—दक्ख-
 नापथ च वेणा नदी दे कंडे वनै च विष्णुदत्त नां दा ब्राह्मण
 इस मंत्रसिद्धि गी जानदा ऐ । यकखनी दे वचन गी सुनियै
 आदित्यशर्मा उत्थें गेआ । त्रै वरे उसनै संन्यासी दी मन लाइयै
 सेवा कीती । प्रसन्न होइयै विष्णुगुप्त नै आदित्यशर्मा गी
 सुलोचना यकखनी दी सिद्धि दा मंत्र दित्ता । आदित्यशर्मा नै
 विधि दे अनसार नकेवलै आसन जमाइयै मंत्रसिद्धि कीती ।
 सिद्धि प्राप्त करने बाद सुलोचना यकखनी विमान पर सोआर
 होइयै आदित्यशर्मा दे सामनै प्रगट हाई ते आखन लगी—तुसें
 मिगी सिद्ध करी लेआ ऐ पर छे महीने तगर मेरे कन्यावर्त
 गी भंग नेईं करना । उदे परंत मेरे गर्भ थमां तुसेंगी इक
 नेआ पुत्तर मिलग जेड़ा सर्वज्ञ होग ते कुसै कोला जित्तेआ
 नेईं जाग । आदित्यशर्मा नै उसदी शर्त मन्नी लेई सुलोचना उसी
 अपने विमानै च बठालियै अलकापुरी लेई गेई । उत्थें जाइयै
 आदित्यशर्मा नै सुलोचना कच्छ रौहदे होई वी छे महीने तक

ब्रह्मचर्य दा पूरा पालन कीता । उदी इस तपस्या पर परसन्न होइयै यक्षपति कुबेर नै अपने हथें सुलोचना आदित्यशर्मा गी व्याही दित्ती । समां वीतने पर आदित्यशर्मा दे घर सुलोचना दे गर्भा कोला इक पुत्तर नै जन्म लेआ । इन्नी कथा सुनाइयै गुणशर्मा अग्निदत्त ब्राह्मण गी आखन लगा—आदित्यशर्मा दे घर ओ जेड़ा पुत्तर जम्मेआ ओ अऊं ऐं गुणशर्मा आं । पिता नै मेरा नां गुणशर्मा रक्खेआ । अलकापुरी च गै में यक्षपति मणिभद्र कोला वेद, वेदांग, शास्त्ररें ते कलाएं दी शिक्षा लेई । इक वारी कुबेर कन्ने मिलने लेई देवराज इंद्र अलकापुरी आए । कुबेर दी सभा च सारें उटिठयै उंदा स्वागत कीता । पर मेरा पिता मस्ती कन्ने अपने आसनै पर गै बैठा रेआ । इदे पर इंद्र नै क्रोध करियै शाप दित्ता जे मूरखा, जा तूं अपने मर्तलोक गी । तूं यक्षलोक च रौह्ने दे जोग नेईं । मेरी माता सुलोचना ने इंद्र कोला माफी मंगी । इंद्र नै आक्खेआ—अच्छा पिता दे मर्तलोक जाने दे थां इदा पुत्तर गुणशर्मा मर्तलोक च जाग । ए सुनियै मेरा पिता मिगी उज्जयिनी नगरी च अपने मामे दे घर छोड़ी गेआ । इत्थें राजा महासेन कन्ने मेरी मित्तरता होई गेई । इदे परंत गुणशर्मा नै राजा महासेन कन्ने मित्तरता होने दे बाद दी सारी कथा अग्निदत्त गी सुनाई । ओ अगली कहानी वी सुनाई जिदे कोला उदा राजा कन्ने बैर होई गेआ ते उसी उज्जयिनी नगरी छोड़नी पेई ।

ए सुनियै ग्रां दा ब्राह्मण अग्निदत्त गुणशर्मा गी आखन लगा—अऊं धन्न आं तुं दे कन्ने मेरी मुलाकात होई । मेरा नां अग्निदत्त ऐ । तुस चलो ते मेरै घर टिको । अग्निदत्त गुणशर्मा गी अपने घर लेई गेआ ते उत्थें उसनै उसी परोह्ने दे रूप च ठराहूया । उत्थें अपनी सुंदरी नां दी कन्या गी दस्सियै ओ गुणशर्मा गी पुच्छन लगा जे इस कन्या दे लक्षणें परा दस्सो जे इदे कनेहू भाग न । उस दिव्व कन्या गी दिक्खियै गुणशर्मा आखन लगा जे व्याहू होई जाने पर इस कन्या दियां सौकनां होडन ।

इस कन्या दे नक्कै पर तिल ऐ ते इक तिल इदी छाती पर वी
 ऐ । इनें तिलें दे नशानें परा गै में ए फलादेश दस्सेआ ऐ । गुणशर्मा
 दी गल्ल सुनियै कन्या दे भ्रा नै जिसेल्लै भैनू दी छाती दिक्खी तां
 उत्थें सचमुच गै तिल हा । अग्निदत्त नै वड़ा चरज बुज्झेआ ।
 बोलेआ—तुस ते मिगी जानिजान मलूम हुंदे ओ । पर सौकनें दा
 होना कोई बुरी गल्ल थोड़ी ऐ । सौकनें दे पति अक्सर धनवान
 हुंदे न जेड़े मतिएं जनानिएं गी चगी चाल्ली पाली सकदे न ।
 निरधन - पति लेई ते जनानी दा पालना वी भार वनी जंदा ऐ ।
 इक दिन नकेवलै अग्निदत्त गुणशर्मा गी आखन लगा तुम परदेस
 जाने दा विचार छोड़ी देओ । इत्थें गै रौह् । अऊं अपनी कन्या
 सुन्दरी तुसेंगी ब्याही दिन्नां । गुणशर्मा बोलेआ—चंगा, अऊं स्वीकार
 करनां । पर इक गल्ल ऐ, राजा महासेन ने वगैर कारण दे मेरा
 अपमान कीता ऐ । ए सोचियै मेरा दिल सदा दुखी रौह् दा ऐ
 ते किश चंगा नेईं लगदा । उज्जयिनी इत्थू मती दूर नेईं । कुतै
 ए नेईं होयै जे राजा गी मेरा पता लग्गी जा । ओ मिगी वन्नी लै
 ते तुसेंगी वी कष्ट देयै । अग्निदत्त आखन लगा—तुस इदी चिंता
 नेईं करो । अऊं नेआ परबन्ध करी देड जे तुस भामें जिन्ना चिर
 मरजी ऐ इत्थें रौह् कुसै गी पता नेईं लग्गग । अऊं तुं दे रौह् ने
 लेई इक नेआ भोरा वनाई देड जिदा सुखने च वी कुसै गी ज्ञान
 नेईं होग । गुणशर्मा ने अग्निदत्त दी गल्ल ते मन्नी लेई पर इस
 शर्ता पर जे जिन्ना चिर अऊं इस दुष्ट राजा गी दंड नेईं देई
 लैंग । इन्ने चिर तुन्दी पुत्तरी गी नेईं ब्यहाड । राजा गी दंड देने
 लेई मिगी देवता दी राधना करने पौग । अग्निदत्त ने उदी शर्त
 मन्नी लेई । उसने अपने घरै अदर इक गुप्त भोरा वनावाआ ।
 उदे अन्दर बेइयै गुणशर्मा ने मंत्र-सहित स्वामी कार्तिकेय दी राधना
 शुरु कीती । साधना करदे - करदे मता चिर होई गेआ । उदी
 साधना पर परसन्न होइयै इक दिन स्वामी कार्तिकेय ने उसी
 दर्शन दित्ते ते आखेआ—पुत्तरा ! तू किश समां बीतने पर राजा
 महासेन गी जित्तियै विस्तृत राजै पर राज करगा । कुमार

कार्तिकेय कोला वर प्राप्त करियै गुणशर्मा ने अग्निदत्त दी पुत्तरी सुंदरी कन्ने व्याहू करी लेआ । उदे कोल अक्षौ खजाना होई गेआ । इदे वलै कन्ने उसनै चतुरंगणी सेना तयार कीती । आले—
 दुआले दे मते राजे उदे कन्ने आई मिले । ए सेना लेइयै उसनै उज्जयिनी पर धावा बोली दित्ता । राजा महासेन कन्ने घमासान जुद्ध दे वाद गुणशर्मा नै राजा गी हराई दित्ता ते उदे राजै पर ववजा करी लेआ । उन्न लोकें गी रानी अशोकवती दे दुराचारै दा हाल बी दस्सेआ ते राजा महासेन गी देस-नकाला देई दित्ता । उसनै होर मते राजें गी जित्तियै उंदिएं धिएं गी व्याही लेआ । इयां अपनी साधना ते गुणें कन्ने विशाल राजै दी स्थापना करियै गुणशर्मा मता चिर धर्मानुकूल शासन करदा रेआ । गुणशर्मा दे गुणें दा ठीक-ठीक मुल्ल नेई पाने करी राजा महासेन गी अपने राजै कोला हत्थ धोना पेआ । ते गुणशर्मा छड़े अपने गुणें ते धीरज दे स्हारै ब्राह्मण कोला राजा बनी गेआ । वीतभीति मंत्री दे मुहां ए रोचक कहानी सुनियै जुद्ध दे समुंदर गी पार करने लेई सूर्यप्रभ दा उत्साह वधेआ ते ओ रातीं नचित होइयै सेई गेआ ।

सतमां तरंग

सवेरै सूर्यप्रभ अपने दलबल समेत तयार होइयै रणभूमि च आइयै डटी गेआ । श्रुतशर्मा बी सेना समेत आई गेआ । मारु वाजा वज्जन लगी पेआ । देवता ते दानव बी अपने-अपने विमानें च बेइयै जुद्ध दा दृश दिक्खने लेई समानै च शाई गे । अज्ज दोनै फौजें अर्धचंद्र व्यूह बनाए । रणदुंदभी वज्जन लगी पेई । शूरवीरें दी छतिएं च जोश दा समुंदर ठाठां मारन लगी पेआ । जुद्ध शुरू होई गेआ । रथें पर सोआर महारथी ते अतिरथी इक दूए गी मारदे जखमी करदे इहर-उहर चक्कर लान लगी पे । म्यानै कोला निकली दियां शूरवीरें दियां लिशकदियां लऊ कन्ने रंगी दियां तलवारां यमराज दियां जीभां लवदियां हियां । चवक्खी बहादरें दे कटोए दे सिरें कन्ने भरोची दी

रणभूमि यमराज दी गेंदबल्ला खेडने दी क्रीड़ाभूमि वनी गई दी ही । अज्ज महारथिणं दा आपू - चें बुरदोबुरदी द्वंदजुद्ध करने दा दिन हा । सूर्यप्रभ दा श्रुतशर्मा कन्ने, दामोदर दा प्रभास कन्ने, महोत्पात दा सिद्धार्थ कन्ने, प्रहस्त दा ब्रह्मगुप्त कन्ने, प्रज्ञाढ्य दा चंद्रगुप्त कन्ने ते वाकी महारथिणं दा दूणं महारथिणं कन्ने मकावला हा । सिद्धार्थ नै वाहुजुद्ध च महोत्पात गी धरती पर लटाई दित्ता । प्रहस्त ते ब्रह्मगुप्त नै इक दूण दे रथ भन्नी दिने । तलवारां सूत्रियै ओ पैदल गै लड़न लगे । प्रहस्त नै ब्रह्मगुप्त गी भुजां सुट्टी लेआ । ओ जिसेल्लै तलवारा कन्ने उदा सिर कप्पन लगा तां ब्रह्मा नै उसी रोकी लेआ । सारे असुर हस्सन लगे जे देवता जुद्ध दिक्खने लेई आए दे न जां अपने पुत्तरें दी रक्षा करने लेई । तलवार दे जुद्ध च प्रज्ञाढ्य नै चंद्रगुप्त दा सिर कलम करी दित्ता । सर्वदमन नै अंकश मारियै अतिवल दा कलेजा बेधी दित्ता । कुंजरकुमार नै धुरंधर गी रथहीन करी ओड़ेआ । फी इक भारी शिला कन्ने उसनै पैह्लें उदे रथ दा चूरा वनाई दित्ता फी उसै शिला कन्ने उसी मारी दित्ता । श्रुतशर्मा कन्ने जुद्ध करदे - करदे सूर्यप्रभ ने विरोचन दा वदला लौने लेई इक्कै वाणै कन्ने यम गी मारी मुकाया । श्रुतशर्मा पासेआ अश्विनी कुमार, अष्टवसु, यमराज, निऋति वगैरा देवतें इस जुद्ध च भाग लेआ ते असुरें दे विरुद्ध लड़ाई कीती । दामोदर ते प्रभास दा प्रचंड जुद्ध होआ । प्रभास नै दामोदर दा धनश भन्नी दित्ता ते सारथी मारी ओड़ेआ । दामोदर नमां धनश लेइयै लड़न लगा । ब्रह्मा नै उसी शावा दित्ती । इंद्र ब्रह्मा गी आखन लगा—म्हारज ! तुसें दामोदर गी शावा की दित्ती, ओ ते हारै करदा ऐ । ब्रह्मा बोले—दामोदर भगवान विष्णु दा अंश ऐ । ए एदी गै ब्हादरी ऐ जे प्रभास कन्ने लड़े करदा ऐ । नेई तां प्रभास कन्ने कोई देवता नेई लड़ी सकदा । प्रभास कालनेमि असुर दा अवतार ऐ । सूर्यप्रभ हिरण्यकशिपु दा अंश ऐ, सुनीथ हिरण्यकशिपु दा अवतार ऐ । प्रहस्त ते सूर्यप्रभ दे वाकी मंत्री, सरबंधी ते मित्तर उनें दैत्त दानवें दा अंश न जिनेंगी

तूसें देवासुर संग्राम च मारेआ हा । इससै लेई मयासुर नै इदा
 पक्ख लेआ ऐ । सूर्यप्रभ नै जंडा रुद्रयज्ञ कीता उदे कारण वलि
 बंधन थमां छुटकारा पाइयै जुद्ध दिक्खने लेई इत्थें आया ऐ ।
 अपने वचन दी रक्षा लेई वलि इन्नां चिर पताल च रौह्ग
 जिन्ना चिर तूस इंद्र दी पदवी पर ओ । परंत ए इंद्र दा पद
 प्राप्त करी लैग । हून असुरें पर शिवें दी किर्पा ऐ । इसलेई
 इंद्र कन्ने सुलाह् करने दी लोड़ ऐ । ब्रह्मा जिसेल्लै इंद्र कन्ने
 ए गल्लवात करे करदे हे तां प्रभास नै दामोदर पर पाशुपत
 अस्तार छोड़ेआ । इस भयंकर अस्तार दी संहार - शक्ति गी
 दिक्खियै विष्णु नै अपना सुदर्शनचक्र छोड़ेआ । इनें दोनें अस्तरें
 दा आपू-चें जुद्ध होन लगा जिदे करी सारें गी विना समै दे
 प्रलय दा भर्म होन लगा । ए दिक्खियै विष्णु प्रभास गी आखन
 लगे—हे प्रभास ! तू अपने अस्तार दा संहार कर फी अम्मी अपने
 सुदर्शनचक्र गी हटाई लैड । प्रभास नै जवाब दित्ता जे मेरा
 चलाए दा पाशुपत अस्तार अकारथ नेई जाग । इसलेई जे
 दामोदर रणै कोला मुंह मोड़ी लैदा ऐ तां में इस अस्तार दा
 संहार करी लैड । विष्णु बोले जे ए गल्ल ऐ तां तुगी वी
 लोड़चदा ऐ जे सार्दे अस्तार दा वी तू मान करें जिदे करी
 उदा चलाना वी अकार्य नेई जा । सुनियै प्रभास बोलेआ—अच्छा
 तू दा सुदर्शनचक्र मेरे रथ दा भंग करियै सफलता प्राप्त करै । परंत
 विष्णु नै दामोदर गी जुद्ध चा दूर करी ओड़ेआ । प्रभास नै पाशुपत
 अस्तार दा संहार करी लेआ । विष्णु दे सुदर्शनचक्र नै प्रभास
 दा रथभंग करी ओड़ेआ । प्रभास दूए रथ पर चढ़ियै सूर्यप्रभ
 कोल आई गोआ ते दामोदर श्रुतशर्मा कोल चली गोआ । हून
 श्रुतशर्मा ते सूर्यप्रभ दा द्वंदजुद्ध मता तेज होई गोआ । श्रुतशर्मा
 जिनें - जिनें अस्तरें दा परयोग करदा हा सूर्यप्रभ उनेंगी गै
 अपने - अपने अस्तरें कन्ने नकारे बनाई दिदा हा । ए दिक्खियै
 श्रुतशर्मा दे क्रोध दा पारा चढ़ी गोआ । उसनै सूर्यप्रभ पर

ब्रह्मास्तर छोड़ेआ । इदे जवाव च सूर्यप्रभ नै पाशुपतास्त्र
 छोड़ेआ । पाशुपत अस्तर दे सामनै ब्रह्मास्तर फिक्का पेई गेआ ।
 ए दिक्खियै इंद्र नै ते वाकी लोकपालें वज्र वगैरा अपने-अपने
 अस्तर छोड़े । इन्हें सारे अस्तरें गी हराइयै पाशुपत अस्तर
 श्रुतशर्मा दे वध लेई अपने तेज कन्ने आपूँ गै जलन लगा ।
 डरियै सूर्यप्रभ नै इदे अगें प्रार्थना कीती जे म्हाराज, श्रुतशर्मा
 दा वध मत करो । इसी वन्नियै साढ़ै सपुर्द करी देओ । हून होर
 वी वड़े भयंकर जुद्ध दा खतरा पैदा होई गेआ । उस्सै बेल्लै
 शिवें दा भेजे दा वीरभद्रगण आइयै इंद्र गी आखन लगा—तुस
 देवता लोक जुद्ध दिक्खने लेई आए ओ । इदे च तुंदे लड़ने दा
 कोई मतवल नेई । जे तुस मरजादा गी लंगगे ओ तो मामला
 होर वी मता विगड़ी जाग । देवता बोले—इस जुद्ध च साढ़े
 पुत्तर - पोत्तरे मारे गे न ते मारे जाकरदे न, इसलेई अस की
 नेई लड़चै । वीरभद्र शिवगण दे चली जाने पर फी भयंकर जुद्ध
 छिड़ी पेआ । सुनीथ, अश्विनीकुमार कन्ने, प्रज्ञाद्य चंद्रमा कन्ने,
 स्थिरबुद्धि वसुएँ कन्ने, प्रकम्पन अग्निदेव कन्ने, सिंहदंष्ट्र निर्वृत्ति
 कन्ने प्रमथन वरुण कन्ने, धूम्रकेतु यम कन्ने, महामाय कुबेर कन्ने
 भिड़ी पे । जिन - जिन अस्तरें गी देवता छोड़दे हे उनें - उनें गी
 गै शिव अपने हुंकार कन्ने नष्ट करी दिंदे हे । मते देवता रण
 करी दित्ता । इंद्र नै अपना वज्र चुक्केआ शिवें हुंकारा भरेआ
 ते वज्र नष्ट होई गेआ । इंद्र दे हारी जाने पर नारायण
 दा प्रभास कन्ने जुद्ध होन लगा । नारायण नै उदे पर भारचर-
 चक्र छोड़ेआ । प्रभास नै मंत्र कन्ने पवित्र खडग छोड़ेआ । दोनें
 अस्तरें दा प्रचंड जुद्ध होन लगा । प्रभास दे खडग गी हारदे
 दिक्खियै शिवें हुंकारा छोड़ेआ । जिदे करी दोए अस्तर गुम्म
 होई गे । इदे कारण असुरें च खुशी दी लैहूर उट्ठी पर देवतें
 दे दिल बेई गे ।

सूर्यप्रभ दी विजै होई । श्रुतशर्मा गी बंदी बनाया गेआ । देवतें
 शिवें दा स्तोत्तर पाठ कीता । उदे थमां परसन्न होइयै शिव देवतें

गी आखन लगे जे सूर्यप्रभ कन्ने जेड़ी असैं प्रतीज्ञा कीती ही उसी छोड़ियै तुस मेरे कोला कोई होर वर मंगो । देवता बोले— भगवन् जेड़ी तुसैं प्रतिज्ञा कीती ऐ उसी कुन भूठा करी सकदा ऐ । पर जेड़ी असैं श्रुतशर्मा कन्ने प्रतिज्ञा कीती दी ऐ ओ वी भूठी नेई होनी लोड़चदी । शिव बोले—तुन्दे दौनें धड़ें दी सुलाह्, होनी जरूरी ऐ । अपने साथिएं समेत श्रुतशर्मा सूर्यप्रभ गी परनाम करै । शिवें दी आज्ञा सुनियै श्रुतशर्मा ने सूर्यप्रभ गी परनाम कीती । दोए इक दूए दे गलें मिले ते मित्तर वनी गे । देवतें ते असुरें दी सुलाह्, होई गेई । आपू-चें दा बैर खतम होआ । सवनें सामने भगवान् शकर सूर्यप्रभ गी आखन लगे—पुत्तरा ! विद्याधर देस दे अद्दे दक्खनी हिस्से च (दक्षिणार्ध) तेरा राज होग ते उत्तरी हिस्सें च श्रुतशर्मा दा । थोड़े काल च गै तेरा राज किन्नर वगैरा आकाश च विहार करने आले जीवें पर वी आई जाग । उदे प्रापत होने पर तू ए करेआं जे दक्षिण वेदि दा अद्दा भाग कुंजरकुमार गी देई देआं । ए आखियै शिवशंकर अंतर्हित होई गे । उंदे वर कन्ने दोनें पासें दे सारे जोद्धा ते वाकी जीव जेड़े इस जुद्ध च मारे गे हे जी उट्ठे ।

देवतें ते असुरें मिलियै इक विराट सभा कीती । इदे च सत्ते पतालें दे स्वामी प्रह्लाद आदि दैत दानव आए । इंद्र, देवगुरु बृहस्पति, दैत्य-दानव माताएं दिति ते दनु सूर्यप्रभ दियां पतनियां भूतासन विमान द्वारा आइयां । इस सभा च सिद्धि नां दी स्हेली आखन लगी—सभासदो ! अज्जै दी प्रीति सभा च जेड़ी खुशी तुस दिक्खै करदे ओनेही खुशी दा अनुभव पैह्लें तुसैं कदें नेई कीती होग । इसलेई दानवमाता दनु आखदियां न जे देवतें ते असुरें च अग्गें वी नेआ गै मित्रतापूर्ण वरतावा रौह्ना लोड़चदा ऐ । इदे च गै साढ़ी खुशी ऐ ते इदे च गै संसार दा कल्याण ऐ । दनु दे वचन सुनियै देवगुरु बृहस्पति आखन लगे— जे इदे च देवतें दा दोश नेई । असुरें दी भावना जद्द - जद्द मलीन होई जंदी ऐ तां देवतें गी उदा उपा करना पौंदा ऐ । बृहस्पति दी

गल्ल सुनियै मयासुर बोलेआ जे असुरजाति दे मन मलीन हुं दे तां
 नमुचि इंद्र गी उच्चैःश्रवा दिव्व घोड़ा दान की दिदा । प्रवल
 अपने शरीर दा दान की दिदा, बलि विष्णु गी त्रिलोकी दा दान
 देइयै बन्धन च की पाँदा, अयोदेह विश्वकर्मा गो अपना शरीर की
 दान करदा । संखेप च मेरे आखने दा मतलव ए ऐ जे सदा देवतें
 साढ़े कन्ने छल-फरेव करियै असेंगी नुकसान पुजाने ते नाश करने दी
 कोशश कीती । जे ए गल्ल नेई हुं दी तां असुरें दी मनोवृत्ति कदे
 मलीन नेई हुन्दी । उसै बेल्लै भवानी दुर्गा दी भेजी दी जया नां दी
 प्रतीहारी उत्थें आई । सबनें उदा जथायोग सतकार कोता । ओ
 सुमेरु विद्याधर गी आखन लगी—जे दुर्गा भवानी ने मिगी तुं दे
 कोल भेजेआ ऐ । ओ आखदियां न जे तुस अपनी पुत्तरी
 कामचूड़ामणि दा ब्याह्, युवराज सूर्यप्रभ कन्ने करी ओढ़ो । सुमेरु
 बोलेआ— भवानी दी आज्ञा पालने जोग ऐ । मेरे लेई इयै
 आज्ञा शिवशम्भु आस्सेआ बी ऐ । फी जया सूर्यप्रभ गी आखन
 लगी—भवानी दी आज्ञा ऐ जे तुसें कामचूड़ामणि गी वाकी सारिएं
 कोला उप्पर जानना । भवानी ते शिवें दी आज्ञा गी शिरोधार्य
 समझियै सुमेरु ने अपनी पुत्तरी कामचूड़ामणि सूर्यप्रभ गी ब्याही
 दित्ती । इस ब्याह् पर भवानी दी दूती जया ने नमीं लाड़ी गी
 दिव्वमाला दित्ती । सुमेरु ने अपनी पुत्तरी गी दाजै च अनमोल
 रतन ते धनराशि दित्ती । जया ने ऐरावत थमां उत्पन्न दिव्व हाथी
 दित्ता ते रतनावली ते एकावली दिव्व मालां दित्तियां जिंदे पाने
 करी भुक्ख, त्रेह, मौत कष्ट नेई दिदियां ते जोआनी सदा इक
 जनेही बनी राँह् दी ऐ । ब्याह् दे बाद सुमेरु ने सबनें गी प्रीति-
 भोजन दित्ता जिंदे च परोसे दे पदार्थ खाने करी सबनें खाने आलें
 दी सदा लेई तृप्ति होई गेई । फी उत्थें विनायक, महाकाल, वीरभद्र
 ते होर मते शिवगण आए । उनें आइयै कट्ठे होए दे लोकें गी
 भांत - भांत दे इच्छा - भोजन खलाए । गंधर्वें ते अपसराएं दा संगीत
 ते नाच बी होआ । भोजन परंत नंदीश्वर शिवगणै ने सकनें गी
 दिव्व मालां, वस्त्र - भूषण दित्ते । इदे बाद सारे लोक अपने - अपने

धरें गी चली गे । नमीं लाड़ी ते मित्तर - दोस्तें कन्ने सूर्यप्रभ
 विमानं पर चढ़ियै सुमेरु दे तपोवन गोआ । ओ रात उसने नमीं
 लाड़ी कामचूड़ामणि दे मैह्लें च बताई । सवेरै विद्याधर सुमेरु
 ने आइयै युवराज गी सनेहा दित्ता जे त्रिकूटाचल दे सारे विद्याधरें
 मिगी तुं दे कोल ए सनेहा देइयै भेजेआ ऐ जे अज्जै थमां त्रिऐ दिन
 ऋषम परवतै पर तुं दा राजतिलक होग । सूर्यप्रभ ने दूतें द्वारा अपने
 मित्तरें, देवतें, मुनियें, राजें, विद्याधरें ते असुरें गी राजतिलक दै
 दिन ऋषम परवतै पर औने लेई वक्ख - वक्ख निमंत्रण-पत्तर भेजे ।
 शिवशंकर ते पार्वती दे निमंत्रण लेई आपू' कलास परवतै पर
 गोआ । जिसेल्लै ओ कलास परवतै दो अदी चढ़ाई चढ़ी बैठा तां
 उसने उत्थें इक विदुम मणि दा वने दा दरवाजा दिक्खेआ । जदू'
 उसी इदे अंदर जाने दा मार्ग नेई मिलेआ तां उसने एकाग्र मन
 कन्ने शिवें दा ध्यान कीता । उस बैल्लै दरवाजा खुल्लेआ ते गजमुख
 नां दे शिवगण ने बाहर आइयै इसी आक्खेआ—आओ चलो अंदर
 शिवशम्भु तुं दे पर वड़े परसन्न न । सूर्यप्रभ ने अन्दर परवेश करियै
 पैह्लें गजानन गी दिक्खेआ ते उसी परनाम कीती । विनायक ने
 औने दा कारण पुच्छेआ ते उसी उप्पर जाने दा रस्ता दस्सेआ ।
 उप्पर जाइयै सूर्यप्रभ ने पद्मराग मणि दा वने दा इक होर दरवाजा
 दिक्खेआ । इदे अंदर जाने लेई फी उसने शिवें दी स्तुति कीती ।
 स्वामी कार्तिकेय दे पुत्तर विशाख बाहूर आइयै सूर्यप्रभ गी अंदर
 लेई गे । अंदर प्रवेश करियै युवराज ने स्वामी कार्तिकेय दे दर्शन
 कीते । उनें बी औने दा कारण पुच्छियै अगला रस्ता दस्सेआ ।
 इस चाल्ली सूर्यप्रभ पंजें रतन - द्वारें गी लंघियै कलास दे शिखर पर
 वलौर दे दरवाजे पर पुज्जा । इदे अंदर प्रवेश पाइयै ते शिव-
 शम्भु दे दर्शन करियै सूर्यप्रभ ने अपने जनम गी धन्न ते पुन्न
 समभेआ । ए थां सुगें थमां उत्तम हा । दिव्व वाशना आली बाहू,
 वगै करदी ही । गंधर्व ते अपसराएं दा दिव्व संगीत चलै करदा
 हा । उत्थें वलौर आंगर श्वेत शरीर मूलपाणि त्रिलोचन वलौरा
 दे श्वेत संघासनै पर विराजमान हे । उंदै कोल उंदी अर्धांगिणी
 गौरजां विराजै करदियां हियां । सूर्यप्रभ शिव - पार्वती दे पैरें

पर डिङ्गी पेआ । शिवें उसी चरणें परा चुक्कियै औने दा कारण पुच्छेआ । सूर्यप्रभ नै अपना निमंत्रण-पत्तर दित्ता । शिव-शंकर आखन लगे—पुत्तरा ! इन्ना कष्ट करने दी केहू लोड़ ही । अस ते तेरे सिमरन मात्र कन्ने उत्थें आई सकदे हे । अस तेरे राजतिलक पर जरूर औगे । ए आखियै शिवशम्भु नै अपने गण गी हुकम दित्ता जे सूर्यप्रभ गी ऋषम परवतै पर पुजाई दे । चक्रवर्तिण दे राजतिलक दा थार ऋषम परवत गै ऐ । भगवान दी आज्ञा मतावक शिवगण ने छिनभरै च सूर्यप्रभ गी ऋषम परवतै पर पुजाई दित्ता । परवतै पर सूर्यप्रभ दे मित्तर, कामचूड़ामणि ते बाकी पतनियां, विद्याधरपति, देवराज इंद्र, देवता, असुर वगैरा सारे अगें गै कुमार गी बलगै करदे हे । सूर्यप्रभ नै शिवशंकर दे निमंत्रण दी घटना सारें गी सुनाई, जिसी सुनियै सब परसन्न होए ।

हून सूर्यप्रभ दे राजतिलक दियां त्यारियां बड़ी धूम-धाम कन्ने शुरू होई गेइयां । प्रभा वगैरा कुमार दे मित्तरें ते साथिएं भांत-भांत दी जड़ी बूटिएं आला नद नदी समुदरें दा तीर्थजल अपने हत्थें सुन्ने दे कलशें च कट्ठा कीता । गौरी शंकर वी अपने गणें समेत उत्थें आए । सवनें उट्ठियै उदें अगें मत्थे नोआए । देव दानव विद्याधरें दे जैकारै दै विच्च सूर्यप्रभ गी विद्याधर चक्रवर्ती दे संघासनै पर बठाया गेआ ते तीर्थजल कन्ने उदा अभिशेक कीता गेआ । मयासुर नै उदे सिरै पर पट्ट बन्नेआ ते मुकट रक्खेआ । मंगलाचरण ते मंगलगायन दी धुना कन्ने सारा परवत गूंजी उट्ठेआ । नमीं व्याही दी कामचूड़ामणि वी महादेवी दे रूप च सूर्यप्रभ कन्दे संघासनै पर बैठी । उदा वी तीर्थजलें कन्ने अभिशेक होआ । शिवें दी आज्ञा दा पालन करियै सूर्यप्रभ ने विद्याधर लोक दा अर्द्धा उत्तरी भाग (उत्तरवेदि) श्रुतशर्मा गी देई दित्ता ।

ए कथा सुनाइयै विद्याधर-पति वज्रप्रभ नरवाहनदत्त गी आखन लगा—युवराज जी ! इस चाल्ली मनुक्ख होने पर वी सूर्यप्रभ नै शिवशंकर दी कृपा कन्ने विद्याधर चक्रवर्ती दी पदवी प्राप्त कीती । परंत नरवाहनदत्त गी परनाम करियै वज्रप्रभ गास्सै च समाइयै अबखीं थमां ओहू लै होई गेआ ।

अलंकारवती (नौमां) लम्बक

पह्ला तरंग

इक वारी नरवाहनदत्त सेना समेत शकार खेडन गेआ ।
जंगलै च उसनै इक हरणै पिच्छें घोड़ा दुड़ाआ । उदे कन्ने
गोमुख वी हा । घोड़ें पर सोआर दोए दूर निकली गे । सेना
पिच्छें रेही गेई । उस सुन्नसान जंगलै च कुमार नरवाहनदत्त
नै वीणा दी धुन सुनी । दोए उस पासे गी चले जिह्वा वीणा
दी भंकार आवै करदी ही । किश दूर गै गे होडन तां उनेंगी
इक शिव मंदर लब्बा । घोड़ें गी बाहुर वन्नियै दोनैं मंदरै च
परवेश कीता । अंदर जाइयै दिखदे न जे इक दिब्व कन्या
वीणा बजा करदी ऐ । ते उदै चक्खी होर मतियां रूपवती
कन्यां खड़ोती दियां न । दिब्व कन्या नै कुमार पासै तिरशी
नजरा कन्ने दिखेआ । ते उदे रूपै पर लुभाई गेई । नरवाहन-
दत्त दा हिंदै वी अपने बसै च नेई रेआ । कुमार दे चित्त-
विकार गी जानियै गोमुख नै कुमारी दी स्हेलिएं कछा उदा
परिचै जानना चाहेआ । उससै बेल्लै उस कुमारी दी शकला
दी इक दूई कुमारी ते उदे कन्ने इक विद्याधरी गासै परा
उतरियां । दूई कुमारी वीणा बजाने आली पैह्ली कुमारी कोल

आइयै बेही गेई । पैह्लो कुमारी नै उटिठ्यै विद्याधरी दे पैर छूते । विद्याधरी नै उसी शीर्वाद दिक्ती जे तूं विद्याधर-चक्रवर्ती गी पतिरूप कन्ने प्राप्त कर । उस बेल्लै नरवाहनदत्त विद्याधरी गी परनाम करियै पुच्छन लगा—माता ! ए कुमारी तुंदी केहू लगदी ऐ । विद्याधरी नै जवाब दिक्ता—सुनो अऊं तुसेंगी दस्सनियां—

गौरी गुरु परवतै पर श्री सुंदरपुर नां दे नगरै च अलंकार शील विद्याधर राज करदा ऐ । उदी रानी दा नां कांचन-प्रभा ऐ । इस रानी नै इक पुत्तर गी जनम दिक्ता । पिता नै उदा नां धर्मशील रक्खेआ । जिसेल्लै पुत्तर जोआन होआ तां राजा नै उसी अपना युवराज बनाई दिक्ता । युवराज बनियै धर्मशील नै पिता कोला वी वधियै प्रजा दा भला कीता । दूई वार रानी कांचनप्रभा नै इक कन्या गी जनम दिक्ता । इस कन्या दे जनम पर दिव्व वाणी होई जे ए कन्या बड्डी होइयै नरवाहनदत्त दी पतनी होग । पिता नै इस कन्या दा नां अलंकारवती रक्खेआ । जिसेल्लै ए कुडी अपने पिता कोला विद्या पढ़िये जोआन होई तां इदे हिर्दे च शिवशंकर दी भगती जागी । ए शिवमंदरें च जाइयै शिवें दी राधना करन लगो । इससै बेल्लै युवराज धर्मशील अपने पिता गी आखन लगा—पिता जी ! मिगी संसार दे भोग चंगे नेईं लगदे । संसार दे भोग नाशवान न । अऊं चाह्नां जे वनै च जाइयै तपस्या करां । में तुंदे कोला आज्ञा मंगनां । पुत्तरै दी गल्ल—सुनियै राजा दी अक्खियें च अत्थरू आई गे । आखन लगा पुत्तरा—इस जोआनी दी वरेसा च तूं कनेई गल्ल करै करनां । तेरा खाने - पीने दा ते भोग विलासै दा वक्त ऐ । घिस्त - आश्रम दे बाद वानप्रस्थ औंदा ऐ । अजें तूं घिस्त - आश्रमै च वी परवेश नेईं कीता । तूं कनेई अनहोनी गल्ल करै करनां । पुत्तरै नै जवाब दिक्ता—पिता जी ! नां मिगी राज चाहीदा, नां इस्त्री नां गै भोग । अऊं ते शिवें दी राधना लेई जाना चाह्नां । पिता अपने अत्थरू पूजियै आखन लगा—पुत्तरा ।

जे तूँ इस उठदो जोआनी च राजपाट छोड़ी - छाड़ियै तपस्या लेई जाकरनां एँ तां मेरा भुगतभोग बूड्डे दा मौह्लें च रौह्ले दा के कम्म ऐ, अम्मी वनै दा आसरा लैन्नां । ए आखियै राजा अलंकारशील नै मर्तलोक जाइयै अपना सारा खजाना दीन-दुखिएँ ते अनाथें गी दान करी दित्ता । दान देइयै ओ अपने नगगरै गी परतोआ । आइयै अपनी रानी कांचनप्रभा गो आखन लगा—रानी जी अऊं वनै गी चलेआं । मेरे पिच्छूँ तुसैं अलंकारवती इस कन्या दी रक्षा करनी । इस वरै दे अखीर इदे ब्याह् दा लगन ऐ । उस समै अऊं आइयै इसी नरवाहनदत्त गी ब्याही देइ । तदूँ थमां लेइयै मेरा जोआई इस नगरी दी रक्षा करग । ए आखियै राजा वनै गी चली पेआ । रोंदो-करलांदी पुत्तरी अलंकारवती गी उसनै घरै गी परताई ओड़ेआ । पति दी आज्ञा दा पालन करदी रानी कांचनप्रभा पुत्तरी अलंकारवती दी रक्षा करन लगी । इक वारी प्रज्ञाप्ति नां दी संन्यासिनी दे आखने पर अलंकारवती नै कश्मीर दे सारे तीर्थें दी जात्रा कीती । इसी समाप्त करियै ओ घर उठी आई ।

ए कथा सुनाइयै प्रौढ़ा विद्याधरी नरवाहनदत्त गी आखन लगी—कुमार जी ए कुमारी अलंकारवती ऐ ते अऊं इदी माता कांचनप्रभा आं । अज्ज ए मिगी वगैर आखे गै पूजा लेई इत्थें आई गई ही । प्रज्ञाप्ति संन्यासिनी कोला मिगी पता लगा जे ए शिव - पूजा लेई इत्थें आई दी ऐ । उदे कोला गै मिगी ए वी पता लगा जे तुस वी इत्थें आए दे ओ । इसलेई अम्मो इत्थें आई गई आं । हून तुस मेरी पुत्तरी गी ब्याहियै मेरा भार हौला करने च मेरा हत्थ बटाओ । भ्यागा सवेरै इदे ब्याह् दा लगन ऐ अज्ज तुस कौशाम्बी चली जाओ । अस वी अपने नगगरै गी चलियां । भ्यागा सवेरै अलंकारवती दा पिता तपोवनै कोला आइयै इसी तुसेंगी ब्याही देग । ए सुनियै अलंकारवती ते नरवाहनदत्त अधीर होई गे । चकवा - चकवी आला लेखा इक दूए दे बजोगै च इक रात कड्डना वी उंदे लेई मुशकल होई गई । कांचनप्रभा उनेंगी आखन लगी—तुस धीरज धरो, भला तुसैं

राम - सीता दी कहानी नेईं सुनी । इनें दोनों इक दूए दे वजोगै
च किन्ने व'रे बताए हे । कांचनप्रभा अलंकारवती गी अपने कन्ने
लेईं गेई ते नरवाहनदत्त कौशांबी परतोई आया । रातीं पलंगै
पर लेटे दा ओ विचार दे समुंदरै च लगा गोते खान । उदे
मनोरंजन लेईं गोमुख नै उसी इक कथा सुनाई—

दखनापथै च प्रतिष्ठान नां दा इक बड़ा समरिद्ध नगगर हा ।
उत्थें रूपशील सम्पन्न पृथ्वीरूप नां दा राजा राज करदा हा ।
उदे कोल रमते राम दो संन्यासी आईं गे । राजा दे रूप गी
दिविखयै ओ आखन लगे—म्हाराज ! अस सारे संसार च फिरे आं
पर असैं तुंदे जनेआ सुंदर कोई होर मनुक्ख नेईं दिक्खेआ ।
पर मुक्तिपुर टापू दे राजा रूपधर दी पुत्तारी कुमारी
रूपलता शलैप्पे च तुंदे वरोवर ऐ । जे तुंदा दोनों
दा व्याह् होई जा तां इदे कोला वधियै होर के मेल
होई सकदा ऐ । उंदी गल्ल सुनियै राजा कामदेव दे वाणें कन्ने
छाननी होए दे कलेजे समान व्याकुल होई गेआ । उसनै अपने
चित्रकार कुमारिदत्त गी सद्दियै आखेआ जे तूं मेरा चित्र लेइयै इनें
संन्यासिएं कन्ने मुक्तिपुर जा । उत्थें जाइयै कुसै जुगती कन्ने मेरा
चित्र राजा रूपधर दी पुत्तारी रूपलता दे हत्थें तक पुजाई ओड़ ।
राजपुत्तारी तक चित्तर पुजाने दे वाद गुप्तरूप कन्ने पता लैना जे
इदा उदे मनै पर के असर पेआ । ए वी मलूम करना जे राजा
अपनी पुत्तारी मिगी व्याही देने गी राजी ऐ जां नेईं । औंदी वारी
राजपुत्तारी रूपलता दा चित्र बनाइयै साढ़े कोल लेई औना ।
ए आक्खियै राजा नै चित्रपट पर वने दे अपने चित्र गी चित्र-
कार दै हत्थ पगड़ाया ते उसी मुक्तिपुर गी खाना कीता ।
चित्रकार दे कन्ने दोए संन्यासी वी गे । चलदे - चलदे ओ
त्रैवे समुंदरै दे कंठै वस्से दे पदमपुर नगरै च पुज्जे । उत्थूं
दा जहाजै पर सौआर होइयै पंत्रमें दिन मुक्तिपुर टापू पर जाई
उतरे । चित्रकार नै जाइयै राजमैहलै दे दरवाजे पर इशतेहार
लाया जे मेरे समान कोई दूआ चित्रकार नेईं ऐ । राजा गी

जिसेल्लै पता लगा तां उसने चित्रकार गी अंदर सदाया ।
चित्रकार राजा गी आखन लगा—म्हाराज ! अऊं सारी पृथ्वी
पर फिरेआं पर मिगी अपने जनेआ कोई चित्रकार नेईं मिलेआ ।
परखा लेई देवता 'असुर' मनुष्य वगैरा जिदा चित्र सरकार
आखन अऊं बनाने गी तयार आं । ए सुनियै राजा नै अपनी
पुतारी रूपलता गी सहेआ ते चित्रकार गी आवखेआ जे इदा
चित्र तयार करियै दस्स । कुमारिदत्ता नै ततकाल रूपलता दी हूवहू
तसवीर तयार करियै राजा दे सामनै पेश कीती । राजा चित्र
दिक्खियै बड़ा परसन्न होआ । राजा उसी पुच्छन लगा—चित्र-
कार जी ! तुस भला दस्सो हां, तुसें कुतै मेरी पुतारी रूपवती
दे समान सुंदर कोई कुमार जां कुमारी दिक्खी ऐ । चित्रकार
नै उत्तर दित्ता—म्हाराज ! तुंदी पुतारी रूपवती दे समान
रूपवान प्रतिष्ठान दा राजा इक पृथ्वीरूप गै ऐ । उयै इस
राजकुमारी दे मेल दा वर वी ऐ । ओ अजें तक कुआरा ऐ
कीजे उसी अज्ज तक अपने मेल दी कोई राजकुमारी नेईं
मिली । उसी परम रूपवान जानियै में उदा चित्र तुआरी लेआ
हा जेड़ा तुस आखो तां अऊं तुसेंगी दस्सनां । राजा दे आखने
पर कुमारिदत्ता चित्रकार नै ओ तसवीर राजा गी दस्सी ।
राजा रूपधर पृथ्वीरूप राजा दे रूप गी दिक्खियै हरान होई
गेआ । आखन लगा—अस धन्न आं जिनें इस राजा गी चित्र
च दिक्खेआ ऐ पर ओ साढ़े कोला मते धन्न न जेड़े इस
राजा गी साक्षात अपनी अक्खें कन्ने दिखदे न । अस उनेंगी
नमस्कार करने आं । राजा दे इस वचन गी सुनियै ते राजा
पृथ्वीरूप के चित्तर गी दिक्खियै राजकुमारी रूपलता दे मनै च
उदी मूरत समाई गई । हून उसी होर कोई गल्ल चंगी नेईं
लगै । राजा रूपधर गी जिसेल्लै पता लगा जे उदी
पुत्री राजा पृथ्वीरूप गी चाहंदी ऐ तां ओ कुमारिदत्ता चित्र-
कार गी आखन लगा जे तुस गै जाइयै मेरी पुत्री दा चित्र
अपने राजा गी दस्सो । जे उनेंगी मेरी पुत्री पसंद ऐ तां ओ

उसी ब्याहने लेई तुरत इत्थें आई जान । राजा दा वचन
 सुनियै चित्रकार ते दोए संन्यासी उत्थूं दा चली पे । समुंदर
 पार करियै ओ प्रतिष्ठान पुज्जे । चित्रकार नै राजा गी अपनी
 जात्रा दा सारा हाल सुनाआ ते राजकुमारी रूपलता दा चित्र
 वी दस्सेआ । चित्रै च राजा दी नजर नेई खुब्वी जे ओ अपने
 आप दी सुधबुध भूल्ली गोआ राजा चित्रकार गी आखन लगा—
 धन्न ऐ विधाता जिन्न ए रूप घड़ेआ ते धन्न ऐ तूं जिन्न ए रूप
 अपनी कलमां कन्ने चित्रै च आइयै बन्नी दित्ता ऐ । अऊं
 राजा रूपधर दे वचन गी स्वीकार करनां । राजकुमारी गी
 ब्याहने लेई तौलै गै मुक्तिपुर द्वीप गी जन्नां । परंत शुभ
 मूरत दिक्खियै राजा नै मुक्तिपुर गी जात्रा शुरू करी दित्ती ।
 उदे कन्ने उदे मित्र, सामंत रजवाड़े, मंत्री ते सेना समेत
 सेनापति वी गे । राजा मंगलघट नां दे गजराज पर सोआर हा ।
 चलदे - जलदे राजा दी सोआरी संत्रा विध्याटवी च पुज्जी ।
 राजा ने रात उत्थें गै गजारी । दूए दिन सवेरै शत्रु-
 मर्दन गजराज पर चढ़ियै उसनै विध्याटवी च प्रवेश कीता ।
 जिसेल्लै राजा दी सोआरी वड़े ठाठवाठ कन्ने विध्याटवी दे
 जंगलै च जा करदी ही तां राजा नै दिक्खेआ जे उदो अगली
 सेना च चानचक खौदल मची गोआ ऐ ते ओ पिच्छें गी मुड़ै
 करदी ऐ । राजा गी वड़ा चरज वजोआ । उससै बल्लै इक
 राजपुत्र हाथी पर सोआर राजा गी आखन लगा—म्हाराज ! अन-
 गिनत भीलें दी फौज अगूं दा आवै करदी ऐ । इसनै साढ़े
 ५० हाथी, ३०० घोड़े ते १००० पैदल सपाई मारी ओड़े न
 साढ़ी सेना नै दो जहार भील मारी मुकाए न । साढ़ी सेना च
 इक कबंध ते भीलें दी सेना च दो कबंध नच्चै करदे न । ए
 दिक्खियै साढ़े शपाही पिच्छें गी हटै करदे न । ए खबर
 मिलदे गै राजा नै भीलें दी फौजा पर हमला बोली दित्ता ।
 उसनै भील सेनापति गी पगड़ियै उदा सिर कलम करी दित्ता ।
 भीलें दी सारी सेना नट्ठी पेई । अपनी थक्की दी सेना गी वसां

देने लेई राजा नै ओ दिन सरोवरै दे कंढे बताया । सबेरै
 फी जात्रा शुरू होई । संज्रा बेल्लै राजा समुंदरै दे कंढे पर
 वसे दे पदमपुर पुज्जा । इक दिन उसनै उत्थूं दे राजा कोल
 वसां कीता । दूए दिन ज्हाजें पर सोआर होइयै राजा ते उदी
 सारी सेना जलजात्रा करन लगी पे । अट्ठें दिनें दी जलजात्रा
 दे परंत राजा दी सोआरी मुक्तिपुर पुज्जी । राजा रूपधर नै
 शैहरै दे बाहर आइयै आपूं सारें दा स्वागत कीता ।
 दोए राजा बड़े प्रेम कन्ने मिले । राजा रूपधर नै जनिहारें
 दा ते उदै कन्ने आई दी फौज दे रौहू ने ते खाने - पीने दा राजकी
 परबंध कीता । राजा रूपधर अपने भावी जोआई पृथ्वीरूप गी
 कन्ने करियै शैहरै च दाखल होआ । नगरै दे नरनारी वर
 दी अपूर्व रूप छटा गी दिक्खियै चकित होई गे । राजा रूपधर
 ते उदी रानी हेमलता राजकुमारी लेई जोग वर पाइयै खुशी
 कन्ने फुल्ले दे नेईं समांदे हे । दूए दिन शुभ लगनै च राजा
 रूपधर नै वेदी गड्डियै विधि अनुसार राजकुमार गी अपनी
 पुत्तरी रूपलता दा पाणिग्रहण कराया । वर - वधु इक दूए गी
 दिक्खियै अपने - अपने भागें गी सराहन लगे । राजा पृथ्वीरूप
 दस दिन सौहरै रेइयै जारमें रोज शुभ म्हरत दिक्खियै रूप-
 लता समेत अपनी राजधानी प्रतिष्ठान गी परतोई पेआ ।
 अपनी पुत्तरी ते जोआई गी ज्हाजै पर चढ़ाने लेई राजा रूप-
 धर समुंदरै दे कंढे तक आया । समुंदर पार करियै राजा
 पृथ्वीरूप रानी समेत पत्रपुर पुज्जा । त्रै दिन पत्रपुर दे राजा
 दा आतिथ्य - सतकार स्वीकार करियै हाथी पर सोआर होइयै
 किश दिनें दी जात्रा परंत राजा अपनी राजधानी प्रतिष्ठान
 आई पुज्जा । इत्थें आइयै राजा नै चित्रकार कुमारिदत्त ते दोनों
 संन्यासिएं गी मता नाम - कनाम ते केईं ग्रां दान दित्ते ।

ए कथा सुनाइयै गोमुख नरवाहनदत्त गी आखन लगा—
 कुमार जी ! हाँसले आले धीर मनुक्ख इआं वजोग गी स्हारदे न ।
 तुस ते वजोगै दी इक रात बी नेईं कट्टी सकदे । नरवाहनदत्त

ने ओ विरह् दी रात वड़ी मुशकलें कट्टी । सवेरै स्नान संध्या
 वगैरा नितकर्म थमां फारग होइयै नरवाहनदत्त जिसेल्लै बैठा तां
 रानी कांचनप्रभा गी गासा दा उतरदे दिक्खेआ । उदे कन्ने उदा
 पति अलंकारशील, पुत्तर धर्मशील ते पुत्तरी अलंकारवती बी हे ।
 गासा थमां उतरियै सारे युवराज नरवाहनदत्त कच्छ आए ।
 युवराज ने उन्दा आदर - सतकार कीता । परंत अनगिनत विद्याधर
 जिनें सुन्ने ते रतनें दे भार चुक्के दे हे अम्बरै परा उतरे । उं दे
 औने दी खवर सुनियै वत्सराज रानिएं ते मंत्रिएं समेत उत्थें आई
 पुज्जा । वत्सराज ने अपने विद्याधर सरबंधिएं दा वड़ा आदर-
 सतकार कीता । राजा अलंकारशील वड़े प्रेम कन्ने वत्सराज गी
 आखन लगा—म्हाराज ! मेरी पुत्तरी अलंकारवती ऐ । इदे जनम
 पर आकाशवाणी होई ही जे इदा व्याह् भावी विद्याधर चक्रवर्ती
 नरवाहनदत्त कन्ने होग । इसलेई अज्ज शुभ म्हरतै च अऊं इसी
 तुं दे पुत्तरै कन्ने व्याह् ने लेई आयां । वत्सराज बोले—अऊं
 किन्नां क तुं दा धन्नवाद करां । तुसैं मेरे पर वड़ी क्किर्पा कीती ऐ ।
 राजा अलंकारशील ने उससै रोज दिव्व रतनें कन्ने सज्जी दी सुन्ने
 दी वेदी च शास्तर-विधि अनसार अपनी पुत्तरी अलंकारवती दा
 पाणिग्रहण कुमार नरवाहनदत्त गी कराया । दाजै च विद्याधरपाति
 ने अनंत धनराशि ते दिव्व नारियां बी दित्तियां । व्याह् समापत
 होने पर वत्सराज ते दूए सरबंधिएं कोला विदा मंगियै राजा
 अलंकारशील अपनी रानी कांचनप्रभा ते पुत्तर धर्मशील समेत
 विद्याधर-लोक गी चली गेआ ।

दूम्रा तरंग

इक वारी नरवाहनदत्त दी सस्स कांचनप्रभा गासै रस्तै
 कौशाम्बी दे राज - मैह्लें च उतरी । वत्सराज ते नरवाहनदत्त ने
 उदी वड़ी आओ - भगत कीती । उसने कुमार गी आक्खेआ जे
 तुस किश समै लेई साढ़े विद्याधर-लोक च सुंदरनगर आओ कन्ने
 अलंकारवती गी लेई आओ । उत्थें आइयै वनें उप-वनें दे सैल करो
 ते मन परचाओ । सस्सू दा निमंत्रण सुनियै कुमार दे पिता वत्सराज

दी आज्ञा अनसार अलंकारवती समेत विमान पर सोआर होइयै
 सुंदरपुर गेआ । उदे कन्ने वसंतक ते मंत्री वी गे । विमान सुंदरपुर
 जाई उतरेआ । कुमार ने विमानै परा उतरियै साथिणं समेत
 नगरै च परवेश कीता । ओ दिन कुमार ने अपने सौहूरै बताया । उत्थें
 सुगें समान सुखै दा नद लेआ । लम्मी जातरा दा थकमां ढाने लेई
 शैल वसां लेआ । दूए दिन कुमार दी सस्स कांचनप्रभा उसी आखन
 लगी—कुमार जी ! इस नगरै च इक विशाल शिव - मंदर ऐ ।
 इत्थें देव दर्शन ते पूजन करने करी संसार दे सारे भोग ते सुख
 मिलदे न । अलंकारवती दे पिता नै इत्थें इक दिव्व बाग ते विशाल
 गंगासर नां दा सरोवर वी बनवाये दा ऐ । अज्ज तुस उत्थें शनान
 ते शिवपूजन करी लौ । सस्स दी गल्ल सुनियै नरवाहनदत्त
 अलंकारवती ते साथिणं समेत शनान ते पूजा लेई शिव मंदर ते
 गंगासर सरोवरै गी गेआ । उत्थें जाइयै उसने साथिणं समेत
 गंगासरै च शनान करियै शिव - पूजन कीता । फी युवरानी
 अलंकारवती कन्ने वागै दा सैल कीता । नेह् भोग विलासैं दा नंद
 लैंदे युवराज नरवाहनदत्त ने विद्याधर नगरी सुंदरपुर अपने सौहूरै
 इक म्हीना गुजारी ओड़ेआ । परन्त कई सौहूरै दियां सगातां लेइयै
 कौशम्बी गी परतोआ । उदे कन्ने अलंकारवती कांचनप्रभा ते मंत्री
 वी आई गे । अलंकारवती दी माता कांचनप्रभा ने वत्सराज ते
 रानी वासवदत्ता दे सामने अपनी धी गी पतिभगती ते वड्डें-वड्डेरे
 दा आदर - मान करने दी सिक्ख - मत्त दिती । इदे वाद उसने
 अलंकारवती गी गलें लाइयै प्यार कीता ते अपने कुड़म कुड़मनी-कोला
 विदा मंगी । विदा मंगियै ओ अपने विमानै पर बेइय सुंदरपुर गी
 उठी आई ।

दूए रोज सवेरै जिसेल्लै युवरानी अलंकारवती कुमार
 नरवाहनदत्त कच्छ बैठी दी ही तां इक जनानी डरियै उदे सामने
 आइयै रोई ते आखन लगी—दुहाई रानी जी मिगी वचाओ । इक
 ब्राह्मण मिगी जानी थमां मारना चांह्दा ऐ । अऊं जान वचाने
 लेई दौड़ियै तुंदे मैह्लें च आई वड़ी आं । युवरानी वोल्ली—डर
 नेई तूं खुल्लियै अपनी कहानी मिगी सुना । ए ब्राह्मण कुन ऐ

ते की तेरे पिच्छें पेदा ऐ ? जनानी ने जवाब दित्ता — रानी जी !
 अऊं वल सेन नां दे खत्तरी दी धी आं । इस्सै नगरे दी रौह् ने आली
 आं । मेरा नां अशोकमाला ऐ । जदू अऊं अजें कन्या गै ही तां
 मेरे रूप गी दिक्खियै इस ब्राह्मण ने, जिदा नां हठशर्मा ऐ, मेरे
 पिता कोला मिगी ब्याह् लेई मंगेआ । जिसेल्लै मिगी पता लग्गा
 तां में अपने पिता गी आखेआ जे पिता जी ! अऊं नेह् करूप ते
 डरौनी शकला आले मनुक्खै कन्ने ब्याह् नेईं करड । जे तुसें मिगी
 इसी ब्याही दित्ता तां अऊं इदे घर नेईं वस्सड । मेरे नां करने
 पर मेरे पिता ने ब्राह्मणै गी ना करी ओड़ी । ए सुनियै ब्राह्मण
 अन्न-जल छोड़ियै साढ़े घर आत्महत्या करने गी बेई गेआ । उसी
 आत्म-हत्या करदे दिक्खियै मेरे पिता ने मेरा ब्याह् उस ब्राह्मण
 कन्ने वरी ओड़ेआ । ओ ब्राह्मण मिगी ब्याइयै अपने घर लेई गेआ,
 भामें अऊं उत्थें जाना नेईं चाह्दी ही । इक दिन मौका पाइयै अऊं
 ब्राह्मणै दे घरा दा नट्ठियै इक खत्तरी दे घर चली गई । हठशर्मा
 ब्राह्मणै ने अपने धनै दे हंकार कन्ने उस खत्तरी पर बड़ा रोव पाया ।
 दूए दिन अऊं उदे घरा दा निकलियै दूए खत्री दे घर चली गई ।
 इस ब्राह्मणै नै रातीं उस खत्री दा घर फूकी दित्ता । उस खत्री
 ने मिगी त्यागी ओड़ेआ । अऊं त्रीए खत्री दे घर चली गई । हठशर्मा
 ने रातीं उदा घर वी फूकी दित्ता । उत्थूं निकलियै अऊं अनाथ
 इद्दर - उद्दर दौड़न लगी । अज्ज कुतै ते कल्ल कुतै । हून ए ब्राह्मण
 मिगी जाना थमां मारने लेई शस्त्र लेइयै फिरन लगा । जिसेल्लै में
 दिक्खेआ जे मेरे वचने दा कोई रस्ता नेईं रेआ तां में शरण लैने लेई
 वलिशर्मा नां दे तुं दे नौकरै दै घर नौकरानी दा कम्म करना शुरू करी
 दित्ता । जदू हठशर्मा गी इस गल्ला दा पतां लग्ग तां ओ बड़ा नराश
 होई गेआ । मेरे वजोगै च चित्ता करी - करी ओ सुक्कियै काह्न्ना
 होई गेआ । चानचक्क मिगी घरा दा बाहर निकली दी दिक्खियै
 ओ नगी तलवार लेइयै मेरे पिच्छें दौड़ेआ । अऊं जान वचाने लेई
 डरै कन्ने तुं दे मैह्लें च आई बड़ी । भला होयै प्रतीहारी दा
 जिसनै दरवाजा खोलियै मिगी अन्दर बाड़ी लेआ । ओ ब्राह्मण

खवरै बाहर बैठा दा ऐ। उदी कहानी सुनिये कुमार नरवाहनदत्त
 ने उस ब्राह्मण गी अपने सामने सददेआ। उदे हत्थै च छुरा हा।
 अन्दर वड़दे गै अशोकमाला गी दिक्खियै ओ गुस्से कन्ने लाल-पीला
 होई गेआ। उदे गुस्से ते बुरी नीता गी दिक्खियै नरवाहनदत्त ने
 कड़कियै उसी आखेआ ओए पापिया ब्राह्मणा ! तूं इस जनानी
 दे मारने पिच्छें लग्गे दा ऐं। कन्ने लोकें दे घरें गी अग्गां लांदा
 फिरना ऐं। तुगी शरम नेईं औंदी। ब्राह्मण बोलेआ—म्हाराज !
 ए मेरी धर्मपत्नी ऐ। मिगी त्यागियै ए लोकें दे घरें वड़ी जंदी ऐ।
 भला अऊं ए गल्ल कियां सहारी सकनां। ए सुनियै अशोकमाला
 वड़ी व्याकुल होइयै आखन लगी—हे लोकपात्र ! तुस मेरे साखी
 ओ। अऊं इस ब्राह्मण कन्ने ब्याह् करना नेईं चाहंदी ही। इसने
 आत्महत्या दी धमकी देइयै मेरे पिता गी मिगी ब्याही देने पर
 मजबूर कीता। ब्याह् दे बाद ए मिगी रोंदी-करलांदी गी जवरदस्तो
 अपने घर लेई गेआ। में उस बेल्लै इसी आखेआ हा जे में तेरे
 घर नेईं वस्सड। अशोकमाला जिसेल्लै ए गल्ल करै करदी ही तां
 उसै बेल्लै आकाशवाणी आखन लगी जे ए जनानी जेकिश
 आखदी ऐ ओ सब सच्च ऐ। ए जनानी मानुशी नेईं ऐ। पैह्ले
 जनम च ए अशोककर नां दे इक वीर विद्याधरपति दी धी ही।
 इदा नां अशोकमाला हा। जिसेल्लै ए जोआन होई तां पिता ने
 इदा ब्याह् करनां चाहेआ। पर ओ अपने रूपै दी हंकारी की
 ही। उसने कुसै कन्ने ब्याह् करनां पसंद नेईं कीता। इदे पर
 इदे पिता विद्याधर-पति गी गुस्सा आई गेआ। उसने शाप दित्ता
 जे तूं जाइयै मर्तलोकै च जनम लै। उत्थैं तुगी इक करूप पति
 मिलग। उसी त्यागियै तूं त्रै होर पति करगी। उत्थूं दा नठ्ठियै
 तूं कुसै राज-पुत्तर दी दासी बनगी। इक दिन तुगी बाहर निकली
 दी दिक्खियै तेरा पति तुगी मारने गी दौड़ग। तूं नठ्ठियै राज-
 मैह्लें च जाई वड़गी। उस समें तेरा शापै थमां छुटकारा होग।
 इसलेई ए अशोकमाला जिसी पूर्व-जनम च विद्याधर पिता ने
 शाप दित्ता हा उसै पैह्लें नां कन्ने मर्तलोकै च आई। अज्ज इदे
 शाप दा अंत होई गेआ ऐ। हून ए विद्याधर लोकें च जाइयै अपने

पैहू, ले शरीरै च परवेश करग । उत्थें इदा अभिरुचित नां दे विद्याधर कन्ने ब्याहू, होग ।

ए आखियै आकाशवाणी चुप्प होई गेई । अशोकमाला ततकाल मुड़दा होइयै धरती पर डिगगी पेई । उसी मोई दी दिक्खियै युवरानी अलंकारवती दी आक्खियें थमां अत्थरू टपकन लगी पे । हठशर्मा ब्राह्मणै गी वी दुक्ख होआ, पर खिन भरै च उदा मुंहू, परसन्नता कन्ने खिड़ी उट्ठेआ । सबनें दे पुच्छने पर जे ब्राह्मण, तेरा मुंहू यकदम खुशी कन्ने की खिड़ी उट्ठेआ ऐ । ओ बोलेआ—मिगी वी अपना पैहूला जनम याद आई गेआ ऐ, सुनो अऊं तुसेंगी इदा भेद दस्सनां—

हिमालै परवतावली च मदनपुर नां दा इक सुंदर नगगर ऐ । उत्थें विद्याधरपति प्रलम्बभुज राज करदा हा । उदे घर स्थूलभुज नां दा पुत्तर पैदा होआ । जोआनी च ओ इक वांका गवरू लब्बन लगा । उदे कन्ने अपनी पुत्तरी दा ब्याहू, करने लेई सुर्शभवत्स नां दा विद्याधरपति अपनी धी लेइयै आपूं राजा प्रलम्बभुज कोल आया । आइयै उसने उदे पुत्तरै कन्ने अपनी पुत्तरी दे ब्याहू, दा प्रस्ताव पेश कीता । राजा ने अपने पुत्तर स्थूलभुज गी सद्दियै इस मामले च उदी राऽ लैनी चाही । स्थूलभुज गी अपने रूप दा बड़ा अभिमान हा । उसने सुर्शभवत्स दी पुत्तरी कन्ने ब्याहू, करना पसंद नेई कीता । उदे पिता ने उसी मता समजाया पर ओ नेई मन्नेआ ते हठै पर अड़ेआ रेआ । इदे कारण राजा प्रलम्बभुज गी गुस्सा आई गेआ । उसने स्थूलभुज गी शाप दिता जे ओए दुष्टा ! तूं अपने रूपै दा इन्ना घमंड करनां । जा तूं मर्तलोकै च जनम लै । तूं उत्थें महां-करूप मनुक्ख होगा ते अशोकमाला नां दी पतनी प्रापत करियै अनंत दुक्ख भोगगा । अशोकमाला तुगी दिक्खियै रोग । तेरे घरा थमां नटिठ्यै ओ त्रै पति उपरो—तली करग । उदियां करतूतां दिक्खियै तूं धुखदा रौहू, गा ते सुक्कियै काहन्ना होई जागा । प्रलम्बभुज दे इस शाप गी सुनियै सुर्शभवत्स दी पुत्तरी सुरभिदत्ता राजा दे पैरें कन्ने चम्बड़ियै रौंदी-रौंदी आक्खन लगी—पिता जी !

मिगी वी शाप देओ जिस करी मेरा पति कल्ला शाप नेईं भोगै ते अऊं उस संकटै दे समै इदा साथ देआं । सुरभिदत्ता दे रोने-करलाने गी सुनियै राजा प्रलम्बभुज दा क्रोध ठंडा पेईं गेआ । आखन लगा—पुत्तरी ! तू चिंता नेईं कर । अऊं अपने पुत्तरै दै शाप दा अंत दस्सी दिन्नां । जदू अशोकमाला गी शाप थमां छुटकारा पाईं जाग उस्सै बेल्लै स्थूलभुज वी अपने पूर्वजनम दिएं घटनाएं गी याद करियै शाप थमां मुक्ति पाइयै अपने पूर्व शरीर च प्रवेश करियै तेरे कन्ने व्याह् करी लैंग । इदे वाद तू सुखी होईं जागी ।

ए कथा सुनाइयै हठशर्मा ब्राह्मण बोलेआ—म्हाराज ! अऊं उयै स्थूलभुज राजकुमार आं जेड़ा पिता दे शाप दै कारण इत्थें मर्तलोकै च आइयै हठशर्मा दे रूप च जम्मेआ । हून मेरे शाप दा अंत होईं गेआ ऐ ते अम्मी अपने विद्याधर लोकै गी जा करनां । में अपने हंकार दे कारन इन्ना कष्ट सहारेआ । हंकारे दे मनुखवै गी सुख कुत्थें । ए आखियै हठशर्मा ने अपने मनुखवै दे चौले गी त्यागियै सूखम शरीर धारण करी लेआ । इस अदृश रूपै च उसने अशोकमाला दे शरीर गी गंगा - जलै च परवाही दित्ता ते उस थाउँ गी वी धोईं ओड़ेआ जित्थें उदा मुड़दा पेदा हा । परंत अपने भावी स्वामी नरवाहनदत्त गी परनाम करियै ओ गासै रस्तै विद्याधर लोकै गी चली गेआ । इस घटना गी दिक्खियै सारे चकित होईं गे ।

नरवाहनदत्त दे मनोरंजन लेईं हून गोमुख ने इक होर कथा सुनाने दा आरम्भ कीता । कथा इस चाल्ली ऐ :—

शूरपुर नां दे नगरै च महावराह नां दा इक घमंडी राजा राज करदा हा । इदी रानी दा नां पदमरति हा । अनंगरति नां दी कन्या गी छोड़ियै राजा दी होर कोई संतान नेईं ही । समां बीतदा गेआ । अनंगरति जोआन होई । उसी अपने रूपै दा बड़ा अभिमान हा । मत्तें राजें उसी व्याह्ने दी इच्छा प्रगट कीती पर उसने सवनें दिएं मंगें गी ठुड़डा मारी ओड़ेआ । उसनै प्रतिज्ञा

काता ज ओ नेह, कुमार कन्ने ब्याह, करग जेड़ा शूरवीर,
 रूपवान ते विज्ञान दा जानने आला होग। इस राजा दे नगरै च
 चार वीर दक्षिणापथ थमां आए। उनें राजपुत्तरी अनंगरति दी
 परतिज्ञा सुनी। उनें समजेआ जे उनें चौनें च इक-इक
 गवरू च ओ सारे गुण ऐन जिनेंगी राजकुमारी पसंद करदी
 ऐ। ए चारै वीर राजा दे सामनै पेश होए। उस बेल्लै राज-
 पुत्तरी अनंगरति वी उत्थें बैठी दी ही। राजा नै उंदे चा
 इक-इक गी उदी जात ते विज्ञान दे विशै च पुच्छेआ।
 पैह्ला आखन लगा—म्हाराज ! अऊं पच - पट्टिक नां दा शूदर
 आं। अऊं रोज पंज-दोहरियां चादरां बुनी लैनां इंदे चा इक
 चादर अऊं ब्राह्मण गी दान देईं दिन्नां, दूई शिवें दे मंदर
 चढ़ानां। त्री आपू वरतनां, चौथी चादर भावी पतनी लेई
 रक्खी ओड़नां। ते पंजमी चादरा गो बेचियै खाने - पोने दियां
 चीजां खरीदियै अपना जीवन - निर्वाह करनां। दूआ गवरू आखन
 लगा—म्हाराज ! अऊं वैश्य - जाति दा आं। अऊं सबनें पशु
 पक्खरुणं दिएं बोलिएं गी समजी लैनां। त्रीआ बोलेआ अऊं
 खडगधर नां दा खत्री आं। रणै च लड़ना गै मेरा कम्म ऐ।
 चौथा बोलेआ—म्हाराज अऊं जीवदत्त नां ब्राह्मण आं। में
 गौरी दे वर दे वलै कन्ने मोई दी जनानो गी जींदी करी
 दिन्नां। राजा महावराह नै अपने प्रतीहार गी सहियै आखेआ
 जे इनें चौनें कुमारे गी तूं अपनै घर लेजाइयै रक्ख जिंदे
 करी इंदा लम्मी जात्रा दा थकेमां दूर होयै। उंदे चले जाने
 पर राजा अपनी पुत्तरी अनंगरति गी पुच्छन लगा—पुत्तरी !
 तुगी इनें चौनें चा केड़ा वर पसंद ऐ। पुत्तरी नै जवाब दित्ता
 —पिता जी ! मिगी इंदे चा कोई वी पसंद नेईं। दूए दिन ए चारै
 दक्खनी गवरू प्रतीहार दे घरा दा निकलियै वजारै दी सैल करन
 लगे। किश दूर गै गे होड़न जे उनें वजारै च लोकें गी हाहाकार
 करदें ते इहर-उहर नठदे दिक्खेआ। अगूं दा राजा दा पदमकंबल
 नां दा मस्त हाथी हाथीवान कोला छुटियै लोकें गी पैरें हेठ

कुचलदा नठदा आवै करदा हा । उसी दिक्खियै चतरफी नाठ
 पेई गेई । उसी अपनै पासै औंदे दिक्खियै खडगधर खत्री गवरू
 तलवार सूतरियै हाथी पर टुट्टी पेआ । तलवारा दे इक्कै
 फट्टै कन्ने उसनै हाथी दी सुङ्ढा दी पुमली गाजरा आंगर
 कट्टी ओड़ी । उसनै हाथी दे पिछले पैर वी जखमी करी
 दित्ते । इदेकरी हाथी धरती पर डिगियै मरी गेआ । खडग-
 धर दी ब्हादरी गी दिक्खियै सारे लोक दंग होई गे । इस
 घटना गी सुनियै राजा गी वी बड़ा चरज लगा । दूयै रोज
 रोज राजा हाथी पर सोआर होइयै शकार खेडन गेआ ।
 दक्खनापथ दे चारै गवरू वी राजा कन्ने गे । जंगलै च
 राजा दे हाथी पर इक्क भयंकर शेरै नै हमला कीता ।
 खडगधर नै तलवार सूतरियै इक्कै फट्ट कन्ने शेरै दे दो टुगड़े
 करी ओड़े । उससै खिन इक्क दूए शेरै ने राजा पर हमला
 कीता । खडगधर नै इसी पिछलियें जंघें थमां पैहलें सिरै परें
 घुमाया ते फी उसी नेआ त्रिट्टियै मारेआ जे ओ मरी गेआ ।
 शकारा दा परतोइयै राजा मेहलै च गेआ उत्थै उसने अपनी
 पुत्तरी अनंगरति गी सहियै शकारा दी सारी घटना सनाई ।
 राजा उसी आखन लगा पुत्तरी ! तूं ए दस्स जे शूद्ध
 वैशश ते कुरूप ब्राह्मण तुगी पसंद नई तां नेह, शूरवीर
 क्षत्री कुमार कन्ने ब्याह करदे तुगी केह उजर ऐ । जे ए गल्ल
 ऐ जे ओ गरीब ऐ तां अऊं उसी इक्क अक्खी दे फोरे च
 माला - माल करी सकनां । इसलेई धीए तूं इसी अपना प्रति
 वरी लै । पिता दी गल्ल सुनियै अनंगरति बोली - पिता जी !
 तुंदा वचन सिर मत्थे पर । पेहलें तुस इनैं चौनैं दक्खन पथ दे
 वासिएं गी इत्थें सद्दो ते कन्ने जोतसियें गी वी सहियै पुच्छो जे
 मेरे ग्रह - गोचर कनेहू न ते इंदे चौनैं कुमारें चा केहड़ा वर
 जोगा ऐ । राजा ने उयां गै कीता जियां धी नै आक्खेआ ।
 चौनैं गवरूयें दे सामनै जिसेल्लै जोतसियें । गी पुच्छेआ गेआ जे
 इंदे च केहड़ा वर अनंगरति दे मेल दा ऐ तां जोतसी आखन

लम्गे—म्हाराज । जे सरकार गुस्सा नेईं करन तां अस किश
 अरज करनेआं । इनें चौने गवरूयें चा इक्क वी राजकुमारी
 आस्तौ वर चुनने दे जोग नेईं । ए असें गी ग्रह - गोचरें दी
 गिनती थमां पता लग्गा ऐ । असल गल्ल ए ऐ जे पिछले जनम
 च राजकुमारी विद्याधर कन्या ही जेह्डी शाप दे कारण
 साहूबें दे घर आई जम्मी । सरकार त्रै म्हीनें तक बलगो ।
 तद् तद् तक शाप दा अंत होने दी सम्भावना ऐ । जोतसियें दे
 आखने पर राजा ने त्रै म्हीनें दी अवधि तक बलगना जरूरी
 समजेआ । जिसलौ त्रै म्हीनें दी मनियाद गुजरी गई तां राजाने
 चौनें दक्खनी गवरूयें गी, जोतसियें गी ते अपनी पुत्तरी
 अनंगरति गी उत्थें सद्देआ । राजा जोतसियें गी आखन लगा —
 जेह्डी मनियाद त्रै म्हीनें दी तुसें दस्सी ही ओ ते बीती गई ।
 हून असेंगी अग्गें के करना लोड़चदा ऐ । राजा ए आखै
 गै करदा हा जे अनंगरति गी अपना पैह्ला जनम याद आई
 गेआ । ओ तुरत अपना मुंह् दपट्टे कन्ने लपेटिये उत्थें गे
 धरती पर लम्मी पेई गई । लेटदे गै उसने मनुक्ख शरीरें
 चा अपने प्राण खिच्चियै शरीर त्यागी ओड़ेआ । उसी भुत्रां
 लेटे दे जिसले मता चिर होई गेआ तां राजे गी बड़ी चिंता
 लग्गी ।

धी दे मुहै परा दपट्टा परें करने पर राजा गी पता
 लग्गा जे ओ ते मरी गेदी ऐ । उसी मुड़दा दिक्खियै राजा,
 रानी ते सारे लोक ढाई मारी - मारी लगे रोन । सारे
 मैह्ल ते शैह्रें च सोग दी घटा छाई गई । राजा ते राना
 बेहोश होइयै डिग्गी पे । किश चिर बाद राजा गी सुरत आई ।
 ओ जीवदत्त गी आखन लगा—तुस आखदे ओ जे तुंदे कोल मृत-
 संजीवनी विद्या ऐ । तुस हून उदे बल कन्ने मेरी धी गी जींदा
 करियै उदा चमतकार दस्सो । जे ए जो उठ्ठा अस इतो
 तुगी गै ब्याही देगे । राजा दे वचन गी सुनियै जावदत्त
 ने अपने मंत्रबल कन्ने राजपुत्तरी गी जींदा करने दा बत्हेरा

जतन कीता पर सब अकारथ । इदे पर नराश होइये जीवदत्त
 तलवारा कन्ने अपना सिर कप्पने गी त्यार होई गेआ ।
 ततकाल आकाशवाणी आखन लगी—जीवदत्ता ! तूं विर्या ए दलेरी
 नेईं कर । ए राजपुत्री पिछले जनम च विद्याधर कन्या ही ।
 शाप दे कारण इसी मर्तलोकें च मनुक्ख जनम मिलेआ । शाप
 दी मनियाद बीती जाने पर हून ओ फी अपने विद्याधर लोक
 गी चली गई ऐ इसलेईं तूं जाइयै विध्यवासिनी दी राधना
 कर । भगवती दे वरै कन्ने गै तूं इसी पाई सकना ऐं । इस
 लेईं राजा रानी गी बी वसोस नेईं करना लोड़चदा । कीजे
 ओ विद्याधर लोक जाइयै शैल गति गी प्राप्त होई गई ऐ ।
 इस अकाशवाणी गी सुनियै राजा नै अपनी पुत्री दा संस्कार
 कीता । त्रै दक्खन देश दे कुमार अपने-अपने घरें गी चली
 गे । पर जीवदत्त नां दा ब्राह्मण कुमार बड़ी शर्धा कन्ने भगवती
 विद्यावासिनी दी राधना करन लगा । उदी राधना कोला
 परसन्न होइयै देवी नै उसी सुखने च दर्शन देइयै आखेआ—
 पुत्रा ! उट्ठ अऊं तेरे पर बड़ी परसन्न आं । तूं हिमालै च
 जा । उत्थें वीरपुर नगरै च समर नां दा विद्याधर राज करदा
 ऐ । उदी रानी अनंगवती नै अनंगप्रभा नां दी पुत्री गी जनम
 दित्ता ऐ । जदूं ए पुत्री जोआन होई तां उसनै अपने रूप
 दे अभिमान च सब विद्याधर कुमारें गी ठुकराई ओड़ेआ । ते
 कुसै कन्ने ब्याह् करना पसंद नेईं कीता । माता-पिता गी
 बड़ा गुस्सा आया । उनें शाप दित्ता—जा मर्तलोक च जनम
 लै । उत्थें बी तुगी पति दा सुख प्राप्त नेईं होग । सो'लें
 व'रें दी वरेसा च तू मनुक्ख देह् त्यागियै फी विद्याधर लोक
 गी परतोगी । उत्थें खडगसिद्ध नां इक करूप मर्द तेरा पति
 होग । ओ बी पेह्लें विद्याधर हा पर मूनिशाप दे कारण
 मनुक्खै दी जाति च जम्मेआ । तूं उसी नेईं चाह्गी पर ओ
 तुगी मर्तलोकै च लेईं जाग । उत्थें तुगी कोई होर मनुक्ख
 हरी लेईं जाग । इस कारण तेरा पति कोला वजोग होग ।
 इसनै अपने पैह्ले जनम च अट्ठ वगानियां जनानियां चुराइयां हियां

इसलेई अट्ठें जनमें च भोगने जोग दुख गी ओ इक्कै जनम च भोगग । तूँ इस इक जनम च अट्ठें जनमें दे दुखेंगी भोगगी । तेरे कई पति होङ्गन । जहूँ तूँ विद्याधर कन्या ही उस बेल्लै मदनप्रभ नां दे विद्याधर कुमार नै तेरे कन्ने ब्याह् करने दी इच्छा प्रगट कीती पर तूँ उसी ठुकराई ओड़ैआ । हून उयै मदनप्रभ मर्तलोकै च राजा बनेदा ऐ । ओ तेरा पति होग । परंत अपने शाप दे अंत च तूँ अपने विद्याधर लोक गी चली जागी । उत्थें तुगी उयै मदनप्रभ नां दा विद्याधर कुमार ब्याग ।

इयां पिता दे शाप कारण अनंगप्रभा राजा दे घर पैदा होई ते अनंगरति खोआई । फी पिता दे शाप कोला छुटकारा पाइयै हून ओ विद्याधर लोकै च अपने अनंगप्रभा शरीरै च परवेश करियै विद्याधर पुत्तरी बनो गई ऐ । देवी नै जीवदत्त गी आखेआ जे हून तूँ वीरपुर जा ते अनंगप्रभा दे पिता गी जित्तियै उदी पुत्तरी कन्ने ब्याह् करी लै । ए लै तूँ मेरा दिव्व खडग । इदे वलै कन्ने तूँ नखड़क गासै च उड़डी सकगा ते सब जगाह् विजै प्राप्त करगा । ए आक्खियै देवी जीवदत्त ब्राह्मण कुमार गी अपना दिव्व खडग देइयै अदृश होई गई । जीवदत्त खडग लेइयै गासै रस्तै वीरपुर पुज्जा । उत्थें विद्याधर पति समर गी जित्तियै उसनै उदी पुत्री अनंगप्रभा गी ब्याही लेआ । किश दिन वीरपुर रेइयै ओ अपनी नमीं लाड़ी समेत मर्तलोक गी परतोई आया । उत्थें इक रमणीक परवतै पर ओ दोए वसां लगे करन । जीवदत्त अनंगप्रभा गी आखन लगा —प्यारी ! जी करदा ऐ नेह् रमणीक थां पर तेरे कैठ दा इक गीत सुनां । पति दे आखने पर विद्याधरी नै अपने कलकंठ कोला मधुर गान शुरू कीता । इस गीत गी सुनदे - सुनदे जीवदत्त दियां अक्खीं मटोई गेइयां तां ओ गाढ़ी नींदरा च सेई गेआ । उससै बेल्लै राजा हरिवर जेड़ा जंगलै च शकार खेडन आए दा हा विद्याधरी दे मधुर गीत दा पीछा करदा - करदा

उत्थें आई निकलेआ । विद्याधरी ते राजा दियां चार अक्खीं मिलदे गै दोनें दा इक दूए कन्ने प्यार होई गोआ । दोनें इक दूए गी अपनी - अपनी जान - पशान दस्सी । अनंगप्रभा राजा गी आखन लगी—मिगी छड़ा तुंदे दिक्खने करी गै प्रेम होई गोआ ऐ । इसलेई अऊं पति गी त्यागियै तुंदे कन्ने चलनी आं । वाकी हाल अगें चलयै वस्तार कन्ने दस्सड । इस वेल्लै ए सुत्ता दा ऐ इसलेई इत्थूं नट्ठी जाना गै ठीक ऐ । अनंगप्रभा गी रथै पर चाढ़ियै राजा हरिवर अपनी राजधानी गी चली गोआ । उत्थें अनंगप्रभा कन्ने विहार करदा राजा सुखै दा जीवन वितान लगा । पति कन्ने द्रोह करने कारण उसी सारियां विद्याधर शक्तियां ते विद्यां भुल्ली गेइयां ओ इक सधारण स्त्री आला लेखा होई गेई ।

उद्दर परवतै पर सुत्ता दा अनंगप्रभा दा पति जीवदत्त जिसेल्लै जागेआ तां उसी वड़ा चरज लगा जे नां ते उदी पतनी अनंगप्रभा उत्थें ऐ ते नां गै देवी दा दित्ता दा दिब्ब खडग । सोचन लगा ए दोए कियां गैव होई गे । अनंगप्रभा गी याद करियै वड़ा रोआ । बिना अन्नजल केई दिन उदी खोजा च परवतै पर भड़कदा रेआ । अपने भागें गी रोंदा इक दिन ओ इक ग्रां जाई पुज्जा । उत्थें ओ कुसै घिस्ती दे घर जाई वड़ेआ । उसी दिक्खियै घरै दी मालकन दासी गी आखन लगी—दिक्खेआं कुड़े । ए वचारा परौहना जेड़ा साढ़े घर आया ऐ इसी जनानी दे वजोगै च भुक्खे - भाने खज्जत हुंदे अज्ज तेरां दिन होई गे न । इदा नां जीवदत्त ऐ । इदा आदर सत-कार कर ते इसी भोजन बी करा । घरै दी मालकन दा आखेआ सुनियै जीवदत्त दंग रेई गोआ । सोचन लगा मलूम हुंदा ऐ जे अनंगप्रभा इत्थें जरूर आई ऐ । जां फी ए जनानी कोई जानी-जान जोगन ऐ जेड़ी दूए दे मनै दी गल्ल बुज्भी लैंदी ऐ । भोजन करियै जीवदत्त नै घरै दी मालकन प्रियदत्ता गी परनाम कीती ते पुच्छेआ—भगवती ! तुसं मेरे कष्ट गी कियां

जानी लेआ । ओ बोली—अऊं पतिव्रता नारी आं । पति दे
विना बाकी मरदें गी अऊं पुत्तर जां भ्रा समझनी आं । इससे
तपस्या दे बलै कन्ने अऊं भूत, भविष्य ते वर्तमान दिएं घटनाएं गी
जानी लैन्ती आं । मेरें घर जेड़ा परौहना औंदा ऐ उसी अऊं
विना आतिथ्य - सतकार दे जान नेईं दिदी । जिसेल्लै तूं
परवतै पर सुत्ता दा हा उसेल्लै तेरी पतनी अनंगप्रभा अपनी
मरजी कन्ने राजा हरिवर संग उदी राजधानी चली गई ।
ओ तुगी हून नेईं मिली सकदी । ओ कुलटा जनानी ऐ । ओह् राजा
दे मैह्लै चा नटिठयै होर केईं घरें खज्जल होग । इसलेईं
तूं उदी चिता करनी छोड़ी दे । जेड़ा दिव्व खडग तुगी देवी
नै दिता हा ओ फी परतोइयै देवी कच्छ चली गेआ ऐ ।
कीजे उदा तपवल पूरा होई गेआ ऐ । ए सुनियै जीवदत्त
गी अनंगप्रभा दा मोह् चली गेआ । ओ आखन लगा—माता ।
तुसें मेरा अज्ञान दूर करियै मेरियां अक्खीं खोली दितियां
न । हून मिगी आज्ञा देओ जे अऊं अपने पापें दा प्राश्चित्त
करने लेई तीर्थजात्रा करां । इन्ने चिरै च प्रियदत्ता दा पति
घर आई गेआ । उन्न बी जीवदत्त दा बड़ा सम्मान कीता ।
दोनों दी आज्ञा लेइयै जीवदत्त तीर्थजात्रा लेईं चलो पेआ ।
नेकां मसीवतां स्हारदे उसनै पृथ्वी दे सारे तीर्थे दी जात्रा
कीती । अखीर जीवदत्त फी विंध्याचल आइयै भगवती विंध्य-
वासिनी दी राधना करन लगा । उदी कठोर तपस्या थमा
परसन्न देवी परतकख होइयै उसी आखन लगी—पुत्रा ! मेरी
गल्ल सुन । पैह्ले जनम च पंचमूल, चतुर्वक्र, महोदय ते
विकटवदन नां दे मेरे चार गण हे । उंदे चा तूं विकटवदन
हा । इक बारी तुस चारै गण गंगा दे कंडै सैल करै करदे हे ।
उत्थें तुसें कपिलनद नां दे मुनि दी कन्या गी गंगा च शनान
करदे दिक्खेआ । तुसें चौनों उसी बुरी नीता कन्ने पगड़ने दी
कोशश कीती । पर कन्या दे आखने पर जे अऊं कुआरी आं
बाकी त्रै गण ते पिच्छें हटी गे पर तूं मुनि कन्या गी वामां

दा पगड़ी लेआ । मुनि कन्या करलाई उदी चीख - पुकार ते करलदा गी मुनियै मुनि दौड़आ । उसनै तुसें चौनें गी शाप दित्ता जे दुराचारियो जाओ मर्तलोकै च जनम लैओ । शाप मुनियै सारे मुनि अगें क्षमा दी प्रार्थना करन लगे । मुनि गी देआ आई गेई, बोले—जदू राजा दी पुत्री अनंगरति जिसी तुस बरना चाहगेओ अपने मानुशी रूप गी त्यागियै विद्याधर लोक जाइयै अपने अनंगलेखा दे शरीरै च प्रवेश करग तां तुसें त्रैनें दे शाप दा अंत होई जाग । पर तूं कीजे मेरी पुत्री दी वांह, गी हत्थ पाया, इसलेई तूं उसी विद्याधरी अनंगलेखा दे रूप च पाइयै फी उसी खोही बौहगा । इसकरी तुगी महा-संकट ते दुख स्हारना पौग । अखीर देवी दी किर्पा कन्ने तेरे शाप दा बी अंत होई जाग ।

जीवदत्त गी ए सुनाइयै देवी फी उसी आखन लगी—उयै मेरे चार गण मुनिशाप दे कारण दखनापथै च चार वीर पैदा होए । पंचपट्टिक, भाशक्ष ते खडगधर ए त्रै तेरे साथी ते शापै थमां उस्सै बेल्लै छुटकारा पाई गे जिसेल्लै अनंगरति मनुक्खे दा चोला छोड़ियै अनंगलेखा विद्याधरी दे शरीरै च परवेश करी गेई । देवी बोली—ओ त्रैवै मेरे कोल विध्याचल आए ते मेरी किर्पा कन्ने शाप थमां मुक्त होई गे । तूं हून मेरी कठन तपस्या कीती ऐ । अऊं तुगी आग्नेई धारणा दिन्नी आं । इस धारणा दे बलै कन्ने तूं अट्ठें जनमें च भोगने जोग शाप गी इक्कै जनम च भोगियै परमपद गी प्राप्त करगा । देवी विध्यावासिनी दी आज्ञा मतावक जीवदत्त ने दिव्व धारणा दे बलै कन्ने अट्ठें जनमें च भोगने जोग शाप गी इक्कै जनमें च भोगियै फी देवी दे गण दी पदवी प्राप्त करी लेई । पराई जनानी कन्ने संगम करने करी जे देवतें दी बी नेई दुरगत हुंदी ऐ तां फी मनुक्खे दा के आखना ।

हून अगें अनंगप्रभा दा हाल सुनो । जिसेल्लै राजा हरिवर दे रथे पर सोआर होइयै ओ राजा दी राजधानी गेई तां राजा ने

उसी अपनी पटरानी बनाई लेआ। सारे लोकें च उदा बड़ा मान
 ते आदर होन लगा। अपने राजपाट दा सारा भार मंत्रिण पर
 सुट्टियै राजा दिन-रात अनंगलेखा दे प्रेम च मस्त विशेभोगें च
 अपना समां बतान लगा। इक वारी लब्धवर नां दा इक परसिद्ध
 नाट्याचार्य मध्यदेश दे राजा हरिवर दे दरवारै च आया। उदी
 अद्भुत नाट्यकला गी दिक्खियै राजा बड़ा चकित होआ। लब्धवर
 वादन ते नाट्य कलाएं दा आचार्य हा। अंतःपुर दिएं जनानिणं गी
 ए दोए कलां सखाने लेई राजा ने उसी नियुक्त कीता। ओ आचार्य
 दे रूप च जनानिणं गी शिक्षा देने लेई विना कुसै रोक-टोक दे
 अन्तःपुर दे जनाने मैहू,लें च जान लगी पेआ। लब्धवर ने अनंगप्रभा
 गी नेई खरी शिक्षा दिती जे ओ इस कला च सारें थमां श्रेष्ठ
 मन्नी जान लगी। लब्धवर नाट्याचार्य इक वांका जोआन हा।
 नित्त उदी संगति च रौहू,ने करी अनंगप्रभा उदे कन्ने प्रेम करन लगी
 पेई। ए प्रेम दिनो - दिन बधदा गेआ। अखीर इक रातीं अनंगप्रभा
 अपने प्रेमी कन्ने मैहू,ला दा निकली पेई। लब्धवर अपना सारा धन
 ऊटै पर लदियै उदे पर बेई गेआ ते अनंगप्रभा घोड़ै पर सोआर
 उदे कन्ने चली पेई। रातोरात दोए जने राजा हरिवर दे राजै
 थमां बाहूर निकली गे। चलदे - चलदे किश दिनें वाद ओ
 वियोगपुर नगगर पुज्जे। कामवश होइयै अनंगप्रभा नै पंहु,लें
 अपनी विद्याधर पदवी कोला हत्थ धोते फी राजलक्ष्मी खोआई।
 अखीर इक नटिए दे संग नट्टियै अपने सुख आदर-मान सबनें गी
 तिलांजली दिती। लानत ऐ नेइए कुलटा जनानिणं गी। राजा
 हरिवर गी सवेरै जदू पता लग्गा जे अनंगप्रभा लब्धवर नटिए
 कन्ने नट्टी गेई ऐ तां ओ आत्म-हत्या करने गी तयार होई गेआ पर
 मंत्री दे समझाने पर इदे थमां रुकी गेआ।

हून अनंगप्रभा नाट्याचार्य लब्धवर कन्ने वियोगपुर रौहू,न
 लगी पेई। किश दिन बीते तां नाट्याचार्य लब्धवर दी पनछान
 सुदर्शन नां दे इक गवरू जोआरियै कन्ने होई गेई। सुदर्शन जुआरियै
 ने लब्धवर दा सारा धन जुए च जिती लेआ। लब्धवर कंगाल

होई गोआ । अनंगप्रभा ने जिसेल्ले उदी कंगाली दिक्खी तां ओ उसी छोड़ियै सुदर्शन जुआरियै दे घर आई बैठी । जनानी ते धनै थमां हत्थ धोइयै लब्धवर नै गंगा दे कंठे जाई डेरा लाया ।

अनंगप्रभा हून सुदर्शन जुआरियै कन्ने रौहून लगी । इक दिन रातीं स्हन्न मारियै चोरें सुदर्शन दा सर्वस हरी लेआ । अनंगप्रभा गी दुखी दिक्खियै सुदर्शन उसी आखन लगा—इस नगरै च हिरण्यगुप्त नां दा इक सेठ मेरा मित्तर ऐ । घरै दे खच्चै लेई उदे कोल किश दुहार मंगने आं । तुम्मी मेरे कन्ने चल । ए आखियै ओ मूरख अनंगप्रभा गी कन्ने लेइयै सेठ दे घर गोआ । ते उदे कोल दुहार मंगन लगा । अनंगप्रभा गी दिक्खियै सेठ दा मन पापी होई गोआ । अनंगप्रभा वी उसी दिक्खियै अपना-आप खोई बैठी । अक्खीं दे शारें कन्ने गै दौनें दी गल्ल-वात तै होई गई । सेठ हिरण्यगुप्त सुदर्शन गो आखन लगा—भ्यागा सवेरै अऊं तुगी रपेआ दुहार देड । अज्ज तुस दोए मेरे परौहूने ओ । अज्ज तुसें मेरै घर गै खाना खाना ते सौना । सेठ ते अनंगप्रभा दी अक्ख-मटक्की दिक्खियै सुदर्शन जुआरियै दे मनै च खतोला पेई गोआ । बोलेआ—अज्ज मेरा जी ठीक नेईं में खाना नेईं खाड । सेठ आखन लग्गा—खैर कोई गल्ल नेईं, तुन्दी श्रीमती जी ते पैहूली वारी साढ़ै घर आइयां न । इनेंगी खाना खलाए बिना भला अस कियां जान देच्चै । ए आखियै सेठ अनंगप्रभा गी खाना खलाने लेई अंदर लेई गोआ । अंदर जाइयै सेठ ते अनंगप्रभा दौनें कट्ठे भोजन कीता ते भांति - भांति दे पान - आसव पीते । सुदर्शन दूए कमरे च बलगन लगा जे अनंगप्रभा भोजन करियै आवै तां घर चलचै । किश चिर होआ तां सेठ दे नौकरै सुदर्शन गी आइयै आक्खेआ जे तुन्दी घरै आली ते भोजन करियै घरै गी चली गई ऐ । तुस वी जाओ तुस इत्थें केहू करै करदे ओ जन्दे की नेईं, कबेल होयै करदी ऐ । सुदर्शन बोलेआ—नेईं, अजें ओ नेईं गई, अंदर गै ऐ । तुस भूठ मारै करदेओ । बिना उसी ले अऊं इत्थूं नेईं हिल्लड । सेठ दे नौकरें उसी ठुड्डे ते धक्के मारियै घरा दा बाहूर कड्डी

दिता । घर जाइयै दुखी होएदा सुदर्शन सोचन लगा इस
 वणिये नै मेरे कन्ने मित्रद्रोह कीता ऐ । फी उदे मनै च आया
 जे ए मेरे अपने गै पाप दा फल ऐ । लब्धवर कन्ने जनेह् आ
 में मित्रद्रोह कीता हा ए उसै दा फल मिगी मिलेआ ऐ ।
 इस घटना कोला सुदर्शन गी वराग होई गेआ । ओ तपस्या
 लेई वदरीधाम गी चली गेआ । जियां भौरै दी मक्खी नमें-नमें
 फुल्लै दा स्वाद लैदी ऐ उयां गै अनंगप्रभा सेठ कन्ने रमण करन
 लगी । दोनै दा प्रेम दिनो-दिन वधदा गेआ । उदे मन
 परचाने लेई सेठ खुल्ले दिलै कन्ने खर्च करन लगा । अखीर
 उदा धन मुक्की गेआ । आखदे न खर्चदे - खर्चदे खूह् बी खाली
 होई जंदे न । अपने गी धनहीन दिक्खियै सेठ वपार लेई दूर
 देस चली गेआ । अपने कन्ने अनंगप्रभा गी बी लेई गेआ ।
 चलदे - चलदे ओ सागरपुर नगर पुज्जा । उत्थें जहाजै पर सोआर
 होइयै कुसै टापू गी चली पेआ । जलजात्रा करदे - करदे इक
 दिन चानचक वड़ा भारी तफान आई गेआ । जहाज डुब्बन
 लगी पेआ । जात्रुए च हाहाकार मची गेआ । सारे रोन-
 करलान लगी पे । अपनी प्रेमिका अनंगप्रभा गी गुम्म दिक्खियै
 हाए प्यारिये । तू कुत्थै ऐं । करलांदे - करलांदे सेठ हिरण्यगुप्त
 नै समुंदरै च छाल मारी ओड़ी । उत्थै इक बेड़ी दा आसरा
 लेइयै ओ पानी दे बेग कन्ने इक पास्से गी रुढ़दा - रुढ़दा
 चली गेआ । समुंदरै च गोते खंदी अनंगप्रभा गी जहाजै दे मालक
 सागरवीर नै अपने कन्ने इक फट्टै पर वठाई लेआ । थोड़ी देर च
 तफान शान्त होई गेआ । समान बी निरमल लब्बन लगा ।
 समुंदरै दा पानी फी समतल होई गेआ । हिरण्यगुप्त सेठ पंज दिन
 बेड़ी पर बैठा - बैठा कठन जात्रा दे वाद समुंदरै दे कंठे लगा ।
 अनंगप्रभा दे वजोगै च दुखी ओ मसां - मसां अपने नगरै गी
 परतोआ । वपार करदे - करदे ओ फी धनवान होई गेआ ।
 उद्दर सागरवीर जहाज दा मालक जल - जात्रा दियां नेक जालनां
 भोगदा अनंगप्रभा समेत अपने नगर सागरपुर पुज्जा । उत्थें
 अनंगप्रभा नै सागरवीर गी बांका जोआन दिक्खियै उदे कन्ने

व्याह् करी लेआ । उदी सम्पत्ति गी भोगदी ओ उस्से घर
 रौह् न लगी पेई । इक दिन दी गल्ल ऐ जे उत्थूं दे राजपुत्र
 विजयवर्म दी सोआरी सागरवीर दे घरै कच्छें लंघी । अनंग-
 प्रभा सोआरी दिक्खने लेई घरा थमां बाह् र निकली । राजपुत्र
 कोल जाइयै ओ उसी आखन लगी—कुमार जी ! मिगी तुसेंगी
 छड़ा दिक्खने करी तुं दे कन्ने प्रेम होई गेआ ऐ । इसलेई
 तुस मिगी अपने कन्ने लेई चलो । उस त्रिभुवन सुंदरी गी
 दिक्खियै राजपुत्र उसी अपने घर लेई गेआ । उत्थें अनंगप्रभा
 राजपुत्र दी पतनी बनियै रौह् न लगी । इक वारी उस नगरै
 दा राजा सागरवर्मा हाथी पर सोआर सैल लेई बाह् र निकलेआ ।
 उसनै अनंगप्रभा गी घरै दे छतै पर खड़ोते दे दिक्खेआ ।
 उसी दिक्खियै उदा मन कामवश होई गेआ । अनंगप्रभा हाथी
 कच्छ आइयै म्हावत गी आखन लगी—अऊं कदे हाथी पर नेई
 चढ़ी, मिगी हाथी पर चढ़ाइयै मेरी इच्छा पूरी कर । राजा नै
 जिसेल्लै उदे अलौकिक रूप गी दिक्खेआ तां ओ म्हावत गी
 आखन लगा—इस जनानी गी हाथी पर बठाइयै इदा चा पूरा
 करी ओड़ो । म्हावत नै अनंगप्रभा गी हाथी पर चढ़ाई लेआ ।
 हाथी पर चढ़ी दी गी उसी, राजा अपने मैह्लें च लेई आया ।
 उत्थें आइयै उसनै उसी, अपनी पटरानी बनाई लेआ । दोनैं
 अपना जनम धन्न समजेआ । किश समां बीतने पर अनंगप्रभा
 गर्भवती होई । उसनै पुत्तर-रतन गी जनम दित्ता । राजा नै
 अपने पुत्तर दा नां समुद्र वर्मा रक्खेआ । ते इदे जनम दी
 खुशी च महान उत्सव मनाया । पुत्तर जिसेल्लै जोआन होआ
 तां राजा सागरवर्मा नै उसी अपना युवराज बनाया ते उदा
 व्याह् राजपुत्री कमलवती कन्ने करी दित्ता । व्याह् दे बाद
 राजा नै सारा राजपाठ पुत्तरा गी सौपी दित्ता । राज संवासन
 पर बेइयै समुद्रवर्मा नै दिग् - विजय लेई पिता कोला आज्ञा
 मंगी । पिता आखन लगा—पुत्तरा ! विजय - लक्ष्मी बड़ी चंचल
 ऐ । उदा कोई वसाह् नेई जे ओ सारे जुद्ध खेत्तरें च तुगी गै
 मिलग । इसलेई तुगी लोड़चदा ऐ जे तू अपने राजै पर गै

संदौख करियै दिग् - विजै दी चाहू गी छोड़ी दे । पिता दे
 समजाने पर वी समुद्रवर्मा सेना लइयै दिग् - विजै लेई चली
 पेआ । थोड़ा समा बीतने पर ओ दिग् - विजै करियै अपनी
 राजधानी की परतोआ । अपने कन्ने ओ जित्ते दे राजें दे दित्ते
 दे अनंत धनराशि दियां खिल्लतां ते सुगातां ल्याआ । उसी विजयो
 ते राजलक्ष्मी द्वारा सम्पन्न दिक्खियै पिता उसी आखन लगा—
 पुत्तर ! धन्न आं अऊं जिदा तेरे जनेहूआ वीर ते यशस्वी पुत्तर
 ऐ । मनक्ख जनम दा जेड़ा चंगे कोला चंगा फल हुंदा ऐ
 ओ में प्राप्त करी लेआ ऐ । हून मेरीं प्रबल इच्छा ऐ जे
 भगवान दे चरणें दी शरण प्राप्त करां । ए आखियै ते अपने
 पुत्तर ते नूहू गी शीर्वाद देइयै ते पर्जा कोला विदा मंगियै
 राजा सागरवर्मा अपनी रानी अनंगप्रभा समेत तीर्थराज प्रयाग
 गी चली गेआ । उत्थें जाइयै राजा ते रानी नै कठन तपस्या
 कीती । रातीं शिवशंकर प्रत्तक्ख होइयै राजा गी आखन लगे—
 अऊं तुं दी तपस्या पर बड़ा परसन्न आं । पूर्व - जनम च तुस
 दोए विद्याधर हे । शाप दे कारण तुसेंगी मर्तलोकै च जनम
 लैना पेआ । हून तुं दे शाप दा अंत होई गेआ ऐ । तुस
 अपने विद्याधर लोकै गी जाओ । सवेरै जिसेल्लै दोए जागे तां
 अनंगप्रभा आखन लगी—पतिदेव मिगी वी रातीं इयै सुखना
 आया । इस सुखने करी मिगी अपना पिछला जनम याद आई
 गेआ । अऊं विद्याधरपति समर दी धी आं । पिता दे शाप
 दे कारण अऊं मर्तलोक च जनमी ते अपना पैहूला जनम
 भुल्ली गई । हून शिवें दी किर्पा कन्ने शाप दा अंत होने करी
 पूर्वजनम दी सारी घटना मेरे अंदर जागी उट्ठी ऐ । उस्सै
 बेल्लै अनंगप्रभा दा पिता समर गासै थमां उतरेआ । राजा सागर-
 वर्मा नै उसी परनाम कीती । विद्याधरपति समर अनंगप्रभा
 गी आखन लगा—पुत्तरी ! तू अट्ठें जनमें दा दुक्ख इक्कै
 जनम च भोगी लेआ ऐ । ए आखियै समर नै पुत्री अनंगप्रभा
 गी उदियां भुल्ली दियां दिव्व दियां फी उसी दित्तियां । ओ
 राजा सागरवर्मा गी आखन लगा—पुत्तरा ! तू पिछलै जनम

मदनप्रभ नां दा विद्याधर हा । मेरी पुत्री अनंगप्रभा गी व्याह्ने लेई केई विद्याधर आए पर इसनै सबनै गी तुच्छ जानियै ठुकराई ओड़ेआ । फी तुम्मी इदे कन्ने व्याह् करने दी चाह् प्रगट कीती पर अपने रूप दे घमंडै च आइयै इसनै तुगी वी ठुकराई ओड़ेआ । उस बेल्लै गुस्से च आइयै में इसी शाप दित्ता जे मर्तलोकै च वी तूं इस्सै दी भारजा बनगी । हून तुंदा शाप दूर होई गोआ ऐ । तुस दोए अपने विद्याधर लोक गी चलो । दोनै तीर्थराज प्रयाग दे जलै च शनान कीता । दोने दे दिब्व विद्याधर रूप होई गो । दोए समर विद्याधरपति कन्ने विमानै पर चढ़ियै वीरपुर नां दे विद्याधरें दी राजधानी गी चली गो । उत्थै जाइयै विद्याधरपति समर नै अपनी पुत्तरी अनंगप्रभा दा व्याह् विधिपूर्वक मदनप्रभ विद्याधर कन्ने करी दित्ता ।

ए कथा सुनाइयै गोमुख युवराज नरवाहनदत्त गी आखन लगा—कुमार जी ! इस चाल्ली दिब्व लोकें दे जीव वी अपना कर्मफल भोगने लेई मर्तलोकै च जनम लैदे न । ते कर्मफल भोगने परंत अपने पुन्तकर्म दे परभाव कन्ने फी देवलोकें गी प्राप्त करदे न ।

त्रिया तरंग

दूयै दिन मंत्री मरुभूति युवराज नरवाहनदत्त गी आखन लगा—म्हाराज ! इक वचारा कार्पटिक नंगधडंग तुं दे राजद्वार पर बैठा दा धुप्प - शां, गर्मी - सदीं, बरखा सारे कष्ट स्हारै करदा ऐ । तुसेंगी उदे पर देआ की नेईं औंदी । ए तपस्या करदे - करदे जिन्ना चिर इदा शरीर कोला छुटकारा नेईं होई जा तुसेंगी लोडचदा ऐ इदा ध्यान वी करो । ए सुनियै गोमुख बोलेआ—युवराज जी ! मरुभूति जी ठीक गै आखदे न । पर इदे च तुंदा दोश नेईं । जिन्ना चिर मनुक्खै दे पापकर्म दा खै नेईं हुन्दा इन्ना चिर उदे पर स्वामी दी दयादृष्टि नेईं हुंदी । पर जदू मनुक्खै दे चंगे दिन औन्दे न तां अपने - आप

उदे पर स्वामी दी दयादृष्टि होई जंदी ऐ ते उदी सारी कंगाली
दूर होई जंदी ऐ । इस परसंगै च अऊं तुसेंगी इक कथा
सुनानां

राजा लक्षदत्त महादानी : लक्षपुर नगगरै च लक्षदत्त
नां दा इक महादानी राजा राज करदा हा । उदे कोल भामें कोई
वी सोआली आवै ओ उसी लक्ख रपे कोला घट्ट दान नेईं
दिदा हा । ते जेड़ा सोआली राजा कन्ने गल्ल करी लैदा हा
उसी राजा पंज लक्ख रपे दान दिदा हा । जिस भागवान
मनुक्खै पर राजा कदें परसन्न होई जंदा हा उसी ओ नेह् आ
मालामाल करी ओड़दा हा जे उदे जनम - जनमांतर दा दुक्ख-
दलिहर धोता जंदा हा । इसै लेई अपने देसै च ओ लक्षदत्त
दे नां कन्ने परसिद्ध हा । इक वारी उदे मेह्लै दे दरवाजे पर
लब्धदत्त नां दा कोई कार्पटिक आइयै बेई गोआ । उसनै लक्कै
च इक चमड़े दा परना वन्ने दा हा । उदा बाकी शरीर नंगा
हा । उदे सिरै पर जटां हियां । सदीं होयै भामें गर्मी, ओ
इसै भेसै च राजा दे दरवाजे च बैठा रौह्दा हा । राजा नै
उसी केई वारी उत्थें बैठे दे दिक्खेआ । पर कदें उदे मनै च
उसी किश देने दा विचार नेईं आया । इक वारी राजा
शकार खेडने लेई जंगलै च गोआ । ओ जटाधारी कार्पटिक वी
हत्थै च डांग पगड़ियै राजा दे पिच्छें - पिच्छें चली पेआ ।
जंगलै च जाइयै उसनै छड़ी अपनी डांगा कन्ने चित्रें जनेह् मते
भयंकर जानवरें गी फड़काई ओड़ेआ । राजा उदी ब्हादरी
दिक्खियै वड़ा हरान होआ पर फी वी उसनै उसी कोई नाम-
कनाम देने पासै ध्यान नेईं दित्ता । शकार खेडियै राजा
राजधानी गी परतोई आया । ओ कार्पटिक बाबा वी परतोइयै
फी राजमैह्लै दे दरवाजे पर जम्मी गोआ । इक वारी इस
राजा दा अपने शत्रु राजा कन्ने घोर जुद्ध होआ । इस लड़ाई
च कार्पटिक बाबा नै अपनी खैर दी डांगा दे प्रहारें कन्ने
शत्रु दे मते शपाइएँ गी फड़कारेआ । इस राजा गी विजै होई ।

बावे दे विचित्र पराक्रम गी दिक्खियै वी राजा नै उसी किश
 नेईं दित्ता । राजद्वारै पर बैठे दे इस कार्पटिक साधु गी पंज
 व'रे वीती गे । छेमां वरा लग्गी पेआ । इक दिन चानचक
 राजा दे मनै च विचार उट्ठेआ जे इस नांगे बावा नै कष्ट
 स्हारी - स्हारियै इन्ने व'रे मेरी सेवा कीती ऐ पर में इसी अज्ज
 तक किश नेईं दित्ता । की नेईं अऊं किश दान देइयै इदी
 परख करां । केह् गल्ल ऐ जे इस वचारे दे पापें दा अजें
 खै नेईं होआ ते लच्छमी इसी अजें वी दरशन नेईं दिदी ।
 ए सोचियै राजा अपने खजाने च गेआ । उत्थें जाइयै उसनै
 इक नारै दे खोड़ै गी रतनें कन्ने भरेआ । बाह् र आइयै राजा
 नै उस खोड़ै गी शैल करियै बंद करी दित्ता । उसनै इक
 बड़ा दरवार लाया जिदे च वड़े - वड़े सामंत, मंत्री, ऐह्लकार
 ते नगर दे परसिद्ध सेठ शऊकार सब कट्ठे होए । उंदै सामनै
 राजा नै कार्पटिक बावा गी दरवारै च सद्देआ । अपने कच्छ
 सद्दियै राजा नै वड़े प्रेम कन्ने उदे पासै दिक्खेआ राजा उसी
 आखन लगा—बावा जी कोई शैल जनेई कवता सुनाओ । कार्पटिक
 बावे नै राजा दे सामनै इक श्लोक पढ़ेआ जिदा मतबल हा—

जियां नदियां भरे दे समुंदरै गी होर मता भरदियां न,
 इयां गै लछमी धनी पर व'रदी ऐ, निरधन पासै अक्ख चुक्कियै
 नेईं दिखदी ।

ए सुंदर कवता सुनियै राजा बड़ा खुश होआ । उसने रतनें
 दा भरेदा नारै दा खोड़ नागा बावे दे हत्थै च पगड़ाया । सारे
 दरवारी चोह् - मोह् करन लग्गी पे जे दिक्खो यारो ए राजा जिदे
 पर परसन्न हुंदा ऐ उदे जनम - जनम दे दलिहर गी धोई ओड़दा
 ऐ । पर इस कार्पटिक बावे गी राजा ने नार देइयै टरकाई ओड़ेआ
 ऐ । ए अपने - अपने भागें दी गल्ल ऐ । भाग्यहीन मनुक्खै लेई
 कल्पवृक्ष वी अप्पल पलाह् दा बूटा बनी जंदा ऐ । कार्पटिक बावा
 रतनें कन्ने भरे दे नारै दे खोड़ै गी लेइयै मैह्लें थमां बाह् र निकली
 आया । उसी बड़ा दुक्ख होआ जे इन्नी सेवा दे बाद राजा ने उसी

ए नाम दित्ता ऐ। अगूं दा इक भिक्खु आवै करदा हा। कार्पटिक
 ने ओ नार उस भिक्खु गी देई दित्ता। उस सुन्दर फलै गी दिक्खियै
 भिक्खु अपने मनै च सोचन लगा ए बे-मौसमी सुन्दर फल अऊं
 जाइयै राजा गी सुगात दिन्नां। ए फल राजा दे गै जोग ऐ। ए
 सोचियै उसने ओ नार राजा अगें भेंटा ते तौर पर रक्खी दित्ता।
 राजा उस फलै गी पशानियै भिक्खु गी पुच्छन लगा जे संत जी !
 तुसेंगी ए फल कुत्थूं मिलेआ ? उसने जवाब दित्ता—म्हाराज ! ए
 फल मिगी कार्पटिक बावे ने दित्ता ऐ। राजा सोचन लगा, ओहो !
 अजें इस बावे दे पापें दा अंत नेईं होआ। हत्थै च आई दी लछमी
 वी इदे कोला चली गई। दूए दिन ओ बावा पैह्लें आंगर फी
 डटियै बेई गेआ। इक दिन राजा ने फी दरवार लाया। सारे
 ऐह्लकार, वड़े - वड़े नागरिक ते दरवारी अपनी - अपनी जगाह
 पर आइयै बेई गे। कार्पटिक बावा वी आया। राजा ने उसी
 अपने कच्छ बुलाइयै फी ओ श्लोक सुनने लेई आक्खेआ। उसने
 उयै श्लोक फी राजा गी सुनाया। राजा ने खुश होइयै उसी दूई
 वारी रतनें दा भरे दा उयै नार नाम दित्ता। दरवारी फी हरान
 होए ते आपू-चें चर्चा करन लगे जे दानवीर होने पर वी इस
 राजा ने उस बावे गी फी उयै नार नाम दित्ता ऐ। बावे ने ओ
 फल लेआ ते राज-मैह्लै थमां बाह्र आई गेआ। बाह्र निकलदे
 गै उसी इक ऐह्लकार मिलेआ जेड़ा राजा कन्ने मिलने लेई अंदर
 जाकरदा हा। उसने कार्पटिक बावे गी कपड़ें दी जोड़ी देइयै उदे
 कोला राजा दी भेंट ओ नार खरीदी लेआ। ए समजियै जे
 वड़्डें कोल जाना होयै तां फलै दी भेंट शुभ हुंदी ऐ। अंदर
 दरवारै च जाइयै उस ऐह्लकार ने राजा गी जै-देवा करियै ओ
 नार उदे अगें भेंट कीता। राजा दे पुच्छने पर जे ओ फल उसने
 कुत्थूं लेआ। ऐह्लकार ने दस्सेआ जे ओ नार उसने कार्पटिक बावे
 कोला खरीदेआ ऐ। राजा गी सुनियै वड़ा दुक्ख होआ जे अजें वी
 इस बदकिसमत बावे दा भाग नेईं जागेआ। उनें वस्तरें दा
 जोड़ा लेइयै कार्पटिक बजार गेआ। इक वस्तर बेचियै उसने

भोजन कीता । अपना तन ढक्कने लेई उसने दूए कपड़े दे दो टोटे
 वनाए । त्रीयै दिन राजा ने फी दरवार लाया ते पैह्लें आंगर
 कार्पटिक थमां सुभाषित श्लोक सुनियै उसी त्री वारी फी उयै नार
 नाम दित्ता । कार्पटिक ने सुन्ने दी मोहूर लेइयै ओ नार राज-गणका
 दे हत्थ बेचेआ । इस मोहूर गी प्राप्त करियै उस दिन कार्पटिक
 ने शैल - खाई पीयै खूब नंद लुट्टेआ । रात मजे कन्ने बताई ।
 राज-गणका रातीं राजा दे मैह्लें गई । उसने उत्थें राजा गी नार
 भेंट कीता । राजा ने दिक्खेआ जे ए उयै नार ऐ जेड़ा उसने नागा
 वावे गी दित्ता हा । सोचन लगा अजें तक नागे दे पापें दा अंत
 नेई होआ । इस्सै लेई हत्थै च आई दी लछमी वार - वार इदे
 कोला नट्ठै करदी ऐ । चौथी वारी राजा ने फी दरवार सद्देआ
 सारा दरवार हाल खचाखच दरवारियें कन्ने भरोई गोआ ।
 कार्पटिक वावा बी दरवार च आया । राजा ने उसी अपने
 कच्छ सद्दिदयै उयै श्लोक सुनेआ ते परसन्न होइयै उयै नार
 नागा वावे दे हत्थै च पगड़ान लगा । पगड़ां दे -
 पगड़ां दे ओ नार राजे दे हत्था दा छुटियै भुजां डिग्गी
 पेआ । डिग्गे गै नारै दे खंड - खंड होई गे ते उदे अंदर
 भरे दे रतन फर्श पर खिल्लरी गे । उनें रतनें गी दिक्खियै
 दरवारी दंग रेई गे । आपू-चें काना - फूसी करन लगे जे
 अस बे-अर्थ गै राजा दे दान पर नुकता - चीनी करदे हे । इस
 नारै च ते राजा नै अनंत धनराशि भरी दी ही । राजा
 दरवारियें गी आखन लगा - दिक्खो में तुं दे सामने इस नागा
 वावे दी किसमता गी केई वारी परखेआ । त्रै वारी इदे हत्थै
 च आई दी लछमी चली गई । की जे तदू तक इस अभाग
 दे पापें दा खं नेई होआ हा । अज्ज इदे दुरभाग दा अंत
 होई गोआ ऐ । ताइयें लछमी ने अज्ज इसी दरशन दित्ता
 ऐ । राजा ने फर्श पर खिल्लरे दे सारे रतन ते हाथी, घोड़े,
 प्रां देइयै उस कार्पटिक गी सामंत दी पदवी तक पुजाई दित्ता ।

ए कथा सुनाइयै गोमुख नरवाहनदत्त गी आखन लगा -
 युवराज जी ! इस कार्पटिक वावे दे पापें दा बी अजें अंत

नेईं होआ लगदा । तांइयै ए दुक्ख भोगै करदा ऐ । गोमुख दे इस व्यंगपूर्ण कटाक्ख गी सुनियै नरवाहनदत्त ने कार्पटिक गी धन, हाथी, घोड़े, गां, देइयै धनवान करी ओढ़ेआ । ओ हून सेठ आला लेखा ठाठ - बाठ कन्ने रौह्न् लगा ।

किश दिन बीते तां इक्क दक्खनापथ दा गवरू नौकरी लेई युवराज नरवाहनदत्त कोल आया । इस गवरू दा नां प्रलम्बवाहु हा । उसने आइयै युवराज गी परनाम कीती ते आखेआ जे म्हाराज ! साबें दे गुणें ते यश गी सुनियै अऊं सेवा लेई तुं दे चरणें च हाजर होआ आं । अऊं अग - रक्षक दे रूप च साबें दी सेवा करड । जे तुस पैदल चलगेओ तां अऊं तुं दे पिच्छें - पिच्छें तुं दी रक्षा लेई पैदल चलड । तुसैं थोड़े चिरै च विद्याधर - चक्रवर्ती दी पदवी प्रापत करी लैनी ऐ । अने गुजारे लेई अऊं साबें कोला रोज इक्क सौ सुन्ने दिया मोह्ंरं लै करड । नरवाहनदत्त ने प्रलम्बवाहु गी रोजाना सौ सुन्ने दियें मोह्ंरें पर नौकर रक्खी लेआ । इस परसंगै च गौमुख ने युवराज नरवाहनदत्त गी इक्क होर कथा सुनाई जेह्ड़ी इस चाली ऐ—

राजा विक्रमतुंग विक्रमपुर नगरै च विक्रमतुंग नां दा इक्क प्रतापी राजा राज करदा हा । इक्क वारी मालव देश दा रौह्ने आला वीरवर नां दा इक्क तरुण ब्राह्मण नौकरी लेई राजा कोल आया । इदे संग धर्मवती नां दी इदी पतनी, वीरवती पुत्तरी ते सत्यवर नां दा पुत्तर हा । वीरवर कोल राजा दी सेवा करने दे त्रै साधन हे । इदे सज्जे हत्थै च तलवार, खब्बे च ढाल ते लकै च कन्ने दे कमरबंदै च कटार लमकै करदी ही । राजा विक्रमतुंग ने वीरवर गी तनखाऽ बल्ला पुच्छेआ । वीरवर आखन लगा—म्हाराज ! अऊं सेवा लेई सरकारा कोला ५०० सुन्ने दियां मोह्ंरं लै करड । उदे चेह्ंरे पर शूरवीरता दे खास नशान दिक्खियै राजा नै उसी उसै तनखाऽ पर नौकर रक्खी लेआ । राजा गी चरज बभोआ जे

ए ब्राह्मण इन्नी तनखाऽ लेइयै केहू करग । इस गल्ला दा पता करने लेई राजा ने वीरवर दे पिच्छें अपने गुप्तचर छोड़ी दित्त । गुप्तचर खुफिया तौर पर वीरवर कन्ने फिरदे रेहू । सारा भेत मलूम करियै उनें राजा गी पता दित्ता जे वीरवर गी सरकार जेहूड़ी ५०० मोहूरां तनखा दिंदे न उसी ओ इस चाल्ली खरचदा ऐ । इंदे चा सौ मोहूरां ओ घरै दे खर्च लेई अपनी जनानी गी देई दिंदा ऐ । इक्क सौ मोहूरें दे वस्तर - गैहू, ने वगैरा खरीददा ऐ, इक्क सौ मोहूरां शनान - संध्या दे बाद भगवान दी पूजा च खर्च करी दिंदा ऐ । बाकी दो सौ मोहूरां ओ दीन - दुखियें गी दान करी ओड़दा ऐ । इस चाल्ली ओ रोज पंज सौ सुन्ने दियां मोहूरां खर्च करी ओड़दा ऐ । गुप्तचरें दी गल्ल सुनियै राजा गी बड़ा संदोख होआ । ओ समजी गेआ जे वीरवर बड़े चरित्र दा मनुक्ख हा ।

सवेरे कोला दपैहूरीं तक र वीरवर राजद्वार पर सावधान खड़ोता रौहूदा । दपैहूरीं घर जाइयै भोजन करदा ते फी राजद्वार पर आइयै सारी रात डटियै पैहूरा दिंदा । झड़-झक्खड़, अधी - बदल किश वी होयै वीरवर परवतै आला लेखा राजद्वार पर अटल खड़ोता रौहूदा । इक दिन न्हेरी रातीं भयंकर तफान चढ़ी आया । चक्खी घनघोर काले मेघ आई गे । बदलें दी गरज ते विजली दी कड़का कन्ने जमीन ते समान फटन लगी पे । राजा विक्रमतुंग नै राजमैहूलें दे झरोखे चा हेठ नजर फेरी तां उसनै वीरवर गी राजद्वार पर यक्ख-मूर्ति आंगर अटल पैहूरा दिंदे दिक्खेआ । तफान जारी हा ते मूसलाधार वरखा होयै करदी ही । नेहू, भयंकर समै च राजा नै कुसै जनानी दी दर्दनाक रोने दी बाज सुनी । राजा नै झरोखे चा वीरवर गी आखेआ—वीरवर ! दिक्ख इस घोर रातीं बेल्लै कोई दुखी जनानी विलाप करै करदी ऐ । जा पता कर जे ए कुन जनानी ऐ ते की रोयै करदी ऐ ? 'सत वचन' आखियै वीरवर हत्थै च तलवार लेदे उस पासे गी

चली पेआ जिह्वा दा रोने दी वाज आवै करदी ही । ए
 सोचियै जे नेह् औखै बेल्लै इस वीर गी कल्ले भेजना ठीक
 नेईं राजा विक्रमतुंग वी हत्थै च नंगी तलवार लेइयै चुपचाप
 वीरवर दे पिच्छें चली पेआ । रोने दी वाजा दा पीछा
 करदे - करदे वीरवर शैह् रै दे बाह् इक थाऽरै पर पुज्जा ।
 उदै कंठै उसनै बसकी - बसकियै रोंदी - विलाप करदी इक
 रूपवती जनानी गी दिक्खेआ । कोल जाइयै वीरवर नै उस
 जनानी गी उदे रोने दा कारण पुच्छेआ । ओ बोली—अऊं राजा
 विक्रमतुंग दी राजलक्ष्मी आं । में इस राजा दी छत्रछायां च
 मता सुख पाया । अज्जै थमां त्रीयै दिन इस राजा दी मृतु
 होई जाग ते अऊं विधवा होई जाड । इससै औने आली मसी-
 वता गी याद करियै अऊं रोयै करनी आं । राजा विक्रमतुंग
 जनेह् आ पति मिगी कुत्थें मिलना । अऊं दिव्बदृष्टि कन्ने इस औने
 आली विपदा गी दिक्खै करनी आं । राजलक्ष्मी दी गल्ल सुनियै
 वीरवर उसी पुच्छनलगा—माता ! भला नेआ कोई उपा नेईं
 जिदे करी राजा दी मौत टली जा । ओ बोली—पुत्तरा ! इदा
 इक्कै उपा ऐ पर ए बड़ा कठन ऐ । वीरवर नै आखेआ—
 माता ! तुस दस्सो ते सेई ओ केड़ा नेआ उपा ऐ । राजा दे
 प्राण वचाने लेई अऊं अपने ते अपने कुटम्ब दे प्राणें दी वलि
 देने गी त्यार आं । राजलक्ष्मी आखन लगी—पुत्तरा ! जे तू
 इस नेड़े खड़ोते दे चंडी दे मंदरै च देवी अगों अपने हत्थें
 अपने पुत्तरै दी वलि दें तां राजा विक्रमतुंग दी मौत टलो
 सकदी ऐ वीरवर आखन लगा—माता ! ए ते कोई बड़ी गल्ल
 नेईं । अऊं इससै बेल्लै ए उपा करनां । ए आखियै वीरवर
 ततकाल अही रातीं अपने घर गेआ । उदे पिच्छें राजा विक्रम-
 तुंग वी छपदा - छपदा गेआ । वीरवर नै अपनी जनानी ते
 वच्चें गी सुत्ते दै गी जगाया । ते उनेंगी सारी गल्ल दस्सी ।
 जनानी आखन लगी—साढ़े धन्नभाग जे स्वामी दे प्राण
 वचाने लेई मेरे पुत्तर दी जान कम्म आई जा तां । वीरवर दा
 पुत्तरा तत्ववर बोलेआ—पिता जी ! जे मेरा शरीर स्वामी दे प्राण

वचाने दे कम्म आवै तां इदे कोला वधियै इस शरीरै दा होर
 के लाह् होई सकदा ऐ । पुत्तरै दा आखेआ सुनियै वीरवर
 बोलेआ—पुत्तरा ! तू सचमुच गै मेरे अंश कोला पैदा होए दा
 ऐं । ताइयै तू इन्ना शूरवीर ते परोपकारी ऐं । राजा विक्रम-
 तुंग वाह् खड़ोता दा वीरवर ते उदे कुटुम्ब दियां सारियां
 गल्लां सुनै करदा हा । सोचन लगा ओहो वीरवर गै छड़ा
 नेई इदा सारा कुटुम्ब गै चरित्रवान, उदार ते स्वामिभगत ऐ ।
 परंत वीरवर अपनी जनानी, पुत्तर ते पुत्तरी गी लेइयै चंडी दे
 मंदर गी चली पेआ । वीरवर सत्ववर पुत्तरै गी घनाड़े चुक्कियै
 अगें - अगें चलन लगा । उदै पिच्छें उदी पतनी धर्मदत्ता अपनी
 पुत्तरी वीरदत्ता गी उंगली लाइयै चलन लगी पेई । चंडी दे
 मंदर जाइयै वीरवर नै पुत्तरै गी घनाड़े परा थल्लै तुआरेआ ।
 पुत्तर सत्ववर अजें बालड़ा गै हा । ओ देवी गी परनाम करियै
 आखन लगा—हे माता । मेरे तुच्छ शरीर दे बलिदान कन्ने
 साढ़ा स्वामी जींदा रवै । शावा पुत्तरा ! ए आखियै वीरवर नै
 तलवारा दे फट्टै कन्ने सत्ववर दा सिर देवी अगें बलि
 चढ़ाई दित्ता । वीरदत्ता नै जिसेल्लै भ्रा गी मोये दे दिक्खेआ
 तां ओ उदे शरीरै कन्ने चम्बड़ी गई । उदा कलेजा फटी गेआ
 ते ओ बी मुड़दा होइयै धरती पर डिग्गी पेई । पुत्तर ते पुत्तरी
 गी मोए दे दिक्खियै वीरवर दी पतनी आखन लगी—पतिदेव !
 हून तुस मिगी आज्ञा देओ जे अऊं अपने वच्चे कन्ने चिखा
 पर बेइयै इंदै संग गै परलोकै गी जां । इंदे बिना अऊं
 जींदी नेई रेई सकदी । वीरवर नै उत्तर दित्ता—देवी ! तू
 ठीक आखनी ऐं । संतान गी सामनै मरदे दिक्खियै तू किआं
 प्राण धारण करी सकनी ऐं । इसलेई अऊं तेरे लेई चिखा
 वनाई दिन्नां जिसकरी तू इस दुखमय संसार कोला कनारा
 करियै भगवान दे चरण-कमलें च शरण पाए । ए आखियै
 वीरवर नै लक्कड़ियां चिनियै चिखा वनाई । उदे परं अपने
 पुत्तर ते पुत्तरी दिएं लोथें गी धरियै वीरवर दी जनानी नै चिखा
 जलाई । फी धर्मदत्ता नै पति दे चरण छूइयै उदी परदक्खता

लेई । ओ देवी माता अगें प्रार्थना करन लगी—हे माता अगले
 जनम च बी मेरे इयै पति होन ते मेरे पति दे स्वामी राजा
 विक्रमतुंग लम्मी उमर भोगन । ए आखियै वीरवर दी पतनी
 धर्मदत्ता चिखा च कुद्दी पेई । इक छिन भरै च पुत्तर-पुत्तरी
 समेत ओ चिखा च जलियै स्वाह् दा ढेर होई गई । कलेजे
 गी फाड़ने आले इस दारुण दृश्य गी दिक्खियै वीरवर सोचन
 लगा जे स्वामि-भगती रक्षा लेई में अपने कर्तब्व दा पालन ते
 करी ओड़ेआ । दिब्बवाणी नै आखेआ ऐ जे राजा दीर्घायु
 होई गेआ ऐ । स्वामी दा जेड़ा अन्नजल में खाद्दा - पीता हा
 उदा रिन में चुकाई ओड़ेआ ऐ पर मेरा कुटम्ब नष्ट होई
 गेआ ऐ । हून में छड़ा अपना ढिड्ड भरने लेई जीना पसंद
 नेई करदा । इसलेई की नेई अम्मीं अपने सिरै दी वलि
 देइयै माता चंडी गी परसन्न करां । ए आखियै वीरवर नै चंडी
 दा स्तोत्र पढ़ेआ ते देवी अगें अपने सिरै दी वलि चढ़ाने
 लेई खड़ग चुक्केआ । जियां उन्न अपने गले पर तलवारा दा
 फट्ट मारने लेई बांह चुक्की ततकाल दिब्ब वाणी कन्ने गास
 गूँजी उट्ठेआ । भगवती चंडी आखन लगी—पुत्तरा ! ए नर्थ
 मत कर । अऊं तेरे पर अति परसन्न आं । तूं मेरे कछा
 जेड़ा मरजी ऐ वर मंग । ए सुनियै वीरवर नै अर्ज कीती—
 माता ! जे तूं मेरे पर परसन्न ऐं तां मिगी वर देओ जे
 मेरा स्वामी राजा विक्रमतुंग सौ बरे जीऐ ते कन्ने तुंदी
 किर्पा कन्ने मेरी पतनी, पुत्तर ते पुत्तरी सारे जी उट्ठन । दिब्ब
 वाणी बोली—‘तथास्तु’ । देवी दे ‘तथास्तु’ आखदे गै ततकाल
 वीरवर दी पतनी, धर्मदत्ता, पुत्तर सत्ववर ते पुत्तरी वीरदत्ता जी
 पे । वीरवर उनें सबनें गी कन्ने करियै अपने घर उठी आया ।
 उनें गी घर छोड़ियै ओ फी राजद्वार पर सचेत होइयै पैह्रा
 देन लगी पेआ । राजा विक्रमतुंग रातीं आला सारा नाटक
 दिक्खियै वीरवर दै औने दै पैह्लें गै पिछली रातीं दे न्हरे
 च अपने मैह्लें गी परतोई आया । मैह्लें दे भरोखे चा राजा

नै पुच्छेआ—राजद्वार पर कुन पैह्रा देयै करदा ऐ । वीरवर नै उत्तर दित्ता—म्हाराज ! अऊं आं वीरवर । सरकारा दे हुकम मतावक अऊं उस रोंदी जनानी दा पता लैन गेआ हा । पर ओ कोई देवी ही, मिगी दिक्खियै ओ अदृश होई गेई । ए सुनियै पलंगै पर लेटे दा राजा सोचन लगा—आहा ! धन्न ऐ ए विशाल हिर्दे महात्मा ! मेरा इन्ना उपकार करियै बी ए उदा नां तक नेईं लैदा । ए वीरवर समुंदरै आला लेखा इन्ने गंभीर दिलै दा मनुख ऐ जे इदी समुंदरै दी गभीरता कन्ने तुलना करनी बी घट्ट ऐ । मेरे प्राण वचाने लेई जिनन अपनी जनानी, पुत्तर, पुतरी सारा कुटुम्ब बलिदान करी दित्ता । इदा अऊं केहू बदला चुकाई सकनां । सारी रात राजा इस घटना गी सोची-सोचियै विचार सागर च गोते खंदा रेआ । राजा विक्रमतुंग ने दरवार लाया । उसनै सबनै दरवारिये सामने सरकंडे खड़े करी देने आली घटना दा वरणन कीता । वीरवर दे इस अमूर्व बलिदान दी कथा सुनियै सारे दरवारी दंग रेई गे । उनै वीरवर दे विशाल हिर्दे ते बहादरी दी बड़ी परशंसा कीती । राजा ने वीरवर ते उदे पुत्तर सत्यवर दे सिरें पर राजपट्ट बन्ने । अनंत धन - राशि, हाथी घोड़े, गां ते होर मतियां कीमती चीजां देइयै राजा विक्रमतुंग ने वीरवर गी अपने बरोबर राजा बनाई दित्ता । हून वीरवर गी अपने बरोबर राजा बनाई दित्ता । हून वीरवर दे सिरै पर राजें आंगर छत्र, चामर भुल्लन लगी पेआ ।

इस कथा गी सुनाइयै गोमुख नरवाहनदत्त गी आखन लगा—
युवराज जी ! वीरवर समान स्वामि - भगत सेवक संसारै च विरले गै हुंदे न । ए प्रलम्बवाहु तुंदा सेवक बी वीरवर आंगर स्वामि - भगत गै परतीत हुंदा ऐ ।

चौथा तरंग

इक्क वारी नरवाहनदत्त शकार खेढ़ने लेई सेना समेत जंगलै गी गेआ । उदे कन्ने गोमुख ते दूए मंत्री बी गे ।

प्रलम्बवाहु वीर ब्राह्मण सवनें दे अग्गे - अग्गे चलै करदा हा ।
 वनें च जाइयै नरवाहनदत्त रथै पर चढ़ियै शकार खेडन लगा ।
 प्रलम्बवाहु पैदल गै तलवार कन्ने शेरें ते चित्रें दा शकार करै
 करदा हा । उदी दलेरी, शूरवीरता ते वेग गी दिक्खियै युवराज
 गी बड़ा चम्भा लगा । शकार करदे - करदे नरवाहनदत्त थक्की
 गेआ । गोमुख कन्ने रथै पर सोआर होइयै ओ पानी दो तलाशा
 च चली पेआ । रथै दे अग्गे प्रलम्बवाहु पैदल चलै करदा
 हा । अखीर रथ इक्क सरोवर पर पुज्जा । उत्थें युवराज
 नरवाहनदत्त ते उदे साथियों शनान कीता । युवराज नै सरोवरै
 दे इक्क पासै किश विचित्र शकलें आले मनुक्खें गी सुन्ने दे
 कमल चुनदे दिक्खेआ । युवराज बड़ी दिलचस्पी कन्ने उदे
 कच्छ गेआ । ओ विचित्र मनुक्ख इसी पुच्छन लगे - तुस कुन
 ओ ते इत्थें कियां आए ? नरवाहनदत्त नै उनेंगो अपना परिचै
 दित्ता । ओ युवराज गी दिक्खियै बड़े परसन्न होए । ओ
 आक्खन लग्गे जे समुंदरै अंदर नारिकेल नां दा इक्क विशाल
 टापू ऐ । इस टापू च चार परवत न - जिंदे नां मैनाक, वृषभ,
 चक्र ते बलाहक न । अस इनें चौनें परवतें ते बसनीक आ ।
 साढ़े चा इक्क दा नां रूपसिद्धि ऐ की जे ओ भांत - भांत दे
 रूपधारण करने च कुशल ऐ । दूए दा नां प्रमाणसिद्धि ऐ ।
 की जे ओ बड़े ते सूखम प्रमाणें गी मलूम करने दी शक्ति
 रखदा ऐ । त्रीए दा नां ज्ञानसिद्धि ऐ इसलेई जे ओ भूत
 भविक्ख ते वर्तमान गी जानने दी समर्थ रखदा ऐ । चौथे दा नां
 देवसिद्धि ऐ - की जे इन्न सवनें देवतें गी सिद्ध कीता दा ऐ ।
 हून अस इनें सुवर्ण कमलें गी लेइयै गास्सै रस्ते भगवान नारायण
 दी पूजा लेई श्वेतद्वीप जा करने आं । जे तुंदी नारायण दे
 दर्शन करने दी अभलाशा होयै तां तुस बी साढ़े कन्ने चलो ।
 ए सुनियै नरवाहनदत्त गोमुख ते बाकी साथियों गी उत्थें गै छोड़ियै
 चौं दिव्व पुरखें कन्ने नारायण दे दर्शन लैई श्वेतद्वीप गेआ ।
 देवसिद्धि नै नरवाहनदत्त गी अपनी गोदा च बठाई लेआ ।

श्वेतद्वीपै च पुज्जियै युवराज ने शेषशाई भगवान नारायण दे
 दर्शन कीत्ते । भगवान दे कच्छ लछमी बैठी दी ही ते वसुंधरा
 उंदे चरण दवा करदी ही । सामने दिब्व वाहन गरुड बैठा
 दा हा । ते देवता गंधर्व उंदी स्तुति करै करदे हे । नरवाहनदत्त
 ने ध्यान लाइयै मता चिर भगवान दी स्तुति कीती ।
 भगवान परसन्न होइयै देवर्षि नारद गी आखन लगे—नारद जी !
 तुस इससै बेली इंद्र कोल जाइयै उसी आखो जे समुंदर मथने
 दे समै जेड़ियां अपसरां उदे चा निकलियां हियां ओ सब
 भगवान ने तुंदे कोल मानत रक्खियां हियां । देवराज इंद्र गी
 आखो जे भगवान उनें अपसरें गी वापस मंगै करदे न ।
 नारद जी ! तुस उनें अपसरें गी इंद्र दे रथ पर बठाइयै मेरे
 कोल लेई आओ । भगवान दी आज्ञा पाइयै नारद जी ने उंआं
 गै कीता । ओ उनें सारियों अपसरें गी इंद्र दे रथ पर
 बठाइयै श्वेतद्वीप लेई आए । अपसरें आइयै भगवान गी परनाम
 कीती । नारायण नरवाहनदत्त गी आखन लगे—पुत्ररा ! तू
 तौले गै विद्याधर चक्रवर्ती बनने आला ऐ । इसलेई ए सारियां
 अपसरा में तुगी दित्तियां । अज्जै कोला लेइयै तू इंद्रा पति
 होआ ते ए अपसरां तेरियां पतनियां होइयां । तुगी शिव-
 शंकर ने कामदेव दा अवतार बनाया ऐ । ए आखियै भगवान
 नारायण ने इंद्र दे सारथि मातलि गी गलाया - सुन मातलि !
 तू नरवाहनदत्त गी अपसरें समेत उंदे घर पुजाई दे । जिस
 रस्तै ए जाना चाहन उससै रस्तै इनेंगी लेई जा । भगवान
 दी आज्ञा अनसार मातलि ने अपने रथ पर बठाई लेआ ।
 युवराज दे आखने पर रथ नारिकेल टापू गी चली पेआ ।
 उत्थै पुज्जियै युवराज ने अपसराए समेत मैनाक ते बाकी त्रौं
 परवतें पर विहार कोता । इनें परवतें पर सदा वसंत रितुराज
 दा गै राज हा । जिदे करी इंदी दिब्व शोभा ही । साथी चौं
 देवपुत्रें अपने - अपने परवतें दियें रमणीक वन - स्थलियें दे
 युवराज ते उदी पतनियों गी सैल कराए । नरवाहनदत्त इत्थै

त्रै चार दिन रेआ । पंजमें दिन ओ अपसराएं समेत इंद्र दे रथै पर बेइयै मातलि गी आखन लगा जे असें गी उस रस्ते चें हुंदे कोशाम्बी लेई चलो जित्थें गोमुख ते वाकी मेरे साथी मिगी डीकै करदे न । रस्ते च उनें सवनें अपने साथिएं गी कन्ने लेइयै युवराज नरवाहनदत्त कौशम्बी गी परतोआ । इंद्र दे रथै परा उतरियै उसनै मातलि गी विदा कीता ते आपू कन्ने अपसराएं मैह्लै अंदर दाखल होआ ।

अपसराएं गी अपने मैह्लै च छोड़ियै नरवाहनदत्त माता - पिता दे मैह्लै च गेआ ते उत्थै उसने उंदे चरण छूते । वत्सराज ते दोए माता—वासवदत्ता ते पदमावती पुत्तर गी दिक्खियै खिड़ी पे । इन्ने चिरै च गोमुख ते प्रलम्बवाहु बी उत्थै आई निकले । मंत्रियें दे सामने वत्सराज ने युवराज थमां पिछलें दिनें दिएं घटनाएं दी बावत पुच्छेआ । युवराज नै सारा वस्तांत विस्तार कन्ने दस्सेआ । इन्ने चिरै च गोमुख युवराज दिएं नमीं ब्याही दिएं पतनिएं, अपसराएं गी मत्था टकाने लेई वत्सराज ते उदी रानिएं सामनै लेई आया । कुमार दे औने दी खुशी च कोशाम्बी नगरी च थां - थां लाल पताका भुल्लै करदियां हियां । कवि कौशाम्बी दी उपमा इक नारी कन्ने दिदा ऐ । कौशाम्बी सोचदी ऐ कुत्थें अऊं ते कुत्थें अमरावती दियां अपसरां । उनेंगी मेरै अंदर ल्याइयै युवराज नै मिगी इंद्रपुरी बनाई ओड़ेआ ऐ । इस खुशी च ए नगरी पताका रूपी अपनियां वामां लोआरी - लोआरियै नच्चै करदी ऐ । गोमुख नै वत्सराज गी प्रलम्बवाहु दे पराक्रम दियां घटना सुनाइयां ।

इक दिन जिसेल्लै नरवाहनदत्त युवरानी अलंकारवती दे मैह्लै च राम करै करदा हा तां मैह्लै दे बाहुर चानचक तूतियें दे वज्जने दी वाज सुनाई देन लगी पेई । युवराज हरान होइयै अपने सेनापति हरिशिख गी पुच्छन लगा जे ए तूतियां चानचक को वज्जन लगी पेइयां न । हरिशिख नै मैह्लै दे बाहुर जाइयै पता कीता । पता करियै ओ युवराज गी आखन

लगा—म्हाराज ! इस शैहरै च रुद्रदत्त नां दा इक वपारी ऐ ।
 ओ मता सारा समान लेइयै वपार लेई समुद्रद्वीप गेआ हा ।
 औंदे होई रस्ते च तफान औने करी उदा ज्हाज समुंदरै च
 डुब्बी गेआ जिदे च उदा सारा कमाए दा धन नष्ट होई
 गेआ । मुशकल कन्ने उदी अपनी जान बची ते ओ अपने
 घरै गी परतोई आया । अज्ज उसी कौशाम्बी आए दे छे दिन
 होए न । इत्थें औंदे गै उसो अपने घरै दे वागै च दब्बे दा
 इक खजाना मिली गेआ ऐ । इदे मिलने करी कंगाल कोला
 ओ फी मालदार होई गेआ ऐ । अज्ज ओ वपारी वत्सराज
 कोल आया । परनाम करने दे बाद बड़ी बिनै कन्ने ओ वत्सराज
 गी आखन लगा—म्हाराज ! मिगी अपने वागै चा इक भारी
 खजाना लब्बेआ ऐ जिदे च चार करोड़ सुन्ने दियां मोहरां
 शामिल न । जे सरकारा दी मरजी ए तां ए खजाना लेई लैन ।
 वत्सराज हस्सियै उस वपारी गी आखन लगे जे ज्हाज डुब्बी
 जाने करी तेरा सर्वनाश होई गेआ । हून विधाता नै ओ कमी
 पूरी करने लेई तुगी तेरे वजुर्गे दा दब्बे दा खजाना दिता
 ऐ । ए तेरा गै धन ऐ । अस इसी स्वीकार नेई करदे ।
 तुगी लोड़चदा ऐ जे तू इदा धर्म दे अनसार वरताव करें ।
 वत्सराज दे दयापूर्ण वचनें गी सुनियै ओ वपारी उंदे चरणें
 पर डिग्गी पेआ । उयै वपारी हून तूतियें दे वाजें कन्ने मित्तरें
 समेत खुशी कन्ने घरै गी जा करदा ऐ । तूतिण दे चानचक
 वज्जने दा इयै कारण ऐ । हरिश्चंद्र की जवानी अपने पिता
 वत्सराज की दया ते उदारता दे भाव गी सुनियै नरवाहनदत्त
 बड़े चरज कन्ने आखन लगा—धन्त ए विधाता की विचित्र
 गति इक हत्थ कन्ने मनुखै दे धन गी हरी लेंदा ऐ ते दूए
 हत्थ कन्ने उसी दिल खोलिये दिदा ऐ । गोमुख बोलेआ—
 म्हाराज ! दैव की गति सचमुच बड़ी विचित्र ऐ । इस परसंगै
 च अऊं तुसेंगी समुद्रशूर की कथा सुनानां—

प्राचीन - काल की गल्ल ऐ हर्षपुर नां दे कुसै नगरै च

हर्षवर्म नां दा राजा राज करदा हा । इस नगरै च समुद्रशूर नां दा
 इक बड़ा भारी वपारी राँहूदा हा । इक बारी ओ वपार लेई
 जलमार्ग द्वारा समुद्रद्वीप टापू गी गेआ । अजें थोड़ी जनेई
 जल-जात्रा बाकी ही तां समुंदरै च भारी तफान उट्ठेआ ।
 चतरफी काले मेघ छाई गे । बदलें दी गरज ते विजली दी
 कड़का कन्ने मूसलाधार बरखा शुरू होई गई । समुंदर समानै
 अल उछलन लगी पेआ । पर्वताकार भौड़ें पर ज्हाज डूने आला
 लेखा डगमगान लगी पेआ । छिन भरै च ज्हाज पत्थरें कन्ने
 टकराइयै छिन्न - भिन्न होई गेआ । नराश होइयै वपारी नै
 समुंदरै च छाल मारी दित्ती । प्राण बचाने लेई समुंदरै दे
 पानी च जिसेल्लै ओ सटपटा करदा हा तां उदे कोल इक
 मनुखै दी लोथ पानी पर तरदी - तरदी आई गई । उस
 लोथा पर बेइयै हत्थपत्थ मारदा - मारदा ओ वणिया अन्कूल
 बाऊ दा आसरा लेइयै समुद्रद्वीप पासे गी जान लगी पेई ।
 द्वीप उत्थूं दा थोड़ी दूर हा । अखीर ओ तरदा - तरदा उस
 टापू दै कंठै जाई लग्गा । कंठै पर पुज्जियै ओ मुड़दे दी
 पिट्ठा परा उतरेआ । उतरदे - उदरदे उसी इंआं परतीत होआ
 जिआं मुड़दे दे लक्कै च लपेटे दे कपड़े दी गंडी किश बज्जा
 दा ऐ । जिसेल्लै उसनै कपड़े दी गंड खोल्ली तां उसनै उदे च
 इक रतनजड़त अनमोल हार दिक्खेआ । हारै गी दिक्खियै
 उसी ज्हाजै दे नष्ट होने करी धननाश दा दुख भुल्ली गेआ ।
 इस हारै गी लेइयै ओ सुवर्णद्वीप दे कलशपुर नगरै च दाखल
 होआ । उत्थें इक मंदर जाइयै रुक्खें दी ठंडी छाई हेठ बेई
 गेआ । थक्के दा ते ओ ऐ गै हा । बाँदे गै उसी गाढ़ी नीदर
 आई गई । ते ओ सतरेड़ लम्मा पेई गेआ । उदे जिस हत्थें
 च हार हा ओ हत्थ खुल्ली गेआ ते हार साफ लब्बन लगी
 पेआ । इन्ने चिरै च उत्थें राजा दे शपाई आए । सुत्ते दे वपारी
 दे हत्थें च हार दिक्खियै ओ बड़े हरान होए । उदे चा इक शपाई
 दूए गी आखन लगा - ए हार ते राजपुत्तरी चक्रसेना दा ए जेड़ा किश
 दिन होए चोरी होई गेआ हा । ए आदमी जरूर चोर ऐ । शपाई

उस वपारी गी पगड़ियै राजा दे सामने लेई गे । राजा दे पुच्छने
 पर जे हार तू कुत्थू लेआ समुद्रशूर वपारी नै सारी घटना राजा अगमें
 ब्यान करी दित्ती । पर राजा गी उसदी गल्ला पर जकीन नेई आया
 राजा बोलेआ—ए बदमाश भूठ बोलदा ऐ । इयै चोर ऐ । हार इस्सै
 कोला मिलेआ ऐ । इदे च शक नेई जे ए हार राजपुत्तरी दा ऐ ।
 ए आक्खियै राजा उस हारै गी खोलियै अपने दरवारियें गी दस्सन
 लगा । हत्थ पसरियै जियां हारै गी ओ इक दरवारी गी दस्सै
 करदा हा तां इक गिरज गासै चा भवटियै उस हारै गी चुंजा च
 पगड़ियै उप्परै गी उडरी गेई । राजा अग-बबूला होई गेआ । उसने
 नोकरें गी हुकम दित्ता जे इस बदमाशै गी फांसी चाढ़ी देओ ।
 इस कठोर दंड गी सुनियै वणिया व्याकल होएदा रोन लगी पेआ ।
 नराश होइयै ओ अपने इष्टदेवता शिवशंकर दा ध्यान करन लगा ।
 ततकाल आकाशवाणी गूंजी उट्ठी । ओ राजा गी आक्खन लगी—
 राजन् ! इस वचारे वणिये गी मत प्राणदंड दे । ए निरदोश ऐ ।
 ए हर्षपुर दा बसनीक समुद्रशूर नां दा वपारी ऐ । ए वपार लेई तुं दे
 द्वीपै च आया । जिसने राजपुत्तरी दा हार चुराया ओ कोई होर
 मनुक्ख हा । ओ पिछली रातीं समुंदरै च डुब्बियै मरी गेआ हा ।
 इस्सै रातीं इस वपारी दा जहाज समुंदरै च डुब्बेआ । इसनै जहाजै
 गी डुवदे दिक्खियै समुंदरै च छाल मारी ओड़ी । डुवदे - डुवदे
 इसी चोरै दी लोथ हत्थ लग्गी गेई । उदी पिट्ठा पर बेइयै हत्थ-
 पैर मारियै तरदा - तरदा ए वपारी इस टापू दे कंठे आई लग्गा ।
 चोरै दी पिट्ठा परा उतरदे बेल्लै इसी उदे परने दी गंडी बज्जा
 दा ए हार मिलेआ । इसलेई ए वणिया चोर नेई ऐ, इसी छोड़ी
 देओ । इस आकाशवाणी गी सुनियै राजा ने समुद्रशूर वपारी गी
 छोड़ी दित्ता ते मृगता सारा धन देइयै उदा आदर - सतकार वी
 कीता । राजा दे दित्ते दे धनै कन्ने वपारी ने सुवर्ण द्वीपा दा
 मता विदेशी माल खरीदेआ । परंत जहाजै च सोआर होइयै समुंदर
 पार कीता । जलयात्रा समापत करियै ओ इक सुदागरें दे जत्थै
 (सार्थवाह) कन्ने थलै दे रस्तै अपने नगर हर्षपुर परतोन लगा ।
 चलदे - चलदे ओ वपारियें दा जत्था संज्ञा बेल्ले इक वीयावान

जुआड़ा च पुज्जा । इत्थें उनें रातीं दे वसां लेई पड़ां रक्खी । अही रात होई तां चानचक्क भीलें दी सेना ने इंदे पर हमला करी दित्ता । सारे कैपा च अफरा - तफरी पेई गेई । मौका पाइयै समुद्रशूर न्हरे च कैम्प थमां खिसकियै इक वोहूड़ा दे दरखत पर चढ़ियै पत्तरें च छप्पियै बेई गोआ । वपारिये दे कैम्प गी लुट्टियै भीलें दी सेना कुसै पाससै गी चली गेई । बाकी दी रात समुद्रशूर ने उससै रुक्खै पर बताई । सवेरै लो लगदे गै उसने सरसरी नजरा कन्ने उप्परै गी दिक्खेआ । उत्थें रुक्खै दी टीसी पर गिरजा दा आलड़ा हा । समुद्रशूर गी आलड़े च कोई चमकदी चीज लब्बी । उसने जरा उप्पर पलांवियै उस आलड़े गी धरोइयै दिक्खेआ तां ए मलूम करियै उदे चरजै दा ठकाना नेई रेआ जे आलड़े च पेई दी चमकदी चीज उयै राजपुत्तरी दा हार हा जिसी सुवर्णद्वीप दे राजा दे हत्था चा भपटा मारियै गिरज गासै गी उड्डरी गोआ हा । इस हारै गी प्रापत करियै ओ फी अनसम्ब धन दौलत दा मालक होई गोआ । इस हारै गी अपने टल्लें च छपालियै चलदा - चलदा ओ हर्षपुर पुज्जा । समुद्रशूर वपारी कोल हून इन्ना धन होई गोआ जे उसी होर कमाई करने दी लोड़ नेई रेई । बाकी जीवन उसने अपने मित्तरें ते सरबधियें च बड़े मजे कन्ने गुजारेआ ।

ए कहानी सुनाइयै गोमुख नरवाहनदत्त गी आवखन लगा—
युवराज जी ! दिक्खो मनुक्खें दे भागें दे विचित्र मोड़ । समुद्रशूर दा समुंदरै च ज्हाज गरक होना, मुड़दे दी पिट्ठा पर बेइयै समुंदर तरना, मुड़दे दे परने चा रतन - जड़त हार दा मिलना, हार दे कारण प्राणदंड, इस दंड थमां वचना, गिरज द्वारा हार दा अपहरण, सुवर्णद्वीप दे राजा कोला धन दी प्राप्ति, घरै गी परतोना, रस्ते च भीलसेना द्वारा सर्वस्व हरण, फी गिरजा दे आलड़े चा उससै हार दा मिलना । भागें दी इस वचित्तर गति गी कुन समझी सकदा ऐ ?

दूए दिन जिसेल्लै नरवाहनदत्त सभा च बैठा दा हा तां

समरतुंग नां दा राजपुत्तर युवराज गी आखन लगा—म्हाराज ! मेरे शरीक संग्रामवर्ष नै वीरजित ते बाकी त्रौं पुत्तरें दी स्हायता कन्ने मेरा देश जित्ती लेआ ऐ । अऊं हून जाइयै उनें अपने पंजें शरीकें गी वन्तियै साबें सामनै लेई औना । अऊं साबें गी ए खबर देन आयां । युवराज नै उसी अपनी सेना दी मदत देनी चाहो पर ओ वगैर मदत ले अपने थोड़े जनेह्, शपाइयें कन्ने गै चली गेआ । उत्थें जाइयै उसने अपने बाहुवल कन्ने उनें पंजें शत्रुएं गी जित्तेआ ते उनेंगी वन्तियै नरवाहन-दत्त कोल लेई आंदा । युवराज नै उस अपने वीर सेवक दी बड़ी सराहना कीती । ए दिक्खियै गोमुख युवराज गी आखन लगा—म्हाराज ! अऊं तुसेंगी राजा चमरवाल दी कथा सुनानां—

पुराने जमाने दी गल्ल ऐ हस्तिनापुर नगरै च चमरवाल नां दा इक्क प्रतापी राजा शासन करदा हा । उदे समरवाल ते होर मते सारे शरीक हे । इनें शरीकें मिलियै राजा दे विरुद्ध इक्क शङ्खजंत्र रचेआ । इनें सलाह् कीती जे राजा चमरवाल असेंगी कल्लें - कल्लें गी जुद्ध च जित्ती लैदा ऐ । की नेईं अस सारे मिलियै इदे पर चढ़ाई करियै इसी जित्ती लैचै जिसकरी साढ़े रस्ते चा ए कंडा सदा लेई हटी जा । ए सोचियै इनें जोतशी गी पुच्छेआ जे नेआ शुभ म्हरत दस्सो जिदे च साढ़ा शत्रु पर हमला सफल होयै । जोतशियें विचारियै दस्सेआ जे इस व'रे दे अंदर कोई नेआ शुभ म्हरत नेईं मिलदा । जे तुसें बिना म्हरत दे चढ़ाई कीती तां तुं दी हार होग । जे तुसेंगी जकीन नेईं औंदा तां अऊं तुसेंगी दौं बणिण् दी कथा सनानां, ध्यान देइयै सुनो—

प्राचीन समै च कौतुकपुर नां दे नगरै पर बहुसुवर्णक नां दा राजा शासन करदा हा । यशोवर्मा नां दा इक्क शूरवीर क्षात्री उदा सेवक हा । राजा भामें दानी हा पर ओ इसी अपने सेवक गी किश नेईं दिदा हा । जद्द ए सेवक राजा

कोला किश मंगदा तां राजा सूरजै पाससै सैनत करियै उसी
 आखदा—भलेआ - लोका अऊं ते तुगी देना चाहनां पर सूरज
 भगवान मिगी दान नेईं देन दिदे । यशोवर्मा वचारा चुप
 करी रौहदा । ओ हून मौके की ताड़ा च दिन गुजारन लगा ।
 इक वारी सूरज ग्रैहण दा समां आया । सूरज ग्रैहण दे दिन
 राजा बहुसुवर्णक ने ब्राह्मणें ते दीन - दुखियें गी दान देना शुरू
 कीता । उस बैल्लै यशोवर्मा वी राजा कोल जाई पुज्जा । ओ
 राजा गी आक्खन लगा म्हाराज ! जेह्ड़ा आदित्यदेव तुसेंगी
 मिगी दान देने थमां रोकदा ऐ उसी अज्ज राहु - राक्षसै ने
 ग्रसी लेदा ऐ । इसलेई अज्ज ते मिगी दान देगे । ए सुनियै
 राजा बहुसुवर्णक ने हस्सियै यशोवर्मा गी वस्तर, सुन्ना ते होर
 कीमती चीजां दान दित्तियां । खर्च करदे - करदे जदू ए दान
 लेआ दा सारा धन खतम होई गेआ ते राजा ने होर किश नेईं
 दित्ता तां यशोवर्मा गी बड़ा दुख होआ । उनें दिनें च गै
 यशोवर्मा दी अपनी पतनी दा काल होई गेआ । इस कारण
 विध्याचल चली गेआ । उत्थें जाइयै सोचन लगा—इस दशा च
 मेरे जीने दा के लाह् । जां ते अऊं मन चाहेआ वर प्राप्त
 करड जां भगवती दे सामनै अपना शरीर त्यागी ओड़ड ।
 ए निश्चै करियै ओ देवी दे सामने कुशा दे आसनै पर जम्मियै
 बेई गेआ ते निराहार भगवती दी राधना करन लगा । उदी
 राधना थमां पसन्न होइयै देवी उसी सुखने च लब्बी ते आक्खन
 लगी—पुत्तरा ! अऊं तेरे पर अति - परसन्न आं । तूं मिगी दस्स
 जे तूं केह् चाहना ऐ अर्थश्री जां भोगश्री । यशोवर्मा बोलेआ—
 माता ! मिगी इनें शब्दे दे अर्थ दा पता नेईं, अऊं केह् मंगां ।
 किर्पा करियै मिगी दस्सो जे अर्थश्री केह् हुंदी ऐ ते भोगश्री केह् ।
 ए सुनियै देवी आक्खन लगी—पुत्तरा ! तेरे नगगरै च भोगवर्मा
 ते अर्थवर्मा दो महाजन रौहदे न । तूं जाइयै इनें वणियें दे
 रैह् न - सैह् न गी दिक्ख ते भोगश्री ते अर्थश्री दोनें शब्दे दे

अर्थ गी समजियै फी इत्थें आइयै मेरे कोला वर मंग । दूयै
 दिन यशोवर्मा ने अपना वर्त पोआरेआ । किश खाई - पीयै ओ
 अपने नगर कौतुकपुर गी वापस गेआ । उत्थें पुज्जियै पैह्लें
 ओ अर्थवर्मा वणिये दे घर गेआ । उसने दिक्खेआ जे उदे घर दी
 शोभा बड़ी मन - मोहनी ऐ । अनसम्ब धन कमाइयै वणिये
 ने अपने घरै गी राज - मेह्लै थमां वी मता सजाएदा ऐ । जिह्म
 नजर मारो सुन्ने चांदी दे समाने दे ढेर लग्गे दे न । यशोवर्मा
 जिसेल्लै घरै अंदर प्रवेश कीता तां अर्थवर्मा ने उदा बड़ा आदर-
 सतकार कीता । दपह्मर होई तां अर्थवर्मा ने यशोवर्मा गी
 भोजन लेई सद्देआ । यशोवर्मा दे अग्गें पकवान मिष्ठान्न ते
 षडरस भोजन परोसे गो । यशोवर्मा ने शैल रज्जियै भोजन
 कीता । पर अर्थवर्मा दे सामने जेह्ड़ा भोजन परोसेआ गेआ
 उदे च सुक्के सत्तू, किश भत्त, मास ते सलूने हे । यशोवर्मा
 ने अर्थवर्मा गी पुच्छेआ—सेठ जी ! तुंदै कोल अनसम्ब धन ऐ
 पर तुस ए रुक्खा - सुक्का भोजन करदेओ । सेठ ने जवाब दित्ता ।
 यशोवर्मा जी मिगी मंदाग्नि दा बड़ा कसूर ऐ । किश नेईं
 पचदा । अऊं छडे सुक्के सत्तू ते रुग्ग भर सुक्का भत्त खन्नां ।
 अज्ज तुंदै सामने में थोड़ा मास ते किश सलूना वी खाई बैठा
 आं । पर मिगी डर ऐ जे ए स्वाद मेरे अंदर खराबी पैदा नेईं
 करन । रातीं दे भोजन दे बेल्लै वी इयां गै होआ । जियां
 दिनै दे भोजनै बेल्लै होआ हा । यशोवर्मा ने शैल चंगे - चंगे
 पदार्थ खादे पर अर्थवर्मा ने उयै सुक्के - सत्तू ते रुक्खा भत्त
 खादा । यशोवर्मा मनै च सोचन लगा—नेह् धनै गी के करना
 जेह्ड़ा कमाने आले दे कम्म नेईं आवै । रातीं अर्थवर्मा ते ओह्
 इक्कै कमरै च सुत्ते । अही रातीं यशोवर्मा ने सुखने च दिक्खेआ
 जे मते सारे डरौने मनुक्ख हत्थें च डंडे लेइयै उस घरै च
 आई वडे न । उनें औंदे गै अर्थवर्मा गी पैरें दा पगड़ियै पलंगै
 परा थल्लै त्रट्टेआ फी डंडे - सोटें कन्ने उसी मारना शुरू करी
 दित्ता । मारदे - मारदे ओ अर्थवर्मा गी पुछदे जंदे हे—
 ओऐ वदमाशा ! तू अज्ज तोला भर घ्यौ, मास ते सलूना

की खादे । तेरे भागै च ते सुक्के सत्तूँ ते रुग्ग भर रुक्खा भत्त
 गै लिखेदा ऐ ! ए आक्खियै उनें सेठै दे ढिङ्ङा चा ओ सारा
 भोजन कड्ढी लेआ जेह्ङा उसने अज्ज वधीक खादा हा ।
 ए सुखना दिक्खियै जिसेल्लै यशोवर्मा दी अक्ख खुल्ली तां
 उसी पता लग्गा जे अर्थवर्मा सेठ ढिङ्ङा - पीड़ा कन्ने तड़फै करदा
 ऐ । उसी केआं आबै करदियां न जिदेकरी उदा सारा
 खादा - पीता वाहूर निकली गोआ ते उसदी ढिङ्ङ-पीड़ा हटी गेई ।
 उदा मन किश ठकाने आया । यशोवर्मा सोचन लग्गा लानत ऐ
 नेह् धनै गी ते अर्थश्री गी जिदा मनुक्ख भोग नेईं करी
 सकदा । इस्सै चिंता च उस्सने वाकी रात सोच - चिंता च गै
 कट्ठी । सबेरा हुंदे गै ओ सेठ अर्थवर्मा दा धन्नवाद करियै उदे
 कोला विदा मंगियै उस घरा दा वाहूर आई गोआ । सोचन
 लग्गा हून मिगी भोगश्री आले भोगवर्मा दे घर जाना लोड़चदा
 ऐ, ए दिक्खन जे उदा रैहून - सैहून कनेह् आ ऐ । ए सोचियै
 यशोवर्मा भोगवर्मा दे घर पुज्जा । भोगवर्मा ने इदा बड़ा सतकार
 कीता ते उसी अपने घर ठराह्या । यशोवर्मा गी पता लग्गा
 जे भोगवर्मा दा घर वड़ा सधारण ऐ । उत्थै धन - सम्पत्ति दी
 नेईं भलक नेईं ही जनेईं उन्न अर्थवर्मा सेठै दे घर
 दिक्खी ही । यशोवर्मा दे दिखदे - दिखदे भोगवर्मा ने कुसं
 वपारी दे घर पंदा माल जवानी खरीदियै कुसै हूए वपारी अगों
 जादै मुल्लै पर वची ओड़ेआ । ए सौदा करने करी बिना
 पैसे खरचे उसनै बैठे - बैठे केई सौ सुन्ने दियां मोहूरां कमाई
 लेइयां । इस कमाई चा ५० मोहूरां अपने नौकर गी देइयै उसने
 वजारा दा भांति - भांति दियां खाने - पीने दियां चीजां मंगार्इ
 लेइयां । इनें चीजें दे औने पर भोगवर्मा दी जनानी शैल-शैल
 स्वादिष्ठ भोजन बनान लगी । पर इन्ने चिरै च भोगवर्मा दा
 इक्क मित्तर आइयै उसी आक्खन लग्गा—वर्मा जी तुस चलो अज्ज
 साढ़ै घर । अज्ज साढ़ै घर किश मित्तर आए दे न । अस सारे
 कट्ठे भोजन करगे । भोगवर्मा ने जवाव दित्ता अऊं अज्ज
 तुं दे घर कियां जाई सकनां । साढ़ै घर परौहूना आए दा ऐ ।
 मित्तर बोलेआ—वर्मा जी ! जेड़े तुं दे परोहूने न ओ साढ़ै बी

परौहूने न । उंदे लेई साढ़े घर भला भोजन नेई । मित्तर
 दे वार-वार आक्खने पर भोगवर्मा यशोवर्मा गी कन्ने लेइयै
 मित्तर दै घर गेआ । दोनैं उत्थें शैल पदार्थ खाद्दे ते मधुजल-
 पान कीते । भोजन करियै भोगवर्मा अपने परौहूने यशोवर्मा
 कन्ने घर उठी आया । रातीं फी घर आइयै दोनैं स्वादले दे
 थिंदे पदार्थ रज्जियै खाद्दे । रातीं दोए सेई गे । पलंग पर लेटे
 दे भोगवर्मा ने नौकरै गी पुच्छेआ जे तू पानी दा घड़ा अंदर
 आइयै रक्खी दित्ता ऐ जां नेई । रातीं त्रेहू लग्गी तां पानी कुत्थू
 पीना । नौकर आक्खन लगा—म्हाराज ! अज्ज मेरे थमां भुत्तल
 होई गेई, पानी नेई भरी सकेआ । दोयै सेई गे । अही राती
 यशोवर्मा गी फी सुक्खना आया । उसने सुक्खने च दिक्खेआ
 भोगवर्मा दे घर आदमी आई वड़े न । उंदे चा दो-त्रै आदमी
 सवनें दे अगें चलै करदे हे । वाकी उंदे पिच्छै हे । पिच्छें
 चलने आले मनुक्खें दे हत्थें च डंडे हे । ओ अगें चलने आले
 मनुक्खें गी पुच्छै करदे हे जे तुसें अज्ज सुराही च पानी की नेई
 भरेआ । ए आखियै उनें अगें चलने आले मनुक्खें गी डंडे
 कन्ने मार चाढ़ी । मार खाइयै अगले आदमी पिछले शपाइयै
 कोला माफी मंगन लगै । परंत ओ सारे आदमी भोगवर्मा दे
 घरा दा बाहूर निकली गे । इन्ने चिरे च परभात होई गेई ।
 यशोवर्मा दी अक्ख खुल्ली गेई । ओ सोचन लगा भोगवर्मा दे भागें
 च धनै दा भोग लिखे दा ऐ । इसी विना चिंता दे सारे भोगने जोग
 पदार्थ मिलीं जंदे न । इसलेई अऊं समझनां भोगश्री अर्थश्री
 कोला उत्तम ऐ । इदे च कोई संदेहू नेई । भामें किन्ना बी
 धन होयै भोग दे वगैर सब बेअर्थ ऐ । भोग समेत थोड़ा
 धन बी श्रेष्ठ ऐ । ए सोचदे-सोचदे दिन चढ़ी आया ।
 यशोवर्मा ने भोगवर्मा दा धन्नवाद करियै उदे कोला विदा मंगी ।
 उदे घरा दा निकलियै ओ विध्याचल गी परतोआ । उत्थें
 विध्यवासिनी दे मंदर जाइयै ओ भगवती अगें प्रार्थना करन
 लगा—माता ! मिगी अर्थश्री नेई लोडचदी, मिगी किर्पा करिये
 भोगश्री देओ । उदी प्रार्थना सुनियै देवी ने 'तथास्तु' आक्खियै

उसी भोगश्री दावर दित्ता । उस दिनै कोला लेइयै यशोवर्मा
गी देवी दी किर्पा कन्ने बिना चिंता दे सारे भोग्य पदार्थ
मिलन लगी पे जिंदे करी उदा जीवन बड़े आनंद कन्ने
बीतन लगा ।

ए कथा सुनाइयै जोशती समरवाल गी आक्खन लगा—तुस
राजा चमरवाल दी भोगहीन सम्पत्ति गी दिक्खियै मनै च जलै
करदे ओ । तुस अपनी दान ते भोगवाली सम्पत्ति कन्ने संदोख
की नेईं करदं । तुस चमरवाल दी भोगहीन सम्पत्ति गी लेइयै
केहू करगेओ । इसलेईं तुसेंगी उदे पर चढ़ाई नेईं करनी
लोडचदीए । शुभ म्हरत नेईं होने दे कारण इस बेल्लै तुंदी
विजै दी कोई भेद नेईं । जोतशी दे रोकने पर बी उनें राजा
चमरवाल पर चढ़ाई करी दित्ती । जिसेल्लै राजा चमरवाल
गी खबर मिली जे समरवाल ने मेरे पर चढ़ाई करी दित्ती ऐ
उसने शनान करियै बड़ी शर्दा कन्ने शिवशंकर दी पूजा कीती ते
उंदी स्तुति च स्तोत्र पाठ कीता । उसै बेल्लै काशवाणी ने
राजा गी दलासा दित्ता जे जुद्ध च तेरी विजै होग । ए सुनियै
परसन्न - चित्त राजा सेना तयार करियै शत्रु कन्ने जुद्ध करने लेईं
अपने देश दी सीमा अल चली पेआ । सीमा प्रांत पर दोनों
फौजें दी जबरदस्त टक्कर होई । शिवें दी किर्पा कन्ने चमरवाल
दी थोड़ी सेना ने बी समरवाल गी करारो शकस्त दित्ती ।
राजा चमरवाल ने समरवाल ते उदे पंज्रै पुत्तरें गी कैदी बनाई
लेआ । इस विजै द कारण अनंत धनराशि ते जुद्ध - समग्री
विजेता दे हत्थ लग्गी । इंदियां रानियां बी राजा दे हत्थ आई
गेइयां । इंदे च राजा प्रतापसेन दी पटरानी यशोलेखा परम
रूपवती ही । किश दिनें परंत यशोलेखा दे आक्खने पर राजा
ने पजै कैदी राजा छोड़ी दित्ते ते अधीनता स्वीकर करने पर
उंदे खुस्से दे राज बी उनेंगी वापस देई दित्ते । परन्त
चमरवाल ने यशोलेखा गी अपनी पटरानी बनाइयै मता चिर
सुख चैन दा निष्कंटक राज भोगेआ ।

ए कथा सुनाइयै गोमुख नरवाहनदत्त गी आक्खन लगा —

म्हाराज ! इक्क वी धीर दे दलेर मनुक्ख अपने भुजवल कन्ने अनेक मंदबुद्धि अभमानी राजाए गी जित्तियै अपने अधीन करी लेंदा ऐ ।

पजमां तरंग

दूयै दिन जिसेल्लै युवराज नरवाहनदत्त युवरानी अलंकार-वती दे मैह्लै च बैठा दा हा तां मरुभूति मंत्री दे नौकरै ने आइयै शकायत कीती जे म्हाराज में मंत्री मरुभूति दी दो व'रे सेवा कीती ऐ । इनें मिगी ते मेरी जनानी गी रुट्टी, टल्ला ते दिक्ता ऐ पर मिगी दो व'रें दी तनखाऽ नेईं दिक्ती । इनें व'रे दियां पत्राह् सुन्ने दियां मोह्-रां मेरी तनखा मकरं कीती ही । दौ व'रें दियां सौ मोह्-रां अजें तक मिगी नेईं मिलियां । अज्ज में जडू इंदे कोला अपनी तनखाऽ मंगी तां इनें मिगी ठुड्डे मारियै घरा दा वाह्-र कड्डी लाया । अऊं हून राजद्वारै पर अन्नजल छोडियै प्राण त्यागी देड जां अग्गी च जली मरड । ए शकायत करियै नौकर चुप होई गोआ । मरुभूति उत्थै गै युवराज कोल बैठा दा हा । आखन लगा—म्हाराज ! में इदो दौ व'रें दा तनखाऽ इक्क सौ मोह्-रा देनियां जरूर न पर मजबूर आं इस बेल्लै मेरे कोल इन्नी रकम है नेईं । फी देई देड । मरुभूति दी गल्ल सुनियै सारे मंत्री गड़ाका मारियै हस्सी पे । युवराज मरुभूति गी आखन लगा—भेई ! ए कनेई मूर्खता ऐ । जाओ ते हूनै मेरे सामने इदी तनखाऽ देई देओ । मरुभूति बड़ा शर्मिदा होआ । उसै बेल्लै ओ गोआ ते तुरत वापस आइयै उसनै सौ मोह्-रा दौ व'रें दी नौकरै दी तनखाऽ भट उसी देई दिक्ती । ए दिक्खियै गोमुख नरवाहनदत्त गी आखन लगा—म्हाराज ! इदे च मरुभूति दा कोई कसूर नेईं । विधाता दी सृष्टि च वक्ख-वक्ख सुभा ते विचित्र प्रकृति दे मनुक्ख न । इस परसंग च गो अऊं साबें गी राजा चिरदाता ते उदे सेवक दी कहानी सुनानां ।

राजा चिरदाता : चिरपुर नगरै च चिरदाता नां दा
 इक्क राजा राज करदा हा । आपू उदा सुभा चंगा हा पर
 उदे परिवार दे लोक कचे सुभा दे हे । इस राजा कोल
 प्रसंग नां दा इक्क मनुक्ख अपने दो मित्तरें समेत आइयै नौकर
 होई गेआ । राजा दी सेवा करदे इनेंगी पंज ब'रे बीती गे पर
 राजा ने इनेंगी तनखाऽ नेईं दित्ती । राजा दे घर केई उत्सव बी
 होए पर इनें मौकें पर बी राजाने उनेंगी किश नाम - कनाम
 नेईं दित्ता । राजा दे कोल रौह् ने आले ऐह्लकारें दी दुरजनता
 दे कारण इनें नौकरें गी राजा अगें अर्ज करने दा मौका
 बी नेईं मिली सकेआ । इक वारी चानचक राजा दा वालड़ा
 पुत्तर मरी गेआ । राजा अति दुखी होई गेआ । इदे कोल
 रौह् ने आले दुरजन ऐह्लकारें इसी घेरी लेआ । इंदे च प्रसंग
 बी जाई संजरेआ । ओ राजा दे पुत्तर दी मौता पर दुक्ख प्रगट
 करदा आखन लगा—म्हाराज ! असेंगी सरकार दी नौकरी
 करदे पंच ब'रे होई गे न पर अजें तक असेंगी सरकारा कोला
 जीवका लेई किश नेईं मिलेआ । फी बी अस इस आसा कन्ने
 साबें दी नौकरी करदे जा करदे हे जे साबें दा राजकुमार
 बड्डा होइयै कदें साढी सुध लैग । भगवान ने इसी बी जीदा नईं
 रौह् न दित्ता । तां हून साढा इत्थें रेइयै केह् कम्म । ए आक्खियै
 प्रसंग ने राजा गी परनाम कीता । परंत ओ अपने दोनैं साथियें
 समेत मैह्ला थमां वाह् र निकली आया । उंदे उठी जाने वाद
 राजा सोचन लगा ए मेरे किन्ने सच्चे सेवक हे । इन्ना चिर
 मेरे थमां इनेंगी किश नईं मिलेआ फी बी ए मेरे पुत्तर च आस
 लाइयै मेरी सेवा करै करदे हे । नेह् सेवकें गी नेईं जान देना
 चाहीदा । ए सोचियै राजा ने उनेंगी वापस बलाया । धन -
 सम्पति देइयै राजा ने इनें सेवकें गी नेआ रजाया जे सारी उमर
 दरिद्रता उंदे नेईं नेईं फड़की ।

ए कथा सुनायै गोमुख आखन लगा—युवराज जी !
 मनुक्खें दे सुभा बड़े विचित्र हुंदे न । राजा चिरदाता नै स्वस्थ

दशा च ते अपने नौकरें गी किश नेईं दित्ता पर पुत्तर दे मरी जाने पर शोक दी दशा च मता किश दित्ता ।

नरवाहनदत्ता दे आखने पर गोमुख नै इक होर कहानी युवराज गी सुनाई ।

राजा कनकवर्ष : प्राचीन समै च गंगा दे कनारै कनकपुर नां दा इक सुंदर नगगर वस्से दा हा । ए नगगर कनकवर्ष राजा दी राजधानी ही । राजा नागेंद्र वासुकि दे पुत्तर प्रियदर्शन दा पुत्तर हा । इदी माता दा नां यशोधरा हा । कनकवर्ष परम रूपवान बांका जोआन सारिएं कलाएं ते गुणें दा मूर्तिमान रूप हा । इक बारी शरद ऋतु दे सुहाने समै ओ अपने रंग-मैहलै च दाखल होआ ते वड़े ध्यान कन्ने भित्ति-चित्रें गी दिक्खन लगा । इन्ने चिरै च प्रतीहार नै आइयै खबर दित्ती जे विदर्भ देसा दा शेलदेव नां दा इक विचित्र चित्रकार चित्रकला च अपने - आपगी बड़ा सिद्धहस्त आखदा ऐ । ओ सरकारा दे दर्शन करना चाह्दा ऐ । राजा दी आज्ञा पाइयै प्रतीहार शेलदेव गी रंग - मैहलै च लेई आया । शेलदेव नै आइयै राजा दा अभिवादन कीता । राजा नै उदा सत्कार कीता ते आसनै पर बठाय़ा । गल्लबात दे सिलसले च शेलदेव राजा गी आखन लगा—महाराज ! में राजमैहलै दे बाहूर अपनी परशंसा च जेड़ा विज्ञापन लाया हा उदा अभप्राय ए नेईं हा जे मिगी अपनी कला दा अभिमान ऐ । उदा मतबल ए हा जे सरकारा कन्ने मेरी तुरत मुलाकात होई सकै । मिगी दस्सो जे में किस - किसम दा चित्र बनाइयै सरकारा अगें पेश करां । राजा बोलेआ—चित्रकार जी ! तुस अपनी पसंदा दा कोई चित्र बनाइयै दस्सो, जिसी दिक्खियै साढ़ा मनोरंजन होयें । तुंदी कला दे विशें च असेंगी कोई शक्क-शुभा नेईं । राजा दा वचन सुनियै उंदे कोल बैठे दे सारे दरवारी चित्रकार गी आखन लगे—चित्रकार जी ! तुस साढ़े स्वामी महाराज हुंदा गै चित्र बनाओ । इदे कोला बधियै चित्र बनाने दा होर

शैल विशै के होई सकदा ऐ । ए सुनियै चित्रकार शैलदेव नै
 किश चिरै च गै महाराज दा सच्चा - सच्चा चित्र तयार करी
 दित्ता । इस चित्रै च राजा दे शरीरै दा कुदरती शलैपा ते
 सूखम विलक्षणता चित्रकार नै बड़ी बरीकी कन्ने दस्सी दियां
 हियां । इस चित्र गी दिक्खियै सारे दरबारी वाह् - वाह् करन
 लगी पे ते आखन लगे इस तसवीरा च अस अपने महाराज
 गी कल्ले दिक्खनां पसंद नेईं करदे । इन्दे काने रंग-मैह्ल
 च चित्तरी दिएं राजपुत्रिएं चा उस राजपुत्तरी दा चित्र बी
 बनाओ जेड़ी साढ़े महाराज दे मेल दी होयै । चित्रकार नै
 जवाब दित्ता जे रंग - मैह्ल दे भित्तिचित्रें पर लिखी दिएं
 राजपुत्रिएं च इक बी महाराज दे मेल दी नेईं । भूमंडल
 च इक्कै राजपुत्तरी इंदे मेल दी ऐ ते ओ ऐ विदर्भदेश दे
 राजा देवशक्ति दी धी राजकुमारी मदन सुंदरी । विधाता नै
 उसी नेआ रूप दित्ता ऐ जे उसी बनाइयै नेहो रूपवती दूई
 कुमारी बनाने दी उदी हिम्मत नेईं पेई । उयै इक राजपुत्तरी
 ऐ जेड़ी रूप, गुण, शील ते सुभा च साबें दे अनुरूप ऐ ।
 उस राजकुमारी नै कुतूँ दा सरकारा दे रूप ते गुणें दी
 चर्चा सुनी लेई दी ऐ । जिदे करी ओ तुसेंगी पतिरूप च
 पाने गी व्याकुल होई उट्ठी दी ऐ । अऊं साबें दी परखा
 लेई उस राजकुमारी दा चित्तर बनाइयै लेई आए दां । ए
 आखियै शैलदेव नै राजकुमारी मदनसुंदरी आला चित्रपट
 राजा अगें खोलियै रक्खी दित्ता । राजा कनकवर्ष राजकुमारो
 मदनसुंदरी गी दिक्खियै इयां जड़-पत्थर होई गेआ जियां कुसै
 मांदरी न उसी कीले दा होयै । चित्रकार शैलदेव नै जेड़ी
 राजकुमारी दी परशंसा कीती ही राजा नै उदे कोला उसी
 बसी बधीक रूपवती पाया । राजा नै चित्रकार गी मुगता
 धन देइयै परसन्न कीता । राजा मते दिन मदनसुंदरी गी
 प्राप्त करने दियां योजना बनांदा रेआ । उसी प्राप्त करने दी
 चिंता च राजा गी रातीं नींदर नेईं औंदी ही । उसी चिंता
 च राजा गी खाना - पीना, विहार करना सब फिक्का लगन

लगा । उदा स्वास्थ्य बी बिगड़ी गेआ । इक दिन मंत्रिण राजा
 दी चिंता दा कारण जानने दी इच्छा प्रगट कीती । राजा ने
 लचार होइयै मंत्रिण गी अपनी चिंता दा कारण दस्सने पेआ ।
 मंत्रिण कन्ने सलाह् करियै कनकवर्ष नै विदर्भदेस दे राजा
 देवशक्ति गी संगमस्वामी नां दे अपने ब्राह्मण दूत दे हथ्यै राज-
 पुत्तरी मदनसुंदरी दे ब्याह् दा प्रस्ताव भेजेआ । संगमस्वामी
 नै विदर्भदेस दी राजधानी कुंडिनपुर जाइयै ओ प्रस्ताव राजा
 देवशक्ति दे सामनै पेश कीता । इस प्रस्ताव गी पढ़ियै राजा
 सोचन लगा जे में अपनी पुत्तरी दा ब्याह् ते करना गै ऐ ।
 की नेई इस प्रस्ताव गी स्वीकार करियै पुत्तरी दा ब्याह् इदे
 कन्ने गै करी ओड़ा । आखर इस राजा च सारे गुण विद्यमान
 न । ए सुंदर ऐ जोआन ऐ ते होर मते गुणें दा स्वामी ऐ ।
 ए सोचियै उसनै ओ प्रस्ताव स्वीकार करी लेआ । ए सूचना
 उसनै संगमस्वामी दूत दे द्वारा राजा कनकवर्ष गी पुजाई
 ओड़ी । संगमस्वामी कन्ने उसनै अपना दूत बी ए पत॥ करने
 लेई भेजेआ जे जिस शुभ म्हरत च उनें ब्याह् करने लेई
 औना होयै उदी सूचना देन । ब्याह् दा म्हरत निश्चित होई
 गेआ । दोनै पासेआ धूमधाम कन्ने त्यारियां होन लगी पेइयां ।
 अखीर ब्याह् दा दिन नेड़ै औने पर राजा कनकवर्ष बड़े
 समारोह कन्ने जानी समेत कुंडिनपुर गी चली पेआ । जदू
 जानी कुंडिनपुर पुज्जी तां राजा देवशक्ति नै राजधानी दे
 बाहर आइयै बड़ी शान कन्ने उदा स्वागत कीता । जनहारें
 दे रौह्ने ते भोजन दा राजकी परबंद्य कीता गेआ । दूयै दिन
 राजा देवशक्ति नै अपनी पुत्तरी मदनसुंदरी दा ब्याह् शास्त्र
 दी विधि अनसार राजा कनकवर्ष कन्ने करी दित्ता । राजा
 नै अनंत धनराशि ते अनमोल गैह्ने - वस्तर ते होर मतियां
 चीजां दाजै च दित्तियां ते बड़ा भारी उत्सव मनाया ।
 ब्याह् दे बाद सत्ता दिन सौह्रै रेइयै राजा कनकवर्ष नमीं
 लाड़ी मदनसुंदरी गी लेइयै अपनी राजधानी कनकपुरी गी
 परतोई आया । ब्याह् दी खुशी च नगरै दे लोकें केई दिन

जलसे कीते ते उत्सव मनाए । राजा दियां होर बी रानियां
हियां पर उनें सबनें च मदनसुंदरी दा दर्जा उच्चा हा जिस
कारण ओ राजा दी परम - प्यारी पटरानी बनी गई ।

बसंत दी रात आई । वन - उपवनें च बेल - बूटे फूलें
कन्ने लदोई गे, भौरे गुन-गुनान लगे । कोयल अपनी पंचम
मुरा कन्ने मोए दे कामदेव गी फी जींदा करन लगी । नदियें
ते सरोवरें दे जल - निर्मल डलकन लगे ते कमलवन डैह, - डैह,
करन लगी पे । नेह, मनै गी लुभाने आले समै गी दिक्खियै
राजा कनकवर्ष रानिएं समेत मधु - उद्यान च विहार करने लेई
गेआ । राजा दे कन्ने पटरानी मदनसुंदरी वो ही । इत्थें राजा
ते रानियां गोदावरी नदी च जलक्रीड़ा करन लगे । जलक्रीड़ा
करदे - करदे राजा नै इक रानी दी नंगी छाती च पानी दे
छट्टे मारे । राजा कनकवर्ष दी इस हरकता गी दिक्खियै
मदनसुंदरी दा चेहूरा गुस्से कन्ने लाल - पीला होई गेआ ।
ततकाल नदी चा बाहूर निकलियै उसनै कपड़े बदले । अपनी
स्हेलडियें कन्ने राजा दी इस करतूता दी निंदा करदी - करदी
ओ अपने मैहूले गी परतोई आई । उसी गुस्से च मैहूले गी
परतोई दिक्खियै राजा बी जलक्रीड़ा समाप्त करियै उदे
पिच्छें - पिच्छें मैहूले गी परतोई आया । उत्थें आइयै उसनै
दिक्खेआ जे मदनसुंदरी अपनी खब्बी तली पर अपना दुखी
मुखड़ा रक्खियै मोतिएं दी लड़ी आंगर अत्थरुं बगांदी कोप-
भवन च बैठी दी ऐ । उसी इस हालता च दिक्खियै राजा
शर्मा दा मारेदा डरदा - डरदा उदे कोल गेआ ते बड़ मिट्ठे
बचनें कन्ने उसी मनान लगा । राजा गी जिसेल्लै अने
कसूरै दा पता लगा तां ओ मदनसुंदरी दे पैरें पर अपना
सिर रक्खियै माफी मंगन लगा । राजा दे मिन्नतां करने पर
मदनसुंदरी मन्नी गई । रातीं राजा उस्से दे मैहूले च सुत्ता ।
उत्थें सुत्ते दे राजा गी भयंकर सुखना आया । सुखने च उसी
इक डरौनी जनानी मैहूले अंदर बड़दी लब्बी । मैहूले अंदर
बड़दे गै उसनै राजा दे गलै चा एकावली मोतिएं दी माला

ते सिरै परा चूड़ामणि भवट्टा मारियै खोई लेई । फी राजा
 नै दिक्खेआ जे इक बेताल आइयै राजा कन्ने घोल करन
 लगी पेआ इस घोलै च बेताल नै राजा गी जप्फा मारियै
 धरती पर सुट्टी दित्ता । परंत राजा दी पिट्ठी पर बेइयै
 राजा समेत ओ गासै गी उड्डी गेआ । उप्पर जाइयै बेताल
 नै राजा गी समुंदरै च सुट्टी दित्ता । राजा नै मुशकल
 कन्ने समुंदर पार कीता । उत्थें उसनै दिक्खेआ जे उदी
 एकावली मोतिएं दी माला ते सिरै दी चूड़ामणि पैह्लें
 आंगर उदे शरीरै पर मजूद न । सबेरै राजा नै जोतशी
 कोला इस सुखने दा फल पुच्छेआ । जोतशी बोलेआ—म्हाराज !
 तुंदे शरीरै परा जेड़ी एकावली माला ते चूड़ामणि गुम होई
 गेई उदा ए मतवल ऐ जे तुंदा अपनी जनानी ते पुत्तरै कोला
 वजोग होग । समुंदरै गी तरियै फी जेड़ियां ए दोए चीजां
 तुसंगी मिलियां उदा मतवल ऐ जे किश समै बाद तुंदा अपनी
 रानी ते पुत्तरै कन्ने फी मेल होग । जोतशी दे मुंहा दा रातीं
 दे सुखने दा फलोदेश सुनियै राजा सोचन लगा अजें तक ते
 मेरै घर कोई पुत्तर नेई जम्मेआ । पैह्लें पुत्तर ते होई लै
 फो अगली गल्ल सोचगें । रामायण दी कथा दे परसंगे च
 राजा नै सुनेदा हा जे पुत्तर पाने लेई राजा दशरथ गी किन्ना
 जतन करना पेआ हा । ए सोचदे - सोचदे राजा नै ओ दिन
 बड़ी दुआसी च बताया । रात पेई तां ओ अपने मैह्लै च
 चिता च डुब्बे दा पलंगे पर बेई गेआ । इन्ने चिरै च दरवाजा
 खुल्लेआ ते उदे सामनै इक बड़ी सुंदर शुभदर्शन जनानी आई
 खडोती । उस देवी गी अंदर आए दे दिक्खियै राजा नै
 उट्ठियै उसी परनाम कीती । ते बड़े आदर - सतकार कन्ने
 आसनै पर बठाया । आसनै पर बेइयै ओ स्त्री राजा कनकवर्ष
 गी आखन लगी पुत्तरा ! अऊं नागराज वासुकि दी धो ते तेरे
 पिता दी भैन रतनप्रभा तेरी वूआ लगनी आं । में गुप्तरूप धारियै
 तेरी रक्षा लेई सदा तेरे अंग-संग रौहूनियां । अज्ज तुगी
 चित्तानुर दिक्खियै अऊं तेरै सामनै परतक्ख होई आं । तूं मिगी

दस्स जे तेरी चिंता दा केहू कारण ऐ । राजा बोलेआ—माता मेरे धन्न - भाग जे तुसैं मेरे पर इन्नी किर्पादृष्टि करदियां ओ । मेरी चिंता दा ए कारण ऐ जे मेरै घर कोई पुत्तर नेई ऐ । दशरथ जनेहू राजें गी वी सुर्ग प्राप्ति लेई जे पुत्तर दी कामना होई तां मेरे जनेहू मनुक्खै दा केहू आखना । ए सुनियै नागपुत्तरी रतनप्रभा आखन लगी पुत्तरा ! तू जाइयै स्वामी कार्तिकेय दी राधना कर । उयै तेरी पुत्तर कामना गी पूरा करडन । उंदी राधना करने दे समै जेड़ी कठोर कुमार धारा तेरे सिरै पर पौग ओ तू मेरी किर्पा कन्ने स्हारने च समर्थ होई जागा । की जे अऊं तेरे शरीरै अंदर प्रवेश करियै तेरी रक्षा करड ।

सवेरा हुंदे गै राजा कनकवर्ष राजकाज मंत्रियें गी सौंपियै आपूँ स्वामी कार्तिकेय दी राधना लेई चली पेआ । कार्तिकेय दे धाम जाइयै उसनै कठन तपस्या कीती । तपस्या करदे - करदे राजा दे सिरै पर वज्र दे समान कठोर कुमार-धारा पौना शुरू होई । पर राजा दे शरीरै च बड़ी दी नाग-पुत्तरी दे परभाव कन्ने ओ धारा राजा दा किश नेई बगाड़ी सकी । ए दिक्खियै कार्तिकेय स्वामी नै राजा दी तपस्या च विघन पाने लेई विघनराज गणपति गी हुकम दित्ता । विघनराज नै आइयै राजा दे सिरै पर पौंदी कुमार-धारा च विष मलाई ओड़ेआ । पर इदे कारण वी राजा दा किश बगाड़ नेई होआ । विघनराज गणेश गी अपने विरुद्ध दिक्खियै राजा नै उंदी प्रसन्नता लेई स्तोत्र पढ़ेआ । इस स्तोत्र पाठ गी सुनियै गणेश बड़े परसन्न होए । उनें राजा गी वर दित्ता जे राजन् ! तेरै घर पुत्तर-रतन पैदा होग । ए वर देख्यै विघनराज बाऊ दा रूप धारण करियै छपी गे । कुमार कार्तिकेय नै वी परसन्न होइयै राजा गी वर मंगने लेई आखेआ । राजा बोलेआ—म्हाराज ! जे तुस मेरे पर परसन्न ओ तां मिगी इक पुत्तर देओ । कार्तिकेय स्वामी आखन लगे—राजन् ! तेरै वर अवश्य

पुत्तर होग। ओ पुत्तर मेरे गणै दा अवतार होग। तू उदा नां हिरण्यवर्ष रखना। परंत कार्तिकेय नै राजा गी अपने मंदरै अंदर पूजा करने लेई आवखेआ। उस बेल्लै नागपुत्तरी रतनप्रभा कनकवर्ष दे शरीरा थमां बाहर निकली गई, इसलेई जे शापभय दे कारण जनानियां स्वामी कार्तिकेय दे मंदरै अंदर प्रवेश नेई करदियां। नागपुत्तरी जिसेल्लें राजा दे शरीरै चा निकली गई तां राजा दा चेहरा पैह्लें आंगर तेजस्वी नेई रेआ। राजा दे मंदरै अंदर प्रवेश करने पर स्वामी कार्तिकेय नै दिखेआ जे राजा दे शरीरै अंदरा नागपुत्तरी दे निकली जाने करी राजा दा चेहरा निस्तेज ते फिक्का पेई गेदा ऐ। कार्तिकेय नै राजा गी शाप दित्ता जे तू मेरे कन्ने धोखा कोता ऐ इसलेई पुत्तर जमदे गै तेरा अपनी रानी ते पुत्तरै थमां बजोग होग। इस कठोर शाप गी सुनियै राजा कनकवर्ष नै स्वामी कार्तिकेय दी प्रसन्नता लेई उंदा स्तोत्र पढ़ेआ। स्तोत्र सुनियै स्वामी कार्तिकेय बड़े परसन्न होइयै आखन लगे—राजन् रानी ते पुत्तरै थमां तेरा बजोग छड़ा इक ब'रे लेई होग। ब'रे परंत तुंदा त्रीनै दा फी मेल होई जाग। इसै ब'रे च जेड़ा तेरी अकाल मृत्यु दा जोग ऐ ओ बी मेरी किर्पा कन्ने तेरे सिरै परा टली जाग। ए आखियै स्वामी कार्तिकेय बाऊ च समाइयै नजरी थमां ओह्लै होई गे ते राजा खुशी-खुशी अपनी राजधानी गी परतोई आया।

समां औने पर रानी मदनसुंदरी नै पुत्तर-रतन गी जनम दित्ता। राजा नै बड़ा भारी उत्सव मनाया। दिन-दुखिएं पर धन दी बरखा करियै राजा नै अपने 'कनकवर्ष' नां गी सच्चा करी दस्सेआ। पंज दिन बीती गे। छेमें दिन रातीं चानचक घनघोर घटा छाई गई। भयंकर बरखा होन लगो। उसै बेल्लै इक बकराल जनानी हथै च छुरा लेदे मैह्लै अंदर आई बड़ी। अंदर आइयै मदनसुंदरी दी छाती परा ज्याने गी लेइयै ओ बाहरै गी निकली गई। उदै पिच्छें मदनसुंदरी वो

दौड़ी । ज्याने गी लेदे अगें - अगो ओ डरौनी जनानी दौड़ै करदी ही ते उदै पिच्छें - पिच्छें उसी पगड़ने लेई रानी मदन-सुंदरी । अगें जाइयै उस जनानी नै इक सरोवर' च छाल मारी दित्ती । पुत्तर' दे प्रेम च अ'न्नी होई दी रानी वी उदै पिच्छें सरोवर' च कुदी पेई ।

किश समां बीतेआ तां समान निर्मल होई गोआ । रात वी बीती गई । रानी मदनसुंदरी दे मैह्लै चा रोने - पिट्टने दी वाज औन लगी पेई । इसी सुनियै राजा कनकवर्ष दौड़दा-दौड़दा उत्थें आया । रानी मदनसुंदरी ते ज्याने पुत्तर' गी गुम्म दिक्खियै राजा गी मूर्छा आई गई । होश आई तां हाए मदन-सुंदरी, हाए पुत्तरा ! ए आखियै वलाप करन लगा । फी उसी स्वामी कातिकेय दा शाप याद आया । अतिव्याकल होई गोआ । बोलेआ—हे भगवान ! अऊं रानी ते पुत्तर' दा व'रे दा वजोग कियां स्हारड । ए इक व'रा मेरे लेई जहार व'रे बनी जाग । मंत्रिएं दे समजाने पर वी राजा दे दुख दा बेग घटेआ नेई । रोंदा - करलांदा ते ढाइयां मारदा ओ मैह्लै चा निकलियै डिगदा - ढौंदा विध्याटवी जाई निकलेआ । भुक्ख-त्रेह् दा मारेदा विध्याचल दे इक निर्मल, शीतल नाडू दा पानी पीयै ओ इक संगमी छां आले खखै हैठ वसां लैन लगा । इन्ने चिरै च परवतै दी गुफा चा इक वव्वरशोर निकलेआ । राजा कनकवर्ष गी दिक्खियै शेर' ने उदै पर हमला करी दित्ता । चानचक गासै चा इक विद्याधर कुद्देआ । उसनै तलवारा दे इक्कै फट्टै कन्ने शेर' दे टोटे करी ओड़े । फी ओ राजा कोल आइयै पुच्छन लगा—राजा कनकवर्ष जी तुस इत्थें कुतां आई ने । राजा पतनी ते पुत्तर दे वजोग च बतोई गेदा हा । मुशकल कन्ने पिछली घटना याद करियै आक्खन लगा—रानी ते पुत्तर दे वजोग दे कारण मेरा ए हाल होई गोआ ऐ । विद्याधर बोलेआ—अऊं बंधुमित्तर नां दा सन्यासी तु'दे नगार रौह् दा हा । तु'दी मदता कन्ने में बेताल

सिद्धि करियै विद्याधर पदवी पाई । तусेंगी पशानियै ते
 तुं दे पिछले उपकार गी जाद करियै वदला चुकाने लेई में इस
 शेरै गी मारी दित्ता । विद्याधर दी पदवी पाने परंत हून मेरा
 नां बंधुप्रभ ऐ । राजा दे पुच्छने पर जे रानी ते पुत्तरै
 कन्ने मेरा संगम कहुं होग ओ बोलेआ जे भगवती विध्यवासिनी
 दी किर्पा कन्ने तुं दा पतनी ते पुत्तरै कन्ने फी संगम होग ।
 इसलेई तूस जाइयै भगवती दी राधना करो । ए आक्खियै
 विद्याधर गासै च छपी गेआ । राजा गी किश धीरज होआ ।
 ते ओ विध्यवासिनी दे दर्शन लेई चली पेआ । थोड़ी गै दूर
 गेआ होग जे उसनै इक्क मस्त जंगली हाथी गी सुंड चुक्कियै
 अपने पाससे औंदे दिक्खेआ । उसी दिक्खियै राजा तुरत इक्क
 अन्ने खुए दे परलै पाससै होई गेआ । ओ पराना खूह् जंगल-
 जाड़ा कन्ने ढकोए दा हा । मस्त हाथी दौड़दा-दौड़दा उस
 खूहै च डिगियै मरी गेआ । राजा अगें चली पेआ । चलदे-
 चलदे ओ इक्क सरोवरै दे कंठै पुज्जा । उत्थें उसने शनान
 करियै फलहार कीता । थकेमें दे कारण उसी इक्क रुक्खै
 थल्लै नींदर आई गेई । उससै रस्तै भीलें दी टोली जा करदी
 ही । ओ राजा गी वन्नियै विध्यवासिनी अगें वलि देने लेई
 अपने सरदारै कोल लेई गे । जदू भीलें दा सरदार वलि देने
 लेई राजा गी देवी दे सामने लेई गेआ तां राजा ने देवी गी
 परनाम कीती । उदे परभाव कन्ने राजा दे बंधन अपने-आप
 ढिलकियै धरती पर डिगि पे । इस चमतकारै गो दिक्खियै
 भीलें दे सरदारै डरियै राजा गी छोड़ी दित्ता । इत्थूं दा छुटियै
 राजा त्री बारी मौता दे मुंहा दा बचेआ । पतनी पुत्तर थमां
 खिडे दे राजा दा इक्क व'रा बीती गेआ । ततकाल नागकन्या
 राजा कनकवर्ष दी रानी मदनसुंदरी ते उदे पुत्तरै गी लेइयै
 परतक्ख होई । ओ राजा गी आक्खन लगी—ए लै अपनी
 रानी ते अपना पुत्तर । शाप दी अवधि तक में इनेंगी सम्हालेआ ।
 हून अऊं इनेंगी तेरै सपुर्द करनी आं । तेरा शाप दूर होई गेआ
 ऐ । इनेंगी लेइयै तूं राजाधनी गी परतोई जा ते पैहू लै आंगर

राजकाज सम्हाल । ए आक्खियै नागकन्या छपी गई । भीलें दे सरदार मुक्ताफल गी जिसेल्लै पता लग्गा जे जिदी ओ बलि देना चाह्दा हा ओ राजा कनकवर्ष ऐ तां ओ राजा दे पैरें पर आई डिग्गेआ । राजा गी अपने ग्रां लजाइयै उसने राजा दा मता आदर - सतकार कीता । कनकवर्ष दे सौहरे राजा देवशक्ति गी जिसेल्लै इस घटना दी खबर मिली तां सेना समेत विध्याटवी च आइयै ओ पतनी पुत्तर समेत कनकवर्ष गी अपनी राजधानी कुंडिनपुर लेई गेआ । किश दिन सौहरे रेइयै राजा कनकवर्ष अपने नगर कनकपुर गी परतोई आया । पर्जा ने बड़ा उत्सव मनाया । उत्थें आइयै राजा नै मदनसुंदरी गी पटरानी बनाया । नित्त उत्सव ते खुशियां मनांदा - मनांदा राजा बड़ आनंद कन्ने राजकाज चलान लगा । गोमुख दी जवानी इस कहानी गी सुनियै नरवाहनदत्त ते अलंकारवती गी परम संदोख होआ ।

छेमा तरंग

गोमुख दी कथा दी सुनियै परसन्न-मुख युवराज नरवाहनदत्त ने मंत्री मरुभूति पाससै दिक्खेआ । मरुभूति दे चेहरे पर गोमुख लेई किश रोह ते इर्खा दे भाव नजरी आवै करदे हे । युवराज मुसकराइयै मरुभूति गी आक्खन लगा—मरुभूति जी, तुस बी कोई कथा सुनाओ । नेईं तां गोमुख बाजी मारो लैग । इदे पर मरुभूति कथा सुनान लगा—

प्राचीन समै च कमलपुर नां दे नगरै च कमलवर्म नां दा कोई राजा राज करदा हा । इससै नगरै च चंद्रस्वामी नां दा ब्राह्मण बी रह्दा हा । ए ब्राह्मण जिन्ना विद्वान हा उन्ना गै धनाड्ड बी हा । इदी भारजा दा नां देवमति हा । देवमति ने पुत्ररतन गी जनम दिता । पुत्र जनम दे समै काशवाणी होई जेह्डी आक्खन लगी—चंद्रस्वामी ! तूं इस अपने पुत्तर दा नां महीपाल रक्खेआं । ए तेरा पुत्तर राजा बनियै जोआनी च मता चिर पृथ्वी दी पालन करग । चंद्रस्वामी ने काशवाणी अनसार अपने पुत्तरै दा नां महीपाल रक्खेआ । महीपाल सकल

कलाएं ते विद्याएं च पारंगत होआ । इसने शस्त्रास्त्र विद्या च
 बी बड़ा नां पैदा कीता । किश समां बीतने पर चंद्रस्वामी दी
 धर्मपतनी देवमति ने इक्क कन्यारतन गी जनम दित्ता । पिता
 ने इदा ना चंद्रवती रक्खेआ । भ्रा ते भैन दोए अपने घरै च
 वधन लगे । मंद - भाग दे कारण बरखा नेईं पौने करी देसै च
 काल पेईं गेआ । इस संकटै दे समै उत्थूं दा राजा कमलवर्म
 धर्ममार्ग गी छोड़ियै चोरें आंगर प्रजा दी धन - सम्पत्ति लुट्टन
 लगा । इस संकटै गी दिक्खियै देवमति अपने पति चंद्रस्वामी
 गी आक्खन लगी - पतिदेव तुस सारे मेरे पिता दे घर चली पो ।
 ए नेईं होयै जे साढ़े वच्चे इस संकटै च नष्ट होईं जान । ए
 सुनियै चंद्रस्वामी आक्खन लगा - भलिये लोके ! संकटै दे समै
 घर छोड़ियै नट्ठी जाना बड़ा पाप ऐ । इसलेईं अऊं अपने वच्चें
 गी इंदै नानक छोड़ी औना । मेरे परतोईं औने तक तूं अपने
 घरै च सचेत होइयै रमेआं । परंत चंद्रस्वामी अपनी पतनी देवमति
 गी घर छोड़ियै ते दोनै वच्चें गी अपने भन्ने लेइयै अपने सौहूरे गी
 चली पेआ । त्रौं - चौं दिनें दी पैदल जात्रा दे बाद ओ इक्क
 बीयावान-जोआड़ लाके च पुज्जा जित्थें चक्कखी लेतर गै लेतर हा ।
 हक्ख टामें - टामें हे । जागत ते कुड़ी त्रेह कन्ने घबराए दे हे ।
 उनें दोनै गी इक्क थां वठाइयै चंद्रस्वामी पानी दी खोजा च
 गेआ । अजें ओ किश दूर गै गेआ हा जे अगूं ता यमदण्ड
 नां दा भीलें दा सरदार नौकरें समेत औंदा लब्बेआ । ए मलूम
 करियै जे चंद्रस्वामी पानी दी खोजा च जा करदा ऐ सरदार ने
 अपने भीलें गी शारा कीता जे जाओ इस ब्राह्मण गी पानी
 देईं देओ । सरदारै दा शारा समझियै भील चंद्रस्वामी गी
 अपने ग्रां लेईं गे । उत्थें पुज्जियै उनें चंद्रस्वामी गी चंडी
 अगों बलि देने लेईं बन्नियै रक्खी ओड़ेआ । अपने - आप गी
 इस नमीं मुसीबता च दिक्खियै चंद्रस्वामी गी अपने वच्चें दी
 याद सतान लग्गी । सोचन लगा हे भगवान ! हूनै तक उनें
 गी कोई जंगली जानवर खाईं गेआ होग । हाए ! मेरे कन्ने जे

किश वी होग वीतग, पर उनें मसूम वच्चे दा के वनग ।
 ए सोचदे - सोचदे उदी नजर उप्पर गासै च सूरज भगवान
 पाससै पेई । उसने तुरत अक्खीं मीटियै बड़ी भगति ते एकाग्र
 मनै कन्ने सूरज भगवान दा ध्यान कीता । ते उदी स्तुति च
 स्तोत्र - पाठ कीता । इस स्तोत्र-पाठ गी सुनियै सूरज भगवान
 बड़े परसन्न होए । ततकाल काशवाणी गूँजियै आकखन
 लगी—हे चंद्रस्वामी ! अस तेरे पर बड़े परसन्न आं । तू मरगा
 नेईं, जींदा रहूंगा । ते मेरी किर्पा कन्ने पुत्तर - पुत्तरी कन्ने
 तेरा तौले गै मेल होग । ए दिव्व - वाणी सुनियै चंद्रस्वामी दा
 मन किश ठकाने आया ।

उद्दर चंद्रस्वामी गी पानी लैन गेदे जिसेल्लै मता चिर
 होई गेआ ते नेईं परतोआ तां उदे पुत्तर महीपाल ते पुत्तरी
 चंद्रवती गी बड़ी चिंता होई ते दोयै जोरै - जोरै कन्ने रोन
 लगी पे । उससै रस्तै वपारिये दा इक्क बड़ा भारी सार्थ (कारवां)
 जा करवा हा । इदे सरदार दा नां सार्थधर हा । उसनै इगे
 दोनें वच्चे दा रोना - करलाना सुनेआ । उसी जिसेल्लै इंदी
 मसीबता दा पता लग्गा तां उसने इनेंगी दलासा दित्ता । ओ इनें
 गी अपने कन्ने अपने देसै गी लेई गेआ । अपने नगर पुज्जियै
 उस सेठ ने उदा दोनें वच्चे दा अपने पुत्तर-धी आला लेखा
 पालन - पोसन शुरू करी दित्ता । इक वारी ताराधर्म नां दे उत्थूं दे
 राजे दा मंत्री अनंतस्वामी अपने मित्तर उस सेठे दे घर आया ।
 ओ महीपाल दे शलैपे ते धार्मक मनोवृत्ति गी दिक्खियै बड़ा हरान
 होआ । जदू उसी पता लग्गा जे ए दोयै वच्चे अनाथ जंगल च
 पाए गे हे तां ओ सेठ गो आकखन लगा जे इनें दोनें वच्चे गी
 तुस भिगी देई देओ । तुसेंगी पता ऐ जे मेरी कोई संतान नेईं ।
 इनें वच्चे गी अऊं पालड । सेठ सार्थधर ने दोए वच्चे अपने
 मित्र मंत्री अनंतस्वामी गी देई दित्ते । उनेंगी लेइयै अनंतस्वामी
 अपने घर आया । उदे समरिद्ध घरै च दोनें वच्चे दा पालन-
 पोसन बड़ा शैल होन लगा ।

उद्गर जिसेल्लै भीलें दा सरदार यमदंष्ट्र दे घर आया तां
 ओ चंद्रस्वामी कोल जाइयै वड़ी नम्रता कन्ने उसी आखन लगा
 जे ब्राह्मण देवता मिगी सुखने च सूरज भगवान ने हुकम दित्ता
 ऐ जे अऊं तुन्दी पूजा करियै तुसेंगी छोड़ी देआं । इसलेई तुस
 उट्ठो ते जित्थें तुन्दी मरजी आखदी ऐ चली जाओ । ए आखियै
 सरदार ने चंद्रस्वामी गी बन्धन थमां मुक्त करी दित्ता ते उसी
 मोती, कस्तूरी दी भेंट देइयै विदा कीता । उत्थूं दा छुटियै
 चंद्रस्वामी अपने पुत्तर - धी दी खोजा च खज्जल हुंदा समुंदरै
 दे कंठ पर वस्सै दे जलपुर नां दे नगर पुज्जा । उत्थें परौहू ने दे
 रूप च ओ इक ब्राह्मणै दे घर चली गेआ । घरै दे स्वामी ब्राह्मणै
 ने इदा स्वागत कीता । रातीं भोजन करने परंत चंद्रस्वामी ने
 अपनी दुःख भरी कहानी उस ब्राह्मण गी सुनाई । उदी कहानी सुनियै
 ओ ब्राह्मण चंद्रस्वामी गी आखन लगा—मित्रा ! किश दिन होए
 कनकवर्मा नां दा वपारी इत्थें आया हा । उदी जवानी असेंगी
 पता लग्गा जे उसी विध्याटवी च इक जागत ते इक कुड़ी लब्बे
 हे । उनें दौनें गी लेइयै ओ नारिकेल टापू च गेआ । ए सोचियै
 जे खवरै ओ दोए जागत कुड़ी मेरे गै पुत्तर - धी होन चंद्रस्वामी ने
 नारिकेल द्वीप जाने दा निश्चै करी लेआ । विष्णुवर्मा नां दा
 वणिया वी उस्सै द्वीप गी जाने आला हा । चंद्रस्वामी उस्सै दे
 ज्हाजै च सोआर होइयै उस टापू गी चली पेआ । उत्थें पुज्जियै
 उसने उत्थूं दे बसनीक बगारिण कोला जिसेल्लै कनकवर्मा सेठ
 दी वावत पुच्छ - पड़ताल कीती तां उसी पता लग्गा जे ओ उस
 टापू च आया जरूर हा ते उदे कन्ने इक सुंदर बालक ते कुड़ी
 वी हे पर ओ उत्थूं दा कम्म खतम करियै कटाह द्वीप गी चली
 गेआ ऐ । ए सुनियै चंद्रस्वामी इक वपारी दे ज्हाजै च बेइयै उत्थूं
 दा कटाह द्वीप गेआ । पर उत्थें पुज्जियै पता लग्गा जे कनकवर्मा
 सेठ उत्थूं दा होर अगें कर्पूर द्वीप चली गेआ ऐ । इस चाल्ली
 चंद्रस्वामी ने इस सेठे दा खोजा च कर्पूर, सुवर्ण ते सिंहल द्वीपें
 दी जात्रा कीती पर कुतै वी उस सेठे दा उग - सुग नेईं लग्गा ।
 सिंहल द्वीप जाइयै उसी पता लग्गा जे कनकवर्मा सेठ वपार

करियै उत्थूं दा अपने चित्रकूट नां दे नगरै गी परतोई गोआ
 ऐ। परंत चंद्रस्वामी चित्रकूट नगर पुज्जेआ। उत्थें उसी ओ
 सेठ मिली गोआ। चंद्रस्वामी ने अपनी सारी दुखभरी कहानी
 उसी सुनाई। कनकवर्मा आखन लगा—मेरे कोल दो वच्चे हैन
 जेड़े मिगी विध्याटवी च अनाथ दशा च रोंदे - विलखदे लब्बे
 हे। ए आखियै उसने ओ दोए ज्याने—इक जागत ते दूई कुड़ी
 चंद्रस्वामी गो दस्से। पर दिक्खो किसमता दे रंग ! ए दोए ज्याण
 कोई होर गै हे, उदे अपने नेईं हे जिदी खोज - पड़ताल च
 चंद्रस्वामी ने थां - थां दी खेह् छानी ते खज्जल खवारियां स्हारियां
 ओ दोए ज्यानें वखले गै निकले। अपनी आशा गी निराशा च
 बदलदे दिक्खियै चंद्रस्वामी मता रोया। उसने प्रण कीता जे
 मेरे दोए ज्याणे इक व'रे अंदर नेईं लब्बे तां अऊं गंगा कनारे तप
 करदा - करदा प्राण त्यागी ओड़ड। परंत उदा इक ज्ञानी म्हातमा
 कन्ने मेल होआ। म्हातमा उसी आखन लगा—ब्राह्मण देवता !
 चिता मत कर। इक व'रे दे अंदर जागत ते धी कन्ने तेरा संगम
 जरूर होग। मेरी गल्ला गी तूं पत्थरै पर लकीर समझ। म्हातमा
 दा गलाया सुनियै चंद्रस्वामी गी किश हौसला होआ। अपने
 दोनें ज्यानें दी खोजा च ओ उत्थूं दा चली पेआ। नगरें-ग्राएं ते मठ-
 मंदरें च फिरदा - फिरदा ओ इक दिन इक घने जंगलै च पुज्जा।
 उत्थें उसने जंगली फल खाइयै जल - पान कीता। ते रात कट्टने
 लेई ओ इक उच्चे रुखे पर चढ़ियै वेई गोआ। अही रातीं उस
 रुखै हेठ नारायणी ते होर देवियां सभा लाइयै भैरों दे औने दी
 डीका च वेई गेइयां। मती देर होई गोई पर भैरों नेईं आए।
 सारियां देवियां नारायणी देवी गी इस बलम्ब दा कारण पुच्छन
 लगियां। नारायणी देवी हस्सी पर किश नेईं बोली। जदूं
 बाकी दिएं देविएं उसी बार - बार पुच्छेआ तां बोली जे भामें
 शर्मा दी गल्ल ऐ पर तुं दे बार - बार पुच्छने पर मिगी दस्सना
 गै पेई—

सुरपुर दे राजा सुरसेन दी विद्याधरी नां दी रूपवती कन्या ऐ
 राजा सुरसेन ने अपनी पुत्तरी विद्याधरी दा ब्याह् विमल राजा

दे पुत्तर प्रभाकर कन्ने करी दित्ता । व्याह् परंत जिसेल्लै
 विद्याधरी अपने सौहरे गेई तां उसी पैहूली रातीं दी मुलाकाता च
 गै पता लग्गी गेआ जे ओदा पति प्रभाकर नपुंसक ऐ । उसने
 अपने पिता गी चिट्ठी लिखी जे पिता जी ! तुसें नपुंसक
 कन्ने मेरा व्याह् करियै मेरा जीवन नष्ट करी ओड़ेआ ऐ । इस
 चिट्ठी गी पढ़ियै विद्याधरी दा पिता सुरसेन सोचन लगा जे
 राजा विमल ने मेरे कन्ने धोखा कीता ऐ । उसी राजा विमल
 पर बड़ा क्रोध आया । उसने अपने कुड़म राजा विमल गो चिट्ठी
 लिखी जे तू जेड़ा मेरे कन्ने धोखा कीता ऐ, उदा दंड देने लेई
 अऊं तेरे कोल आवै करना आं । राजा विमल ने जिसेल्लै ए
 चिट्ठी पढ़ी तां उसने इस मामले पर अपने मंत्रिण कन्ने सलाह
 कीती पर ए मसीबत टालने दा उनेंगी कोई उपा नेईं सुज्झा ।
 पिंगदत्त नां दा उदा मंत्री राजा गी आखन लगा—म्हाराज !
 इस संकट गी टालने दा इक्कै उपा ऐ । मिगी यक्ष गी प्रसन्न
 करने दा मैन्तर औंदा ऐ । इस मंत्र दे जप कन्ने स्थूलशिरा नां
 दं यक्ष दी साधना कोती जा ते ओ प्रसन्न होई जा तां तुस उदे
 कोला अपने पुत्तर लेई पुलिग मंगियै इस संकट गो दूर करो
 सकदे ओ । राजा विमल ने मंत्री दी दस्सी दी विधि अनसार
 राधना करियै यक्ष स्थूलशिरा कोला अपने पुत्तरा लेई पुलिग
 मंगेआ । यक्ष ने राजा दी राधना थमां परसन्न होइयै पुलिग
 राजा गी देई दित्ता । ए मिलने करी राजा दे पुत्तर प्रभाकर
 गी पुंसत्व मिली गेआ पर यक्ष स्थूलशिरा आपू नपुंसक होई
 गेआ । हून विद्याधरी गी पता लग्गा जे उदा पति ते नपुंसक
 नेईं । ओ सोचन लग्गी मिगी ऐमें भरम होआ । में पिता गी
 की चिट्ठी लिखी । उसी शर्म वी आई । उसने अपने पिता गी
 इक होर चिट्ठी लिखी । उदे च उसने अपने पिता गी लिखेआ
 जे पैहूली चिट्ठी जेड़ी में तुसेंगो लिखी ही ओ भलेखे कन्ने
 लिखी ओड़ी ही । मेरा पति ठीक ऐ । मिगी उदे बरखलाफ
 कोई शकायत नईं । इस पत्तर गी पढ़ियै विद्याधरी दे पिता राजा
 रुरसेन दा गुस्सा ढली गेआ ते उसने राजा विमल पर चढ़ाई

नेई कीती । भैरों जी अज्ज जिसेल्लै इस घटना दा पता लग्गा तां उनें क्रोध करियै स्थूलशिरा यक्ष जी अपने सामने सद्दियै शाप दित्ता जे जिस करी अपना पुलिग दूए जी देइयै तूं आपूं नपुंसक बनी गोआ ऐं, इसलेई तूं सारी उमर नपुंसक गै बनेआ रौह्गा ते राजा विमल दा पुत्तर प्रभाकर जिसी तूं अपना पुलिग दान दित्ता ऐ सारी उमर मर्द गै बनेआ रौह्ग ।

ए गल्ल सुनाइयै नारायणी देवी वाकी दिएं देविएं जी आखन लगी—इस कम्मै च लग्गे रौह्ने करी अज्ज भैरों जी दे इत्थें औने च चिर होई गोआ ऐ । अजें ए गल्ल - वात होयै गै करदी ही जे चक्रेश्वर भैरों जी वी उत्थें आई पुज्जे । उत्थें कटिठयां होई दिएं देविएं भैरों दी पूजा कीती ते उदे अगें भेटां चढ़ाइयां । किश चिर भैरों ने देविएं कन्ने तांडव नृत्त कीता । रुक्खै दा चंद्रस्वामी ए सारा तमाशा दिक्खै करदा हा । उसने नारायणी देवी दी इक दासी जी उप्परा दा दिक्खेआ । दासी ने वी उसी दिक्खी लेआ । दौनें दा अक्ख-मटक्का होने करी दौनें दे हिर्दे च प्रेम दा डूर फुटी पेआ । नारायणी देवी जी दिव्व दृष्टि द्वारा उदे प्रेम दा पता लग्गी गोआ । उसने चंद्रस्वामी जी रुक्खै परा उतरने दा शारा कीता । जिसेल्लै ओ रुक्खै परा उतरेआ तां नारायणी देवी नै उनें दौनें जी पुच्छेआ जे दस्सो तुंदी केहू मरजी ऐ । दोए बोले—साढ़ा आपूं-चें प्रेम होई गोआ ऐ । उंदी गल्ल सुनियै देवी दा गुस्सा ठंडा पेई गोआ । ओ चंद्रस्वामी जी आखन लगी—तेरै सत्य - वचन जी सुनियै अऊं वड़ी परसन्न आं । अऊं तुगी अपनी दासी देई दिन्नी आं । तूं अपनी मरजी पूरी करी लै । चंद्रस्वामी बोलेआ—माता ! भामें मन चंचल होने करी इदर - उदर भड़कदा ऐ पर अऊं पराई जनानी जी शरीर कन्ने स्पर्श नेई करदा । चंचलता मनै दा सुभा ऐ पर मनुक्खै जी शरीरै कन्ने पाप नेई करना लोड़चदा । उदा जवाब सुनियै नारायणी देवी वड़ी परसन्न होई । आखन लगी—जा मेरी किर्पा कन्ने तौले गै तेरा पुत्तर ते धी कन्ने संगम होग । ए

आखियै देवी ने चंद्रस्वामी गी सदा डै - डै करने आला विषनाशक
फुल्ल दित्ता ते आपू दासी समेत गासै च समाई गेई ।

सवेरै चंद्रस्वामी रमता - राम तारापुर नगर पुज्जा । जित्थें
उदे दोए ज्यानें मंत्री अनंतस्वामी दे घर पलै करदे हे । चंद्रस्वामी
दे घर गेआ । मंत्री ने इदा स्वागत कीता ते परौहने दे रूप च
इसी अपने घर ठराह्या ते भोजन लेई निमंत्रण दित्ता । चंद्रस्वामी
अनंतहृद नां दे पापहर सरोवरै च शनान करने लेई गेआ । शनान
करियै जिसेल्लै परतोआ तां दिखदा केहू ऐ जे मंत्री अनंतस्वामी
दै घर ढाओ-पिजर पेदा ऐ । पुच्छने पर लोकें कोला पता लग्गा
जे महीपाल नां दे ब्राह्मण बालक गी जिसी मंत्री ने अपना बालक
पुत्तर बनाए दा हा काले नागै ने डस्सेआ ऐ ते ओहू बेहोश पेदा ऐ ।
चंद्रस्वामी सोचन लगा—होए नेईं होए ए मेरा पुत्तर महीपाल
ऐ । ओ नारायणी देवी दा दित्ता दा सदावहार फुल्ल लेइयै उत्थें
पुज्जा जित्थें महीपाल बेहोश पेदा हा । उसी दिक्खियै चंद्रस्वामी
ने पशानी लेआ जे ए मेरा पुत्तर महीपाल ऐ । उसने तुरंत ओ
विषहर फुल्ल जागतै दे नक्कै कन्ने लाया । फुल्ले दी सगंध जिसेल्लै
नक्कै रस्तै महीपाल दे अंदर गेई तां उदा सारा विष उतरी गेआ
ते ओ चंगा भला उट्ठियै बेई गेआ । उदे जींदा होई जाने पर
मंत्री अनंतस्वामी ने बड़ा उत्सव मनाया । सारे लोक चंद्रस्वामी
गी चमतकारी मनुक्ख समझन लगे । सारे नगरै च उदी चर्चा
ते पूजा होन लगी पेई । ओ मंत्री अनंतस्वामी दे आखने पर उदे
घर गै रौहू न लगी पेआ । महीपाल उदी भैन चंद्रवती ते चंद्रस्वामी
त्रौनें इक दूए गी पशानी लेआ । पर त्रैवै चप्प रेहू । उनें भेद
कुसै चौथै गी नेईं दस्सेआ । जदू महीपाल गवरू होआ तां उदे
शलैपे ते गुणें पर मोहूत होइयै उत्थूं दे राजा तारावर्मा ने अपनी
पुत्तरी बंधुमती दा ब्याहू उदे कन्ने करी दित्ता । जोआई गी
अपने राजै दा अद्दा भाग देइयै राजा ने उसी अपना युवराज
घोशत करी दित्ता । ते राजकाज दा भार उदै सपुर्द करी दित्ता ।
महीपाल ने राजकाज दी वागडोर अपने ह्थै च ले लेई । हून

उसने सारी पर्जा च घोशत करी दित्ता जे चंद्रस्वामी उदा पिता ते चंद्रवती उदी सककी भैन ऐ ।

इक दिन चंद्रस्वामी पुत्तरा गी आक्खन लगा जे अपने देस जाइयै तेरी माता गी इत्थै लेई औचै । उसी दुक्ख स्हारदे - स्हारदे जुग बीती गेआ ऐ । जे उसी पता लगा जे तूं राजा बनी गेदा ऐं ते मस्ती च आइयै उसी भुल्ली गेदा ऐं ते कुतै ओ गुस्सै च आइयै तुगी शाप नेईं देई देयै । माता पिता दे शाप कारण पुत्तर कदें सुखी नेईं रेई सकदा । इस परसंगै च अऊं तुगी इक कथा सुनानां—

धवल नगरै च चक्र नां इक वणियां रौह्दा हा । ओ माता-पिता दे रोकने पर बी वपार लेई सुवर्ण द्वीप गेआ । अनंत धनराशि कमाइयै पंजें वरें वाद ओ अपने देस गी परतोआ । जलजात्रा किश वाकी ही जे समुंदरै च भयंकर तफान आया । जेदे करी उदा ज्हाज डुब्बी गेआ । मते जात्रू समुंदरै च डुब्बी मोए । मते गी मगरमच्छें ते जलजंतुएं खाई ओड़ेआ । चक्र वपारी दी अजें किश आयु वाकी ही । उसी समुंदरै दिएं लैहूरें कंठे पर आई सुट्टेआ । ओ थक्का - मांदा समुंदरै दे कंठे पर पेदा हा । उसने इक डरौने मनुक्खै गी अपने सरैहूनै पासै खड़ोते दे दिक्खेआ । उदे हत्थै च फाई ही । ए मनुक्ख चक्र वणियै गी फाई कन्ने वन्नियै अपने सरदारै कोल लेई गेआ जेड़ा संघासनै पर बैठा दा हा । इस सरदारै दे हुकम मतावक उस डरौने मनुक्खै ने चक्र वणिए गी लोहे दी सीखै आले कैदखाने च डक्की दित्ता । इस कैदखाने च वणिए नै दिक्खेआ जे इक होर कैदी दे सिरे पर अग्गा दे डारे आंगर लाल तपे दा चक्कर वमीरी आला लेखा चलै करदा ऐ जिस करी उस मनुक्खै गी अति कठोर नरक जातना भोगनी पवै करदी ऐ । चक्र वणिए ने उसी पुच्छेआ—भ्रा ! तूं के पाप कीता ऐ जे तुगी नेआ दंड भोगने पवै करदा ऐ । ओ बोलेआ—अऊं खडग नां दा वणिया आं । में मात - पिता दी आज्ञा दा नरादर कीता हा, जिसलेईं उनें मिगी शाप दित्ता । उनें आक्खेआ—पापिया

पुतरा ! जितनेई तू साढ़ी आज्ञा दा नरादर करियै साढ़ा अपमान
 कीता जिसकरी साढ़े सिरें च नेई सिर-पीड़ लग्गी राँह् दी ऐ अशकै
 साढ़े सिरें पर तपे दे चक्कर चलै करदे होन इसलेई
 दुराचारिया ! तुगी वी नेई गै जातना भोगनी पौग । उंदा
 शाप सुनियै अऊं रोन लगी पेआ । मिगी रोदं दिक्खियै
 उनेंगी तरस आई गोआ । आखन लगे—रोओ नेई ।
 तुगी इक म्हीना गै ए जातना भोगनी पौग । में ओ दिन
 बड़ी चिंता - फिकर च कट्टेआ । रातीं इक बड़ा भयानक
 मनुक्ख मिगी सुखने च लब्बा । उसने जवरदस्तो मिगी इस
 लोहे दे कैदखाने च धक्का देइयै मेरे सिरै पर डगरे आंगर तपे
 दा चक्कर धरी दित्ता । ओ आखन लगा—ए मिगी माता-पिता
 दे शाप दा फल ऐ । अज्ज म्हीना होई गोआ ऐ पर अजें
 वी मेरा छुटकारा नेईं होयै करदा । खडग दी गल्ल सुनियै
 चक्र वणिया बोलेआ—भ्रावा ! मिम्मी अपने माता - पिता दा
 आखेआ नेईं मन्नेआ हा जिसकरी सारी कमाई समुंदरै च
 ज्हाज डुब्बने कारण नष्ट होई गई । उससै बेल्लै काशवाणी आखन
 लगी—ओ खडग वणिआ ! तेरे शाप दा अंत होई गोआ ऐ ।
 हून तू इस तपे दे लोहे दे चक्करै गी चक्र वणिये दे सिरै
 पर रक्खियै घरै गी जा । ततकाल ओ चक्कर चक्र वणिये दे
 सिरै पर फिरन लगी पेआ । कोई गुप्त मनुक्ख शापमुक्त
 खडग वणिये गी उदै घर लेई गोआ । उसनै फी कदें वी अपने
 माता - पिता दी आज्ञा दा नरादर नेईं कीता । चक्र वणिया
 उस लोहे दे जलदे चक्कर गी अपने सिरै पर धारण करियै
 आखन लगा—मेरी इस जातना दे परभाव कन्ने संसार दे सारे
 पापी पाप थमां छुटी जान । जिन्ना चिर उंदा छुटकारा नेईं
 हुंदा इन्ना चिर ए चक्कर वशक्क मेरे सिरै पर चलदा रवै ।
 उदे ए आखने पर गासै चा फुल्ले दी बरखा होई । विमानें च
 बैठे दे देवतें उप्परा दा उदा साधुवाद कीता ते आक्खेआ जे
 तेरा सारा पाप नष्ट होई गोआ । तू फी अनंत सम्पत्ति दा
 स्वामी बनी जागा । इक पलै च उदे सिरै परा लोहे दा

चक्कर छपी गोआ । उससै बेल्लै इक विद्याधर उदे कोल आया । उसनै आइयै इन्द्र दे दित्तो दे अनमोल, मोती मानक इसी दित्तो ते गासै रस्तें उसी उदै घर धवलपुर पुजाई दित्ता । घर पुज्जियै चक्र नै सारी आपवीती अपने माता - पिता गी सुनाई । उदे माता - पिता, मित्तर - सरबंधी मते चिरै पिच्छूं उसी घर आए दे दिक्खियै वडै खुश होए ।

ए कथा सुनाइयै चंद्रस्वामी अपने पुत्तर महीपाल गी आखन लगा—पुत्तरा ! माता - पिता दा वरोध करने दा नेआ फल हुंदा ऐ । ते माता - पिता भगती ते सेवा करने करी मनुक्खै दी हर कामना सिद्ध होई जंदी ऐ । इस सरबंधै वी अऊं तुगी इक कथा सुनानां—

प्राचीन समै दी गल्ल ऐ इक बड़ा तपोधन मुनि कुसै तपोवनै च रौहूदा हा । इक दिन ओ कुसै रुक्खै थल्लै बैठा दा हा । उप्परा दा पक्खरू नै उदे पर विट्ठ कीती । मुनि नै गुस्से कन्ने उप्परै गी दिक्खेआ । दिखदे गै ओ पक्खरू स्वाह दा ढेर वनियै अगें आई पेआ । उसी मोए दा दिक्खियै मुनि गी हंकार होई गोआ । इक दिन ओ मुनि भिक्षा लेई कुसै ब्राह्मणै दे घर गोआ । उत्थें उसनै घर दी मालकन कोला भिक्षा मंगी । ओ आखन लगी—मुनि जी ! जरा ठैहरो अऊं पति दी सेवा करियै तुसेंगी भिक्षा दिन्नी आं । ए सुनियै मुनि नै क्रोध कन्ने उस ब्राह्मणी पासै दिक्खेआ । उसी गुस्से च दिक्खियै ब्राह्मणी मुसकराई ते मुनि गी बोली—वावा जी ! अऊं कोई रुक्खै आला पक्खरू नेई जे तुं दे दिक्खने करी भुत्रां डिग्गी पौड । मुनि हरान होइयै सोचन लगा ए ब्राह्मणी उस पक्खरू आली घटना गी क्रियां जानी गई ऐ । परंत पतिसेवा कोला फारग होइयै ब्राह्मणी मुनि गी भिक्षा देन आई । मुनि नै हत्थ जोड़ियै उस सती कोला पुच्छेआ—माता ! तुसैं रुक्खै दी चिड़ी आली घटना क्रियां जानी लेई । उसनै उत्तर दित्ता—पतिसेवा कोला परें मिगी होर धर्म नेई औंदा । उससै दे करनै कन्ने मिगी

परोक्ख (अक्खीं ओह्लै) दियां घटनां सामनै लब्बी जंदियां न ।
 इस भेद गी जे तुस होर शैल करियै जानना चांह्दे ओ तां
 इस नगरै दे वसनीक धर्मव्याध नां दे कसाई कोल जाओ ।
 उदे कन्ने मिलने करी तुंदा हंकार दूर होई जाग । ब्राह्मणी
 दे उपदेश गी सुनियै मुनि भिक्षा लेइयै अपनै थां चली गेआ ।
 दूयै दिन ओ धर्मव्याध कन्ने मिलन गेआ । धर्मव्याध अपनी
 हट्टी पर मास बेचै करदा हा । मुनि गी दिक्खदे सार गै
 ओ आखन लगा—भगवन् ! तुसेंगी मेरै कच्छ उस पतिव्रता
 ब्राह्मणी नै भेजेआ ऐ । ए सुनियै मुनि दंग रेई गेआ । पुच्छन
 लगा—म्हाराज ! तुस मास बेचदे ओ तुसेंगी ए ज्ञानबल
 कियां प्राप्त होआ ? धर्मव्याध बोलेआ—ए बल मिगी
 माता - पिता दी सेवा कोला प्राप्त होआ ऐ ।
 माता - पिता गै मेरे इक देवता न । अऊं होर कुसै
 देवता दी पूजा नेईं करदा । उनेंगी शनान कराइयै अऊं
 शनान करना, उनेंगी खलाइयै अऊं खन्नां ते उनेंगी
 स्वालियै अऊं सौनां । इस्सै करी मिगी ए दिव्व ज्ञान प्राप्त
 होआ ऐ । मास बेचना मेरी परंपरा दी जीवका ऐ । दूएँ दे
 मारे दे मिर्गे दा मास बेचियै अऊं अपनी जीवका कमानां ।
 अऊं ते मेरी पतिव्रता जनानी असें दोनै दे हंकार गी त्यागियै
 धर्म दे मार्ग पर चलो । ए करने करी तुंदे हिर्दे च
 असली ज्ञान दा डूर फुटग । धर्मव्याध दे उपदेश गी हिर्दे
 च धारण करियै ते उदी - जीवन चर्या गी दिक्खियै मुनि गो
 परम संदोख होआ ते ओ बनै गी चली गेआ । धर्मव्याध दे
 उपदेश पर चलियै मुनि सिद्ध दी पदवी गी प्राप्त करी गेआ ।
 माता - पिता दी भगती दे कारण धर्मव्याध ते उदी पतिव्रता
 जनानी गी बी परम सिद्धि प्राप्त होई गेई ।

ए कथा सुनाइयै चंद्रस्वामी अपने पुत्तर महीपाल गो
 आखन लगा जे माता - पिता दी भगती दी नेईं मैह्मा ऐ ।
 इसलेई तू जाइयै अपनी माता दी सुध लै । अपने धर्मपिता

अनंतस्वामी दी अनुमति लेइयै महीपाल पिता कन्ने माता दे मिलने लेई गेआ । महीपाल दी मां पति, पुत्तर दे वजोगै च पता नेईं इन्ता चिर कियां जींदी रेई । उंदे वजोगै च ओ सुक्कियै काह्ना होई गेदी ही । जिसेल्लै उसनै केई वरै दे वजोगै वाद इनैंगी घर आए दे दिक्खेआ तां खुशी कन्ने उदी अक्खीं दा अत्थरूणं दी धार छुटी पेई । पैह्लें ते उसी अपनी अक्खीं पर विश्वास नेईं आया जे ओ उदे पति ते पुत्तर न । पर उंदी जवानी उंदी सारी आपबीती कहानी सुनियै उसी जकीन आया । उदे आनंद दी सीमा नेईं रेई । उसनै भगवान दा लक्ख-लक्ख धन्नवाद कीता । पुत्तर महीपाल गो छाती कन्ने लाइयै उदी माता देवमति नै उसी अत्थरूणं दी धार कन्ने नल्हाई ओड़ेआ ।

उद्दर तारापुरै च महीपाल दी पतनो राजपुत्तरी बंधुमती जिसेल्लै सबैरै उट्ठी तां उसनै अपने पति गी उत्थें नेईं दिक्खेआ । खोज-पड़ताल करने पर वी जिसेल्लै ओ नेईं मिलेआ ते उसी गोआचे दे मते दिन बीती गो तां बंधुमती व्याकल होई उट्ठी । पति दे वजोगै च उसनै रोना ते वतोएँ आला लेखा डा-वडा बोलना शुरू करी दित्ता । जीने कोला मरनां चंगा समजन लगी । अनंतस्वामी मंत्री नै उसी समजाया जे तेरा पति कुसै खास कम्मै लेई वाह्र गेआ हा । हून आवै करदा होग । मंत्री दे दलासा देने पर राज-पुत्तरी गी किश तसल्ली होई । पति दा कुशल-मंगल जानने लेई ओ विदेशें कोला औंदे-जंदे जात्रिएँ गी पुछदी ते दीन-दुखिएँ गी दान दिदी ही । इक वारी संगमदत्त नां दा ब्राह्मण दान लैने लेई उदे कोल आया । बंधुमती नै उदे कोला पति दा समाचार पुच्छेआ । ओ आखन लगा—देवी ! तुंदा पति ते में कुतै नेईं दिक्खेआ पर तुसेंगी धीरज नेईं छोड़ना लोड़चदा । कई वार सरबंधिएँ दा मते चिरें वी मलाप हुंदा ऐ । इस परसगै च अऊं तुसेंगी इक वड़े चरज दी घटना सुनाना आं—

इक वारी तीर्थे दी जातरा करदा - करदा अऊं हिमालै
 च मान - सरोवर पुज्जा । सरोवरै अंदर में इक मणिमय मैह्ल
 दिक्खेआ । चानचक उस सरोवरै चा इक मनुक्ख हत्थे च
 तलवार लेदे निकलेआ । उदे संग मतिआं सारियां अपसरा बी
 हियां । उत्थे सरोवरै दे कंठे पर वने दे वागै च मधुपान
 करिये ओ अपसराएं कन्ने बिहार करन लगा । अऊं छप्पिये
 ए तमाशा दिक्खन लगा । उसै बेल्लै इक वांका गवरू कुसै
 पासेआ मेरे कोल आई निकलेआ । में उसी वागै च अपसराएं
 कन्ने बिहार करदा ओ मनुक्ख दस्सेआ जोड़ा किश चिर होआ
 सरोवरै चा निकलेआ हा । ओ वांका जोआन अपनी जोवन-
 कथा मिगी इस चाल्ली सुनान लगा :—

मेरा नां त्रिभुवन ऐ । अऊं पैह्लें त्रिभुवन ना दे नगगरै
 दा राजा हा । उत्थे इक पाशुपत साधु मता चिर मेरी सेवा
 करदा रेआ । उसनै इक वारी विल - खडग दी सिद्धि लेई
 मेरी मदत मंगी । में उसी मदत देने दा वचन दित्ता । किश
 दिन बीते तां ओ पाशुपत साधु मिगी अपने कन्ने जंगलै च
 लेई गेआ । उत्थे जाइयै रातीं हवन कीता । उत्थे इक बड़ा
 मोह्र जन लब्बन लग पेआ । साधु मिगी आखन लगा
 राजन् ! तू इस खोह दे अंदर वड़ी जा । अंदर जाइयै
 जिसेल्लै तुसेंगी खडग मिली जा तां तुसें मिगी बी अंदर
 सद्दी लैना । साधु दे आखने पर अऊं उस मोह्रै अंदर जाई
 वड़ेआ । अंदर जाइयै में इक विशाल मणि जड़त भवन
 दिक्खेआ । उसै बेल्लै उस मैह्लै चा इक असुर कन्या वाह्र
 आई । ओ मिगी मैह्लै अंदर लेई गई । उत्थे जाइयै उसनै
 मिगी इक दिब्ब खडग दित्ता । खडग देइयै ओ आखन लगी
 ए खडग सब सिद्धिएं दा देने आला ऐ ते इदे बल कन्ने
 मनुक्ख गासै च विचरण करी सकदा ऐ । इसलेई इस खडग
 गो वड़ी सावधानी कन्ने रक्खना । खडग गो हत्थे च लेइयै
 अऊं गुफा दे दरवाजे पर आया ते अपने कन्ने उस पाशुपत

साधु गी वी अंदर लेई आया जेड़ा गुफा दे बाहूर मिगी बलगै करदा हा । ओ साधु जिसेल्लै अंदर आई गेआ तां उस मैह्लै च इक असुरकन्या कन्ने अऊं रौहून लगी पेआ ते दूई कन्ने ओ साधु । इक वारी जदूँ अऊं मधुपान करियै मस्त पेदा हा तां उस साधु नै छलै कन्ने मेरा खडग अपने हथ्यै च लेई लेआ । खडग हथ्यै च लैने करी सारियां सिद्धियां उसी प्राप्त होई गेआ ? उसनै धक्के मारियै मिगी गुफा दे बाहूर कड्ढी दित्ता । मिगी बाहूर कड्ढियै आपूँ ओ नखडक दोनै असुर कन्याएं ते उंदी स्हेलडिण कन्ने रंगरलियां मनां-दा उस मैह्लै च रौहून लगी पेआ । पिच्छले वारां ब'रे गुफे च इस साधु गी तुपदे मिगी बीती गे । पर इसी कुतै नेई लव्वो सक्केआ । ए उयै दुराचारी धूर्त पाशुपत साधु मेरी असुरकन्या कन्ने बिहार करै करदा ऐ । जिसेल्लै राजा त्रिभुवन मिगी अपनी जीवन कथा सुना करदा हा तां ओ पाशुपत साधु मता शराब पीने करी गाढ़ी नींदरा च सेई गेआ । त्रिभुवन नै दोड़ियै उदी तलवार अपने हथ्यै च लेई लैई, जिदे करी फी सारियां सिद्धियां उसी प्राप्त होई गेइयां । ठुड्डा मारियै उसनै पाशुपत गी जगाया ते उदी खूप दुरदशा कीती । पर जानी कोला नेई मारेआ । परंत राजा त्रिभुवन स्हेलिण समेत असुरकन्या गी लेइयै असुरपुर दे अंदर प्रवेश करी गेआ । सिद्धिभ्रष्ट होने दे कारण ओ पाशुपत साधु पतत होई गेआ ।

ए कथा सुनाइयै संगमदत्त ब्राह्मण राजपुत्तरी बंधुमती गी आखन लगा ए सब किश अपनी अक्खीं कन्ने दिक्खियै अऊं तुंदे कोल आई गेआ आं । मेरा पूरा विश्वास ऐ जे तुंदा पति कन्ने संगम तौले गै होने आला ऐ । जियां राजा त्रिभुवन दा अपनी प्रेमिका असुरकन्या कन्ने होआ ।

ब्राह्मणै दे मुंहा हौसला देने आले वचन सुनियै राज-पुत्तरी बंधुमती दा धीरज होर वी बधेआ । उसनै मुगता धन

देइयै ब्राह्मणै गी विदा कीता । दूयै दिन इक होर परदेसी ब्राह्मण राजपुत्तरी कोल आया । राजपुत्तरी नै उदे कोला बी अपने पति दा समाचार पुच्छेआ । ब्राह्मण आखन लगा—देवी ! में तुं दे पति गी कुतै नेईं दिक्खेआ पर मेरा पूरा विश्वास ऐ जे तुं दा तौले गै पति कन्ने संगम होने आला ऐ । चिर बजोगिएं दा कदें नां कदें जरूर मलाप हुंदा ऐ इस परसंगै च अऊं तुसेंगी निषध दे राजा नल दी कथा सुनानां—

प्राचीन समै निषध देश च नल राजा राज करदा हा । संसारै च नेआ सुंदर दूआ राजा नेईं हा । उदे रूप गी दिक्खियै कामदेव बी ऊरमा दा मारे दा शंकर दी नेत्राग्नि च जली मोआ । राजा नल नै सुनेआ जे विदर्भ देश दे राजा भीम दी पुत्तरी दमयंती परम रूपवती ते गुण शीलवती ऐ । राजा भीम नै अपनी पुत्तारी लेईं वर दी मती खोज - पड़ताल कीती । पर राजा नल कोला चंगा होर कोई वर उसी नेईं मिलेआ । इक दिन दमयंती अपने नगर इक सरोवरै च शनान करै करदी ही । शनान करदे - करदे उसने इक राजहंस गी सरोवरै च जलक्रीड़ा करदे दिक्खेआ । दमयंती नै चुप्प - चवीते उदे कोल जाइयै अपना दबट्टा सुट्टियै उसी पगड़ी लेआ । राजहंस दमयंती गी आखन लगा—राजपुत्तरी ! तूं मिगी छोड़ी दे । अऊं तेरै कम्म औड । नल नां दा निषध देश दा राजा ऐ जिसी पाने लेईं अपसरां बी तरसदियां न । तूं उदी भारजा होने जोग ऐ । ते ओ तेरा पति होने जोग ऐ । तुंदा दोनों दा इक दूए कन्ने नाता जोड़ने लेईं अऊं दूत दा कम्म करड । उदी गल्ल सुनियै ते उसी दिब्ब हंस समजियै दमयंती नै उसी छोड़ी दित्ता । कन्ने ओ हंस गी गी आखन लगी—हंसें दे राजा ! तेरा वचन सुनियै में संकल्प करी लेआ ऐ जे नल दे बिना अऊं कुसै होर मर्दे कन्ने ब्याहू नेईं करड । में उंदे रूप ते गुणों दी बाबत जे किश सुनेआ ऐ ओ सुनियै मेरा मन उंदे प्रेम - जालै च फसी गेआ ऐ ।

ओ राजहंस विदर्भ देश थमां उड्डेआ ते निषध देश च
 आइयै इस्सै सरोवरै च विहार करन लगा—जित्थें राजा नल
 शनान करै करदा हा । राजहंस गी इन्ना सुंदर दिक्खियै राजा
 नल नै लुकलुकी कन्ने अपना दबट्टा सुट्टियै उसी पगड़ी
 लेआ । हंस नल गी आक्खन लगा—म्हाराज ! मिगी छोड़ी
 देओ । अऊं कम्मै लेई गै इत्थें आयां । जेड़ी गल्ल अऊं आक्खना,
 ओ तुस ध्यान लाइयै सुनो । विदर्भ देश दे राजा भीम दी पुत्तरी
 दमयंती रूप, गुण ते शील च संसार दिए सारियें राजपुत्रियें
 चा श्रेष्ठ ऐ । देवता वी उसी वरना चाह्दे न, मनुक्खें दा
 ते केह् आक्खना । उदे अगें जिसेल्लै में तुं दे गुणें दी चर्चा
 कीती तां उसने तुसेंगी पति रूप कन्ने बरी लेआ । ए खबर
 देने लेई अऊं तुं दे कोल आया आं । राजहंस दे वचनें गी
 सुनियै राजा नल दमयंती दे प्रेम च अपने - आप दी सुध - बुध
 गुअई बैठा । किश चिरै वाद उदा मन ठकाने आया ते ओ हंस
 गी आक्खन लगा—पक्षिराज ! अऊं धन्न आं जे उस दिव्व
 राजपुत्तरी ने मिगी बरेआ ऐ । ए आक्खियै नल ने हंस गी छोड़ी
 दित्ता । हंस उत्थूं उड्डियै फी विदर्भ देश पुज्जा । उदी राजा
 नल कन्ने जड़ी गल्ल, वात होई ही, ओ सारी उसने दमयंती
 गी सुनाई । दमयंती दे मनै च नल गी पतिरूप कन्ने प्राप्त
 करने दी इच्छा ठाठां मारन लगी, उसने अपनी माता दी जवानी
 पिता गी आक्खेआ जे उदे लेई स्वयंवर रचेआ जा ते सबनें देसैं
 दे राजकुमारें गी स्वयंवरै च औने लेई साद्दा भेजेआ जा । उदे
 पिता राजा भीम ने सारें राजकुमारें गी स्वयंवरै च औने दा
 साद्दा भेजेआ । स्वयंवर दा दिन मकरं होई गेआ । साद्दा पाइयै
 सबनें देसे दे राजकुमार विदर्य देसैं दी राजधानी कुंडिनपुर
 गी चली पे । राजा नल वी रथै पर सोआर होइयै कुंडनपरै
 गी चली पेआ । इंद्र ते बाकी लोकपालें देवर्षि नारद दे मुंहा दा
 दमयंती दे स्वयंवर दी खबर सुनी ते उनेंगी इस गल्लै
 दा पता वी लगा जे दमयंती राजा नल गी चाह्दो ऐ ।
 ए खबर सुनियै इंद्र वायु, यम, अग्नि ते वरुण पंजै लोक - पाल

आपूँ - चें सलाह् करियै विदर्भ देस गी जंदे राजा नल गी
 रस्ते च मिले । नल ने उंदा बड़ा स्वागत कीता ते औने दा
 कारण पूछेआ । लोकपाल आक्खन लगे जे तुस साढ़े बल्ला
 दमयंती कोल जाओ ते उसी आक्खो जे ओ साढ़े पंजें लोक-
 पाले चा कुसै इक्क गी वरी लै । नल मनुक्ख ऐ उसी वरियै
 उसी केह् लाभ होग । मनुक्ख नाशवान ते मरणधर्म हुंदे न ।
 अस देवता अमर आं । साढ़े वर कन्ने दमयंती दे मैह्लै च
 परवेश करदे तुगी कोई नेईं दिक्खी सकग । राजा नल ने
 लोकपालें दी आसा दा पालन कीता । विदर्भ देस दो राजधानी
 पुज्जियै ओ दमयंती दे मैह्लें च अलख प्रवेश करी गेआ ।
 दमयंती दे सामने जाइयै उसने लोकपालें दा सनेहा उसी दित्ता ।
 नल दे सनेहे गी सुनियै दमयंती उसी आक्खन लगी—देवता
 भामें कनेह् बी होन पर नल गी पतिरूप कन्ने प्रापत करने
 दा मेरा निश्चा अटल ऐ । देवतें कन्ने मेरा कोई कम्म
 नेईं । दमयंती दे इस प्रण गी सुनियै नल ने अपने - आप गी
 उदै सामने प्रगट करी दित्ता । राज - मैह्लै चा निकलियै नल
 लोकपालें कोल आया । उसने ओ सारी गल्ल - वात उनें
 गी दरसी, जेड़ी दमयंती ने उदे कन्ने कीती ही । लोक-पाल
 राजा, नल गी आक्खन लगे—अस तेरे सच बोलने पर परसन्न
 आं । अस तेरे वशै च आं । जद्दू तूँ असेंगी जाद करगा
 अस तेरै सामने परतक्ख होई जागे । नल दे चली जाने पर
 लोकपालें दमयंती गी छलने दी योजना बनाई । स्वयंवरै दे मंडपै च
 पंजै लोकपाल राजा नल दा रूप धारण करियै नल कोल जाइयै
 बेई गे । जद्दू मंडपै च सारे राजा अपने - अपने आसनें पर
 बेई गे तां दमयंती ने अपने भ्रा कन्ने मंडपै च परवेश कीता ।
 भ्रा हर इक्क राजा दे नां ते गुणें दा वर्णन करदा दमयंती
 कन्ने चलै करा हा । दमयंती ने सवनें राजें गी इक्क - इक्क
 करियै दिक्खेआ पर उसने कुसै गी वरमाला दे जोग नेईं
 समजेआ । अखीर ओ उत्थें आई जित्थें राजा नल ते नल दा
 रूप धारण करियै पंज लोक - पाल बैठेदे हे । इनें छें मनुक्खें

दी इक्क समान शकल दिक्खियै दमयंती शशो - पंज च पेई
 गेई । उसी पता नेई लगा जे इंदे च निषधराज नल केड़ा ऐ ।
 सोचन लगी जे मिगी छलने लेई पंजें लोकपालें अवश ए माया
 रची दी ऐ । ए सोचियै उसने सूरजदेव पासै मुंह कीता ते
 आखेआ—हे लोकपालो ! राजा नल दे बिना पर - पुरुष जे
 मिगी कदें सुखने च बी नेई आया तां तुस मिगी अपना असली
 रूप दस्सो । उसी में पैहलें गै मन च बरी लेदा ऐ । उदे बिना
 मेरे लेई बाकी सब पराए मर्द न । ते उदे लेई अऊं पराई जनानी
 आं । इसलेई तुस देवता होइयै बी किस मोह् जालै च पेदेओ ।
 ए सुनियै पंजें लोकपालें मानुशी रूप त्यागियै अपने दिव्व रूप
 धारण करी ले । छड़ा राजा नल गै अपने मानुशी रूप च लब्बन
 लगी पेआ । उसै बेल्लै दमयंती ने प्रेम कन्ने वरमाला उदे गलै च
 पाई दित्ती । गासै चा देवतें फुल्लें दी वरखा कीती । राजा भीम
 ने अपनी पुत्तरी दमयंती दा व्याह् शास्तर विधि अनुसार राजा
 नल कन्ने करी दित्ता । आए दे राजें दा जथाजोग सत्कार
 करियै राजा ने उनें गी बिदा कीता । पंजें लोकपालें जंदे-
 जंदे रस्ते च कलि ते द्वापर दिक्खे । ए जानियै जे ओ दमयंती दे
 स्वयंवरै च शामिल होने लेई जा करदे न । लोकपालें उनें गी
 उत्थें जाने थमां रोकेआ । उनें कलि ते द्वापर गी आखेआ
 जे दमयंती ने राजा नल गी बरी लेआ ऐ । हून तुस उत्थें जाइयै
 केह् करगेओ । ए सुनियै ओ गुस्से कन्ने आखन लगे जे तुसें
 लोकपालें गी छोड़ियै दमयंती ने जेड़ा नल मनुक्खै गी बरेआ ऐ
 इस अपमाने दा अस जरूर बदला लैगे । ए परतिज्ञा करियै ओ
 परतोइयै अपने - अपने घरें गी चली गे । सत्त दिन सोह्रै रेइयै
 राजा नल दमयंती समेत निषध देश गी वापस आई गेआ । दौनें
 दा आपू-चें अगाध प्रेम होई गेआ । जियां विधाता ने दौं
 शरीरें च इक प्राण पाए दे हे ।

व्याह् होए दे किश व'रे बीती गे । समां औने पर दमयंती
 ने पैहली प्रसूति च पुत्तर ते दूई च पुत्तरी गी जनम दित्ता ।
 माता - पिता ने पुत्तर दा नां चंद्रसेन ते पुत्तरी दा नां इंद्रसेना

रक्खेआ । कलि ने जेड़ी परतिज्ञा कीती दी ही उसी पुरा करने
 लेई ओ इस तक्का च हा जे राजा नल कोला कदे कोई खुंज
 होई तां अऊं अपना बदला लें । इक्क वारी दी गल्ल ऐ जे
 नल बिना संध्या कीते वगैर पैर धोते मधुपान करियै उसै
 मस्ती च सेई रेआ । कलि गी नल दे शरीरै च परवेश करने
 दा शैल मौका मिलेआ । जिसेल्लै राजा नल दे शरीरै च
 कलि नै परवेश करी लेआ तां राजा धर्म दा रस्ता छोड़ियै
 मनमानियां गल्लां करन लगी पेआ । उसनै जुआ खेड़ना,
 दासिये कन्ने रमण करना ते भूठ बोलना शुरू करो दित्ता ।
 उसी दिनें सौने ते रातीं जागने दो इल्लत बी पेई गेई ।
 बिना कारण दे क्रोध करना, पाप कन्ने धन कमाना, भले
 लोकें दा अपमान करना उदा सुभा वनी गेआ । कलि नै
 नल राजा दे शरीरै च परवेश करियै उसी धर्मभ्रष्ट करी
 दित्ता । उदे साथी द्वापर नै इयै कम्म नल दे भ्रा पुष्करै दे
 शरीरै च परवेश करियै कीता । इक दिन नल नै अपने भ्रा
 पुष्कर दे घर इक सुंदर चिट्ठा बैल दिक्खेआ उसनै भ्रा
 कछा ओ बैल मंगेआ । द्वापर नै पुष्कर दे दमागै गी वगाड़ी
 ओड़े दा हा । उसनै अपने वड्डे भ्रा दी मंगा गी ठुकराई
 ओड़ेआ । पुष्कर नल गी आखन लगा जे तुगी बैल इन्ना नै
 प्यारा ऐ तां तूं इसी मेरे कोला जुए च जित्ती लै इयां ते
 अऊं इसी नेई दिंदा । नल नै जुआ खेड़ना मन्ती लेआ ।
 दोए भ्रा जुआ खेड़न लगी पे । नल नै जुए च सब किश
 हारी ओड़ेआ । राजा गी हारदे दिक्खियै दमयंती नै अपने
 दोए ज्याने रथै पर वठाइयै नानकै भेजी ओड़े । पुष्कर नल गी
 आखन लगा—हून तूं सारा राज-पाठ हारी बैठा ऐं, हून दमयंती
 गी दाऽ पर ला । नल गी निक्के भ्रा दी व्यंगभरी गल्ल सुनियै
 वडा क्रोध उछली आया पर चुप रेआ । पुष्कर ने राजपाठ जित्तियै
 दमयंती समेत नल गी राज कोला बाहर कड्डी लाया ।
 नल थां-थां ठोकरां खंदा नेक कष्ट स्हारदा दमयंती कन्ने
 दीन अनाथ आंगर खज्जल होन लगा इक दिन भुक्खा त्रेहाया

ओ इक वनै च दाखल होआ । उसनै दौं हंसै गी सरोवरै दे कंठै दिक्खेआ । उनेंगी पगड़ने लेईं उसनै अपनी चादर सुट्टी पर ओ उस चादरा गी लेइयै उड़डी गे । ए हंस नेई हे कलि ते द्वापर हे । नल दे कोल छड़ा इक वस्तर रेई गेआ । उसी बड़ा वसोस लगा । ओ दमयंती गी आखन लगा—
 प्रिये ए रस्ता तेरे पिता दे देश विदर्भ गी जंदा ऐ, ते ए दूआ रस्ता अंग देश गी ते त्रीया कोशल देश गी जंदा ऐ । दमयंती दे मनै खतोला होआ जे पतिदेव मिगी विदर्भ दा रस्ता की दस्सै करदे न । मलूम हुंदा ऐ जे ए मिगी त्यागना चाहूं दे न । रातीं दोनै कंदमूल खाइयै जलपान कीता । थकेमें दे कारण दमयंती गी तौले गै नींदर आई गेई । पर नल चिता च डुब्बा दा भाग्यचक्र दी गति पर चरज करै करदा हा । उसी नींदर कुत्थें । चानचक उदे मनै च वोआल उट्ठेआ । उसनै दमयंती दी अही साढ़ी पाड़ियै अपना नंगा शरीर ढक्केआ ते उस न्हेरी, गुप्प राता च दमयंती गी अनाथ छोड़ियै इक पासे दा रस्ता पगड़ी लेआ । शरीरै च बैठे दे कलि नै उदी बुद्धि - भ्रिष्ट करी ओड़ी दी ही इससै लेई ए सब किश होयै करदा हा ।

सबेरै जियेले दमयंती दी नींदर खुल्ली तां उसनै चतरफी नजर दुड़ाई पर अपने पति गी कुतै नेई पाया । ओ रोन लगी पेई । ओ पति दे गुणें ते प्रेम दा सिमरन करियै विलाप करन लगी । पति दी कुशलता ते सुरक्षा लेई ओ लोकपालें अगें विनती करन लगी । रोंदी विल - विलांदी पति दे दस्से दे रस्ते पर अपने पिता दे देस गी चली पेई । वन परवत - नदिएं गी पार करदी नेक मसीवतें गी स्हारदी ओ नडर दिल कन्ने विदर्भ देस दे रस्ते पर अगें गै अगें वधदी गेई । उदा सती धर्म भगवान कृष्ण दे सुदर्शनचक्र आंगर उदी रक्षा करै करदा हा । रस्ते च जंगलै च कुसै व्याधे ने उसी पाप दृष्टि कन्ने दिक्खेआ पर ओ उत्थें गै भस्म दा ढेर होई गेआ । प्रभु दी मरजी उस रस्ते पर पिच्छूं दा इक

वपारिये दा सरदार काफले कन्ने आवै करदा हा । दमयंती गी दिक्खियै उसी बड़ा तरस आया । उसी अपनी धी समजियै सरदार नै दमयंती गी राजा सुवाहु दे नगगरै च पुजाई ओड़ेआ । इत्थें राजा सुवाहु दी पुत्तरी नै दमयंती दा अलौकिक शलैप्पा दिक्खियै उसी अपने कोल रक्खेआ । फी उसनै उसी अपनी माता दे सपुर्द करी दित्ता । जिसेल्लै उसी ए सोआल पुच्छेआ जा जे तुंदा पति कुत्थें ऐ तां दमयंती उदा ए जवाव देयै जे मेरा पति मिगी त्यागी गेदा ऐ ।

दमयंती दे पिता राजा भीम गी जदू नल दे राज्यभ्रष्ट होने ते देस - नकाले दा पता लग्गा तां उसनै उदा पता करने लेई चक्खी अपने दूत भेजे । इंदे च इक दूत दा नां सुवाहु हा । ओ खोज करदा - करदा ब्राह्मणै दे भेसै च राजा सुवाहु दी नगरी च आई निकलेआ । उत्थें उसनै दमयंती गी दिक्खेआ । दोए इक दूएगी पशानी गे ते दोए रोन लगी पे । राजा सुवाहु दी रानी गी जिसेल्लै सुवाहु दूत दी जवानी पता लग्गा जे ए दमयंती ऐ तां उसनै लाड कन्ने दमयंती दे सिरै पर हत्थ फेरआ । दमयंती राजा दी भनू दी धी ही । रानी दे आखने पर राजा नै अपने राज-कीय रथे पर बठाइयै बड़े सम्मान ते सपाइयें दी सुरक्षा च दमयंतो गी उदे पिता दे घर भेजी दित्ता । दमयंती जिसेल्लै अपने प्यौकै पुज्जी तां उदे पिता नै राजा नल दी खोजा च चोनें दिशाए च अपने गुप्तचर ते दूत दड़ाई दित्ते । राजा भीम नै गुप्तचरें ते दूतें गी आखेआ जे जित्थें कुतै तुसेंगी कुसै दे नल होने दा शक्क पवै तां तुसैं ए श्लोक पढ़ना एहू आखियें उसने कागदै पर लिखे दा श्लोक उनेंगी पकड़ाया ।

इदर दमयंती गो त्यागियै राजा नल न्हेरी गुप्त राती च नेक संकटें गी स्हारदा अन्हें—बाह अगें चलदा गेआ । अगें जाइयै उसनै दिक्खेआ जे भयंकर दावानल कन्ने जंगल धकधक जलै करदा ऐ । उदे चा चानचक वाज आई जे ओ शूरवीरा ! जिन्ना चिर अऊं जलियै भसम नेईं होई जंदा मिगी जलने कोला वचा । मेरे प्राणें दी रक्षा कर । राजा नल नै जदू उदर नजर

दुड़ाई जिहूरा दा बाज आवै करदी ही तां उसनै इक भारी
 नाग गी अग्गी दी लपेटा च दिक्खेआ । नल नै दौड़ियै उसी
 अग्गी दी लपेटा चा बाहूर आंदा । जदू नल नाग गी धरती
 पर छोड़न लगा तां वड़ी विनती ते मिन्नता कन्ने नल गी आखन
 लगा—म्हाराज ! मिगी इत्थै मत छोड़ो । मिगी इस थां कोला
 दस कदम अग्गी दे सेका कोला दूर अगों चलिअै छोड़ो । नल
 नागै गी सिरै पर चुक्कियै कदम गिनदा - गिनदा अग्गा कोला
 दूर जान लगा । जिसेल्लै राजा नै दसमां कदम गिनेआ तां
 नाग मै राजा नल दे मत्थे पर डंग मारेआ । जिदे करी ततकाल
 राजा दा शरीर श्यामवर्ण, ठिगना ते कुरूप होई गोआ ।
 राजा नै नाग गी सिरै परा तोआरियै भुंजा रक्खेआ ते आखेआ—
 भलेआ लोका ! में तुगी मरदे गी अग्गी दी ज्वाला चा कडिदियै
 वचाया ते तू मिगी इस उपकार दा बदला दित्ता ऐ ।
 नाग आखन लगा—अऊं कर्कोट नां दा नागराज आं । में डंग
 मारियै तेरा भला गै कीता ऐ बुरा नेई । मेरे डंगने करी
 तेरा शरीर काला ते कुरूप होई गोआ ऐ । गुप्तवाम च रूप
 ते रंग दे बदलने करी तुगी कोई पशानी नेई सककग । इदे
 करी तेरा कल्याण होग । ए आखियै नागराज नै नल गी दो
 वस्तर दित्ते ते आखेआ जे इनें वस्तरें दा नां अग्निशौच
 ऐ । इनें वस्तरें गी तुसें सम्हालियै रखना । जिसेल्लै तुस
 इनें वस्तरें गी धारण करंगेओ तां तूदे शरीरै दा रंग पैह्लें
 आला लेखा सुन्दर होई जाग । ए आखियै ते वस्तरें दा
 जोड़ा राजा नल गी देइयै नागराज कर्कोट छपी गोआ । वस्तर
 लेइयै नल चलदा - चलदा कोशल देश पुज्जा । उत्थें नल नै
 राजा ऋतुपर्ण दं मैह्लें च रसोइए दी नौकरी करी लेई ।
 ओ षडरस भोजन बनाने च नेआ स्याना हा जे थोड़े समै
 च गै ओ राजा ऋतुपर्ण दा कृपापात्र बनी गोआ । नल जनेआ
 स्याना स्यान हा उयै नेआ अद्वितीय सारथी वी हा । इक
 वारी विदर्भ देश दं राजा भीम दे गुप्तचरें चा इक गुप्तचर
 राजा ऋतुपर्ण नगरी च आया । उसी शकक होआ जे होई

सकदा ऐ राजा नल इत्थें गै होयै । ए सोचियै उसनै राजा दे मैह्लें च जाइयै अपने स्वामी दा दस्से दा श्लोक पढ़ेआ ।

उदे इस श्लोक गी सुनियै राजा ऋतुपर्ण दे बाकी नौकरें उस गुप्तचर दा मखौल डोआया पर स्यान दे रूप च बदले दे राजा नल नै इदे जवाब च इक दोहा पढ़ेआ ।

दोहे गी सुनियै ते स्यानै गी भेस बदले दे राजा नल समजियै ओ गुप्तचर ए खबर देने लेई विदर्भ देस गी परतोई गेआ । जिसेल्लै दमयंती गी इस गल्ला दा पता लगा तां ओ अपने पिता राजा भीम गी आखन लगी पिता जी मेरा तन गोआई दिंदा ऐ जे स्यानै दे भेस च ओ जरूर मेरे पतिदेव गै न । इस लेई उनेंगी इत्थें आनते लेई अऊं तुसेंगी इक जुगती दस्सनी आं, तुस उदे मतावक चलो । तुस दूनै जवानी राजा ऋतुपर्ण गी सनेआ भेजो जे मतै चिरै थथां राजा नल दा किश पता नेईं लगै करदा इसलेई अस अपनी पुत्तरी दमयंती दा फी स्वयंवर रचै करनेआं । तुस अज्ज गै विदर्भ देश गी आई जाओ । इस सनेहे गी सुनियै राजा ऋतुपर्ण मेरे पतिदेव गी अपना सारथी बनाइयै इक्कै दिनै च विदर्भ देश उठी औग । दमयंती दे आक्खने पर उदे पिता राजा भीम ने उयै सनेहा देइयै अपना दुत राजा ऋतुपर्ण कच्छ भेजेआ । राजा ऋतुपर्ण गी जिसल्लै ए सनेआ मिलेआ तां उदे हिदै च दमयंती गी पाने दी लालसा इक्क वारी फी जागी उट्ठी । ओ नल गी सहियै बोलेआ—की भई स्याना ! तूं आक्खदा हा जे मिगी रथ चलाने दी कला बी औंदी ऐ अज्ज उदी परखा दा समां ऐ । तूं असेंगी अज्ज गै विदर्भ देश पुजा । जे तूं इस कम्मै च सफल निकलेआ तां अस तां मनगे जे तूं इस कला दा बी स्याना ऐ । नल ने सोचेआ जे दमयंती ते नेईं पतिव्रता ऐ जे ओ कदै बी दूए स्वयंवरै दा नां नेईं लेई सकदी । ए पखंड खवरै उसने मेरे सहने लेई रचेआ ऐ । अज्ज अऊं उत्थै चलियै दिक्खनां जे असली मामला केहू ऐ । ए सोचियै ओ


रथ तयार करियै राजा ऋतुपर्ण कोल लेई आया । राजा दा
 रथ पर बौहना हा जे रथ वायुवेग कन्ने विदर्भ दा रस्ता
 पौन लगी पेआ । रस्ते च राजा दा वस्तर रथ परा डिग्गी
 पेआ । ओ करलाया जे रथ रोक मेरा वस्तर डिग्गी पेआ ऐ ।
 नल राजा ऋतुपर्ण गी आक्खन लगा म्हाराज ! रथ रोकने
 करी केहू लाभ । रथ इन्ने वेग कन्ने चलै करदा ऐ जे
 तुंदा वस्तर केई मील पिच्छे रेई गेआ ऐ । राजा ऋतुपर्ण
 चकत होए दा बोलेआ—मित्तरा ! रथ चलाने दी अद्भुत
 कला तू मिंगी सिखा । इदे बदलै अऊं तुगी पासा सुट्टने दी
 कला सखाड । इस अक्षज्ञान कला कारण पासा तेरे वशै च
 आई जाग । तू संख्याज्ञान गिनती च उस्ताद होई जागा ।
 तेरे सामने जेहूडा रुक्ख ऐ उदे पर पत्रा जहार पत्तर लग्गे दे न ।
 जे तुगी विश्वास नेई तां वशक गिनियै मेरे सच दी परख
 करी लै । नल ने जिसेल्लै पत्तर गिने तां सचमुच उन्ने गै निकले
 जिन्ने राजा ऋतुपर्ण ने आक्खे हे । परंत नल ने राजा ऋतुपर्ण
 गी रथज्ञान दित्ता ते ऋतुपर्ण ने उसी अक्षज्ञान दित्ता ।
 उसै बेल्लै नल दे शरीरै चा इक्क काला मनुक्ख निकलेआ ।
 नल दे पुच्छने पर जे तू कुन ए ओ बोलेआ—अऊं कलि
 आं । जदू दमयंती ने तुसंगी वरेआ हा तां में बदला लैने लेई
 तुंदे शरीरै च दाखल होआ हा । तुंदे शरीरै च मेरे प्रवेश
 करने करी तुंदी मत्त मारी गई तुस जुए च सारा राजपाट
 हारियै कंगाल होई गे । कर्कोट नाग ने जिसेल्लै तुसगी डंगेआ,
 तां उस डंगै दा सारा असर मेरे पर पेआ । दिक्खो मेरी
 केहू दशा होई गई ऐ । ए आक्खियै कलि अदृश होई गेआ
 नल दे शरीरा दा जिसेल्लै कलि निकली गेआ तां राजा नल
 पेह्लें आंगर धर्मी ते सदाचारी होई गेआ । नल ने राजा
 ऋतुपर्ण गी उसै दिन विदर्भ देश पुजाई ओड़ैआ । जिसल्लै
 लोकें राजा ऋतुपर्ण गी उत्थै औने दा कारण पुच्छेआ तां
 ओ बोलेआ—में दमयंती दे दूए स्वयंवर पर आयां आं । सारे
 लोक हस्सन लगे । उत्थे स्वयंवर दा कुसै गी पता गै नेई
 हा । दमयंती ने राजा ऋतुपर्ण दे रथ दी गरज सुनो तां

समजी गेई जे इदा चलाने वाला उदा पति गै होई सकदा
 ऐ । ओ मनै च बडी परसन्न होई । उसनै अपनी दासी गी
 पता करने लेई भेजेआ । किश चिरै वाद दासी आइयै दमयंती
 गी आक्खन लगी—देवी जी ! कोशल देश दा राजा ऋतुपर्ण
 तुं दे दूए स्वयंवर दी भूठी खबर सुनियै इक्कै दिन दी जातरा
 परंत इत्थें आई पुज्जा ऐ । इदा सारथी हुच्छिएं बाह्में आला
 कोई काला कलूटा मनुक्ख ऐ । पर ओ कोई चमतकारी शक्ति
 दा मनुक्खें ऐ । उदे आटे चा अपने - आप पानी निकली आया ते
 लक्कड़ियें च बिना अग्न सुलगाने दे अपने - आप अग्न भड़की
 उट्ठी । इक्क छिनै च उसने भांति - भांति दे शङ्कर भोजन
 तयार करी लेन । ए चरज दिक्खियै अऊं इत्थें आई गेई आं ।
 दासी दे मूहा दा ए खबर सुनियै दमयंती गी निश्चै होई गेआ
 जे ए सारथी उदा पति गै ऐ । अग्नि ते वरूण देवता उनें
 सिद्ध कीते दे न ते रथ चलाने दी कला च उं दे मकावले दा
 दुनियां च कोई दूआ नेई । कुसै कारण - वश उंदा शरीर करूप
 होई गेआ ऐ । ए सोचियै दमयंती ने अपने दोए ब्रच्चे दासी
 कन्ने उत्थें भेजे जित्थें ऋतुपर्ण दा सारथी उतरेदा हा । नल
 ने दिक्खदे सार गै दोनें ज्याने गी अपनी गोदा च बठाई लेआ ।
 उनेंगी दिक्खियै उदे नेत्रें चा अथरूएं दी धार चली पेई, पर
 ओ चुप रेआ । दो दासी गी आक्खन लगा मेरे वी नेह्, गै दो
 ज्याने हे । दासी ज्यानें गी लेइयै मैह्लै गी परतोई गेई ।
 उसने सारी गल्ल - वात दमयंती गी दस्सी । उंदा निश्चै होर वी
 पक्का होई गेआ जे ओ सारथी उदा पति गै ऐ । दूऐ रोज
 दमयंती ने दासी दी जवानी ऋतुपर्ण दे सारथी गी आक्खी भेजेआ
 जे तुं दे बराबर कोई दूआ स्यान नेई । इसलेई तुम साढ़ी रसोई
 च आइयै अपनी कजा दा प्रदर्शन करो । दासी ने जाइयै
 दमयंती दा सनेआ नल गी दित्ता । राजा ऋतुपर्ण दी आज्ञा
 लेइयै नल दमयंती कोल गेआ । दमयंती ने उसी नकेवलै पुच्छेआ
 जे तुस नल ओ तां मिगी सच्च - सच्च दस्सी देओ, जिसकरी अऊं
 दुक्ख दे समुंदरै च गोते खंदी इस संकटै दा पार पाई सककां ।

दमयंती दे प्रश्न गी सुनियै नल दे हिंदै च इक्को वारी प्रेम खुशी, दुख, लज्जा दे भिन्न-भिन्न भावें दी इक्क लैहूर उठ्ठी । उछलदे कलेजे गी थम्मियै ते शरमा कन्ने मुंह नींदा करियै ओ आखन लगा-प्रिये ! अऊं ऐं पापी नल आं । जिसने अपने कुकर्म करी तुगी कठोर नारकी जातना भुगताई ऐ । दमयंती बोली जे ए गल्ल ऐ तां तुंदा शरीर नेआ करूप की होई गेआ । नल ने दमयंती गी दावन्नल ते कर्कोट नागराज वाली ओ सारी घटनां सुनाई कियां उदा सुंदर रूप विगड़ियै करूप होई गेआ हा । फी उसने नागराज दे दित्ते दे वस्तर पाइयै पैह्ला सुंदर रूप च दिक्खियै दमयंती गी हिरखै दे सरकंडे उव्वरी आए । विदर्भ राज भीम ते उदी रानी गी जिसेल्लै इस अनहोनी गल्ला दा पता लग्गा तां ओ दौड़दे-दौड़दे उत्थें आई गे । उन्हें बड़ा उत्सव मनाया । राजा ऋतुपर्ण दा जथा-जोग सत्कार करियै राजा भीम ने उसी उदे देस कोशल गी विदा करी दित्ता । किश दिन सौहूरै रेइयै राजा नल दमयंती ते दोनै ज्याने समेत निशध देश गी परतोई आया । पुष्कर दे शरीर थमां द्वापर दे निकली जाने करी हून ओ वी धार्मिक ते सदाचारी होई गेदा हा । उसने अपने बड़्डे भ्रा नल दा बड़ा सत्कार कीत्ता ते उदा राजपाट उसी परताइयै आपू सुरखरू होई गेआ । राजा नल वी अपनी पतिव्रता पतनी दमयंती कन्ने अखंड राजसुख भोगन लगा ।

ए कथा सुनाइयै सुमना राजपुत्तरी बंधुमती गी आखन लगा जे दमयंती आंगर तुंदा वी तौले गे पति कन्ने मेल होग । बंधुमती ने मुगता धन देइयै सुमना गी विदा कीता । धीरज दा आसरा लेइयै ओ पति दे औने दी डीका च दिन कट्टन लगी । किश समां बीतेआ तां बंधुमती दा पति माता-समेत घरै गी परतोआ । अपने माता-पिता, स्त्री-पुत्तर आदि परिवारै कन्ने राज-मुख भोगदा महीपाल परम सुखै दा जीवन बतीत करन लगा ।

मरुभूति मंत्री दे मुंहा दा ए विचित्र कथा सुनियै युवराज नरवाहनदत्त ते युवरानी अलंकारवती दा बड़ा मनो-रंजन होआ ।





Published by the Secretary on behalf of
J&K Academy of Art, Culture & Languages, Jammu.
& Printed at S. N. Magotra Printing Press, Jammu